

PL
2534
1K8
V.20

元詩選辛集目錄

鐵崖先生楊維禎三百六十七首

可閑老人張昱一百九十五首

雲林先生倪瓚一百六十二首

靜思先生郭鈺一百七十九首

周處士霆震七十二首

最閑園丁王逢二百九首

雲顥天民葉顥七十五首


曲江老人錢惟善七十首

華布衣幼武三十首

丁孝子鶴年一百九首

附元帥吉雅謨丁七首

應奉愛理沙三首



吳惟善三首

玉山主人顧瑛一百五十二首

元詩選辛集

鐵崖先生楊維禎

維禎字廉夫會稽人登泰定丁卯進士署天台尹改錢清場鹽司令遷江西等處儒學提舉會兵亂避地富春山徙錢塘張士誠招之不往又忤達識丞相自蘇徙松江明洪武二年召修禮樂書維禎謝曰豈有八十歲老婦就木不遠而再理嫁者邪賦老客婦詞以進賜安車詣闕畱百二十日以白衣乞骸骨放還卒年七十有五廉夫嘗居吳山鐵冶嶺故號鐵崖過太湖得莫邪鐵筴又稱鐵筴道人築室松江上有小蓬壺草玄閣諸勝海內薦紳大夫與東南才俊之士造門納屨殆無虛日玉山草堂之會推主敦盤筆墨橫飛鉛粉狼籍或戴華陽巾披鶴氅踞船屋上吹鐵筴作梅花弄坐客皆蹁躑起舞

以爲神仙中人也所著書數百卷其古樂府尤盛行張伯雨曰三百篇而下不失比興之旨惟古樂府爲迄今代李季和楊廉夫遂稱作者廉夫上法漢魏而出入少陵二李之間故其所作隱然有曠世金石聲又時出龍鬼蛇神以眩蕩一世之耳目斯亦奇矣元詩之興始自遺山中統至元而後時際承平盡洗宋金餘習則松雪爲之倡延祐天曆間文章鼎盛希蹤大家則虞楊范揭爲之最至正改元人材輩出標新領異則廉夫爲之雄而元詩之變極矣明初袁海叟楊眉菴輩皆出自鐵門錢牧齋謂鐵體靡靡久而未艾斯言未足以服鐵崖也

履霜操

并序

琴操有履霜謂尹吉甫子伯奇爲後母譖而見逐自傷而作也其詞曰朝履霜兮採晨寒考不明其心兮信讒

言何辜皇天兮遭斯讐痛歿不同兮恩有偏誰說
知此冤使是詞果出伯奇則伯奇不得希于舜矣予爲
之補云

霜鮮鮮兮草戔戔兒獨履兮兒宿野田衣荷之葉兮葉易穿
採檉花以爲食兮食不下咽嗟兒天父兮天胡有偏我不父
順兮寧不兒憐履晨霜兮泣吾天

雉朝飛

并序

琴操有雉朝飛多指牧犢子之作據揚雄所記則曰雉
朝飛者衛女傅母之所作也衛女嫁齊太子中道太子
死問傅母傅母曰且往當喪喪畢女不冝歸終之以死
傅母悔之取女所自操琴于冢上鼓之忽有雉出墓中
傅母撫雉曰女果爲雉也言未畢雉飛而起故其操曰
雉朝飛予以牧犢之歎不如衛女之善死有關世教也

故賦以補舊樂府之缺云

雉朝飛一雄挾一雌雄苑雌誓黃泥歸衛女嫁齊子未及夫
與妻青縞綰素結一死與之齊人言衛女蕩且離烏得冢中
有雉飛琴聲鼓之聞者悲

石婦操

并序

石婦卽望夫石也在處有之詩人悲其志與精衛同不
必問其主名也予爲詞補入琴操云

峩峩孤竹崗上有石魯魯山夫折山花歲歲山頭歌石婦行
人幾時歸東海山頭有時聚行人歸啼石柱石婦岑岑化黃

土

鐵崖與李季和在吳下論古今人詩季和舉酒屬楊曰廉夫崛強作漢魏古樂府
亦能作昌黎伯琴操乎楊亟請題賦畢季和拍八三叫曰楊廉夫鐵龍精也

獨祿篇

并序

古樂府獨祿篇爲父報仇之作也太白擬之轉爲雪國
恥之詞予在吳中見有父仇不報而與之共室處者人

理之滅甚矣爲賦此詞以激立孝子之節云

獨祿獨祿惡水濁仇家當族孝子免汙辱孝子軀幹小勇氣
滿九州拔刀削中睨父仇父仇未報何面上父丘漆仇頭爲
飲器鬻仇肉爲食囓頭上之天纔可戴

烏夜啼

并序

古樂府烏夜啼者宋王義慶妓妾報赦之詞予爲補之
而少見規誡之義云

籠蔥高樹青門西夜夜棲烏來上啼報君凶報君喜願君高
樹成連理啼烏夜夜一作生八九子莫使君家高樹移烏生八九
烏散飛

鴻門會

天迷關地迷戶東龍白日西龍雨撞鐘飲酒愁海翻碧火吹

巢雙猱猱

暗言范增項莊

照天萬古無二烏殘星破月開

一作來

天餘一作開此言沛

公當獨王天下
羽不得分也

座中有客天子氣左股七十二子連明珠軍聲十

萬振屋瓦拔劍當人面如赭將軍下馬力拔山氣卷黃河酒

中瀉劍光上天寒彗殘明朝畫地分河山將軍呼龍將客走

石破青天撞玉斗

富春吳復曰先生酒酣時常自歌
是詩此詩本用賀體而氣則過之

臙脂井

井無水荒龍椅不得如巴馬子仰天夜見黃姑星水底嘍嘍

話紅鬼井中之人不殉苑宮人斜在雷塘趾

一作尾斜
宮人塚也

宿癰詞

采桑女項如甕

汪叶

受教采桑不受教觀大王大王聘之居中

房舊衣不換新衣裳采桑女項如甕宮中掩口笑嚶嚶堯舜

桀紂陳興亡中宮笑口慚且惶服后服正後宮

叶

卑宮室親

蠶桑減弋獵斥優倡諸侯玉帛走東方王上帝號聲煌煌

梁家守藏奴

將軍椒房親跋扈闕如虎嗟嗟孫家兒豈識鳶肩主有司夜
捕帑藏婢及人母紫金與白珠没入將軍府吁嗟乎梁家婢
何太苦不知一作如將軍妻秦宮婦三主六君七貴人明日飛花
亂紅雨

虞美人行

拔山將軍氣如虎神騅如龍蹋天下戶叶將軍戰敗歌楚歌美
人一苑能自許蒼皇一作
倉惶伏劒荅危主不爲桎雉隨仇虜江邊
碧血吹青雨化作春芳悲漢土

六宮戲嬰圖

黃雲複壁椒塗蘇銀牀水噴金蟾蜍空男草生二月初燕燕
求友烏將雛夫容花冠金結縷飄飄盡是瑤臺侶宮中箇箇
承主恩豈復君王夢神女梅檀小殿吹天香新興髻子換宮
妝中有一人類號國淨洗脂粉青睂長百子圖開翠屏底戲

弄狎狎未生齒侍奴兩兩昇錦裯不是唐家綠衣子蘭湯浴
罷春晝長金盤特瀉荔枝漿雕籠翠哥手擎出爲愛解語通
心腸宣州長史耽春思工畫傷春欠春意吳興弟子廣王風
六宮猫犬無相忌君不見王釵淫黿戕漢孤作歌請獻螽斯
圖

城西美人歌

并序

丙戌花朝後一日與客游長城之靈山宴于城東老人
所時偕游者城中美人靈山秀也酒酣作城西美人歌
長城嬉春春半強杏花滿城散餘香城西美人戀春陽引客
五馬青絲韁美人有似真珠漿和氣解消冰炭腸前朝丞相
靈山堂雙雙石郎立道傍當時門前走犬馬今日丘壟登牛
羊美人兮美人舞燕燕歌鴛鴦蜻蜓蛺蝶爭飛揚城東老人
爲我開錦障金盤薦我生櫝郎美人兮美人吹玉笛彈紅桑

爲我再進黃金觴舊時美人已黃土莫惜秉燭添紅妝

崔小燕嫁辭

闔閭城中三月春流鶯水邊啼嚮人崔家姊妹雙燕子踏青
小靴紅鶴觜飛花和雨著衣裳早裝小婢嫁文央離歌苦惜
春光好去去輕舟隔江島東人西人相合離爲君歡樂爲君
悲

長洲曲

長洲水引東江潮潮生莫莫還朝朝只見潮頭起郎施不見
潮尾回郎橈昨夜西溪買雙鯉恐有郎槭寄連理金刀剖腹
不忍食尺素無憑膾還委西溪之水到長洲明日啼紅臨上
頭

琵琶怨

蜀絲鴛鴦織錦綃邏檀鳳皇斲金槽絃抽甕繭五色豪雙成

十指聲嘈嘈塚頭青草天山雪眼中紅冰嵬下血哀絃淒斷
感精烈池上蕤賓躍方鐵

內人吹簫詞

為顧瑛題
盛子昭畫

天寶年來教春坊紫雲製曲吹寧王美人何處竊九漏耳譜
亦解傳伊涼鷗絃轉斷黃金軸獨據胡牀弄橫玉冶情忽逐
野鷺飛十指紅蠶迷起伏御溝水暖浴鷄鵲天地久無征戰
聲夫容楊柳自搖落豈識黃雲邊塞情西樓今夜月色午內
人思仙望河鼓白日蕭條鳳不來井梧風動神鳥語

奔月卮歌

為茅山外史
張伯雨賦

神犀然光射方諸海水拆裂雙明珠大珠飛上玉兔白小珠
亦奔銀蟾蜍千年太陰鍊成魄豈識妖蜮吞啖厄剗胎乃墮
歡伯計玉斧椎開桃扇核茅山外史海上來拾得海月稱奇
哉按劒或為龍鬼奪擲手自戲仙人杯雄雷雌電繞丹屋顧

免清光吞在腹醒來不記墨淋漓塵世隨風散珠玉鐵崖仙
客氣如虹金橋銀橋游月宮素娥飲以白玉醴羽衣起舞千
芙蓉居然月宮化鮫室坐見月中清淚滴我方醉臥玉兔傷
但覓大魁酌天漿一作酒不用白兔長生藥不用千年不死方

簫杖歌

爲永嘉瓊天
則道人賦

空心勁草琅玕節瘦如筆枝赤如鐵壺公手中曾擲之黃公
石上飛星裂璣天道人雙眼青見之不減九節藤神丁未闢
混沌竅中有萬壑銅龍聲道人親鑿崆峒玉九漏玲瓏尺度
足黑蛇飛來膝上橫道人手中嘯鸞鵠自言奇音不敢作寒
星墮地風折岳去年臺山解虎鬪今年狼山敲豸角鐵崖相
見洞庭東腰間遂佩蒼精龍湘江雨脚吹雌風相呼道人木
上座杖陂水拔鬚眉峯

皇媧補天謠

盤皇開天露天醜夜半天星墮天狗璇樞缺壞奔星斗輪鷄
環兔愁飛走聖媧巧手煉奇石飛廉鼓鞞虞淵赤紅絲穿餅
補天穿太虛一碧玻璃色輻旋轂轉一作興四極正高蓋九重縣
水鏡三光不涸河不洩天上神仙宅金闕當時坤母亦在傍
下拾殘灰補地裂

龍王嫁女詞

并序

海濱有大小龍拔水而飛雷車挾之以行者海老謂之
龍王嫁女故賦此辭率匡山人同賦

小龍啼春大龍惱海田雨落成沙砲天吳擘山成海道鱗車
魚馬紛來到鳴鞞聲隱佩鏘琅璫姬玉女桃花妝員宮美人
笄十八新嫁南山白石郎西來態盈慶春壻結子蟠桃不論
歲秋溪寄字湖龍姑蘭香廟下一雙魚

湖龍姑曲

湖風起浪如山銀城雪屋相飛翻白鼉豎尾月中泣倒卷君
山輕一粒浪中拍碎岳陽樓萬斛龍驤半空立雨工騎羊鞭
迅雷紅旗白蓋蚩尤開青娥鬢髮紅藍腮紫絲絡頭雙黃能
神絃神絃十二
中之一歌急龍姑來

修月匠歌

并序

按酉陽雜俎太和初有王秀才游嵩山迷道見一人枕
幘而坐曰君知月乃七寶合成乎月勢如丸其影則日
爍其凹處也常有八萬三千戶修之予卽一數因作修
月匠歌

天公弄丸七寶鈿脆如琉璃拆如線月中斤人八萬戶勅賜
仙廚瓊屑飯什什伍伍入杳冥妙手持天輕欲旋千斤寶斧
運化鈎混沌皮開精魄見昇家奔娥太輕脫須臾蹋破蓮花
瓣十二山河影碎中輪郭重完冰一片縹緲長懸玉臼飛堅

牢永結妖墓患封辭何用蟣蟲臣功成萬古蒙天眷一歸蘭

路一作詔

不知年
兔子花開三萬徧

五湖游

鴟夷湖上水仙舟
舟中仙人十二樓
桃花春水連天浮
七十二黛吹落天外如青漚
道人謫世三千秋
手把一枝青玉虬
東扶海日紅桑樛
海風約住吳王洲
吳王洲前校水犀
十萬如浮鷗水聲一夜入臺沼
麋鹿已無臺上游
歌吳歛舞吳鉤一作劍
招鴟夷兮狎陽侯
樓船不須到蓬丘
西施鄭旦坐兩頭
道人臥舟吹鐵笛
仰看青天倒流商
老人橘幾奕東方生
桃幾偷精衛塞海成
甌窶海盪邛山漂
髑髏胡爲不飲成
春愁

茗山水歌

一作火畊
陳帝墳

茗山如畫雲茗水如篆文
使君畫船山水裏
蕩漾朝暉與夕

曠中流棹歌驚水鴨捷如競渡千人軍渡頭劉阮郎清唱煙
中聞爲設胡麻飯招手越羅蚡旣到車山口還過韞水濱東
盛斗前折楊柳西莊漾下紉香芹東村擊鼓送將醉西村吹
笛迎餘醺三日新婦拜使君野花山葉斑斕裙使君本是龍
門客宮衫脫錦披黃斤願住吳儂山水國不入中朝鸞鵠羣
酒酣更呼酒輓衣勸使君游絲蜻蜓日款款野花蛺蝶春紛
紛君不見城南風起寒食近老農火畊陳帝墳

廬山瀑布謠

并序

甲申秋八月十六夜予夢與酸齋仙客游廬山各賦詩
酸齋賦彭郎詞予賦瀑布謠

銀河忽如瓠子決瀉諸五老之峯前我疑天仙

一作孫

織素練素

練脫軸垂青天僂欲手把

一作借

并州翦翦取一幅玻璃煙相逢

雲石子有侶捉月仙酒喉無耐夜渴甚騎鯨吸海枯桑田居

然化作十萬丈王虹倒挂清冷淵

花游曲

并序

至正戊子三月十日偕茅山貞居老仙玉山才子煙雨中游石湖諸山老仙爲妓者璫英賦點絳脣詞已而午霽登湖上山歇寶積寺行禪師西軒老仙題名軒之壁璫英折碧桃花下山予爲璫英賦花游曲而玉山和之三月十日春濛濛滿江花雨溼東風美人盈盈煙雨裏唱徹湖煙與湖水天虹女忽當門午光穿漏海霞裙美人凌空躡飛步步上山頭小真墓華陽老仙海上來五湖吐納掌中杯寶山枯禪開茗椀木鯨吼罷催花板老仙醉筆石闌西一片飛花落粉題蓬萊宮中花報使花信明朝二十四老仙更試蜀麻箋寫盡春愁子夜篇

古憤

陰陰璞玉抱幽幽雌劒鳴玉屈有時白劒孤有時并如何妾
玉身長抱礧石名如何妾劒身一作聲指為妖鐵精天乎如有情
蝕月為妾明地乎如有情河水為妾清

采菱曲

若下清塘好清塘勝若耶妃央飛鏡浦鸚鵡睡銀沙兩槳夾
螳臂雙榔交犬牙照波還自惜豔色侶荷花袖惹紅萍溼裙
牽翠蔓斜大堤東過客背面在蒹葭日落江風起清歌雜笑
哇

春芳曲

春容不再芳春華不再揚我欲倩游絲花前繫春陽春陽不
可繫游絲徒爾長飛來雙蛺蝶綴我羅衣裳頓足起與舞上
下隨春狂

南婦還

并序

南婦有轉徙北州者越二十年復還訪苑問生人非境
換有足悲者爲賦之

今日是何日慟返南州岐汨汨東逝水一日有西歸長別二
十年休戚不相知去時一作鬢髮青歸來面眉黧昔人今則是
故家今則非脫胎有父母結髮有夫妻驚呼問鄰里共指塚
累累訪苑欲穿隧泣血還復疑白骨滿丘山我逝其從誰

梁父吟

步出齊城門上陟獨樂峯梁父昂雉堞蕩陰夷鬣封齊國殺
三士杵臼不能雄所以梁父吟感歎長笑翁吁嗟長笑翁相
漢起伏龍關張比疆治將相俱和同上帝棄炎祚將星墮營
中抱膝和梁父梁父生悲風

要離塚

金昌亭下路春草沒荒丘云是要離塚令人生古愁侏兒三

尺幹不佩雙吳鉤。中包猛士膽。白日照高秋。忍死屠骨肉。視身若蜉蝣。荆軻不了恨。慶忌成身謀。如何五噫客。死與爾同仇。

白一作積雪辭

癡雲駕日日。爲黃白光半。夜漏東方廣。寒兔老玉髮。蛻一箭。剛風落人世。錦宮肉屏香。汗溶酒如春。江飲如虹彩。鸞簾額。不受卷酒面。洗作梨花風。堦前獅子積。不壞十日瓊田。換塵界金鉦。取挂扶桑曉。照見瓊田出寒葶。

鹽商行

人生不願萬戶侯。但願鹽利淮西一作兩淮頭。人生不願萬金宅。但

願鹽商千料舶。大農課鹽析秋毫。凡民不敢爭錐刀。鹽商本是賤家子。獨與王家埒富豪。亭丁焦頭燒海權。鹽商洗手籌運握。大席一囊三百斤。漕津牛馬千蹄角。司綱改法開新河。

鹽商添力莫誰何大艘鉦鼓順流下檢制孰敢懸官鉞吁嗟
海王不愛寶夷吾策之成伯道如何後世嚴立法祇與鹽商
成富媼魯中綺蜀中羅以鹽起家數不多只今誰補貨殖傳
綺羅往往往甲州縣

花門行

大唐宇宙非金甌黃頭奚兒蟆作蚪跳梁河隴翻九土驚呼
一作烏夜半呼延秋朔方健兒袖雙手戰馬傷春舞楊柳當時天
驕不借兵渭闕黃旗仆來久快哉健鶻隨手招渡河萬匹疾
如猋白羽若月筋韋驕彎弓仰天落胡旄吁嗟健鶻有如許
邀我一作功索花固其所明年西下崆峒兵壯士重憂折天柱折
天柱唐無人引狼殪虎狼非麟空令漢女嫁非匹窮廬夜夜
愁寒雲

征南謠

錢塘江頭點行軍大艘金鼓聲殷殷千里萬里鷄犬絕杳杳
南國淡蠻雲蠻邦父母苦不仁九重天子淡無聞草間弄兵
本鋤梃聚力四萬稱孤君皇華遣使宣主恩橫草未立終童
勛閩南總戎賜斧鉞紫髯一拂清妖氛六駭生來食虎尊猛
虎雖猛寧同羣於乎猛虎雖猛寧同羣城狐社鼠何足云

貧婦謠

西家婦貧失身東家婦貧無親紅顏一代難再得皦皦南國

稱佳人夫君求昏多禮度三日昏成戍邊去龍蟠有髻不復

梳

一作閉門花落春不知
又作閉門花落青春淡

寶瑟無絃爲誰御朝來采桑南陌周道旁

過客黃金求黃金可棄不可售望夫自上西山頭夫君生死

未知所門有官家賦租苦姑嫜繼歿骨肉孤夜夜青燈泣寒

杼西家婦作傾城姝黃金步搖繡羅襦東家婦貧徒自苦明

珠不傳青州奴爲君貧操彈修竹不惜紅顏在空谷君不見

人間寵辱多反覆阿嬌老貯黃金屋

留肅子歌

留肅子草衣儒居無室屋出無驢十年落魄走吳下一日奮
迅游天都自言袖有黃帝書淮荒海盜及吳租大臣不諱省
中木法官交譏臺上烏草衣言事不畏死請劍欲斬崔司徒

治師行

并序

贈緱氏子名長弓太湖中人與予鑄鐵笛者也通文史
又善鑄鐵冠如意自云將鑄湖心鏡求予詩歌之云

湖中治師緱長弓有如漢代陶安公七月七日與天通朱雀
飛來化青童且莫隨仙踏飛鴻道人鐵笛已在手鐵冠八柱
凌喬嵩皇帝一統誅羣凶猛士千將無所庸還徼上青子天
上裨重瞳江心火電流赤虹雲凝霧結愁蟠龍

五禽言

并序

禽言無出梅都官之作予猶惜其句律佳而無風勸之意故予製五禽言言若拙而意頗關風勸焉

喚起喚起東方明門前已如市上林有鳥殺司晨苦殺蕭娘睡方美

提胡盧提胡盧沽酒何處沽烏程與若下美酒高無價小姑典金釵勸郎醉卽罷君不見城中官長壺盧提十日九日醉如泥

姑惡姑惡姑不惡妾命苦姑有孝女姑爲慈母妾亦甘爲東海婦

子歸子歸子不歸白頭阿嬈慈且悲子弗歸待何時君不見西江處士章九華十年去赴丘園科母死妻啼未還家行不得哥哥我不行奈我何西山有豺虎西江有風波風波尚可壺豺虎尚可羅努兒關平地多行不得哥哥

匹鳥曲

建章宮中匹瓦飛太液浮起雙紅衣文塘小徑迎春紅
蓮葉春倚倚金丸嬌郎故驚起白頭雙飛誓雙死上林鴈婦
忍流離九疑悵悵天萬里長干沙頭人望夫願託錦領西江
書結生不作白頭伴結死須作青陵鳥

鬪雞行

兩雄勇銳誇匹敵老距當場利如戟毘毳毳毳刺張怒咽
魄礪嗔睛碧劒心一動碎花冠口血相汙膠綵翼何當罷鬪
作啼聲埭上梨花春露滴

白翎鵲辭二章

并序

按國史脫必禪曰世皇畋于林桺聞婦哭甚哀明日白
翎鵲飛集幹朶上其聲類哭婦上感之因令侍臣製白
翎鵲辭鵲能制猛獸尤善禽駕鵲者也舊辭未古爲作

白翎鵲詞二章以補我朝樂府

白翎鵲西極來叶金爲冠玉爲衣百鳥見之不敢飛雄狐猛
虎愁神機先帝親手鞬重爾西方奇海東之青汝何爲下攫
草間雉兔肥奈爾猛虎雄狐狸

白翎鵲來西極地從翼旋山目側邊風勁氣勁折膠材官猛
箭與之敵黃狼紫兔不餘力須臾白雪輕一舉千仞直駕鵝
洒血當空擲金頭玉頸高十尺千秋萬歲逢王食

殺虎行

并序

劉平妻胡氏從平戍零陽平爲虎擒胡殺虎爭夫千載
義烈有足歌者猶恨時之士大夫其作未雄故爲賦是
章

夫從軍妾從主夢魂猶痛刀箭瘢況乃全軀飼豺虎拔刀誓
天天爲怒眼中於菟小于鼠血號虎鬼冤魂語精光夜貫新

阡土可憐三世不復仇泰山之婦何足數

城門曲

謀報越王兵城門夜不扃孤臣晴不死門月照人青

飲馬窟

長城飲馬窟飲馬馬還驚寧知嗚咽水猶作寶刀鳴

俠客詞

未許同交苑全身報國仇太阿飛出匣欲取賈亢頭

牧羝曲

老羝何日乳歸鴈忽能言不逐虞常死丁零尚有恩

桑陰曲

妾自夫君戍桑陰路不通將軍哮侶虎少婦竊秦宮

貞婦詞

一作漸臺井

皎日常持信倉皇不改真君王符不到水長漸臺傾

三閣詞

一作膳
脂井

昨夜韓擒虎將軍

一作金陵

奏凱回井中人不死重帶美人來

連理枝

主家連理木昨夜一枝零野藤沿別樹相託萬年青

玉蹄騶

銀腦玉蹄騶金鞭問妾家窗開桃葉渡小艇在荷花

商婦詞二首

蕩蕩

一作子

發航船千里復萬里願持金剪刀去翦西流

一作江水

郎去愁風水郎歸惜歲華吳船如屋裏南北共浮家

春波曲

家住春波上春溪未得歸桃花新水長應沒浣花磯

采蓮曲二首

東湖采蓮葉西湖采蓮花一花與一葉持寄阿侯家

同生願同死葬清泠注下作鎖子藕上作雙頭華

楊柳詞

楊柳董家橋鵝黃萬一作幾萬條行人莫到此春色易相撩

賭春曲

鬪草歸來後開筵又賭春堦前撒珠戲獨一作誰是得雙人妝樓記洛陽有

樂姓者撒真珠為戲厚盈數寸以班螺令妓女酌之仍各具數以得雙者為勝得雙妓乃作雙珠宴以勞主人

王鏡臺

郎贈王鏡臺妾挂菱花盤安得咸陽鏡照郎心肺肝

聞鴈篇

樓頭聞過鴈隻影不成雙一夜狂夫夢相隨到九江

買妾言

買妾千黃金許身不許心使君聞有婦夜夜白頭吟

續絃言

麝肉煮爲膠續絃絃在弓誓將一作丁寧絃上箭不一作莫射孤飛鴻

歸客誤

夜聞歸客騎玉轡鳴匣嘒喚婦開西窗秋風響桐葉

自君之出矣二首

自君之出矣燕去復燕歸思君如荔帶日日抱君衣
自君之出矣草青復草黃思君如魚鑰日日守君房

吳子夜四時歌四首

效劉琨體作

麴塵波欲動紅心草已生朝來夾城道流車如水行
睡起珊瑚枕微風度屨廊夫容最高葉翻水洗鴛鴦
秋風吹羅帷玉郎思寄衣多情雙絡緯啼近妾寒機
樺煙噓席暖不知寒漏長朝來玉壺冰爲君添衣裳

陽臺曲

月落望夫山高臺十二鬟楚宮多妬女雲雨夢中還

昭陽曲

美人初睡起內史報蘭湯散盡黃金餅無尋赤鳳皇

焦仲卿妻

生爲仲卿婦死與仲卿齊廬江同樹鳥不過別枝啼

小臨海曲

一名洞庭曲

十首

日落洞庭波吳娃蕩槳過道人吹鐵笛風浪夜來多
道人鐵笛響半入洞庭山天風將一半吹度白銀灣
仙橘大如斗浮之過洞庭江妃渾未識喚作楚王萍
海客報奇事青天火甕飛明朝雷澤底新有落星磯
網得珊瑚樹移栽瑪瑙盆夜來風雨橫龍氣上珠根
海上雙雷島渾如灩澦堆乖龍拔山脚飛渡海門來
潮來神樹沒潮歸神樹青雲裏天妃過龍旗帶雨腥
客入毛公洞洞溪人不還明年揆禹穴相見會稽山

太液象圓海金蓮夜夜開水中萬年月照見昆明灰
秦峯望東海雲氣常飄飄桑田明日事奚用石爲橋

桂水五千里二首

桂水五千里瀟湘雨氣空衡山七十二望見女英峯

桂水五千里南風大府開象王新貢入鮫女送珠來

西湖竹枝歌

一作小臨海曲

九首

并序

予閒居西湖者七八年與茅山外史張貞居茗溪郊九
成輩爲唱和交水光山色浸沈曾次洗一時尊俎粉黛之
習于是乎有竹枝之聲好事者流布南北名人韻士屬
和者無慮百家道揚諷諭古人之教廣矣是風一變賢
妃貞婦興國顯家而烈女傳作矣采風謠者其可忽諸至
正八年秋七月會稽楊維禎書于玉山草堂

蘇小門前花滿株蘇公堤上

一作下

女當壚

一作水平湖

南宮北使須到

此江南西湖天下無

鹿頭湖船唱報郎

一作片言許郎金石剛

船頭

一作阿奴

不宿

一作是

野鴛鴦為郎歌舞

為郎死不惜

一作怕

真珠成斗量

家住西湖

一作城西

新婦磯勸君不唱縷金

一作金縷

衣琵琶元

一作本

是韓朋

一作馬

木彈得鴛鴦一處飛

湖口樓船

一作行雲

湖日陰湖中斷橋湖水淡樓船

一作行雲

無柁

一作心

是郎

意斷橋無

一作有

柱是儂

一作如心

病春日日可如何起向西窗理琵琶見說枯槽能卜命柳州

街口問來婆

小小渡船如缺瓜船中少婦竹枝歌歌聲唱入空侯調不遣

狂夫橫渡河

勸郎莫

一作休

上南高峯勸儂

一作我

莫

一作休

上北高峯南高峯雲北高

雨雲雨相催愁

一作隨惱

殺儂

寺裏看碑來

長城女兒雙結丫陳皇宅前第一家生來不識古井怨唱得
後主後庭花

楊花白白縣初遊梅子青青核未生大婦當壚冠侶瓠小姑
喫酒口如櫻

今朝天氣清明好江上亂花無數開野老殷勤送花至一雙
蝴蝶趁人來

南鄰酒伴辱相呼共訪城東舊酒壚柳下秋千間絡索花間
喚起勸胡盧

我愛東湖舊廣文更過水口覓將軍醉歸嘗騎廣文馬不怕
打鼓噤黃昏

冶春口號七首

寄崑山袁郭
呂三才士

今年臘底無殘雪却是年前十日春騎馬行春橋上路密梅

花發僂撩人

吳下逢春春思濃不堪花發館娃宮
吳山青青吳水白愁殺江南盛小叢

見說崑田生王子海西還有小昆侖
明朝去拔珊瑚樹龍氣隨飛過海門

鮫卵兼斤傳海上海人一尺立階前
婁江馬頭天下少春水如天卽放船

南朝宮體袁才子更說西崑郭孝廉
自是玉臺新句好風流無復數香奩

湖上女兒桺葉眉春來能唱黃鸝兒
不知却是青娘子飛傷枇杷索荔枝

西樓美人不受呼清箏一曲侶羅敷
可無東甌五花馬去博

西樓一斛珠

妓名也

石新婦

即秦皇
觀石也

下水連空飛來峯前山萬重不辭妾作望夫石

一作妾妬甘
爲石新婦

望來

一作
蕭郎或一作
忽

侶飛來峯

望郎一朝又一朝信郎信侶浙江

一作
錢唐

潮浙江潮信

一作牀
脚摺龜

有時

失

一作
爛

臂上守宮無日消

此題各本所載不同元詩體要共有十首
去取互異今從西湖竹枝唱和傳本錄之

吳下竹枝歌七首

率郭義
仲同賦

三箸春溪草色齊花間蕩漾勝耶溪採菱三五唱歌去五馬

行春駐大堤

家住越來溪上頭臙脂塘裏木蘭舟木蘭風起飛花急只逐

越來溪上流

寶帶橋西江水重寄郎書去未回儂莫令錯送回文錦不答

死央字半封

馬上郎君雙結椎百花洲下買花枝畧畧冠子高一尺能唱

黃鸝舞鴈兒

白翎鵲操手雙彈舞罷胡笳十八般銀馬杓中勸郎酒看郎色侶赤瑛盤

騎馬當軒鵠背靴西風馬上鼓琵琶內家隊裏新通籍不步南州百姓家

小娃十歲唱桑中盡道吳風侶鄭風不信柳娘身不嫁真珠長絡守宮紅

漫興七首

并序

學杜者必先得其情性語言而後可得其情性語言必自其漫興始錢唐諸子喜誦予唐風取其去杜不遠也故今漫興之作將與學杜者言也

醴畫溪頭翠水家水邊短竹夾桃花春風嗾人狂無那走覓南鄰羯鼓過

丈人接籬白瓊栽花邊下馬不驚猜環沈溪頭買酒去高堂

春俠雜詞一作口號八首

金丸脫手彈鸚鵡
玉鞭嬉笑擊珊瑚
侍兒無賴有如此
知是霍家馮子都

花袍白面呼郎神
當堦奪花不避人
天馬乘龍金絡腦
賈家貴婿正嬌春

柘林縱獵金毛鷹
花街行春銀面馬
夜宿倡樓酒未醒
飄風吹落妃央瓦

又一詩云昨日布衣行九州今日繡衣拜冕旒馬前清道一千步當街不敢窺高樓吳復編古樂府不載

蜀琴初奏雙妃央
嶰竹和鳴雙鳳皇
夜闌酒散不上馬
紫荊月墮西家牆

石上葉生青鳳尾
堦前花開黃鵠觜
美人弄水百花池
水洒花枝雙蝶起

鳳皇城外橫門道
小妓軍裝金線襖
春暉無賴苦撩人
自下雕鞍蹋芳草

美人遺我崑溪竹未寫雌雄雙鳳曲愛惜長竿繫釣緡釣得
江西雙比目

關右新來豪傑客姓字不通人不識夜半酒醒呼阿吉平聲

眼

兒吹筆笛

此首吳復古樂府及復古詩俱不載見章編鐵崖詩集

燕子詞二首

燕子來時春雨香燕子去時秋雨涼
死央一生不作客夜夜不離雙井塘

燕子樓頭入妾家燕來燕去惜容華
祇應韓重相思骨化作湖中並蒂花

小游仙十首

東華塵又起瀛洲十屋今添第
幾籌阿母西來騎白鳳蛾眉相見不勝秋

麻姑今夜過青丘玉醴催斟白玉舟
莫向外人矜指爪酒酣

爲我擘筍篸

以上二首見玉山名勝小蓬萊所題

天上菰常宮又成文章只數老玄卿五雲閣吏亦謫世牛鬼少年專盛名

日落海門吹鳳匏須臾海水沸如炮船頭處女來相喚一作知聽曲是洞庭千歲蛟

曾與毛劉共學丹丹成猶未了情一作塵緣玉皇勅賜西湖水長

作西湖月水仙

西湖仙人蓮葉舟又見石山移海流老龍卷水青天去小朶

蓮花

一作峯

共上游

以上二首亦見玉山名勝集

青旄節衛翠雲輶按部東行過赤城龍女遺珠鷄卵大結爲

雙佩賜方平

若木西來赤岸東白金城闕碧珠宮天家令急不敢住折得

五花歸飯龍

東逾弱水赤流溪夜得桃都息羽旌地底日迴天上去金鷄
如鳳自交鳴

金鵝蕊生瑤水陰錦駝鳥鳴珠樹林上皇勅賜龍色酒天
五雲流玉音

海鄉竹枝歌四首

潮來潮退白洋沙白洋女兒把耰耜苦海熬乾是何日免得
儂來爬雪沙

門前海坍到竹籬堦前腥臊蟛子肥猓孖三歲未識父郎在
海東何日歸

海頭風吹楊白花海頭女兒楊白歌楊花滿頭作鹽舞不與
斤兩添銅鉞

頰面侶墨雙腳頰當官脫袴受黃荊生女寧當嫁盤瓠莫

近嫁東家亭

海鄉竹枝非敢以繼風人之鼓吹予以
達亭民之疾苦也觀民風者或有取焉

鐵崖古樂府十卷門人吳復類編每卷加以評識鐵崖自言予三體詠史用七言絕句體者三百篇古樂府體者二百首古樂府小絕句體者四十首絕句人到吾門者章不能之古樂府不易到吾門張憲能之至小樂府二三子不能惟吾能之故五峯李著作推爲詠史手云門人章琬又編復古詩六卷皆五七言絕句大半見于吳編古樂府中其香奩諸作并類附于後

烽火辭 以下復古詩

美人方一笑烽火不須驚昨夜驪山下西戎已結兵

吳復類編二韻倒轉

去妾辭

萬里戎裝去琵琶上錦韉傳來馬上曲猶唱想夫憐

宮詞十二首

并序

宮詞詩家之大香奩也不許村學究語爲本朝宮詞者多矣或拘于用典故又或拘于用國語皆損詩體天曆間予同年薩天錫善爲宮詞且索予和什通和二十章今存十二章

鷄人報曉五門開鹵簿千官泊虎

一作帝

臺天上駕鵝先有信九

重鸞駕上都

一作京回每歲此禽先駕往返

開國遺音樂府傳白翎飛上十三絃大金優諫關卿在伊尹

扶湯進劇編

海內車書混一時奎章御筆寫烏絲朝來中貴傳宣急南國

宮娥拱鳳池

薰風殿閣日初長南貢新來荔子香西邸阿環方病齒金籠

分賜雪衣娘

宮錦裁衣錫聖恩朝來金榜揭天門老娥元是南州女私喜

南人擢殿一作狀元

北幸一作狩和林幄殿寬句一作高麗女侍嬈好官君王自賦一作製昭君

曲勅賜琵琶馬上彈

后土瑤仙一作花屬內家揚州從此絕名花君王題品容誰並一作難盡

萼綠宮中萼綠華

十二璫樓浸月華桐花移影上窗紗簷一作簾前不插鹽枝竹卧
聽金羊引小車

金屋秋深露氣涼宮監久不到西廂丁寧莫竊寧哥笛鸚姆
無情說短長

露氣夜生鳩鵲樓井梧葉葉已知秋君王只禁宮中蠶不禁
流紅出御溝

十三宮女善詞章長立君王玉几傍阿婉有才還有累宮中
鸚鵡啄條桑

蛾眉曠處不勝秋長帶夫容小苑愁眉爲君王通一笑羽書
烽火誤諸侯

女史詠十八首 錄八

鉤弋夫人 漢武帝宮人
生昭帝者

婕妤未換母儀尊聞說一作道君王已一作日寡恩太子宫中無木作

可無鞠域到堯門

班婕妤

前漢成帝宮人

長門不用買多才
紉扇炎涼善自裁
五鬼一言能悟主
秋風愁殺望思臺

綠珠

石崇以珠三斛買梁氏女

百斛明珠價莫加
高樓投壁壁無瑕
臨春不死臙脂井
又逐降王一作上檻車

馮小憐

北齊穆后愛衰侍婢馮小憐大幸

前山較獵御同車
一笑平陽等戰蝸
挽一作換得后衣才上馬
琵琶又入一作自屬代王家

楊太真

唐明皇貴妃

萬花叢裏澤初承
紫磨金搖不自勝
義髻早知無苑所
不如生不負青陵

關盼盼

唐張建封節制武寧納妓盼盼于燕子樓公薨不他適

冢上白楊今十年樓頭燕子尚畱連
銅臺多少丁寧恨誰向西陵望墓田

韓蘄王夫人

宋韓世忠

巫家卜偶不爲嫌優女占夫事
更堅看取異時真畏友九重書上議黃天

女貞木楊氏

予從大父女弟名宜旣笄許陸氏子娶一夕陸氏子卒後達官聘之宜誓不嫁母強逼之遂閉重戶自盡予

表其墓曰女貞

守苑重閨事

一作關志

不睽九泉不負陸郎妻至今墳上女貞木不

受商陵怨鳥棲

香奩八詠

并序

吳間詩社香奩八詠無春芳才情者多爲題所困縱有篇辭鄙婦學妝院體終帶鄙狀可醜也晚得玉樹餘音

爲甲而長短句樂府絕無可拈出者一日雲菴王先生
寄示踏莎行八闋讀之驚喜先生蓋松雪翁門人今年
八十又三矣而堅強清爽出語娟麗此殆爲月中神仙
人也謹付翠兒度腔歌之又評付龍洲生附八詩後繡
梓以見王孫門中舊時月色雖曰喪亂固無恙也至正
丙午春三月初吉錦窠老人楊維禎序

金盆沐髮

華清春晝賜溫泉綰脫青絲散一編翠雨亂跳花底月黑雲
半卷鏡中天銅仙盤冷添甘露玉女盆傾拾翠鈿攏得雲鬢
高一尺畧冠新上玉臺前

月奩勻面

一片清光照膽寒玉容滿鏡掩飛鸞素娥照見黃金闕絳雪
鎔開白玉盤翠點柳尖春未透紅生櫻顙露初乾好風爲我

披羅幙一朵夫容正面看

玉頰啼痕

天然玉質洗鉛華怪底偏將半面遮紅滴香冰融獺髓彩黏
膩雨上梨花收乾通得言難盡點溼明妃畫莫加聚得斑斑
在何處輒綃寄與薄情家

黛眉顰色

按樂圖開列畫堂春愁何獨損清揚蜀山煙雨雙尖瘦漢柳
風霜雨葉蒼索畫未成京兆譜欲啼先學壽陽妝蕭郎忽有
歸期報喜得天庭一點黃

芳塵春跡

是誰步履印微茫便侶石家春滿牀輭雪消時痕晃底好風
起處步生香彩雲飛上秋千鐙芳草侵來蹴踘場愁絕如癡
成獨立繡鴛拾得在東牆

雲窗秋夢

骨瘦魂清酒力微
路迷錯莫是還非
羅浮曉月相將落
巫峽斷雲何處飛
金彈撇來驚忽忽
玉龍嘶了尚依依
不如直到鈞天所
記得霓裳樂譜歸

繡牀凝思

繡線添來日正遲
香絨倦理一丈頤
心游飛絮渾無著
身蛻枯蟬忽若癡
花幘錯描愁伴覺
金針閣住許誰知
絕憐小玉情緣重
到苑春蠶始絕絲

金錢卜歡

紫姑壇上祝方兄
忽聽呼盧擲地聲
星斗未分牛女會
陰陽先判雨雲生
青蚨孕子寧無兆
玉蝶化身元有情
寶鏡重圓三五夜
重磨半月問虧盈

續幣

一作老鐵
梅花夢

二十首

并序錄八

陶元亮賦閒情出摯御之辭不害其爲處士節也予賦
韓偓續奩亦作娟麗語又何損吾鐵石心也哉法雲道
人勸魯直勿作豔歌小辭魯直曰空中語耳不致坐此
墮落惡道予于續奩亦曰空中語耳不料爲萬口播傳
兵火之後龍洲生尚能口記又付市肆梓而行之因書
此以識吾過時道林法師在座予合十曰若墮惡道請
師懺悔梅花夢楊維禎自敘

學書

歌徹陽春酒半醺玉尖搦管蘸香雲新詞未上鴛鴦扇

一作記醉

墨先污蛺蝶裙

一作羣

習舞

十六天魔教已成背反蓮掌苦嫌生夜淡不管排場歇

一作散

尚

向燈前踏影行

染甲

夜擣守宮金鳳蕊十尖一作指盡換紅鴉觜閑來一曲鼓瑤琴

點桃花泛流水

照畫

畫得崔徽卷裏人菱花秋水脫真真只今顏色渾非舊燒藥

幪頭過一春

理繡

揀得金針出象筒妃央雙刺扇羅中却嗔昨夜狸奴惡抓亂

一作破金牀一作花五色絨

甘睡

漏減良宵晝日遲困人天氣酒中時東家女伴太驕劣偷解

裙腰一作連環竟不知

躡鞦

月牙束靨紅幪首月門脫落葵花斗君看脚底軟金蓮細蹴
花心壽郎酒

走馬

胡女一作伎牽來獰叱撥輕身飛上電一抹半兜玉鐙裏湘裙不

許一作使春泥汗羅襪

鐵崖豔體擅場一時王國器踏莎行八闕皆有鐵崖評語故并載章編復古詩集中續
幣二十首尚有學琴演歌上頭出浴相見相思的信私會成配洗兒秋千釣魚諸題其
浴思信配等作多用昔人成語茲不具載西湖游覽志稱鐵崖雅好聲妓名徹都下晚
居松江有侍兒四竹枝柳枝桃花杏花皆善歌舞酒酣耳熱命歌白雪之曲自倚鳳瑟
和之一日訪瞿士衡飲次脫妓鞵置杯行酒名曰鞵杯謂其姪孫宗吉詠之宗吉作
沁園春一闕以呈鐵崖大喜卽命侍兒歌以侑觴當時傳爲佳話嘗過玉山草堂
題云無奈道人狂太甚時攜紅袖寫烏絲
其風流韻致要非方幅之士所能及也

寄張伯雨以下鐵崖集

句曲先生非隱淪苦嫌城市客來頻每瞻湖上青鳥去不覺
山中白兔馴古洞神瓜圓侶斗空林老茯苓長如神金鐘玉杵
我所愛鶴氅烏巾許卜鄰

送羅太初北游

聚散何如水上漚君行朔漠我東州三年風雨同爲客一日
江湖各問舟古木殘陽栖短景清琴涼月照高秋燕山驛路
四千里歸夢還能到此不

游開元寺憩綠陰堂

爲開元寺長老秀石公賦

韋郎句中尋書寂劫灰不盡綠層層鴻文重紀青城客內典
新傳瀑布僧石佛浮江輕侶葉神珠照鉢隱如燈杪櫛樹子
風前落吹滿一作像恩公舊毼毼音榻登西域毛席大牀前小榻以上香者

贈溧陽馬閑雲鍊師

閑雲隱者一區宅相直芝山半面開劒氣上天看北斗鶴人
作語過蓬萊樵柯石爛圍碁在梅洞雲淡采藥回相約丹陽
尋祖武三花髻子市中來

四月四日偕蜀郡袁景文大梁程冲霄益都張翔遠

雲間呂德厚會稽胡時敏汝南殷大章同游錢氏別墅飲于菊亭僧舍賦此書于壁

山公今日飲何處爲愛東池似習池喬木尚傳錢相宅蒼苔已上岳公碑井竇或從雙劍起一作出石人夜逐五丁移中天艮岳爲平地可但平泉草木悲

追和鮮于公寄山齋先生釣石詩

星灘分得小雙臺不染東華半點埃爽氣時從仙掌出青天忽見岳蓮開雲根遠帶桐江水夜雨新生海眼苔九朶峯前成屢憶不隨霜鶴寄詩來

送錢思復之永嘉山長

湖頭送客綵舟移青雀飛來花滿枝進士舊傳羅剎賦佳人新唱竹枝詞黃桐錦樹秋風早青奧紅雲海日遲思遠樓前約相見西山煙雨畫新眉

送費夢臣北上并簡十八丈

桃花新水漲湖頭今日南風起戍樓雲近紫臺龍虎氣春回
青海鳳鱗游簫韶美頌從容上光範長書次第投爲問湖南
名奉使綠衣驄馬正風流

錢塘裏古率堵無傲同賦

一作詠
白塔

天山乳鳳飛來小南渡衣冠又六朝劫火自焚楊璉塔箭鋒
猶抵伍胥潮燐光夜附山精出龍氣秋隨海霧消一作獨惟有宮
人斜畔月多情還一作猶自照吹簫

訪倪元鎮不遇

霜滿船篷月滿天飄零孤客不成眠居山久慕陶弘景蹈海
溪慚魯仲連萬里乾坤秋侶水一窗燈火夜如年白頭未遂
終焉計猶欠蘇門二頃田

西湖

西湖風景開圖畫墨客騷人入咏嗟
扇底魚龍吹日影鏡中鷺燕老年華
蘇堤物換前朝柳葛嶺人耕故相家
今古一作消沈一杯水兩峯長照夕陽斜

畱別浯溪諸友

浯溪長揖向蘭溪偶及高秋欲半時
明月不分天遠近故人相望浙東西
青山木落千檣立滄海潮來萬馬馳
倚棹歌闌離思作今宵風雨倍淒淒

次韻黃大癡豔體

千枝燭樹玉青蔥綠紗照人江霧空
銀甲辟絃斜鴈柱薰花撲被熱鴛籠
仙人掌重初承露燕子腰輕欲受風
閑寫惱公詩已就花房自擣守宮紅

寄衛叔剛

二月春光如酒濃好裏每與故

一作可

人同杏花城郭青旗雨燕

子樓臺玉笛風錦帳將軍烽火外鳳池仙客碧雲中憑誰解
釋春風恨一作情重只有江南盛小叢

玄霜臺爲呂希顏賦

仙家樓若有玄霜無奈今宵月色涼露下金莖仙掌白光生
玉兔雪眉蒼道人醉寫榴皮字仙客饑分寶屑糧愛我西闌
吹鐵笛碧雲千里鴈飛長

和呂希顏

雨過長江五月秋主家讌客林塘幽苦無奇字從人問賴有
清尊消我憂道士舊游尋赤壁美人相見憶羅浮休官便擬
璜溪住蓴菜鱸魚不外求

題春江漁父圖

一片青天白鷺前桃花水泛住家船呼兒去換城中酒新得
槎頭縮頸鰻

郭天錫春山圖

不見朱方老郭髯大江秋色滿疎簾
醉傾一斗金壺汁貌得江心兩玉尖

飛絮

春風門巷欲無花絮起晴風落又斜
飛入畫簾空惹恨不知楊柳在誰家

吳詠十章用韻復正宗架閣

館娃宮裏落花多春色撩人可奈何
南省風流又架閣宮才解賦館娃歌

曾侍虛皇第二筵鐵仙輕脫故依然
江州坐上初相見還識人中孟萬年

杜牧尋春苦未遲水晶宮裏舊題詩
小鬟莫訝腰如束善唱白家楊柳枝

馬上郎君出帝城
璫林宴裏記相迎
吳山吳水新迎送
學唱陽關第四聲

淮南八月鴈初過
奉使槎回烏鵲河
十里揚州花底散
五陵年少已無多

夏駕湖頭朱雀舟
湖光山色不勝秋
丘中不見金銀氣
臺上閑看麋鹿游

江上梅花鐵石心
江南腸斷越人吟
南垣閣老多情甚
才見梅花便抱琴

鴟夷仙去五湖船
故國何人憶計然
昨夜洞庭秋水長
夢聞廣樂下鈞天

黃菊初花客未歸
登高自試花羅衣
真娘墓上好紅葉
伍相祠前多翠微

地行仙子羊權家
曾降山中萼綠華
三十六橋明月夜
姑蘇

一作蘇州

城裏有璫花

官妓名璫花宴者
新自維揚來蘇州

卷一

高樓已荊棘丹青寫賦工何益君不見袁家有客能罵賊將
軍頭風重草檄

題陶淵明漉酒圖

義熙老人義上人一生嗜酒見天真山中今日新酒熟漉酒
不知頭上巾酒醒亂髮吹騷屑架上烏紗洗糟蘖客來忽一作
怪頭不冠巾冠豈爲我輩設故人設具在道南老人一笑猩
猩貪東林法師非酒社攢眉入社吾何堪家貧不食檀公肉
甯食劉家天子祿頽然徑醉臥坦腹笑爾阿弘來奉足

題陶弘景移居圖

大奴擔簦挈壺飧小奴籠雞約孤狔雪斑鹿前雙婉孌水雲
牯背三溫磨中有玉立而長身幅巾野服爲何人云是永明
之隱君身有黑子七星文自從夜讀葛洪傳僂覺白日生青
雲解冠徑挂神武門蜜蠹尚拜君王恩句容洞天元第八茅

家兄弟遁秦臘飛宮三接十二樓下聽華陽海聲狹三朝人
物半凋零水丑木中文已成金牛脫絡誰得簠畫牛以金籠頭絡之枯龜
受灼寧生靈金沙丹飯饑可餉山中猶嫌呼宰相從此移家
金積東滿谷桃花隔秦壤畫工何處訪仙蹤修眉明目射方
瞳可無雞犬逐牛豕栗橘葛樞皆家僮鐵崖浮家妻子從名
山亦欲尋赤松華陽禮一作祀郎或相逢清風喚起十八公乞以
玉笙雙鳳吹雌雄

唐玄宗按樂圖

大唐天子梨園師金湯一作城重付軋犖一作綠衣兒何人端坐閱樂籍
三萬纏頭不足支龜年一作茲檀板阿蠻舞花奴手中花如雨釣
天供奉真人上亦親撾一作撻汝陽鼓玉奴檀槽倦無力忽竊
寧哥手中笛邊風吹入新貢簫銅池夜夢雙飛翼閤門邊一作天
奏塞駐聰耳譜更訪一作傳明月宮漁陽一震萬竅聾梨園弟子

散如雨

一作簫瑟鵲鼓擲如土

惟有舞馬傷春風

自題鐵笛道人像

道人煉鐵如煉雪丹鐵火花飛列缺神焦鬼爛愁鏤鄒精魂
夜語吳鉤血居然躍冶作龍吟三尺笛成如竹截道人天聲
闕天竅媧皇上天補天裂淮南張涯人中傑愛畫道人吹怒
鐵道人與笛同苑生直上方壺觀日月

題趙仲穆臨黃筌秋山圖

成都畫師稱要叔不獨錦雞兼寫竹李昇筆法最稱神萬里
雲山出西蜀重巒疊嶂金碧堆丹崖楓樹如花開銀河著地
可望不可到上有仙家十二之瓊臺峨眉玉壘天邊落萬雉
金城連劔閣雪山西蜀爲武擔石鏡清輝纏井絡江邊里牯
似沈犀水怪不敢湍金隄支機石在嚴真觀浣花水落少陵
溪蜀王宮殿牛羊下鼓吹却入雞豚社雪飛水磨舊敲茶春

釀郛筒荷熟煮草田麥壠煙光薄交鹿呦呦雉角角何處山
僧赤脚歸空林野水日欲落吳興小趙精天機出入內府閱
秘奇親摹此本第一幅閉戶三月忘朝飢老夫平生有山癖
草玄亭前雙眼碧江上何處未歸來黃鶴高樓吹鐵笛

題錢選畫長江萬里圖

神禹劃天塹橫分南北州祇今天不限南北一葦航之如大
溝洪源發從瞿塘口嶮峽中擘爭黃牛括漢包一作甲湘會沅澧

二妃風浪兼天浮青山何罪受秦赭翠黛依然生遠愁洞庭
微波木葉脫有客起登黃鶴樓老瞞橫槩處釃酒澆江流江
東數豪傑乃是孫與周東風一信江上發從此鼎國曹孫劉

吳南魏北後倏忽

一作忽聞

開六朝

叶朝

江南龍虎地山水清相繆多渡

頭龍馬王氣歇洲邊鸚鵡才名畱新亭風景豈有異長江不
洗諸公羞宮中金蓮步方曉後庭玉樹聲已秋何如一杯酒

錦袍仙人月下舟解道澄江靚一作淨如練醉呼小謝開青眸鐵

崖散人一作蕭散萬里鷗拙迹今似林中鳩不如大賈舶江山足勝

游腰纏足跨揚州鶴樓船不用一作問蓬萊丘平生此志苦未酬

眼明萬里移滄洲烏乎楚水尾吳淞頭山河一髮瞻神州孰

使我戶不出兮囚山囚

題桺風芙月亭詩卷

主家池館西龍塘龍塘華國參差芳秋輪輒露春雲熱水風

楊桺芙蓉月星橋高挂東西虹宮花小隊煙花紅金絲拂鞍

長袖舞夜靜水涼神欲語草池夢落西堂客吟詩一夜東方

白

謝呂敬夫紅牙管歌

并序

呂云度廟老宮人所傳物也滄江泰娘蓋敬夫席上善

倚歌以和予天忽雷者故詩中及之

鐵心道人吹鐵笛大雷怒裂龍門石滄江一夜風雨湍水族
千頭嘯悲激樓頭阿泰聚雙蛾手持紫檀不敢歌呂家律呂
慘不和換以紅牙尺八之冰柯五絲同心結一作繫龍首曾把昭
陽玉人手只今流落已百年不省愁中折楊柳道人吹春哀
北征宮人斜上草青青吳兒木石悍不驚秦娘苦獨多春情
爲君清淚滴紅冰

紅酒歌

謝同年智
同知作

揚子渴如馬文園宰官特賜桃花源桃花源頭釀春酒滴滴
真珠紅欲然左官忽落東海邊渴心鹽井生炎煙相呼西子
湖上船蓮花博士飲中仙如銀酒色未一作不爲貴令人長憶桃
花泉膠州判官玉牒賢憶昔同醉瑤林筵別來南北不通問
夜夢玉樹春風前朝來五馬過陋廛贈以同袍一作我
曾中五色彩
線副以五鳳樓頭牋何以澆我磊落抑塞之感慨桃花美酒

斗十千垂虹橋下水拍天虹光散作真珠涎吳娃鬪色櫻在
口不放白雪盈人顛我有文園渴苦無曲奏宛央絃預恐沙
頭雙玉盡力醉未與長瓶眠徑當垂虹去鯨量吸一作此
興吞百川
我歌君扣舷一斗不惜詩百篇

題月山公九馬圖手卷爲任伯溫賦

并序

任公月山九馬圖一卷馬官控而立者二渴飲者二赴
飲者一共櫪秣者二立而昂首回顧者二昔韓幹善畫
馬實出曹將軍霸唐之畫馬稱曹韓而杜子美評曰幹
惟畫肉不畫骨則幹猶未暇入曹將軍室也今公所畫
法備而神完使在開元間未知與霸孰先後豈獨方駕
幹而已哉其孫士珪出卷求予言故爲賦卷尾

任公一生多馬癖松雪畫馬稱同時已知筆意有獨得天育
萬騎皆吾師房精夜墮池水黑龍出池中飛霹靂圖中九馬

氣俱王都護青驄尤第一一馬飲水水有聲兩馬齧草風雨
生其餘五馬盡奇骨蠻煙洗盡桃花明君不見佛郎獻馬七
度洋朝發流沙夕明光任公承旨寫神駿妙筆不數江都王
任公一化那可復後生畫馬空多肉此圖此馬無人看黃金
臺高春草綠

原卷題云李黼榜第二甲進士曾稽楊維禎書時捧硯者蘇臺常氏繡簾也

哀馬圖

唐家內廐三萬匹畫史縑緗都熟識綠蛇連卷骨初蛻一團
旋風五花色溼雲乍洗烏龍池金索掣斷愁欲飛奚官獨立
柳陰下手把玉鞭將贈誰

飲馬圖

佛郎新來雙象龍鼻端生火耳生風臨流飲水如飲虹波光
倒吸王良宮吁嗟青海頭白磧尾渴鳥一失金井水長城窟
遠腥風起

正面黃

鼎湖乘黃忽已仙
龍池霹靂飛青天
玉臺萬里在足下
青絲挽住春風前
疑如長鶴靜不騫
仗下肯受庸奴鞭
主恩一顧百金重
不辭正面當君憐

背立驪

首昂渴烏跨山峙
拂階一把銀絲委
金羈脫兔勢無前
踣鐵盤攢忽如倚
淺髀大脰方爭塗
忍使驪龍老垂耳
倚風背立非背恩
馱錦秋高爲君起

趙大年鵝圖

鏡湖湖上春波明
灣碕樹樹鵝黃青
上有金衣弄簧舌
下有紅掌浮繡翎
春鋤_{鷺也}一白能自好
尚嫌性帶鷗鷺腥
眼明見此羣鵝鵝
不與匹鳥爭春晴
大年筆法如蘭亭
宛頸箇箇由天成
艮宮流落二百載
胡賈不厭千金爭
却恨會稽內史無

此筆爲人辛苦書黃庭

月梅

以下鐵龍詩集

天上清虛府人間香影家阿剛斫桂斧只合種梅花

雨竹

倚石添新筍爭妍箇箇添佳人聽春雨笑隔水晶簾

秋江晚渡圖

船泊大江口行人與馬爭不如漁艇子高卧待潮平

詠石榴花

密幄千重碧疎巾一撈紅花時隨早晚不必嫁春風

秋鴈圖

野水江湖遠秋風蘆葉黃南飛舊兄弟一一自成行

織錦圖

秋溪未寄衣絡緯上寒機斷織曾相戒夫君不用歸

題米芾小景

煙霧林梢出蒼翠望中分山溜雜人語溪雲亂鶴羣石梁逢
釋子岳屋隱徵君皴皴誰家筆披圖有篆文

散七迹反皮細也米
元章有皴皴畫法

畱題毗山松風竹月亭

蕩舟北郭外華表見新亭水作游龍勢山爲偃月形怪松蟠
水赤高竹上山青一束生芻意千秋地下靈

題邊魯生梨花雙燕圖

燕燕兩于飛璫樓暮雨微春風歌白雪夜月寢烏衣對語寄
宮樹營巢接禁闌江南花事晚疑是苦思歸

題山居圖

以下鐵笛詩

千澗沄沄一徑通長松盡入白雲中徵君更在山溪處滿谷
桃花爛熳紅

雨後雲林圖

浮雲載山山欲行
橋頭雨餘春水生
僂須借榻雲林館
臥聽仙家雞犬聲

狼山晚晴圖

樵東風雪夜無邊
一別狼山已幾年
今日江南攜畫看
玉峯十二倚青天

題芭蕉美人圖

髻雲淺露月牙彎
獨立西風意自閑
書破綠蕉雙鳳尾
不隨紅葉到人閒

題凌波仙圖

帝子乘風下九疑
含情欲去更遲遲
獨憐江草年年長
曾見凌波解佩時

題撚花仕女圖

寫罷桃花扇底詩
木香手撚小枝枝
靈犀一點春心密
不許

牆東野蜨知

水墨四香畫

玉龍聲嘶五更了綠衣倒挂樽桑曉道人衝寒酒未醒梨花零落春雲小

瑞香花

一團華蓋翠亭亭萬箇丁香露欲零日炙錦薰眠不得玉人扶起酒初醒

題柯敬仲竹木

洞庭秋盡水增波光動珊瑚碧樹柯夜半仙人騎紫鳳滿天清影月明多

題王元章畫梅

舊時月色有誰歌拔劍王郎鬢已皤惆悵東風舊詞筆南枝

香少北枝多

此詩玉山雅集作鄭元祐

四馬挾彈圖

八駿瑤池一半歸錦袍欲脫玉霄圍君王手挾流星彈莫打
慈烏繞樹飛

出獵圖

燕支花開春日暉從官游騎去如飛分明一段龍沙景白鴈
黃羊好打圍

題墨鴈

黃沙衰草羽毵毵八月天山冷不堪昨夜朔風吹過影盡將
秋色到天南

夜宴范氏莊

南弁山間多翠微池唐處處涵清暉丹泉釀酒名千日化樹
成窠大十圍童子單衣碧鶴立美人兩袖彩鸞飛臨分更作
嬉春約賸載紅船白苧衣

題孟珍玉澗畫岳陽小景

岳陽樓上望君山
山色蒼涼十二鬟
劒氣拂雲連翠黛
珮聲挑月過滄灣
洞庭水落漁船上
雲夢秋深獵客還
最憶老仙吹鐵笛
馭風時復往來間

承天閣

荊棘荒涼繞故宮
梵樓突兀畫圖中
地連滄海何由斷
月墜青天不離空
蟬螭著簷秋易雨
蒲牢吼屋夜還風
越南羈旅登臨倦
書賦囚人日月籠

題張長年雪篷

故人今在雪之濱
風雪孤篷未苦貧
二載溪頭見安道
一蓑江上覓玄真
飯烝一作風清菰米香生夜
被擁一作月白蘆花夢繞春
莫說江都錦帆事
蕪城煙雨正愁人

龍眠居士畫捫蝨圖

以下草玄閣後集

困敦游兆稽堯史真卿夜降條山裏仙官豈榮璽書紙銅符
傳信八子齒雪鼠成精真錯比妒女廟前空宣旨冑爲阿璽
三徵起金榼墮地非酒鬼巾箱以驢行萬里神仙狡獪聊復
耳青羊小兒元姓李

此詠唐張果老事注
見後璽音照武后諱

古觀潮圖

八月十八睡龍死海龜夜食羅刹水須臾海壁龕赭門地卷
銀龍薄于紙艮山移來天子宮宮前一箭隨西風劫灰欲死
蛇鬼穴婆畱朽鐵猶爭雄望海樓頭誇景好斷鰲已走金銀
島天吳一夜海水移馬蹠沙田食沙草崖山樓船歸不歸七
歲呱呱啼軋道

此詠趙宋
觀潮事

奉題子昂驕馬圖

西家驍騎驍如龍鼻端生火耳生風東家老段老且蹇有如
征南矍鑠翁西家公子誇遠服千里之行一日速東家主人

役老段不取驍騰取馴伏主人公子性各殊愛驍愛段知何
如若將夔蛇較足下胡敢並轡爭齊驅朝明西家蹄一蹶解
鞍折臂中道歇道俯仰首鳴向天蹴躡風塵愁跋鼈坐令公
子心火然顧瞻老段行在前烏乎世步誰後先東家莫厭遲
遲鞭

題履元陳君萬松圖

紫芝道人天思精南來新畫青松障東家畫水西家山積棄
陳縑忽如忘突然槎牙生肺肝元氣淋漓迫神王亟呼圓瓦
倒墨汁盡寫髯官立成仗羣爭十丈百丈身氣敵千人萬人
將交柯玉鎖混鱗甲屈鐵金繩殊骨相石鬬雷霆白日傾雨
走蜩龍青天上前身要是僧擇仁五百蜿蜒見情狀天台老
林亦畫松三株五株成冗長我家東越大松岡五鬣蒼蒼鬱
相望門前兩箇赤婆娑上有玄禽語相向雕龍梓客朝取材

伏虎將軍夜偷餉安得射洪好綃百尺強令泫陰森移疊嶂
 鼓以軒轅之瑟五十絃共寫江聲入悲壯
右寫似子昭異才子昭工畫仕女花木子懼其情過粉黛則氣乏風雲故書此詩以遺之子昭讀此詩後得無激作于公孫大娘之劍乎

跕躑歌贈劉叔芳

跕躑復跕躑佳人當好春金刀翦夫容紉作滿月輪落花游
 絲白日長年年它宅媚流光綺襦珠絡錦繡襠草裊漫地綠
 色涼揭門縛綵觀如堵恰呼三三喚五五低過不墜蹴忽高
 蛺蝶窺飛燕迴舞步矯且捷如凌波輕塵不上紅錦靴揚眉
 吐笑頰微渦江南年少黃家多劉娘劉娘奈爾何只在當年
 舊城住門前一株海棠樹
古樂府載跕躑篇為劉娘賦云江南女兒花娟始五花繡出葵花圓跕躑花上下儂文鴛雙文鴛玉連環髻斜斜馬初墮

鼙婆引
搜神記琵琶一名鼙婆女

吳門玉帳元戎府手擊銅龍踏哮虎錦貂半醉金盤春芍藥

三千嬌欲語梅卿上馬彈輦婆鵲絃振振金邏紗軟灰促節
變幹羅楓香古調翻回波四索真珠瀉銅盃三十六竿合笙
管孤鸞夜語烏絲愁朔風吹寒青草短玉環流落梨園空三
郎不在華清宮凝碧池頭散花雨天上仙班奉明主

明皇按樂圖

沈香亭前花萼下

叶戶

天街一陣催花雨海棠花妖睡初著

直略切

喚醒一聲紅芍藥金鑾供奉調清平梨園舊曲換新聲阿環
自吹范陽笛八姨獨操傷春情君不見夜游重到明月府青
鸞能歌兔能舞五雲不障蚩尤旗回首煙中萬輦鼓那知著
底梧桐雨雨聲已入淋鈴譜

題開元王孫挾彈圖

開元少年意氣雄任俠不數陳孟公文犀束帶鵲被小驕馬
颺踏如飛龍側身仰望目瞿瞿爲有流鶯在高樹兩騎聯翩

未敢前看送金丸落飛羽白頭烏啄延秋門漁陽塵起天地
昏珊瑚寶玦散原野空令野客哀王孫平原公子五色筆俗
史庸工俱辟易寫成圖畫鑒興衰未必奢淫不亡國

王若水綠衣使圖

綠衣翠頂珠冠纓西來萬里隴山青金雞一鳴天下白此鳥
一鳴天下平金精稟氣清傲直言語分明藏不得宮中未聞
家國事共愛聰明好顏色殿上袞衣誰小戲宮中錦襖搖虎
翅阜鵬御史不彈邪拜賜君王綠衣使

聽鶯曲

紫驪踏花雲滿足南陌東阡日馳逐不如幽谷黃衣郎好音
綿蠻出溪木鄰家女兒愁別離楊花却倚珠簾飛樓前關山
人未歸奈何奈何啼黃鸝

蓮花斗歌

斗在太湖之西蘭氏村斗
或作鬥山川峭絕處音斗

棟花風殘啼鴂

一作子規

舌蓮花斗上春三月斗上女郎齊踏歌輕

衫白苧飄香雪青山淡鎖薊家村使君艇子恰

一作泊

當門門前

滿樹櫻桃子手摘櫻桃招使君使君本是龍門客身脫宮袍
岸烏幘何處江南最有情新買蓮花斗上宅

小姑謠

小姑失母年十五大嫂育之嫂如母小姑急嫁嫁蠻郎雙鬟
私插金釵股大嫂泣血告小姑爾祖儀同父上柱如何世閥
不對當失身去作蠻郎婦汝貪蠻婦多金銀寧嫁華郎守賤
貧蠻郎金多不到老華人雖窶終吾身小姑不聽大嫂戒蠻
郎戰沒羊羅寨五丁一夜發郢塢官籍黃金官估賣小姑還
家嫂怒嗔棄置棄置同市門嫁衣重繡金織孫今年又嫁烏
將軍

題王母醉歸圖

瑤池春暖波如澱不與紅妝洗嬌面仙娥泛月蕊宮來催宴
瑤花開水殿麻姑滿進九霞觴金盤鮓熟夫容香歌雲緩繞
紫鸞管舞鸞淑洒青霓裳阿母嬉春淡妝束雲冠巧琢梅花
玉酒痕凝頰呼不醒扶上仙山雪毛鹿綺袍半脫露香肩飛
控不動金連錢天風吹夢渡弱水含羞倦倚雙嬋娟歸來笑
拂龍髯席汗溼鮫綃睡無力玉鉤齊上水精簾十二瑤樓月
光白吳興畫史筆如神丹青貌得瑤池真劉郎自是識仙趣
看花同賞玄都春圖中彷彿一相見何必蓬萊問清淺傻呼
青鳥報鸞箋蟠桃明日重開宴

六客亭分題送趙季文知事湖州

秋水城下碧秋山城上青水晶出宮闕雲氣到車輶風流五
馬貴六客聯華星美酒來東林朱果取洞庭奇畫掃寒蕩妍
辭約浮萍焉知後不繼高堂葺殘局送子河風道賓鴻集修

翎官奴重秉燭此筆裛蘇亭

六客亭在湖州郡園中張子野爲前六客詞東坡爲後六客詞李公擇爲郡時有張子

野劉孝叔楊元素東坡陳君舉會于碧瀾堂子野作六客詞張子野守郡時有東坡曹子方劉景文蘇伯固張秉道會于此東坡繼前作六客詞

鳳皇石

至正辛丑花朝前三日余偕華藏月亭登玉峯頂坐鳳皇石月庭索賦詩爲課十有四韻

大瀛浴火鳥滅沒失倒景玉龍挾之飛脫落疊浪頂根從太
始并勢與華嵩並琅實旣克脰玉距猶在礦馬爭灩澦堆龜
讓天梯餅神人不敢鞭怒啄欲成癭遷輕岐陽鼓扛重鳥獲
鼎坐寒彭蠡磯沈怯景陽井裘突月支頭劒磨嚴顏頸秦女
寧受跨晉士豈容醒灰歷五千劫金鑠八千頃未知金帶恩
遠却白羽影會當鳴朝陽卽都鳳飛鳴也有奇警巨手一拍飛欽師
許誰請

嬉春體四絕句

燕子衝簾過胡蜂採蜜歸折花香露溼不惜繡羅衣
水暖鴛鴦渡風寒燕燕樓桃根與桃葉都在曲江頭

月過薔薇架雕鞍未到家小娃猶帶酒攔路奪人花
花氣不成雨鶯聲都是春戎裝飛上馬疑是漢宮人

士女

小玉相呼起問春堦前草色上羅裙玉釵半墮無聊賴欲倩
牙纖理亂雲

紅梅

羅浮仙子宴瑤宮海色生春醉靨紅十二闌干明月夜九霞
帳暖睡東風

折枝海棠

金屋銀缸照宿妝一枝分得錦雲鄉梅郎底事多餘恨怪殺
珊瑚不肯香

王左轄席上夜宴

銀燭光殘午夜過鳳笙龍管雜鳴鼉佩符新賜連珠虎觴令

嚴行卷白波南國遺音誇壯士西蠻小隊舞天魔醉歸不怕
金吾禁門外一聲吹簫羅

禁酒

鐵史先生遵酒禁笙歌不上小蓬臺忍看紅雨將春去孤負
青天送月來陶令額紗勞且裏孔融手薦豈容裁洞庭春色
應無律多種黃柑作酒材

挽達兼善御史

辛卯八月
歿于南洋

黑風吹雨

一作浪

海冥冥被甲船頭夜點兵報國豈

一作但

知身有死

誓天不與賊俱生神游碧落青騾遠氣

一作怒

挾洪濤白馬迎金

置

一作廊廟

正修仁義傳史官

一作詞臣

執筆淚先傾

過沙湖書所見

五月落殘梅子雨沙湖水高三尺強大風開帆作弓滿白浪
觸船如馬狂唱歌買魚赤鬚老打鼓踏車青苧孃故人相憶

在樓上坐對玉山懷草堂

瑤花珠月二名姬

并序

春正月廿有二日偕崑山顧仲瑛雪川鄭九成大梁徐師顏讌于吳城路義道家佐酒者六姝皆蘇臺之選內有瑤花與珠月者選中之絕也義道起持觴屬客曰今日名姬對名客不可無作座客酒俱酣暘瑤花者捧硯請余題首仲瑛曰花月一對雖絕而彼此不無相妒題品稍偏當令偏者舉主人蓮花巨觥連飲之予矢口月滿十分珠有價花開第一玉無瑕

時珠月者已出主仲瑛有意收之瑤花者未事人也

兩姬

大喜客皆起坐交觥予就醉矣明日足詩曰

新年春色在鄰家隊子三三聚館娃月滿十分珠有價花開第一玉無瑕蒲萄酒灩沈櫻顚翡翠裙翻踏月牙老子圍紅先點筆詩成勉飲玉蓮華

楊妃襪

天寶年來窄袖留幾隨錦被暖香篝月生簾影初弦夜水浸
蓮花一瓣秋塵玷翠盤思亂滾香黏金鞵憶微兒縣知賜浴
華清日花底棚兒碧眼偷

夜坐

以下東維子集

日落羣動息張燈坐草堂浮生百年事清坐一爐香謀拙鄰
人嘆幽棲世慮忘吟詩不知寐華月自流光

賦春夢漣

黃桺城邊風雨多白頭宮女有遺歌東坡哨徧無知己賴有
人間春夢漣

送貢尚書入閩

繡衣經略南來後漕運尚書又入閩萬里銅鹽開越嶠千艘
升斗貿蕃人香熏茉莉春醒重葉卷檳榔曉饌頻海道東歸

閑未得法冠重戴髮如銀

寄秋淵沈鍊師

所居號琅玕所

琅玕種得三千箇箇箇瓊臺玉樹齊秋淨雙鳬青柳曲夜寒
一虎大茅西長茸不著花猫獵溪竹時聞翠羽啼老我所須
唯鐵杖不須太乙乞青藜

用韻復雲松老人華陽巾歌

君不見獬豸不識字高柱削鐵堅白簡孰辨賢不賢又不見
鷄鶡偏尚武高屋壓虎肩五兵不理長酣眠鐵崖老狂者強
項如董宣小巾製子夏正要江東傳人間緋紫揜已蛻風中
蟬脫巾漉酒東籬邊吳淞老褐來賀我倒冠共醉春風前我
歌此歌君拍手東壺西閬開洞天洞天之鶴爲我雙回旋

大樹歌爲馮困如賦

東柯溪頭三大樹水溪土厚崖石牢一株石茶粲冬嶠紅若

少鏡鎔冰濤兩株老檜披霜幹青如連弁翹雙鰲不知人間
富貴植青紫草亾木卒紛如毛漢家根株歷千歲當時大將
誇人豪只今子孫仗大義昧始尚薄巾車勞三槐風雲慶有
待荆湯火死已逃金鴉倒立海底景白鳳夜燄風中膏蟠
柯骨露黑石虎奇幹手接蒼山猱惡氛西起白日翳恍惚大
將排旌旄東柯東柯濟時具豈無兵家文武韜摩挲大樹日
酣臥不甯卽僞從韃橐始知后皇受命乞獨正神明扶植冰
霜操我來飲我中山醪脫巾挂樹三花高大槐太守夢楚國
大梅美人臨漢皋大榭老雄侍我酒長箏亦卽金絲槽醉歌
寫入嘉樹傳竊比橘頌騷人騷

毘陵行

記十月
七日事

孟冬四將發句吳彎弓誓落雙髯顱智謀無過史萬葉嫖姚
無加李金吾前茅已作破竹刃三覆乃裹含沙狙常山長蛇

一斷尾卽墨怒牯齊犇踡玉蕊孤軍呼庚癸阜鴉萬甲迷模
糊江南長技江北無蒲牢一吼千鯨呼赤杠卓入鐵甕戶錢
翅橫截丹陽湖擣虛之策不出此赤手可縛生於菟當時上
將陷江都至今莫贖千金軀後來飛將慎勿疎襄王城頭啼
白鳥如何臨期易將犯兵忌何必不讀孫吳書

送謝太守

湖秀今三郡循良第一人武林非復舊文比要圖新海岳東
南會湖江左右鄰曾開天水國直問尾箕津府大同京尹居
崇異國賓提封家萬戶易俗力千鈞惜也承平久於焉值亂
頻煙華餘故市風物感殘民今日裒匡濟乘時好拊循念君
多意氣滿腹貯精神別地梅凝曙寒江桺孕春過船沙沒屐
駐旆雪埋輪龜勉猶無及窮愁不敢嗔贈言知面赧取醉寄

情真勿袖烹鮮手須閒牧犢身推誠歸簡妙植善息頑囂亂
後無家世漁中有隱淪千年黃鶴返萬里白鷗親莫學張京
兆應如召信臣貂蟬從岳牧圖畫可麒麟

紀夢中作書遺報復元

九月九如三月三五湖山水盡清酣西瞻林屋三天近南上
風颿一日貪潮蹴豔堆青不動雨縣花洞氣長谿月中簫鼓
神君殿雲下龍鸞帝子驂猛虎護林依董奉毒蛇避井施蘇
耽膳脂塘暗清塵起縹緲峯高碧落參落日大堤花果杲西
風茂苑草毵毵越人仕倦秋思棗吳女情多夜擘柑自是王
仁僧好伴爲予善唱望江南

送客洞庭西

以下從各選本錄入

送客洞庭西雷堆青兩兩陳殿出空明吳城連蒼莽春隨湖
色淡風將潮聲長楊柳讀書堂芙蓉採菱漿懷人故未休望

望欲成往

淵明撫松圖

孤松手自植保此貞且固微微歲寒心孰樂我遲莫畱侯報
韓仇還尋赤松去後生同一心成敗顧隨遇歸來撫孤松猶
是晉時樹

游虎丘與句曲張貞居遂昌鄭明德毘陵倪元鎮各
追和東坡畱題石壁詩韻

漾舟海湧西坡陲緣素嶺陟彼闔閭丘俯瞰千尺井至今井
中龍上應星耿耿居然辟歷飛殘腥洗蛙黷已知湛盧精古
憤裂幽礦甬隨魚腸逆寒鋒助殘猛後來入郢功勇志亦馳
騁丹臺納嫵娟金鎚碎骨鯁坐令金精氣龍虎散俄頃花凝
鐵壁堅木根去聲山骨冷何哉幽獨魂白日歌夜永我從陶朱
來青山異風景豈無西家兒池頭弄風影五湖尚浮桴煙波

不須請

元夕與婦飲

問夜夜何其睠茲燈火夕月出屋東頭照見琴與用老婦紀
節序清夜羅酒席右蠻舞裊裊左瓊歌昔昔婦起勸我酒壽
我歲千百仰唾天上蛛誓作酒中魄勸君飲此酒呼月爲酒
客婦言自可聽爲之浮大白

老婦曰人言天孫思妃不如月娥守孤不知
羿婦相棄以犇曷若織女相望以久之愈也

玉蓮曲爲金陵張氏妓賦

笑容出五沃蕩漾水中央託根遍七澤濯影照滄浪亭亭立
淤泥靜試岳井妝使君青雀舫夜夜宿花傍爲結明璫蓋覆
此並頭芳洛妃解瑤珮王母薦瓊觴飢餐玲瓏玉渴飲醍醐
漿白日忽成晚粉面落秋霜窟窀不結子柔絲斷藕腸波寒
沈獺傘愁殺野鴛鴦

孤憤一章和夢菴韻

楊子哭停雲歷數死生友首哭台州帥再哭江州守三哭天水頭四哭淮渦口五哭六哭餘英風復何有確山截罵舌宛湖沈斫首嗟嗟狗國臣培養百年久猛去晉終背或死魏何咎而況鳴吠才蠢蠢小雞狗弋鴻羽旣怯釣魚餌滋誘根撥那望實蒂分尚懷藕珠雀旣失彈火鼠重被垢長包中土心相詫模稜手外壺空倒戈中薄官敝筭祝宗祈未死循牆駭還走長涕未上書窮辭空還酒驚見夢菴詩一首洒百醜大義揭日月孤忠縣畎畝亂厭出下泉尸極還易
裏君郭泰

交夜梓飣春韭和君孤憤章澆致酒一斗

夕陽亭

夕陽亭馬超超車驅驅問高貴今何如夕陽亭行且止白沙一信南風起千載髑髏夜生齒項成大府攝鬼豪論功闕剪當塗高竹書小兒旣有罪夕陽老魅誅何逃於乎桐宮空斃

金屑竿鴛鴦檣中牛繼馬

鐵崖古樂府外有詠史詩門人顧亮所編多吳編所未載者鐵崖樂府自吳復章疏所編者名曰鐵雅而詠史詩又名爲鐵史云

大健兒

唐太宗常曰當今名將惟李勣道宗萬徹而已勣道宗雖不能大勝亦不大敗至萬徹非大勝卽大敗徹自建成敗後嘗隱于終南

山晚節再出乃爲房氏不肖子所陷君子惜之

燉煌有力士自稱大健兒氣吞黃狼蠹義扶白鵲旗李家春
宮子去逐春宮起海池敵虬髯不議真天子天子親評三大
將鴨綠歸來肆驕宕快刀不斫兩牝妖臂足甘爲羣鼠葬老
荆盜弄金烏丸手搥血日夢中還何如短衣疋馬射猛虎老
死不出終南山

孔巢父

孔巢父竹溪流竹溪之水可飲牛胡爲去干肉食謀孔巢父
盍歸來叶河北虎幸斃河中虎方威孔巢父不歸去十年東
海迷煙霧釣竿空負珊瑚樹

警枕詞

吳越王錢鏐自少在軍中夜未嘗寐倦極則就圓木小枕或枕大鈴寐熟輒欹而寤名曰警枕置粉盤于臥內有所記則書盤中

比老不倦或寢方酣外有白事者令侍女振鈴即寤時彈銅丸于樓牆之外以警直覺者嘗微行夜叩北門吏不官啓關曰雖大王來亦

不啓乃自他門入明

日召北門吏厚賜之

不睡龍醒復醒珊瑚圓木搖金鈴五花寶簟芙蓉屏銅盤雪粉香淺清樓牆銅彈飛霹靂夜半更奴起辟易圓木功無與敵吳越封疆平地闢四世三王安衽席

三閣圖

金陵新閣空中起虎踞龍蟠鳳雙椅沈檀雕柱闕玉螭麗華吹笙綵雲裏水晶簾空瀟明月三十六宮白于水紅塵巴馬四百秋梁末童謠五城步障五花球綵繒山頭蓋宮殿山前十二銀潢流健娥五百曳錦纜金蓮吐影上下金銀州二三狎客混歌舞中有酒悲淚如雨嘉州諷諫三閣圖秦川別幸千花株回鶻隊鴉羣呼夜半卷土昌瀘渝黃茅縛髻口銜壁草降表

王中書嗚呼玉樹聲中作唐虜門外崇韜是擒虎

李鐵鎗歌

并序

鐵鎗封萬戶至正壬辰七月二十日破賊于杭予嘗歌以美之是年九月不幸死于昱關復爲歌些之

李鐵鎗人之傑將之強手持鐵鎗丈二長鐵鎗入手烏龍驤
龍精射之落攬搶皇帝十有二載秋七月紅兇西來寇西浙
防關健兒走惶惶鐵鎗一怒目皆裂十萬赭衣暗城闕鐵鎗
烏龍去明滅須臾化作風雨來淨洗銅城滿城血嗚呼殪猘
獠屠封狼鐵鎗之鋒無與當胡爲將星昨夜墜昱關鐵鎗一
折天無光天無光人偃偃雲臺倚天雲潛傷天子贈忠良祠
以血食冬青鄉嗚呼歸來乎鐵鎗

鐵城謠

并序

張司業有築城詞嫌其嘽緩無沈痛迫切之警今補之

蒸土築城城上鐵北風一夜吹作雪君不見銅駝關外鐵甕
堆中填白骨外塗血髑髏作聲穿鬼穴銅駝崩鐵甕裂

又鐵甕
杵歌云

亟亟城城亟成小兒齊唱杵歌聲杵歌傳作睢陽曲中有哭聲能陷城疊疊石石石嶽
嶽立竿作表齊竿旌阿誰造得雲梯子剗地過城百尺高其詩音調悽苦用意與此相近

冬青塚篇

老羝夜射錢塘潮天山兩乳王氣消禿妖尚壓龍虎怪浮圖
千尺高岩堯文山老客智且勇夜舟拔山山不運江南石馬
久不嘶塚上冬青今已拱百年父老憤填曾不知巧手奪天
工冬青之木鬱蔥蔥六檀更樹蒲門東

盲老公

刺拜住哥臺長戊戌十月二十三日黨海寇州壯
士椎殺之邁里古思將黃中禽拜住盡戮其家

盲老公侍御史崇臺半面呼天子白米紅鹽十萬家鳳笙龍
管三千指門前養客皆天驕一客解散千黃苗太阿之枋忽
倒擲槌殺義鵲招羣梟一客死百客辱萬夫怒一夫獨生縛
老盲來作俘百口賤良一日戮獨遣小娥年十五罾金買身

潛出戶默作倡家馬

銅將軍

刺偽相張士信丁未六月六日爲龍井砲擊死

銅將軍無目視有準無耳聽有神高紗紅帽鐵篙子南來開
府稱藩臣兵強國富結四鄰上稟正朔天王尊阿弟柱國秉
國鈞僭逼大兄稱孤君案前火勢十妖嬖後宮春豔千花嬪
水犀萬弩填震澤河丁萬鍾輸茅津神愁鬼憤哭萬民銅將
軍天假手疾雷一擊粉碎千金身斬妖蔓拔禍根烈火三日
燒碧雲鐵篙子面縛西向爲吳賓

周鐵星

張氏亡國亡于其弟士信趣亡於毒斂臣周振振山陽鐵冶子以聚斂功至上卿伏誅曰錢穀鹽鐵籍皆在我汝國欲富當勿

殺我主者怒曰亡國賊不知死罪尚敢言是耶速殺之吳人快之或手額謝天曰今日天開眼也

周鐵星國上卿談申韓爲法經釘箠杖爲國刑千倉萬庫內
外盈十有三賦爭科名周鐵星鞭笞箕斂無時停開血河築
血城血戰艦血軍營刮民膏啖民髓六郡赤骨填芻靈齊雲

倚天一日傾鐵星
亡國法當烹尚將六郡金
谷數丐死萬一
克虞衡鳴呼周鐵星
十抽一椎百萬釘誓剗爾體
作溺嬰鐵
星碎地啓瞶天開顚音

蔡葉行

刺佞倖臣蔡文葉德張氏亡國由大弟致此實由二佞
丁未春二佞伏誅于臺城風乾其尸于秤刑者一月

君不見僞吳兄弟四六
七十年強兵富金穀大兄垂旒不下
堂小弟秉鈞獨當國山陰蔡藥師雲陽葉星卜朝坐白玉堂
莫宿黃金屋文不談周召武不論頗牧機務託腹心邊策憑
耳目弄臣什什引膝前骨鯁孤孤內囚牯去年東臺殺普化
今年南垣殺鐵木鳳陵剖棺取含珠鯨海刮商刼沈玉粥官
隨地進妖豔籠貨無時滿坑谷西風卷地來六郡下披竹朽
索不御六馬奔腐木郗支五樓覆大越先罪魁餘殃盡孥戮
寄謝悠悠佞倖兒福不盈眦禍連族何如吳門市賣藥賣卜
餓死亦足

金盤美人

刺爲謝馬潘某潘娶美倡凡數十內一蘇氏才色兼美醉後尋其罪殺之以金盤薦其首于客宴絕類北齊主事國公伏誅

臺城投其首于溷

昨夜金牀喜喜薦美人體今日金盤愁愁薦美人頭明朝使

君在何處溷中人溺血骷髏君不見東山琵琶音骨夜夜鬼

語啼笙簇

北齊主納娼婦薛氏清河王岳嘗因其娼迎之至第主怒殺其娼薛甚寵于帝久之主忽思其與岳通斬首藏于裏出東山宴飲揆其首投于盤支

解其屍弄其髀爲琵琶復收髀流涕曰佳人難再得載屍出葬主被髮步哭送之

老客婦謠

一作鍼線婦

老客婦老客婦行年七十又一九一作鍼線婦鍼線婦黃塵滿面蓬滿首少年嫁夫甚

分明夫死猶存舊箕帚南山阿妹北山姨勸我一作予再嫁我一作

力辭涉江一作水采蓮上山采薜一作薇采蓮采薜一作采薇可以療饑夜

來道一作昨日偶過娼一作閭門首娼一作閭門蕭一作蕭然驚一作老醜老醜自有

能養身一作養身自有能萬兩黃金在纖手上天織得一作繡出雲錦章繡成願

補一作玄黼舜衣裳舜衣裳爲一作與妾佩一作立古意一作節揚清光辨妾不是

邯鄲娼

明太祖初卽位遣翰林詹同奉幣徵維禎維禎賦此詩同爲作老客婦傳維禎又有詩曰皇帝書徵老秀才秀才懶下讀書臺商山本爲儲君出黃石終期孺子來太守枉於堂下拜使臣空向日邊回老夫一管春秋筆畱向曾中取次裁宋景濂詩云不受君王五色詔白衣宣至白衣還蓋記其實也

邯鄲美人二首

爲趙娘賦也

邯鄲市上美人家
美人小襪青月牙
繡靴對著平頭鴉
平頭鴉鴉場下包銀壺
馱細馬
裙翻桺脚垂青空
水花吹亂秋芙蓉
須臾氣喘如渴虹
如渴虹索銀癭轉轆轤
飲金井

二月十二日玉山人買百花船泊山塘橋下呼瓊花
翠屏二姬招予與張渥叔厚于立彥成游虎阜俄而
雪霰交作未果此行先以此詩寫寄就要諸公各和
百華樓船高八柱
主人春游約春渚
山塘橋下風兼雨
正值
灌壇西海婦桃花
街口小蠻孌腰身
楊桺隨風揚翡翠
屏溪

未甯出蹋歌直待踏春陽喜聞晴語聲谷谷明朝豫作花游
曲小蠻約伴合吹笙解調江南有于鵠

乙酉四月二日與蔣桂軒伯仲諸友同泛震澤大小雷
望洞庭之峯吹笛飲酒乘月而歸蓋不異老杜坡仙
游漢陂赤壁也舟中各賦詩余賦二十韻爲首唱

江國春歸夏云孟十日五日風雨橫具區擺闔浪如山吳兒
善泅并敢榜今朝氣候昨不同湖頭無雨兼無風小施祠前
棹謳發樓船下水如游龍大雷不動小雷伏銀海空青光奪
目魚龍百怪暫被除平展輕綃三百幅牙樯五兩空中舉陳
瀆村中過撾鼓燒筍旣憩彭城灣采蓴復渡楊家浦中流颺
發占莫徭須臾鯨浪吼蒲牢長年捩柁稱好手小腰失箸生
寒毛蔣家二仲素奇士更有登高羊叔子老崖鐵笛上青雲
玉龍穿空卷秋水船頭可奈風水何拔劍擬斫生蛟鼉人生

哀樂固相半神靈涉意母過多鴟夷入海人不識漁媪漁王
配寒食鄉里小兒舞竹枝乞與神童舞銅狄我聞洞庭之峯
其橘大如斗剖而食之見奕叟弱水不隔天表流獨我胡爲
牛馬走五湖挂席從此首

題楊妃春睡圖

沈香亭前燕來後三郎鼓中放花柳西宮困人春最先華清
溶溶煖如酒雪肢欲透紅薔薇錦襠卸盡流蘇幃小蓮侍擁
扶不起翠被卷作梨雲飛蟠龍髻重未勝綰燕釵半落犀梳
偃晚漏壺中水聲遠簾外日斜花影轉琵琶未受宣喚促睡
重黎腰春正熟不知小裯思塞酥夢中化作銜花鹿

素雲引爲玄霜公子賦

玄霜璜溪呂氏月臺名也

清河美人姑射神夢中認得梨花雲朝朝暮暮不肯雨璫枝
玉葉光輪困艷妝不染臙脂水輕歌欲遏鸞笙起五花細馬

馱春風羅帶飄飄白鵬尾柔情易逐綵霞空半掩春衣嘶玉
龍九點峯前指歸路家住松陵東復東桃葉桃根春已暮又
逐飛花度江去梨園昨夜春雨多回首孤飛在何處何處孤
飛去復來直是玄霜百尺臺

和楊孟載春愁曲之什

小樓日日聽雨臥輕雲作團拂簾過金黃楊桺葉初勻雪色
棠梨花半破東家蝴蝶飛無數西鄰燕子來兩箇玉關萬里
尺書稀春風不侶春愁大

一作羞殺牡丹如斗大

送曹生之京

十載辭京國常懷玉筍班鳳麈游僻水虎豹啓天關海樹分
秦雨江雲隔楚山壯游須努力況子正紅顏

題蘇武牧羊圖

未入麒麟閣時時望帝鄉寄書元有鴈食雪不離羊旄盡風

霜節心懸日月光李陵何以別涕淚滿河梁

送用上人之金陵

東土帝王州高僧汗漫游
衣收夜雨洗鉢渡江流草發金
銀穴花飛霹靂溝攜詩見短李應下讀書樓

送楊生琰歸溧陽

之子吾同姓相逢已道南春衣彫白苧佳樹長黃柑雨淡潛
龍寺天清漂女潭蒲公讀書處白石有新菴

翡翠巢

羅浮花使先春到來傷玉樓淡處巢舞雪豔翻楊柳絮歌雲
輕壓海棠梢屏開時露鴉頭襪絃斷應銜鳳觜膠却笑雪衣
娘太劣雕籠淡鎖未全教

席上賦

蘿洞蘭煙繞燭微三更三點妓成圍魚吹綠酒常雙躍鴈列

瑤箏不獨飛隔座送闌喧中射當筵呼摻促夏衣鷄鳴樂極
翻悽斷闕月纖纖照影歸

嬉春體五首

錢塘湖上作一云賦俏唐
體遺錢塘詩人學杜者

今朝立春好天氣況是太平朝野時走向南鄰覓酒伴還從
西墅買花枝陶令久辭彭澤縣山公祇愛習家池空春帖子
題贈爾日日春游日日空

西子湖頭春色濃望湖樓下水連空桺條千樹僧眼碧桃花
一株人面紅天氣渾如曲江節野客正是杜陵翁得錢沽酒
勿復較如此好裏誰與同

何處被花惱不徹嬉春最好是湖邊不須東家借騎馬自可
西津買蹋船燕子繞林紅雨亂鳬雛衝岸浪花圓段家橋頭
猩色酒重典春衣沽十千

入山十里清涼國三百樓臺迤邐開岳王墳前弔東渡隱君

寺裏話西來接果黃猿呼一箇揆花白鹿走千迴風流文采
湖山主坡白應須屬有才

楊子休官日日閑桐江新棹酒船還叮嚀舊客兼新客漫浪
南山與北山好裏急就一斗飲佳人能作五絃彈君看此地
經游輦彷彿春風夢未殘

玉山主人云所謂嬉春體卽老杜以江上誰家桃
柳枝春寒細雨出疎籬爲新體也先生自謂代之

詩人爲宋體所格
故作此體變之云

又湖州作四首

書寄班恕齊試溫
生筆寫入前卷

三月三日雨新晴相邀春伴冶西城卽倩山妻紗帽辦更煩
小將犢車輕好語啼春秦吉了仙姿當酒董雙成憑君多唱
嬉春曲老子江南最有情

五十狂夫心尚孩不容俗物相填狃興來自控玉蹄馬醉後
不辭金當杯海燕來時芹葉小野鷺啼處菜花開春衫已備
紅油蓋不怕城南小雨催

長城小姬如小憐紅絲新上琵琶絃可人座上三株樹美酒
沙頭雙玉船小洞桃花落香屑大堤楊柳埽晴煙明朝紗帽
青藜杖更訪東林十八仙

湖州野客似玄真水晶宮中烏角巾得句時過張外史學書
不讓管夫人綦尋東老林中橘飯煮西施廟下莼無雨無風
二三月道人將客正嬉春

無題效商隱體四首

與袁子
英同賦

當軒隊子立紅靴龜甲屏風擁絳紗公子銀瓶分汗酒佳人
金勝翦春花曲調青鳳歌聲轉觥進黃鵠舞勢斜五十男兒
頭未白臨流洗馬走紅沙

主家院落近連昌燕子歸來舊杏梁金埒近收青海駿錦籠
初教雪衣娘卷衣甲帳春容曉吹笛西樓月色涼今夜阿鴻
新進劇黃金小帶荔枝裝

二月皇都花滿城，美人多病苦多情。
一雙孔雀銜青綬，十二飛鴻上錦箏。
酒掬珍珠傳玉掌，羹分甘露倒銀罍。
不堪容易少年事，一作潘郎老爭遣狂夫一作施朱作後生。
天街如水夜初涼，照室銅盤壁月光。
別院三千紅芍藥，洞房七十紫鴛鴦。
繡靴跼踖句驪樣，羅帕垂彎女直妝。
願爾康強好眠食，百年歡樂未渠央。

和蔡彥文題虞伯生張伯雨倡和帖

髯駕已聞攀鼎水，劫灰又見話昆池。
劒藏玉几山中記，筆記玄卿天上碑。
舊譜紫霞吹鶴骨，新章白雪寫烏絲。
逃身我未學仙去，何處還丹日月遲。

送理問王叔明

金湯回首是邪非，不用千年感令威。
富貴向人談往夢，干戈當自息危機。
雄風豪雨將春去，剩水殘山送客歸。
聞說清溪

黃鶴在鶴邊仍有釣魚磯

丹鳳樓

十二危樓百尺梯飛飛丹鳳五雲齊
天垂翠蓋東皇近地拂銀河北斗低
花靨秋空戎馬順神燈夜燭海雞啼
仙童與報麻姑會應說蓬萊水又西

夜坐

雨過虛亭生夜涼朦朧素月照芳塘
螢穿溼竹流星暗魚動輕荷墜露香
起舞劉琨肝膽在驚秋潘岳鬢毛蒼
候蟲先報砧聲近不待蓴鱸憶故鄉

悼李忠襄王

羅山進士著戎衣淚落神州事已非
百二山河驚易改三千君子誓同歸
天戈已付唐裴度客七那知蜀費禕
賴有佳兒功業在東人重望捷淮淝

聞定相死寇

丙申六月死京口

三朝勳舊半彫零京口雄藩孰老成可是叔孫祈欲死託吉喜

聞先軫面如生東園草暗銅駝陌北固潮平鐵甕城珍重子

儀誰可繼三軍氣色倍精明

書錢唐七月廿三日事

至正丙申

兒童十日報日鬪前後妖墓生燧光十日夜月食如紅銅瓠子勢方吞鮓甕

瓠子苗氏也人鮓甕地名蘄州血已到錢唐宋謠云惟有蘄黃兩州血至今流不到錢唐火鯁東掣千尋鎖

鐵馬西馳半段搶老左老童紫微老人迷醉眼綵紅猶挂米鹽商自吳

門被寇鹽米不通寇入杭先三日運餉至省臣喜為之挂紅

和盧養元書事二首

中原煙火半丘墟樓櫓相望白下孤蕃廝夜歌銅鈎鏐蠻酋

春醉錦席廡北征解賦盧才子西事時談劇霸都莫上姓名

丞相府老夫著論學潛夫先生有救時論二首曰人心論巨室論及丞相長書一通皆不出名氏投于政事堂

年年苛吏傷王政往往紅眠叛教條漳水有時生小草洞庭
無地種餘苗伏龍雛鳳應勞訪綺季黃公底用招聞道紫樞
開錫燕寶釘大鈐賜天驕

時哈相招東
南三處士

多景樓

極目心情獨倚樓荻花楓葉滿江秋地雄吳楚東南會水接
荆揚上下流鐵甕百年春雨夢銅駝萬里夕陽愁西風歷歷
來征鴈又帶邊聲過石頭

新省呈右相及藩參諸公

大省新開方岳重人間第二紫微垣丹池鳳浴江湖淺温室
花開雨露繁天柱星辰高北極海門日月遠東藩相君大業
憑誰賦白髮詞臣詔立言

至正廿三年四月淮南王左相微行淞江步謁草玄
閣夜移酒船宴閣所

微行誰識王丞相草履過門如野人太史遙遙瞻紫氣老夫
急急裏烏巾子陵故友終辭漢張祿先生又入秦休說五湖
天樣闊扁舟何處不容身

送王筍生往吳大府之聘兼簡國寶樞相賓卿客省
近報淮吳張柱國樓船遣使聘嘉賓漢家自有無雙士趙客
何勞十九人天上瓊花回后土江南杜宇到天津若逢呂相
煩相問應有奇書痛絕秦

送呂左轄

名珍

還越

保障南藩第一功未容若木挂雕弓露書誓翦金牀兔壯氣
平吞黑槊公萬里天威龍虎北五雲佳氣鳳皇東麥城又報
捷書至江上將軍是呂蒙

送僧歸日本

東風昨夜來鄉國又見堦前吳草青金錫躡空靈鳥逝寶珠

嗅海毒龍腥車輪日出扶桑樹笠蓋天傾北極星我欲東夸
訪文獻歸來中土校全經

芝雲堂分韻得對字

窮冬積繁陰快雨不破塊問途玉山下繫船桃溪匯主人聞
客來把酒欣相徠窈窕雙歌聲嬋娟兩眉黛談笑方云云妍
媿各成態憶昔獻策時日炯重瞳對下馬宴瓊林宮花出西
內俯仰三十年同袍幾人在明當理行舟天遠征鴻背那能
事煩劇曉出星猶戴行當謝冠冕一作理歸山陽耒

湖光山色樓

仙家十二樓俯瞰芙蓉渚象田耕玉煙龍氣生珠雨鳳麟遠
水接空濛小瀛夜折蓬萊股蘭臺美人能楚語十三鴈急孤
鸞舞仙人醉騎黃鶴來酣揮落日使倒迴翦取瑤田一稜歸
滿天鐵笛走春雷

玉山草堂雅集又題

我常被酒玉山堂風物于人引興長銀絲蓴薦野鴨炙

段作金

栗瓜取西楊莊山頭雲氣或成虎溪上仙人多訝羊何處行
春柘枝鼓閬州竹枝歌女郎

奉謝玉山假僦屋

玉山長者有高義乞與山人僦屋金駟馬一時皆上客青娥
三日有遺音西山湧海當秋後南斗流江入夜淡更報大茅
張外史興來須抱小雷琴

春日有懷玉山主人

梨花枝外雨冥冥宿酒朝來尚未醒倚砌空男偏婀娜隔窗
鸚鵡太丁寧紫鸞簫管和瑤瑟金鴨香爐倚繡屏青李來禽
臨已徧定從白鵲授黃庭

懷玉山一首書珠簾氏便面

五月江聲入閣寒故人西望倚闌干珠簾新卷西山雨第一
峯前獨自看

湖上感事漫成四絕奉寄玉山

湖水碧于天湖雲薄似煙鴛鴦不驚亂飛過岳墳前
湖水明于鏡湖泥濁似涇祇應萇血在染得水華清
海嶠浮西日關梁轉北風蘇郎書未返愁絕鴈來紅
將石星空墮靈山鳳不飛惟餘灞頭水西去復東歸

與客登望海樓作錄寄玉山主人

蜚子雨開江上臺江頭野老不勝哀蜃將樓閣空中落鰲引
旌旗月下來保障許誰爲尹鐸事諧無復問文開可憐歌舞
舊城闕又是昆明幾劫灰

媚媚秋風起洞庭銀州宮闕渺空青客星石落江龍動神馬
潮來海雨腥弱水無時通漢使赭峯何事受秦刑遠人新到

三韓國中土文明聚五星

同鄴九成過玉山舟中聯句

城角初升旭日遲
舵樓東向起遐瞻
鰲頭直下凝雲暗

楊鷁

尾徐開破浪恬
野色微明金水曲

鄴

清江隱見玉山尖
雨收

幕燕簷牙起

楊

風颭檣烏帆
腹添波影白翻鷗
箇箇

鄴

燒痕

青出麥纖纖
弋來野鷺毛全蛻

楊

筍得冰魚口尚噉
解籜上

萌蓮蒨苦

鄴

潑醅新盎蜜脾甜
避船好鳥機先識

楊

入座江

花手自拈未必江山惟客有

鄴

也知吏隱許吾兼
桃花不隔

仙源路詩就寧辭晷刻淹

楊

席上作

江南處處烽煙起
海上年年御酒來
如此烽煙如此酒
老夫

裹抱幾時開

戴冠濯纓亭筆記張士誠據姑蘇元主以上尊酒賜士誠士誠設宴以饗使者楊廉夫與焉卽席賦詩云云士誠得詩甚慚

可閒老人張昱

昱字光弼廬陵人少事虞文靖公集得詩法焉又爲張
潞公翥所知左丞楊完者鎮江浙用才略參謀軍府事
遷左右司員外郎行樞密院判官左丞死棄官不出張
士誠禮致之不屈策其必敗題蕉葉以寓志與周伯溫
楊廉夫輩交游最相得張氏亡明太祖徵至京師閔其
老曰可閒矣厚賜遣還因自號可閒老人徜徉西湖山
水間年八十三卒其生平所作散亡已多楊文貞公士
奇搜得其遺藁爲之序曰虞文靖才高識廣其詩浩博
而不肆變化而不窮而一宿于正先生之詩氣宇閎壯
節制老成而從容雅則稱其所傳元季用兵藩府僚屬
多侵官怙勢惟光弼以詩酒自娛超然物表退居西湖
之壽安坊貧無以葺廬凌彥翀爲疏募焉酒閒爲瞿宗

吉誦歌風臺詩以界尺擊案淵淵作金石聲笑曰我死
埋骨湖上顓曰詩人張負外墓足矣錢牧齋列朝詩集
次光弼于廉夫之後皆以元官終其身者也

行路難

鴻鴈及秋來玄鳥先社去俱生亭毒內羽翼乃不遇翔者不
知水流者不知山世事每如此人生行路難

少年行

看取木槿花朝榮夕已萎芳容有彫謝膩澤何所施壽命如
可長仙人今何之高堂有歌舞及此少年時

美女篇

燕趙有美女紅蓮映綠荷珮環彫夜玉團扇畫春羅流盼星
光動曳裾雲氣多回車南陌上誰不駐鳴珂

晚春辭

暄風日夜起春到亦已久清晨卷簾坐惆悵閨中婦憑闌暗
垂淚對花嬾擡手昨宵夢夫婿白馬章臺走結成合歡帶自
置妾懷袖覺來風張幔唬鳥在高柳空織迴文錦佳期竟何
有

上巳日杭州府學教授徐一夔四齋訓導拉遊智果
寺訪東坡題參寥泉

佳遊在上巳屬此清明前春景已云宴風光猶未暄往尋智
果寺竟得參寥泉雲物豈殊昔人世自更遷邈哉長公咏高
吟憶當年我輩復登臨花界何因緣古佛儼香閣眞詮積華
軒境超萬念空道勝諸妄指緬懷此會難徘徊未云還申章
續芳藻冀或來者傳

妙高院大方屋上人

碧岑日在望雨雪阻登臨二客從事者扶藜長松陰綠雲及

上方步履皆黃金佛香出寶閣一息契初心心如白蓮花塵
垢何由侵攢眉入社後此會還可尋廬山得遠公法侶滿東
林虎溪偶然事傳笑直至今我輩仍避俗屋師誠可欽

舟行即事

舟行如虛空上下天光裏中宵撤前幔鯨星在清泚天河橫
未落北斗當面指涼風波上來吹皺青天綺蘆洲集夜禽聒
聒鳴不已惡聲雖擾眠清景則可喜却思車馬塵此時動城
市

唐太宗駿馬圖

昭陵石刻今無有絹素乃能存不朽當時奇骨濟時艱駕馭
盡入天人手隋家再世俱凡庸不知肘腋生英雄晉陽奮起
六駿馬蹴蹋大海波濤紅帝王一出萬邦定干戈四指羣小
空凌煙勲臣盡圖畫一旦冒遺汗血功嗚呼何從得此樣規

模却與石刻同乃知帝王所馭是龍種豈可求之凡馬中唐家開基三百載展卷尚覺來英風

張建封擊毬圖

唐家風流尚毬馬中外靡然爲之化徐州節度張建封坐領東藩示閒暇長簫短吹行相隨以此慢遊爲日夜玉山滿馬醉扶歸正及樓頭望春罷孔雀屏圍次第開黃金買得春無價不教白日向西馳只許黃河向東瀉使君死後誰登臨燕子不來風雨浚綠珠甘守珊瑚樹文君獨宿鴛鴦衾當其意氣傾朝野官信人無百年者萬言猶在從事書一幅空遺後人畫

五王行春圖

開元天子達四聰羽旄管籥行相從當時從駕驪山者宰相猶是璟與崇華萼樓中雲氣裏兄弟同眠復同起玉環一旦

入淡宮大枕長衾冷如水興慶池頭花樹邊梨園小部俱嬋娟楊家姊妹夜遊處銀燭萬條生紫煙寧知樂極哀方始羯鼓未終鼙鼓起袞斜西幸雨淋鈴回首長安幾千里

白翎雀歌

烏桓城下白翎雀雄鳴雌隨求飲啄有時決起天上飛告訴生來羽毛弱西河伶人火倪赤能以絲聲代禽臆象牙指撥十三絃宛轉繁音哀且急女真處子舞進觴團衫鞞帶分兩傍玉纖一作質羅袖柘枝體要與雀聲相頡頏朝彈莫彈白翎雀貴人聽之以爲樂變化春光指顧間萬蕊千花動絃索只今蕭條河水邊宮庭毀盡沙依然傷哉不聞白翎雀但見落日生寒煙

題玉朋梅界畫大都池館圖樣

元朝人

國初以來好時節冶綠妖紅蓋阡陌樂遊盡是勳貴家人鬧

馬嘶聽不得細漆闌干輦子車同載女子如薜花車中馬上
日相許蝴蝶夢滿東西家牡丹臺畔夜如晝花照銀鐙大於
斗正月飲到三月中樂地歡天古無有一朝花謝春復歸門
鎖池園空綠苔簾前塵覆珊瑚樹案上蝶棲鸚鵡杯豪華盡
逐東流往百年丹青化草莽當時命酒徵歌人此日題詩畫
圖上

織錦詞

行家織錦成染別牡丹花紅杏花白作雙紫燕對銜春一疋
錦成過半月持來畫堂卷復開佳人細意爲翦裁銀鐙連夜
照針黹平明設宴章華臺爲君著衣舞垂手看得風光滿楊
柳蝶使蜂媒無定棲萬蕊千花動衣袖回回舞罷換新衣新
衣未縫錦下機憐新棄舊人所悲百年歡樂無一作惟片時

蓮塘曲

青蘋風起桺塘水波聲夜聒鴛鴦睡一點芳心不自持露荷
又作璫珠碎藕絲織錦香滿機裁成衣裳將遺誰只愁賤妾
夢魂短不恨蕩子歸來遲花間鷓鴣依芳草等閑綠遍邯鄲
道還應憶念蕩舟人滿架芙蓉鏡中老

過歌風臺

世間悵意寧有此亭長還鄉作天子沛宮不樂復何爲諸母
父兄知舊事酒酣起舞和兒歌眼中盡是漢山河韓彭受誅
黥布戮且喜壯士今無多縱酒極歡畱十日感慨傷懷涕沾
臆萬乘旌旗不自尊魂魄猶爲故鄉惜從來樂極自生哀泗
水東流不再回萬歲千秋誰不念古之帝王安在哉莓苔石
刻今如許幾度秋風灞陵雨漢家社稷四百年荒臺猶是開

基處

瞿宗吉云豪邁
跌宕雅與題稱

題華光梅

墨梅之作盛衡湘始作俑者唯華光此僧平生十萬紙筆力
所到花爲香是誰好事憐清苦三二百年存絹素和靖多情
縱有詩廣平得意還能賦東坡先生昔倅杭萬松嶺見一枝
長我今見畫如昨夢都在君家白玉堂

學仙曲

二八女人貌嬋娟杏花陰裏競鞦韆同心錦帶刺石蓮逢人
學縛剪刀錢却妒鴛鴦沙上眠

古辭

歡樂自歡樂苦辛長苦辛城中十萬戶誰是種田人

水殿納涼圖

別殿紅綃女無風亦自涼闌邊是湖水夜夜宿鴛鴦

七夕

乞與人間巧全憑此夜秋如何鍼線月容易下西樓

別劉博士

祇爲情如雨從教醉似泥免看楊柳色相送出城西

銅雀臺

自古誰無死英雄豈不知望陵歌舞歇還有夢來時

峽川

石與青天近浮雲向客低自然堪下淚不是有猿啼

題揚州左史臣畫扇

后土祠前路金鞍憶舊遊春風雙燕子渾似在揚州

鄰牆梅花

臘後春纔到寒香襲素袍梅花如有意不在粉牆高

問梅

一種隴頭樹東風都合吹未應造物者偏在向南枝

別故人

未別欲千言臨別無一語惟此舊時心隨君渡江去

白頭翁

疎蔓短於蓬卑棲怯晚風祇緣頭白蚤無處入芳叢

題宋子障太守畫

老樹含青雨平林澹白煙隔溪茅屋在好泊米家船

訪舊三竺次泐禪師雜興韻

酒館湖船盡有名玉杯時得肆閑情至今人說張員外不是看花不出城

題明皇擊毬圖

管籥聲隨萬乘遊開元毬馬最風流九齡老去無人諫不破中原不肯休

小遊仙次韻四首

漢武求仙未絕情枉將心力事金莖靈王太子因無欲吹得

琅玕作鳳鳴

桂閣金銀不甚高仙山幾許隔波濤信回青島無尋處一色

春風是絳桃

小娃莫說臉如蓮自牧羊龍向葑田笑指清泠橋下水此中

元是碧瑤天

青蛇昨夜付書回只許麻姑自坼開說道蓬萊山下路莫因

清淺不歸來

題鸚鵡士女圖

美人應自惜年華庭院沈沈鎖暮霞

一作長門幾日斷羊車閑得工夫坐日斜

只有舊

時鸚鵡見春衫曾似石榴花

過泖湖

泖湖有路接天津萬頃銀花小浪勻安得滿船都是酒船中
更載浣紗人

題吳綵鸞寫韻圖

小點紅鸞欲下遲
遠山渾似畫來眉
如何一念人間事
上界仙曹便得知

同徐大章溪上看芙蓉

日莫歸來雨溼衣
涼風千樹綵雲飛
渚宮只在秋江上
何事襄王夢到稀

荷花詞次韻周伯溫參政

一種西湖與若邪
鴛鴦宿處便爲家
秋房結得新蓮子
便是當時藕上花

桺枝詞二首

尊前不棄小腰身
爭欲攙先上舞茵
多謝東風好擡舉
盡情分付畫眉人

春光領略不勝嬌
搖蕩東風千萬條
悔盡江州白司馬
一生

空詠小蠻腰

唐天寶宮詞八首

壽王妃子在青春賜與黃冠號太真不是白頭高力士翠華
那得遠蒙塵

興慶池頭芍藥開貴妃步輦看花來可憐三首清平調不博
西涼酒一杯

清源小殿合涼州羯鼓琵琶響未休爲是阿瞞供樂籍八姨
多費錦纏頭

昇上兒綳滿翠容黃裙高髻一叢叢君王入內聞歡笑賜與
金錢滿六宮

四海承平倦萬機只將彩戲悅真妃不平最是彈雙陸骰子
公然得賜緋

小部梨園出教坊曲名新賜荔枝香霓裳按舞長生殿擊碎

梧桐夜未央

香囊遺下佛堂階不使君王不愴懷
想著當年雪衣女羽衣猶得苑中埋

天寶年中寵賈昌黃衫年少滿雞坊
絳冠鬪罷羅纏項又得君王笑一場

覺來

好風吹雨覺來遲開遍荼蘼總不知
團扇晚涼人似玉也須消瘦莫春時

春光

湖上偏多楊柳風桃花吹盡雨前紅
等閑却被東君笑大半春光在醉中

柳花詞二首

欄馬牆西欲莫春花飛不復過中旬
倚天樓閣晴光裏爭撲

珠簾不避人

滿院長條散綠陰
誰家門戶碧沈沈
地衣不許重簾隔
雪白花鋪一寸深

輦下曲一百二首

并序 錄四十

昱備員宣政院判官以僧省事簡搜索舊文彙於囊中
曩在京師時有所聞見輒賦詩有宮中詞塞上謠共若
千首合而目之曰輦下曲其據事直書辭句鄙近雖不
足以上繼風雅然一代之典禮存焉

五坡千陛立朝廷
檻首銅鵬一丈翎
不待來儀威鳳至
日間韶漢在青冥

州橋拜伏兩珉龍
向下天潢一派通
四海仰瞻天子氣
日行黃道貫當中

東樓緋服唱雞人
擊到朱輦第幾聲
楠寢奉常先告備
駕行

三叩紫鞘鳴

國戚來朝總盛容
左班翹鶚右王封
功臣帶礪河山誓
萬歲千秋樂未終

三司侍宴皇情洽
對御吹螺大禮終
寶扇合鞘催放仗
馬蹏哄散萬花中

只孫官樣青紅錦
裹肚圓文寶相珠
羽仗執金班控鶴
千人魚貫振嵩呼

西天法曲曼聲長
瓔珞垂衣稱豔妝
大宴殿中歌舞上
華嚴海會慶君王

竹扛金鑄百尋餘
頂版高鐫梵國書
禁得下方雷與電
聲光不敢近皇居

墀左朱闌草滿叢
世皇封植意尤濃
艱難大業從茲起
莫忘龍沙汗血功

國初海運自朱張百萬樓船渡大洋有訓不教忘險阻御廚
先飯進黃梁

遼東羞貢入神廚祭鮪專車一大魚寢廟歲行春薦禮有加

鉶豆雜鮮脍

禽鳥
之內

當年大駕幸灤京象背前馱幄殿行國老手鑪先引導白頭
聯騎出都城

請號關牌趨鼓閣弓刀千騎領兵符例差右姓巡倉庫哄唱
穹廬賜大酺

祖宗詐馬宴灤都捫酒噶噶載憨車向晚大安高閣上紅竿
雉帚埽珍珠

駝裝序入日精門銅鼓牙旗作隊喧一聽巡階鈴鉞振滿宮
俱喜出迎恩

華纓孔帽諸番隊前導伶官戲竹高白傘葳蕤避馳道帝師

輦下進葡萄

守內番僧日念咍御廚酒肉按時供組鈴扇鼓諸天樂知在
龍宮第幾重

御前親拜中書令恩賜東宮設內筵手署勅黃唯一道任誰
祇受付雙遷

美人唱罷內門開千騎前頭丞相來衛士金瓜雙引導百司
擁醉早朝回

端本堂深繡榻高滿前學士盡風騷星河騎士知唯馬慣識
金牋玉兔毫

儒臣奉詔修三史丞相銜兼領總裁卒士院官傳賜宴黃羊
桐酒滿車來

文明天子念孤寒科舉人材兩牘寬別殿下簾親策試唱名
纔了便除官

鑪香夾道湧祥風
梵輦遊城女樂從
望拜絲樓呼萬歲
拓黃袍在半天中

對芻肉飲自相招
黃鼠生燒入地椒
馬湏飲輪金鐸刺頂寧
割髮不相饒

桺林密遣弄臣回
封印黃金盒一枚
天語直將西內去
便教知是草芽來

直教海子望蓬萊
青雀傳言日幾回
爲造龍舟載天姆
院家催造畫圖來

西方舞女即天人
玉手曇花滿把青
舞唱天魔供奉曲
君王長在月宮聽

鴨綠江波勝鴨頭
魚龍變化滿中州
分來一派天潢水
到得烏桓便不流

昭君遺下漢琵琶
拘軫誰彈猓獲沙
春色不關青塚上
只今

芳草滿天涯

西番僧果依時供小籠黃旗帶露裝滿馬塵沙兼日夜平坡
紅豔露猶香

園殿儀天十六楹向前黃道不教行帳房左右懸弓角盡是
君王宿衛兵

棕毛四面擁龍牀殿角涼生紫霧香上位勵精求治切不曾
朝退不擡湯

閒家日逐小公侯藍棒相隨覓打球向晚醉嫌歸路遠金鞭
相過御街頭

鬪鶴初罷草初黃錦袋牙牌日自將鬧市閑坊尋搭對紅塵
走殺少年狂

教坊女樂順時秀豈獨歌傳天下名意態由來看不足揭簾
半面已傾城

似將慧日破愚昏向日如嘗下釣軒男女傾城求受戒法中
祕密不能言

肩垂綠髮事康禪淡埽蛾眉自可憐出入內門裝飾盛滿宮
爭逐女神仙

壁衣面面紫貂爲更繞腰闌挂虎皮大雪外頭淡一尺殿中
風力豈曾知

天朝習俗樂從禽爲按名鷹出桺陰立馬萬夫齊指望半空
鵝影雪沈沈

欄馬牆臨海子邊紅葵高桺碧參天過人不敢論量數雨露
相將近百年

宮中詞二十一首

并序 錄十二

宮中詞唯唐陝西司馬王建一百首爲得體蓋從內臣
出入宮闈所賦俱實見其事厥後蜀主花蕊夫人效其

體賦詩一百首亦其身親見之宋王安國校官書見其
本序而置之內閣元初奉天楊奐錄宋宮人語五言詩
十八首頗得其情足次二家後大抵宮中詞論富有天
下貴爲天子不可以文工拙稱必非想像必親見皆非
閭巷之士可擬而賦者後學廬陵張昱光弼誌

裏頭保母性溫存不敢移身出後門尋得描金龍鳳紙學摹
國字教皇孫

頒賜三宮端午節金絲纏扇繡紅紗謝恩都作男兒跪拜起
淡淡鵲尾斜

內人哄動各盈腮談自西宮撒雪回報與內司當有宴羊車
今晚蚤將來

宮衣新尚高麗樣方領過腰半臂裁連夜內家爭借看爲曾
著過御前來

和好風光四月天
百花飛盡感流年
宮中無以消長日
自擘龍頭十二絃

鴛鴦鸕鶿滿池嬌
綵繡金茸日幾條
早晚君王天壽節
要將著御大明朝

宮羅支請銀霜褐
徹夜房中自翦裁
明日看花西內去
牡丹臺畔木瓜開

延華閣下日如年
除是當番到御前
尋出塗金香墜子
安排衣線撚春綿

頻把香羅拭汗腮
綠雲背綰未曾開
相扶相曳還宮去
笑說秋千架下來

上苑新波小海分
綠香溢岸好湔裙
故將禁指監官見
放出天河洗綵雲

填金臂失戲分明
贏得珍珠三兩升
便去房中還賭賽
黃封

銀榼酒如澠

從行火者笑相招步輦相將過釣橋鹿頂殿開天樂動西宮
今日賽花朝

塞上謠八首

錄六

玉貌當壚坐酒坊黃金飲器索人嘗胡奴疊騎唱歌去不管
桺花飛過牆

莽然路失龍沙西捫酒中人軟似泥馬上毳衣歌刺刺往還
都是射鵰兒

馬上黃鬚惡酒徒搭肩把手笑相扶
人強作漢家語哄著
邨童唱塞歌

野蠶作繭絲玉玉乳雞浴沙聲谷谷駱駝妳子多醉人羶帳

雪寒畱客宿

下一首云胡姬二八貌如花畱宿不問東西家醉來拍手趁人舞口中含唱阿剌刺

雖說灤京是帝鄉三時閑靜一時忙
駕來滿眼吹花桺駕起

連天降雪霜

親王捧寶送回京
五色祥雲抱日明
錫宴大開興聖殿
盡呼萬歲賀中興

雪夜寄史左丞

白雪相將一丈深
碧油窗合夜沈沈
党家更有人如玉
猶道春寒入繡衾

題夏圭孤舟風雨圖

此船載得許多愁
使我尊前感舊遊
惆悵揚州十年夢
滿江風雨泊瓜州

船過臨平湖

船過臨平欲住難
藕花紅白水雲間
只因一霎溟濛雨
不得分明看好山

詠何立事

宋押衙官何立秦太師差往東南第一峰
恍忽引至陰司見太師對岳飛事令歸告夫人東窗事犯矣復命後即弃官學道蛻

晉今在蘇州玄
妙觀爲蓑衣仙

舊作衙官身姓何陰司歸後記仙魔視身已是閑軀殼一領
蓑衣也是多

荔枝畫爲福建僉憲張惟遠題

濟南人

茜羅輕裹玉肌寒吹盡南風露未乾一寸丹心無與寄爲憑
圖畫入長安

翦花士女

咫尺芳叢豔色浚蜂情蝶思兩難禁看來莫用閑惆悵翦下
春風一寸心

劉曜卿畫折花宮女

桺風草露欲沾衣又是宮中上直時好把桃花都折盡免教
吹作落紅飛

湖中即事

湖桺湖波盡可憐不知春在阿誰邊滿頭翡翠雙鬟女細雨
吳歌溼畫船

臨安訪古 錄八

石鏡

臨安山中古石鏡曾照錢王冕服來天遣紫苔封裏後等閑
不許別人開

婆畱井

錢王初生時將棄井中婆奪畱之
故乳名婆畱既貴以鏐代畱字

舊日婆畱井未堙石闌苔蘚上龍鱗而今率土皆臣妾莫願
皇天產異人

功臣塢

峰頭石塢表功臣五百年前是佛身莫問蓬萊水清淺野藤
猶蔓劫餘春

錦溪

錢王功業與天齊
百里旌旗照此溪
從此波中鋪錦後
至今光景淨無泥

衣錦山

今縣治主山是王
故居即九龍堂

還鄉滿山都覆錦
富貴應須白晝歸
設宴九龍堂上日
沛中歌後似王稀

將軍樹

王平時率羣隊狂戲此樹下
還鄉以錦幪之號錦樹將軍

將軍官重執金吾
不比秦朝列大夫
王爲錦衣歸故里
遂令老樹有稱呼

環翠閣

謝安遊處
今爲寺

東山尚存環翠閣
謝傳來遊經幾年
可是舊曾攜妓到
粉香猶在畫闌邊

淨土寺

東坡作杭倅行部
過於潛回至此

祥符額賜海會寺
回首年來彈指過
試問竹林橋下路
往還

曾見幾東坡

求仙詞

漢皇承露鑄金莖別道雲間有玉京萬乘旌旗不隨去此身
何用獨長生

春日

一陣春風一陣寒芭蕉長過石闌干只銷幾箇夢騰醉看得
春光到牡丹

光弼初居楊左丞幕下頗有功業之思及張氏擅權光弼憤焉其詩云云蓋刺淮張用事諸人也

題青山白雲

一箇茅廬何處小橋古木溪灣但見山青雲白不知天上人
間

擬古秋夜長

雲中鴻鴈過門前朔風起梧桐葉落金井頭月照烏鵲天似
水誰家機上織迴文夜聽鵲鳥如不聞明朝爲遣安南使細

意緘題持贈君

暑中招客

江山猶故國風月自閑人老至謀生拙時更盛化新花疑春似夢酒與道爲鄰柱史猶何者何嫌有此身

送天使僧

釋子承天語儒臣撰寺碑萬間靈谷見一切布金爲寶界山河大璇題雨露垂丹青人所仰壯麗古

鈔幣勤中賜恩

榮拜曲施文章尊典誥億兆頌皇基騫舉鸞迴筆光華鳳吐辭繡幢天上遣金錫日邊移赫赫瞻行邁遙遙賦再馳在公無候謁於禮有嫌疑道路承傾蓋言辭見誦詩斯須知久要造次亦委蛇宗廟觀壘洗雲霄式羽儀乃知修白業動輒守清規空谷行春律餘生共聖時頂祈摩佛手目願覩堯眉慶讚諸天會觀光夙世期叩頭雲陛遠舞袖草堂卑枝繞貪生

鵲池支服氣龜睽違難折桺嚮仰只傾葵復命蒼龍闕覃恩
白玉墀握蘭前席對侍草近臣知仙樂停宮扇天花散殿帷
一人膺大慶萬宇受繇禧立雪時將至拈花事未遲有緣皆
弟子無念不慈悲軟語敷甘露清齋却紫芝頻煩尊者問慚
媿老夫衰在德寧忘報惟心不可欺朝宗江漢水日夜注懷
思

投贈潞國公承旨學士張仲舉

漢家舊德有桓榮赤舄登朝羽翼成三晉鳳鳴千載會兩河
龍現五雲迎獨於社稷多艱日復使君臣大義明自念昔曾
親几杖頌聲慚後魯諸生

五府驛代楊左丞畱題

免胄日趨丞相府解鞍夜宿五侯家玉杯行酒聽春雨銀燭照
人如一作天生晚霞受命敢忘一作世亂且從軍旅事撫時又過掖垣花一作功成須插

御筵花

漢家

一作王

未可輕韓信尚要生擒李左車

西湖遊覽志又載一詩云西樓柳風吹晚香石榴裙映黃金觴纖歌不斷白日速微雨欲度行雲涼笑看席上賦鸚鵡醉聽門前嘶驢驄早晚平吳王事畢羽書飛捷入朝堂此詩今不見本集

岳鄂王墳上作

朔雪炎風共此年中原父老亦堪憐
豎儒屢遣祈求使大將空持殺罰權
忠諫有碑書大節奸邪無面見重泉
至今宰木猶南拱遺憾西陵是墓田

陪宴相府得芍藥花有感賦

醉吐車茵媿不才馬前蝴蝶趁花回
玉瓶盛露扶春起錦帳圍鐙照夜開
垂白敢思溱洧贈欵紅還是廟廊栽
揚州何遜空才思惟對高寒咏閣梅

退居湖上投贈楊左丞二首

樓外湖光白渺茫樓中少婦試新妝
行年將近半百歲大醉豈能千萬場
織錦繡裙一作翠織舞裙飛蛺蝶白描歌扇睡鴛鴦
垂楊

滿院無人到芍藥花開日正長

且觀神女爲行雨莫問郎官應列星芳草到門無俗駕好山
終日在湖亭白鷗共戲荷葉小黃鳥亂啼楊柳青甯信曲闌

干外立晚涼吹得酒初醒

一作都醒

光弼至正時爲行省左右司員外郎卜宅於壽安坊今之花市是也罷官後自號一笑居士時居室已弊友人凌彥泚募緣以輯之疏云昌黎寄玉川子首稱洛城破屋之數間東坡題綠筠軒終比揚州纏腰之十萬一笑居士詩名優於張籍生計劣於陶潛囊無一錢之畱家徒四壁之立若非慷慨而多助安得輪奐之一新即欲取杜工部草堂費何時可辦儻昔得楊關西槐市塾今歲無憂但不至於虛拘便可謂之實惠此崢嶸事在特達心疏傳交遊皆助之其居始就當時傳爲盛事

戊戌題

海上作

華表仙人舊姓丁羽毛今日惜飄零海中又見蓬萊淺門外
空傳楊柳青莫雨朝雲翻覆手落花飛絮短長亭如何未熟
黃梁飯說道英雄夢已醒

惆悵五首

三山夢斷綵雲空幾把長牋賦惱公畫閣小杯鸚鵡綠玉盤

纖手荔枝紅春衫汗浥薔薇露夜帳香回茉莉風惆悵近來
江海上却將鞍馬學從戎

畫船湖上載春行日日花香扇底生蘇小樓前看洗馬水仙
祠畔坐聞鶯碧桃紅杏渾相識紫燕黃蜂俱有情惆悵繡華
成逝水盡歸江海作潮聲

惆悵當年使酒來娼樓紅粉夜相催可憐明月三分在不見
瓊花半朶開誰復醉翁堂下桺夏堪從事閣中梅揚州一片
青青草誰信春來無鴈回

惆悵雄藩海上遊武昌佳氣接神州東風歸思王孫草北渚
愁生帝子洲楚國江山真可惜劉家豚犬亦何羞不須夏問
中原事官桺新栽過戟樓

至今惆悵在東城結伴看花取次行輦道駐車招飲妓宮牆
回馬聽流鶯星河織女從離別海水蓬萊見淺清不有酒船

三萬斛此生懷抱望

一作向

誰傾

過楊忠愍公軍府畱題

總是田家門下客誰於軍府若爲情
林花滿樹鶯都散雨水平池草自生
街上相逢驚故吏馬前迎拜泣殘兵
能言樓上題詩處猶有將軍舊姓名

睡覺

滿院楊花風力輕牡丹時節好清明
簾垂不知白日晚睡覺忽聞黃鳥鳴
萬斛春光金盞酒百年心事玉人箏
劉伶未到忘形處枉自閑將畚鍤行

湖舫勸曹德昭僉院酒

倩得名姬唱慢歌梁塵直欲下輕波
西風八月芰荷老落日滿湖鳬鴈多
到手莫辭雙盞飲轉頭又是一年過
光陰只在槐柯上柰此浮生樂事何

別春次揚州成廷珪韻

燕語鶯啼盡可哀更無馬迹到青苔自從玉樹成歌後曾見
銅仙下淚來爲晉爲秦花幾度行雲行雨日千迴若教蝴蝶
知春夢儘把黃金付酒杯

丞相委入姑蘇索各官俸米畱別幕府諸公

不比常年載酒遊杏花時節出杭州粉闥未覺爲郎貴萱草
難忘此日憂沙漠帛書空見鴈江湖春水莫容鷗何須折盡
垂楊柳畱取他年繫別愁

光弼至姑蘇呈太尉一首云相君求米若求雨貧外得船如得仙職忝下僚班可恥情通鄰
好亦堪憐山中棋局迷樵客溪上桃花誤釣船醉把玉杯無所記不勝惆悵晚春前可與前

後二詩

互看

辭荅張太尉見招

中年頓覺壯心去涉世頗知前事非若使范增能少用冒敎
劉表失相依風雲天上渾無定麟鳳人間不受韞殘夢已隨

流水遠五湖春水一鷗飛

秋興

一夜涼風便覺秋楚人多感易生愁金盤露水何曾見紈扇
恩情未肯休零落梧桐金井上稀疎楊柳御街頭近來收得
麻姑信說道蓬萊更可憂

春閨詞

白日高堂欲莫難鳴鳩乳燕靜相干銀鉸行酒雙鬟綠玉管
調笙十指寒蝴蝶每因飛處見牡丹多是折來看明朝爲遣
安西使錦字紅燈織夜闌

湖上漫興二首

百鎰黃金一笑輕少年買得是狂名尊中酒釀湖波綠席上
人歌一作傳鳳語清蛺蝶畫羅宮樣扇珊瑚小柱教坊箏南朝舊
俗憐輕薄每到花時別有情

湖上新泥雪漸融門前溝水暗相通
裙欺萱草輕盈綠粉學櫻桃
淺淡紅莫雨欲來銀燭上
春寒猶在酒尊空青綾被薄
不成夢又是一番花信風

繡毬花次兀顏廉使韻

繡毬春晚欲生寒滿樹玲瓏雪未乾
落過一作遍楊花渾不覺飛來蝴蝶忽成團
釵頭嬾戴應嫌重手裏閑拋却好看
天女夜涼乘月到羽輪一作車偷駐碧闌干

湖樓

樓前芳草碧盈盈付與幽禽自在鳴
隄上馬馱紅粉過湖中人載畫一作酒船
行日長燕子語偏好風暖楊花體又一作更輕何限
才情被花惱獨教書記得狂名

次林叔大都事韻四首

春來長是誤佳期
鳩鳥雄鳩不可私
錯認櫻桃懸蟾子
悔將

衫袖染鵝兒燒殘蠟燭渾成淚折斷蓮莖却是絲辜負綠窗
閑歲月只教楊柳妒腰肢

何處銀鞍白鼻騮忘將錦瑟數年華渡頭水急憐桃葉陌上
春狂信柳花那得芳心對鸚鵡泣將殘淚付琵琶一身已自
成惆悵況是平陽十萬家

莫謾題情在粉牆藕絲終日繫柔腸不知漢主黃金屋何似
盧家白玉堂好夢自拋桃葉後閑愁似過柳條長無端收得
番羅帕徹夜薔薇露花香

陳王當日賦凌波寫得風流也太多掌上玉鸞看教舞雲中
青鳥使傳歌情緘尺素魚中字恨織迴文錦上梭休信雙星
是牛女年年波浪隔天河

昔遊

春到名園總是花都城無處不繇華冠翹鵲尾朱袍盛馬頓

金羈玉面斜騎吏去忙官索酒侯門散晚妓畱車党家賤妾
粗豪慣輕易銀鉶雪水茶

小王孫

貂帽貂裘美少年圓牌通籍內門前新分草地緣遊獵舊賜
彤弓未控弦銀甕蒲萄春共載玉鞍驕馬口隨牽穹廬一夜
迷淡雪忘却朝天是醉眠

侍御周伯溫以行臺羈畱姑蘇簡寄之

白頭歲月付流波何物虛名在諫坡屬國莫嫌持節久子陽
猶謂見天多強梁不見圖銷印跋扈如聞欲倒戈一樹紅梨
春事晚宣文閣下欲如何

得朱桓編修海道之音

命酒徵歌記往年玉堂遂有夢相牽魚緘尺素雖云密事載
空言始可憐季世人材思管樂盛時戎馬說幽燕張騫慣識

天河路俛仰乾坤一慨然

兩山亭畱題

馬頭曾爲使君回北望新亭道路開於越地形緣海盡勾吳
山色過江來英雄有恨餘湖水天地忘懷入酒杯珍重謝家
林下客玉山何待倩人推

三月三日湖上作

此日誰人冑在家傾城滿意事繇華時非上巳不爲節春到
牡丹纔是花霧鬢風一作髻雲鬟湖上女畫輪繡轂道傷車兒童
盡唱銅鞮曲未覺人間日易斜

縱飲

外湖裏湖花正開風情滿意看花來白銀大甕貯名酒翠羽
小車一作姬歌落梅身外功名真土苴古來賢聖盡塵埃韶光如
此不一醉百歲好懷能幾回

感事二首

雨過湖樓作晚寒此心時暫酒邊寬
杞人唯恐青天墜精衛難期碧海乾
鴻鴈信從天上過山河影在月中看
洛陽橋上聞鶻處誰識當時獨倚闌

老至翻遭世慮牽何曾一覺得安眠
家鄉尚遠潯陽郡世事有如天
寶年朝報唯瞻遼海上羽書不斷省
門前長星正在天西北白水寒沙盡可憐

西湖漫興

玉局當年爲寫真西施宜笑復宜顰
朝雲暮雨空前夢桃葉柳枝如故人
露電光陰千劫外魚龍波浪一番新
傷心最是

林逋

一作逋仙

宅半畝殘梅共晚春

集中又載西湖晚春一首與此稍有不同其詩云憶昔東坡爲寫真至今詩句在遊人朝雲猶

是當時夢桃葉渾非舊日身翬燕情懷千語少魚龍波浪幾回新傷心誰問林逋宅零落殘梅共晚春

次韻處士和堽上人詩

每到爐頭憶嬾殘十年戎馬雪窗寒亂來亦謂功名易老去
纔知世路難醉把茱萸應自感狂顚鸚鵡欲誰看相逢白髮
秋風裏可惜銀鐙照夜闌

明州倪師園觀猿

捷于風雨過喬枝乍鎖名園亦自疑幾萬里來都是恨第三
聲後最堪悲月沈夜澗魂先去露滴春梢淚對垂富貴豈能
長汝役綠珠還有墮樓時

晚歸

左掖歸時日未斜小園檢點舊生涯染裙萱草纔抽綠破雪
櫻桃又著花玉斚試斟官給酒銀煎重瀹貢餘茶西湖水色
春來好說道風光似謝家

鄰園海棠

自家池館久荒涼却過鄰園看海棠日色未嫣紅錦被露華

猶溼紫羅^{一作絲}囊掌中飛燕還能舞夢裏朝雲自有香銀燭莫辭淡夜照幾多佳麗負春光

醉顚

二月鶯聲最好聽風光終日在湖亭清宵酒壓楊花夢細雨鐙淡孔雀屏情在綢繆歌白苧心同慷慨贈青萍方平自得麻姑信從此人間見客星

虎丘寺畱顚

莓苔欲遍盤陀石知是梁朝古道場陳迹謾驚成俛仰空門元不預興亡白漫天上俱兵氣赤伏池中是劒光如會生公重說法勸教東海莫栽桑

感事

憶昔銀鐙鼓瑟琴屏開孔雀畫堂深頭顱謾有新添雪囊橐都無舊賜金好夢未成春漏盡殘星猶在曉河沈郎君自上

斑駁後露滿銅盤淚不禁

寄松江楊維禎儒司

畫蛇飲酒合誰先塵土東華四十年海上豈無詩可和雲間
還有事相牽牡丹開後春無力燕子歸來事可憐欲倩鐵龍
吹一曲滿湖風浪又迴船

碧筩飲次胡丞韻

小刺攢攢綠滿莖看揜羅袖護輕盈分司御史心先醉多病
相如渴又生銀浦流雲雖有態銅盤清露寂無聲當年欲博
千金笑故作風荷帶雨傾

送丁道士還澧陵

丁令還家骨已仙更無城郭有山川未添白髮三千丈又見
銅駝五百年荒草茫茫連故國孤雲冉冉下寥天澧蘭歌送
潺湲水極望涔陽思惘然

贈沈生還江州

鄉心正爾怯高樓，况復樓中賦遠遊。
客裏登臨俱是感，人間送別不宐秋。
風前落葉隨車滿，日下浮雲共水流。
知汝琵琶亭畔去，白頭司馬憶江州。

贈寓客還瓜州

把酒臨風聽櫂聲，河邊官柳綠相迎。
幾潮路到瓜州渡，隔岸山連鐵甕城。
月色夜畱江叟笛，花枝春覆寺一作市樓簫。
贈行不用歌楊柳，此日還家足太平。

無題

灼灼庭花露未收，樂然雙燕語綢繆。
新妝滿面猶看鏡，殘夢關心嬾下樓。
春到自憐人似玉，困來誰問酒扶頭。
狂蹤已作風絲斷，敢怨流年似水流。

長安鎮市次趙文伯韻

淹遍衣衫酒未乾何如李白醉長安牡丹庭院溥新露燕子
簾櫳過薄寒春晚絕無情可託日長惟有睡相干舊題猶在
輕羅扇小字斜行不厭看

寄羅博士

莫說文星與酒星已同傖父泣新亭夢中此日頭能白海內
何人眼更青鵲化羽毛猶姓杜鶴歸華表尚名丁縱然記得
前朝事彈向銀箏只自聽

無題二首

幾夢郎君引碧幢微波難與寄沅江青春每念青絲騎白日
長閑白玉窗菡萏結房雖有異鴛鴦織錦不成雙潮來好是
兒家恨流過門前氣未降

咫尺香閨步嬾移搔頭誰理玉蟠螭不聽小管吹銀字只數
迴文織錦詩得伴有時惟鬪草遣懷無日不彈棋鳴鳩乳燕

青春晚謝却繇花幾萬枝

金山寺

六鼇捧出法王宮樓閣居然積浪中門外鷗眠春水碧堂前
僧散夕陽紅揚州城郭高低樹瓜步帆檣上下風人世幾回
江上夢不堪垂老送飛鴻

飲吳令家

膠漆相投古亦難酒間何事慘無歡苦愁海底量淺痛哭
鐙前出肺肝白首旣辭當世事朱絃何必向人彈醉來渴甚
思吞海無復天家小鳳團

演法師惠紙帳

銀鐙夜照白紛紛四面光搖白縠文隔枕不聞巫峽雨繞牀
惟走剡溪雲風和桺絮何因到月與梅花竟不一作莫分塞北江
南風景別却思羶帳舊從軍

寄東山寺長老宅區中索畫梅

同是多生無垢身孤芳歲晏轉精神
濡毫應覺香先到寫影無如月最真
庾嶺近來還有信華光以後更何人
情知此事難描畫驛使空回可不嗔

中秋望月

甲辰年賦

月裏分明見九州浮雲西北是璫樓
歌鐘未厭今宵酒砧杵那禁此夜愁
若使有情須痛哭不知何物是風流
霓裳不向當時罷戎馬中原未肯休

姑蘇懷古

十里河隄蹋暖塵老懷忽憶故鄉春
泥金孔雀裁歌扇刻玉麒麟壓舞裯
翠袖錦尊邀上客畫船銀燭照歸人
而今白髮東風裏疑是前身與後身

雲林先生倪瓚

瓚字元鎮無錫州人其先世以貲雄一郡元鎮不事生
產強學好修刻意文史所居有雲林堂蕭閒館清閼閣
諸勝饒介之稱其閣如方塔三層疏窗四眺遠浦遙巒
雲霞變幻彈指萬狀窗外巉巖怪石皆太湖靈壁之奇
高于樓堞松篁蘭菊蘼蔥交翠風枝搖曳涼陰滿苔閣
中藏書數千卷手自勘定三代鼎彝名琴古玉分列左
右時與二三好友嘯咏其間性好潔見俗士避去如恐
浼盥頰易水振拂巾服日以數十計居前後樹石頻令
洗拭書畫蕭疎秀挺稱其爲人至正初天下無事一旦
盡斥賣其田產得錢以與貧交疎族或竊笑之及兵興
富家多被剽掠元鎮扁舟箬笠往來湖泖間人乃服其
前識明洪武七年始還鄉里時年七十有四矣寄居其

姻鄒惟高竟卒于鄒氏嘗自謂嬾瓚亦曰倪迂長樂王
賓志其旅葬吳人周南老志其墓皆曰元處士雲林先
生句曲張雨錢塘俞和嘗繕寫其橐藏之論者謂如白
雲流天殘雪在地楊鐵厓曰元鎮詩才力似腐而風致
特爲近古吳匏菴曰倪高士詩能脫去元人之穠麗而
得陶柳恬澹之情百年之下試歌一二篇猶堪振動林
木也

春日雲林齋居

饒介之云堂扁雲林二字雲字正摹天台白雲寺額林字摹廬山東林寺額皆右軍得意筆也

池泉春漲淡逕苔夕陰滿諷咏紫霞篇馳情華陽館晴嵐拂
書幌飛花浮茗盃階下松粉黃窗間雲氣暖石梁蘿薦垂
翳行蹤斷非與世相違冥棲久忘返

此詩集中又載改本云臨池春流駛埽地夕陰滿正襟味道言超遙坐

溪館嵐嶺當書榻煩襟一舒散靡靡松花黃逐逐雲氣暖石梁青苔合於焉人迹斷故非與世疎冥栖遂忘返元音所載即此

雨中寄孟集

英英西山雲翳翳終日雨清池散圓文空林絕行屨野性夙
所賦好懷誰共語燒香對長松相與成賓主

聽袁子方彈琴

蕙帳凝夕清高堂流月明芳琴發綺席列坐散繁纓迴翔別
鵠意縹緲孤鸞鳴一寫冰霜操掩抑寄餘情

贈天寧福上人

荆溪霜落後銅官日出初自櫛頭上髮更理篋中書上人從
定起咏言方繞除解后發微笑幻身同太虛

爲方厓畫山就題

摩詰畫山時見山不見畫松雪自纏絡飛鳥亦閑暇我初學
揮染見物皆畫似郊行及城遊物物歸畫笥爲問方厓師孰
假孰爲真墨池挹涓滴寓我無邊春

奉謝張天民先生

鳴鴈將北歸，裴回舊棲處。江湖春水多，欲去仍回顧。稻梁豈
余謀，矰繳非所慮。猶爲氣機使，喧冷逐來去。寥寥天宇寬，彼
此同一寓。風萍無定踪，易散聊爲聚。君看網中魚，在疚猶相
煦。

夜泊芙蓉洲走筆寄張鍊師

芙蓉猶滿渚，疎桐已殞霜。泊舟菰蒲中，吳山隱微陽。因懷靜
默士，竹林閔玄房。煮茗汲寒澗，燒丹生夜光。憶與鄭郊輩，閑
咏步修廊。時子有所適，顧瞻重尚羊。庭下生苔蘚，牖間繙詩
章。奕勢鄭老勝，酒榼郊生將。雅歌雜詠諧，列坐飛羽觴。子歸
日已晚，棗栗亦傾筐。揮手輒謝別，莫宿荒城傍。遲明趨所期，
待子鄭公堂。晨往遂至昏，企望徒悵悵。乃嗟仙真馭，固非世
所望。惻惻理歸櫂，泛泛秋浦長。還尋甫里陸，更醉山陰王。素
冠斯馳贈，喜知終未忘。余茲將遠適，旅泊猶彷徨。微風動虛

碧初月照石梁曠望對清景賦詩託陳郎茯苓思同煮夜雨
共匡牀

列朝詩集載此詩至棗栗亦傾筐而止不知此處如何可住是必傳寫之譌未經較定故耳牧齋先生最善考索而不無一時之誤後之覽者未可以藉口先生而不亟爲改正也

蕭閒館夜坐

隱几忽不寐竹露下泠泠青鐙澹斜月薄帷張寒廳燥煩息
中動希靜無外聆窅然玄虛際詎知有身形

走筆次陶蓬韻送葉參謀歸金華

手把玉芙蓉青天騎白龍出入人間世飛鴻蹋雪蹤瑶草粲
可拾羣峰森玉立璧月挂天南離離星斗溼君昔在山時玉
韞山有輝因同白雲出更與白雲歸白雲無定處豈只山中
住河漢共縈紆經天復東注金華牧羊人游戲不生嗔笑拂
巖前石行看海底塵手調白羽箭陋彼磨銅硯一語不投機
歸歟寧再見士豈始隗乎全趙匪相如項王疑亞父竟爾龍

爲魚擾擾何時已百年聊寄耳良也報仇歸言從赤松子去
山今幾年還山大學仙天台司馬宅雲氣近相連

雙寺精舍新秋追和我豈長安秋夕

秋暑晚差涼茗餘眠獨早清風振庭柯寒蛩吟露草晨興面
流水西望吳門道不知人事劇但見青山好

玄文館讀書

并序

玄中真師在錫山東郭門立靜舍號玄文館幽虛敞朗
可以閑處至順壬申歲六月余處是兼旬謝絕塵事遊
心澹泊清晨櫛沐竟遂終日與古書古人相對形忘道
接翛然自得也又西神山下有好流水味甚甘冽與常
水異館去西神山遠不出五里故得朝夕取水以資茗
薈之事居茲館讀書研道之暇時飲水自樂焉乃賦詩

曰

真館何沈沈寥廓神明居陽庭肅宏敞丹林鬱扶疎
言茲遊息脫屣榮利區檐榱初日麗池臺涼雨餘
焚香破幽寂飲水聊舒徐潛心觀道妙諷咏古人書
懷澄神自怡一作適意愜理無虛誰云黃唐遠泊然天地
初迴首撫八荒紛攘蚍蜉如願從逍遙遊何許崑崙墟

述懷

讀書衡茅下秋淡黃葉多原上見遠山被褐起行歌
依依墟里間農叟荷蓀過華林散清月寒水澹無波
遐哉棲遁情身外豈有它人生行樂耳富貴將如何

丙子歲十月八日夜泊閭門將還溪上有懷友仁陸

徵君

明發辭吳會移舟夜淹泊空宇垂繇星微雲暝前郭沈沈抱
冲素悄悄傷離索歸埽松逕苔遲君踐幽約

聽素負外彈琴

并序

至正四年十一月素負外來林下爲畱兼旬臘月十七日悽雪初霽庭無來迹與僕靜坐因取琴鼓之古音蕭寥如茂松之勁風春壑之流冰負外時年八十有二顏貌筋力未如四五十許人爲言甫弱冠遭逢盛明初宰當塗過九華山道逢神人與棗食之後數數見夢寐間若冥感玄遇者負外韜耀蘊真仕祿以自給不爲人所知豈郭恕先之流歟爲賦五言一首

郎官調綠綺谷雪賞初晴雨忘絃與手流泉松吹聲問言一作年踰八十云嘗見河清挂帆望九華神人歛相迎啖以海上棗歡愛若平生玄遇寧復得惜哉遺姓名

戊寅十二月丹丘柯博士過林下賦詩次韻酬荅

積雪被長坂臥疴守中林山川雖云阻舟楫自見尋傾蓋何

必舊相知亦已深驚風飄枯條清池冒重陰聯翩雙黃鵠飛
鳴綠水潯顧望思鬱紆徘徊發悲吟願言齊羽翮金石固其
心歡樂何由替黃髮期滿簪

己卯正月十八日與申屠彥德遊虎丘得客字

余適偶入城本是山中客舟經二王宅弔古覽陳迹松陰始
亭午嵐氣忽斂夕欲去仍徘徊題詩滿苔石

次韻陳維允姑蘇錢塘懷古四首

釀酒劒池水玉壺清若無揮盃送落月山鬼共歌呼松間鐙
如漆白骨漫寒蕪

耕鑿古隧穿乃吳桓王墓金鴈隨冷風黃腸異呈露悲歌異
今昔踟躕緩歸步

仙人悲世換宴景在清都寒暑自來往英雄生釣屠錢唐江
畔桺風雨夜嘯烏

江山國破後弔古一經行輦路苔花碧御溝菰葉生古跡今
寧有新城江上橫

贈惟寅

隱几方熟睡故人來扣扉一笑無言說清坐澹忘機衣上松
蘿雨袖中南澗薇知爾山中來山中無是非三十不娶妻四
十不出仕逍遙巖岫間翳名以自肆何曾問理亂豈復陳美
刺高懷如漢陰終老無機事

對春樹

端憂對春樹影落身上衣美人手所成紉縫願無違步庭悲
往躅瞻景惜餘暉芳襟沾露溼蘭珮委風微凝思自的的染
澤尚依依晨雞催夢短夜鵲逐魂飛歡愛自茲畢憔悴損容
輝

送馬生

送子淮南行繫舟江岸柳翠影舞晴煙落我杯中酒舉杯向
落日春水浮天碧時見白鷗飛雪光翻綺席應笑披羊裘獨
釣江邊石

寄楊廉夫

吳松江水春汀洲多綠蘋彈琴吹鐵笛中有古衣巾我欲載
美酒長歌東問津漁舟狎鷗鳥花下訪秦人

寄李隱者

南汀新月色照見水中蘋便欲乘清影緣源訪隱淪君住鉅
山湖綠酒松花春夢披寒雪去疑是剡溪濱

題畫贈岳道士

義興岳道士野鶴如長身我知彌明徒不是侯喜倫結喉吟
肩聳鐵脊霜髯新手中石棋子頭上漉酒巾久居離墨山自
謂無懷民喪亂不經意松陵畱十旬香雲作輿衛長松爲主

賓旣滋數畦菊復種二畝芹樂哉以忘死道富寧憂貧爲我
具舟楫相期桃花春

對酒

題詩石壁上把酒長松間遠水白雲度晴天孤鶴還虛亭映
苔竹聊此息躋攀坐久日已夕春鳥聲關關

尋友人不遇

洲渚多落英泝流尋遠山輕舟載美酒搖蕩綠波間俯咏拾
瑤草遐思隘塵寰寅緣忽失遇悵望遂空還

池蓮詠

迴翔波間風的歷葉上露清池結素彩華月映微步雲陰花
房斂雨歇芳氣度欲去拾明璫踟躕惜遲莫

徐氏南園對雨

櫻桃花欲落風雨莫淒迷忽憶郊園日竹林通磴西弱蔓滋

野援蘭葉長芳畦念我當時友蒿萊沒舊溪

題畫贈九成

故人郊掾史邀我宿溪船把酒風雨至論詩煙渚前晨興就清盥思逸愛春天復遇武陵守共尋花滿川

至正十二年三月八日冒風雨過九成荆溪舟中劉德方郎官方舟煙渚畱宿談詩明日
使晴移舟綠水岸下相與嘯咏仰睇南山遙瞻飛雲夾岸桃柳相廁如散綺霞掇芳芹
而薦潔瀉山瓢而樂志九成出片紙命畫眼前景物紙惡筆凡固欲騁其逸思大乏騏
驥康莊也歐陽公每每云筆硯精良人生一樂書畫同理余亦云焉時舟中章鍊師岳
隱者對奕吳
老生吹洞簫

早春對雨寄懷張外史

林臥苦泥雨憂來不可絕掀帷望天際春風吹木末飛蘿散
成霧細草綠如髮念子獨高世南山修隱設撫弄無絃琴招
邀青天月神安形不彫跡高行自潔思之不可見飢渴何由
歇願爲鸞鵠翔南遊拂松雪

此詩集中又載改本云林臥對雲雨憂來不可
絕褰帷望庭際春風動林樾飛蘿散成霧煙

草綠如髮不見高世人飢渴何由歇神鸞戲玄圃巨鱗偃溟渤爾亦碧巖中通形修隱該
燒香庭竹淨洗研池苔滑取瑟和流泉操瓢酌明月跡高行亦苦冰檠忌芳潔何當往

相尋拂石樓松雪今新本所刻竟自神鸞戲玄
圃句起而題無早春對雨字不知何所據也

送呂養浩之紹興

賀監宅前路荷花今亦無空餘湖上月照見水中蒲送爾作
官幽絕處錢塘江頭飛桺絮聽事臨隄滿夕嵐時有沙鷗自
來去

送徐君玉

閩江之水清漣漪隔江名園多荔枝閩中女兒天下白越波
飛檠逐鳧鷖擢歌清綿洲渚闊蕩槳落日令人悲蠻煙怪雨
忽冥密蔣芽蒲葉相參差此中勝事不爲少徐郎遠遊牽我
思

對梓樹花

去年梓樹花開時美人明璫坐羅幃今年梓樹花如雪美人
死別已七月梓花如雪不忍看沈吟懷思淚闌干鳴鳩乳燕

共悲咽桺綿風急煙漫漫

劉君元暉八月十四日邀余翫月悛雪齋中命余詩
因賦

卷簾見月形神清疑是山陰夜雪明長歌欲覓剡溪戴悵然
停杯遠恨生爾營茅齋名悛雪邀我吹笙弄明月明星如銀
浮翳消垂露成帷桂花發酒波蕩漾天河傾笙聲嫋嫋秋風
咽古人與我不竝世鶴思鷗情迴愁絕

苦雨行

孟秋苦雨稻禾死天地晦冥龍怒嗔南鄰老翁臥不起漏屋
溼薪愁殺人自云今年八十剩力農一生茲始病兩逢赤旱
三遇水租稅何曾應王命吾今寧免身為魚死當其時良可
吁

餘不溪詞

并序

開玄館在餘不溪濱距溪無百步上清王真人所立
流冬夏盈演玉光澄映與他水特異故爲名焉庚午歲
春因市藥過浙江趣便道將歸梅里俛斯水而悅之沂
流閒咏盟濯平津顧瞻壇宇近在東麓遂舍舟造其下
真人爲出酒脯燕歡巖洞竟日乃返悠悠徂歲忽已十
有七寒暑矣余旣爲農畎畝身依稼穡復邇政繇奔走
州里欲爲昔遊其可得乎鍊師遐騫物表閒情夷朗周
覽宇內將還真館余因仿像疇昔之所覩極道山之清
婉追賦短章以餞斯別若夫超蹤溷濁逍遙玄邁蓋淡
志於是矣覽而咏言能無動悲慨乎

餘不溪水涵綠蕢微風吹波蹙龍鱗看山蕩槩不知遠兩岸

桃花飛接人

一作花間白
鹿來迎人

溪迴路轉松風急竹林華房霞氣溼忽

逢道士頎而長疑是韓國張子房相期飄拂紫煙裏下攬滄

溟浮玉觴

醉歌行次韻酬李徵君春日過草堂賦贈

杜陵昔年有

一作昔聞
杜陵之

茅屋浣花溪邊錦江曲古人不見春風

來桃李無言自山麓石牀蘚澀青泥乾波渠流水夜潺湲可

憐寶劒埋黃土空餘山月照波間今我不樂空懷

一作懷往

古短世

長年誰比數花下那知李白來山鳥恣歌童亦舞酒酣大笑

五情熱作相形求築巖說夷齊相逝居首陽逍遙采薇飽芳

潔勿歌虞夏神農詩賢愚等是百年期魯連恥秦亦蹈海笑

爾局促商山芝少文壁間對圖畫莫待老來難命駕仰看翕

忽浮雲馳安得乘螭與之化漠漠楊花縈遠天迸壑晴雷驚

醉眠李侯神爽色不動手中

一作敲

茶雪落輕煙逢君此樂誠草

草便欲攜君臥煙島海上千年

一作秋

白鶴飛世人胡爲而自老

爲曹僉事畫溪山春曉圖因題

荆溪之水清漣漪溪上晴嵐紫翠圍連舸載書煙渚泊提壺
入林春蕨肥身遠雲霄作幽夢手栽花竹映山扉磯頭雪影
多鷗鷺也著狂夫一浣衣

賦翠濤硯

岳翁嘗寶翠濤石今我還珍翠濤硯翠濤沄沄生縠紋雲章
龍文發奇變米芾硯山徒自惜此硯顛應未曾見我初避亂
失神物玉蟾滴淚空悽戀珠還合浦乃有時洗滌摩挲冰玉
姿書舟輕迅逐鳬鷺喜出火宅臨清漪松雪磨香淬毛錐天
影江波

碧滋一咏新詩開我眉

題張德常良常草堂

翠壁鄰丹竈青楓背草堂琴書聊卒歲麋鹿自成行澗水流
杯滑飛花入座香能無問津者及此繫舟航

遊善權洞

來窺善權洞一上李公樓水玻巖前引雲旌松際浮然鐙長
不夜垂釣只虛舟欲讀吳朝刻真成冒雪遊

雪槎軒

已比溝中斷空思海上浮隨雲秋汎汎貫月夜悠悠無路通
河漢憑誰問女牛漂搖非有待吾道付滄洲

賦德機徵君荆南精舍圖

結廬溪水南勝事足幽揆夏果落山雨春衣染夕嵐石欹招
鶴磴門俛射蛟潭日日縈歸夢蕭條雪滿簷

贈公遠

霜葉落欲盡晚山看更青躡將沙際屐坐久水邊亭俛仰已
如夢漂搖同泛萍稻梁非所戀黃鵠思冥冥

張心遠訪郊九成因書以寄

州府今爲掾風埃多厚顏香芹渾滿澗去鶴未巢山思逐春

雲亂心隨野水閑
張君應話我樗散
碧巖間

荒邨

踽踽荒邨客悠悠
遠道情竹梧秋雨
碧荷芰晚波明穴
鼠能人拱池鷺類
鶴鳴蕭條阮遥集
幾屐了餘生

寄虞子賢

天闊海漫漫崑山
望眼寬桃源迷晉
世松樹受秦官雨
蘚鹿迹遍霜梧鸞
影寒封題數行字
聊問竹平安

贈沈文舉

波光浮草閣苔色
上春衣楊柳鶯啼
遠一作暗櫻桃鳥啄
稀榮名非所慕登
覽竟忘歸泚水宜
修禊重來坐釣磯

己酉八月廿三日
雨至廿六日乃開
霽賦五言呈德

常

積雨琴絲緩沿階
蘚碧滋泥途方汨
沒茅屋且棲遲酒
向鄰

家貲杯從野老持便應從此去海上候安期

畫江天晚色贈志學

不見呂君久題詩懷不忘風聲渾落葉山影半斜陽獨鶴來
遲莫孤帆出渺茫爲圖秋色去畱寄讀書堂

垂虹亭

虛閣春城外澄湖暮雨邊飛雲忽入戶去鳥欲窮天林屋青
西映吳松碧左連登臨感時物悵吸酒如川

題畫贈王仲和

曾住南湖宅于今已十年叢筠還自翳喬木故依然雨雜鳴
渠溜雲連煮朮煙何時重相過爛醉得佳眠

南湖陸玄素高士幽居今王君仲和居之木木

清華戶庭幽邃余嘗寓其家四年翛然忘世慮也仲和以此幀索畫竹石畫已并詩其上以寫惓惓之懷玄素仲和外舅也故尤感余故人之思乙巳初月十七日

題元璞上人壁

蕭條江上寺迢遞白雲橫坐待高僧久時聞落葉聲鴟夷懷

往事一作躅張翰有餘情獨櫂扁舟去門前潮未生

北里

舍北舍南來往少自無人覓野夫家鳩鳴桑上還催種人語
煙中始焙茶池水雲籠芳草氣一作色井牀露淨碧桐花練衣挂
石生幽夢睡起行吟到日斜

山園

春水鳬鷖野外堂山園細路橘花香棲棲身世書一作畫盈篋漠
漠風煙酒一觴豈謂任真無禮法也須從俗著冠裳不營產
業人應笑竹本桃栽已就行

林下遣興

眼見藤梢已過牆手拈書卷復堆牀閑臨水檻親魚鳥欲出
柴門畏虎狼冠製不嫌龜殼小衣裾新翦鶴翎長從來任拙
唯疎嬾一月秋陰不下堂

春日

閉門積雨生幽草歎息櫻桃爛熳開春淺不知寒食近水濱
唯有白鷗來卽看垂柳侵磯石已有飛花拂酒杯今日新晴
見山色還須拄杖蹋青苔

雲林所居苔蘚盈庭不容人跡綠縵可愛每遇
墜葉輒令童子以鍼綴杖頭挑出不使點壞

二月十日玄文館聽雨

臥聽夜雨鳴高屋忽憶陂塘春水生何意遠林飢獨鶴若爲
幽谷滯流鶯成叢枸杞還堪采滿樹櫻桃空復情二月江頭
風浪急無機鷗鳥亦頻驚

雪後過陳子貞隱居

陶公卜宅南邨裏悞雪初晴思一遊樹辨微茫來獨鶴櫓搖
欹側散輕鷗墨池繞溜春冰滿塵榻繙書夕照收相見惘然
如有失掉頭吟咏出林丘

次韻薩天錫寄張外史

谷口路微山木合溼衣空翠不曾晴飢猿扳檻爲人立寒犬
號林如豹聲小閣秋清聽雨臥長空日出採芝行道心得失
已無夢沐髮朝眞候五更

送張外史還山

道士朝乘白鶴還樓臺金碧鎖空山半天花雨飛幢節萬壑
松風雜珮環丹井夜寒光剌剌石壇春靜蘚斑斑飄然便擬
從君隱分我玄洲一作屋半間

寄張貞居

不但入城蹤跡少南鄰野老見猶稀狂歌鳴鳳聊自慰舊學
屠龍良已非蒼蘚渾封麋鹿逕白雲新補薜蘿衣羊君筆札
誰能繼欲讀靈文一扣扉

贈別益以道書記

一笑相逢豈有期因懷西崦話移時李公祠畔一作堂裏空餘月陸

子泉頭舊有詩旅思悽悽非中酒人情落
落似殘棋雲濤眼底三生夢鷗影秋汀又遠

一作離別

送寶南琰往往住荆溪碧雲寺兼簡方厓

碧雲林壑杳重重此去風流似簡公
春藥碓閑湍激下吟秋蛩響月明中結茅擬候芝三秀眠鹿應遺地一弓聞道重居開竹牖待予艇子過溪東

一作空山

奉和虞學士寄張外史

華陽上館誰曾到知有高人避世深
當戶春雲團紫蓋洗空花雨散青林
丹臺篆跡龍蛇動經閣松濤聲鸞鶴吟
念子離居消息遠幾將書札寄遙岑

一作濤

春日試筆

喜看新酒似鷺黃已有春風拂草堂
二月江南初變柳一作破柳扁舟晚下獨鳴榔
苔生不礙山人屐花發應連野老牆
美酒已

拚千日醉莫將時事攪愁一作離腸

寄張天民先生

清溪演漾綠生蘋溪上軒楹發興新只欠竹陰垂北牖儘多
山色近南津湖魚入饌長畱客沙鳥緣階不畏一作避人媿我萍
蹤此淹泊片雲回首一傷神

居竹軒

翠竹如雲江水春結茅依竹住江濱階前迸筍從侵逕雨後
垂陰欲覆鄰映葉黃鸝還自語傍人白鶴亦能馴遙知靜者
忘聲色滿屋清風未覺貧

送張鍊師遊七閩

高士不羈如野鶴忽思閩海重經過舟前春水他鄉遠雪後
晴山何處多鰲鰓臥雲芳草細鉤輶嘒嘒樹野煙和武陵九曲
最清絕落日采蘋聞櫂歌

杭人有傳余死者貞居聞之愴然因賦此以寄

果園橘熟誰分餉茅屋詩成嬾寄將
衰謝皆傳余已死迂疎真與世相忘
夜分風雨雞鳴急天闊江湖鴈影長
寥落百年能幾面論文猶及重銜觴

寄張德常

身世蕭蕭一羽輕白螺杯裏酌滄瀛
逍遙自足忘鵬鷖漫浪何須記姓名
石鼎煮雲聽夜一作雨玉笙吹月和松聲
憑君爲問張公子曾到良常夢亦清

題張以中野亭

人境曠無車馬雜軒楹只在第三橋
開門草色侵書幌隔水松聲和玉簫
一榻雲山供夏簟滿江煙雨看春潮
君能擷取飛霞珮天際真人近可招

題孫氏雪林小隱圖

天地飄搖一短篷小窗虛白地鑪紅脩然忽起梨雲夢不定
仍因桺絮風鶴影襴褌簷上下鹿迤散漫屋西東杜門我自
無干請閑寫芭蕉入畫中

送杭州謝總管

南省迢遙阻北京張公開府任豪英守臣視爵等侯伯僕射
親民如父兄錢廟有碑刻夜雨岳墳無樹著秋聲好將飲食
濡飢渴何待三年報政成

上巳日感懷

石梁破屋路欹斜僻似華陽道士家漠漠春雲飛別鶴潺潺
夜雨雜鳴蛙閑看稚子翻書葉時有鄰翁汲井花日莫傷心
江水綠共舟人已躡飛霞

贈張玄度時方喪內

吳松江水似荆溪九點煙嵐落日西寂寂郊園寒食過蕭蕭

風雨竹雞啼蕙花委砌心應折芳草歸途意轉迷曾得魯連
消息否春潮隨雨到長隄

喜謝仲野見過

階下櫻桃已著花窗前野客獨思家故人攜手蹋江路拄杖
敲門驚夢華藉草悲歌聲激烈停杯寫竹字欹斜新蒲細柳
依依綠西北浮雲望眼遮

寄熙本明二首

在山無事入城中每問歸樵得信通松室夜鐙禪影瘦石潭
秋水道心空幽扉獨掩林間雨疎磬遙傳谷口風幾度行吟
欲相覓亂流溪澗隔西東

白首遙知得道餘不聞詩思近何如高齋夜雪同誰話古木
寒山獨自居夢裏只尋行去路愁時聊讀寄來書夕陽溪上
多飛鳥若箇能看影是虛

寄盧士行

闔閭浦口路依微
笠澤汀邊白板扉
照夜風鐙人獨宿
打窗江雨鶴相依
畏途豈有新知樂
老境一作景空思故里歸
擬問桃花泛春水
船頭浪暖鰕魚肥

送徐子素

山館畱君才一月
梅花無數倚霜晴
垂簾幽閣團雲影
貯火茶鑪作雨聲
淡竹每容馴鹿臥
青山時與道人行
歸舟載得梁溪雪
惆悵鄰雞月四更

三月一日自松陵過華亭

竹西鶯語太丁寧
斜日山光澹翠屏
春與繇花俱欲謝
愁如中酒不能醒
鷗明野水孤帆影
鶻沒長天遠樹青
舟楫何堪久畱滯
更窮幽賞過華亭

再用韻呈諸公

北窗高臥自清寧煙霧衣裳雲錦一作翠屏舉世無知心自得衆
人皆醉我何醒黃熊號野兵埃黑白骨生苔鬼燐青舊宅荒
蕪時入夢墨池誰訪子雲亭

次韻邵生

一作疎林遠岫圖
寫贈子素徵君

已從鷗鳥狎雲溪老我無機似漢陰采采菊花猶滿地蕭蕭
霜髮不勝簪南遊阻絕傷多壘北望艱危折寸心好在吳松
江水上青猿嘯處有楓林

別章鍊師

方舟共濟春江闊訪我寒煙菰葦中鼓柁斜衝蘆葉雨鉤簾
半怯杏花風仙人壇上芝應碧玉女窗中桃未紅擬趁輕帆
數來往縹壺不惜酒如空

寄養正

得君佳句清如玉秋色驚人換物華老境侵尋真有感故園

隔絕更興嗟女蘿綠遍牽茅屋烏柏紅明映落霞欲酌一尊
澆磊塊幾時邀子過田家

贈岳松澗

曾訪神仙五粒松澗泉流潤白雲封林間蘿葛交青影一作蔓石

一作水畔菖蒲開紫茸煮石有方畱一作秘設采苓一作芝何處覓行蹤岳

君別我三千歲晚戲滄洲又汝一作得再逢

送僧遊天台次張外史韻

四明山水名天下師去那知客路遙雪霽驚麕騰宿莽月明
寒鵲集疎條坐尋雲頂千峰石歸趁江頭八月潮說與住山

一作寄語山中光老子送賓也合過溪橋

過許生茅屋看竹

舟過山西已夕曛許生茅屋遠人羣鑿池數尺通野水開牖
一規畱白雲煮藥煙輕衝竈出碓茶聲遠隔溪聞可憐也有

王猷興階下新移少此君

寄德朋

故人欲問梁鴻宅遺跡猶應杵臼存
楓葉菊花秋瑟瑟荒園廢圃雨昏昏
農人掩舍春明墅縣吏催租夜打門
唯有德朋多遠思賦詩刻燭酒重溫

寄顧仲瑛

江海秋風日夜涼蟲鳴絡緯尚練裳
民生惴惴瘡痍甚旅泛依依道路長
衰柳半欹湖水碧濁醪猶趁菊花黃
知君習靜觀諸妄林下清齋理藥囊

與伯雨登溪山勝槩樓

樓下清溪夏亦寒溪頭箇箇白鷗閑
風回綠卷平隄水林鍤青分隔岸山
若士振衣千仞表何人泛宅五湖間
絕憐與子同清賞擬向雲霄共往還

和華以愚韻兼題所畫春山高士圖

扁舟溪上數來過
白髮殘春奈我何
桺絮如煙迷曉浦
杏花飛雪點春波
林扉有客圖丘壑
石室何人帶女蘿
欲和華山高隱曲
羈愁悽斷不成歌

風雨

風雨蕭條歌慨慷
忽思往事已微茫
山人酒勸花間月
秦女箏彈陌上桑
鐙影半窗千里夢
泥塗一日九回腸
此生傳舍無非寓
謾認他鄉是故鄉

故吾

縹緲青山日欲晡
瀟漫秋水興何孤
鶴歸城郭生新夢
塵掩圖書尚故吾
南畝藝苗傷碩鼠
北窗臨澗聽啼烏
醉歸倘乞封侯地
便復移家傍酒壚

二月廿二日潘子素王叔明來慰藉臨別爲寫水傍

樹林圖并題

積雨開新霽汀洲生綠蕒臨流望遠岫歸思忽如雲

竹石圖

雨過黃陵廟風生渭水波當時卸帆處苔石倚喬柯

爲曾高士畫湖山舊隱

厭聽殘春風雨卷簾坐看青山波上鷗浮天遠林間鶴帶雲
還

題畫

罨畫溪頭喚渡銅官山下尋僧水榭汀橋曲曲風林雲磴層
層

絕句四首次九成韻

我別故人無十日衝煙艇子又重來門前積雨生幽草牆上
春雲覆綠苔

斷送一生棋局裏
破除萬事酒杯中
清虛事業無人解
聽雨移時又聽風

沒逕春泥不出門
山煙江霧晝長昏
糟牀聲雜茅簷雨
破却陰寒酒自溫

郊子論詩冀北空
晤言千里意常同
待晴紫陌堪縈手
行咏山光水影中

至正十四年二月廿五日雨郊君九成賦絕句四首云杏花簾幕看春雨溪巷無人騎馬來獨有倪寬能憶我黃昏躡屐到蒼苔春色三分都有幾二分已在雨聲中牆東兩個桃花樹恨殺朝來一番風十日春寒早閉門風風雨雨怕黃昏小齋坐對黃金鴨寂寞沈香火自溫春寒時節病頭風惆悵年華逝水同世事總如春夢裏雨聲渾在杏花中倪瓚畱宿高齋篝鐙爲寫春林遠岫圖并次韻四詩題畫上時夜漏下三刻矣佩韋齋中書

雨晴

江上白蘋風起波
冷紋縈碧莫煙和
織成一幅鴛鴦錦
零落紅衣遠恨多

絕句

醉喚吳姬舞蹋筵風闌花陣亦回旋愁生細雨寒煙外詩在
青蘋白鳥邊

賦空遠樓

空遠樓前春可憐數峰依約亂流邊若爲倚劒崆峒外回望
齊州九點煙

別潘先輩

君來煙草正淒迷君去溪頭桺葉齊挂席中流竟東上莫重
回首向荆溪

重送初上人參禮光公

阿育王塢舍利存山氣無雪春冬溫蓮花臺近多羅樹中有
人談不二門

竹枝詞

井序 錄五

會稽楊廉夫邀余同賦西湖竹枝歌余嘗莫春登瀕湖

諸山而眺覽見其浦澈沿洄雲氣出沒慨然有感于中
欲託之音調以申其悲歎久未能成章也因覩斯作爲
之心動言宣爲詞凡八首皆道眼前不求工也

錢王墓田松柏稀岳王祠堂在湖西西泠橋邊草春綠飛來
峰頭烏夜啼

湖邊女兒紅粉妝不學羅敷春采桑學成飛燕春風舞嫁與
燕山遊冶郎

阿翁聞說國興亡記得錢王與岳王日莫狂風吹桺折滿湖
煙雨綠茫茫

春愁如雪不能消又見清明賣桺條傷心玉照堂前月空照
錢唐夜夜潮

嗷嗷歸鴈度春江明月清波鴈影雙化作斜行箏上字長彈
幽恨隔紗窗

倪高士詩集刻本係荆溪寒曦編集所載竹枝詞八首敘次甚明新刻本止載四首又不載小序而于楊鐵厓西湖竹枝詞所載雜見集中并列朝詩選所錄二詩亦分兩處鐵厓所載四首王第二首與此頗同附記于此其詞云鷓鴣生長最高枝雁墀銜將向北歸天長水闊無消息只有空梁燕子飛湖邊女兒紅粉妝不學羅敷朝采桑自從學得纖腰舞嫁與城西遊冶郎愁水愁風人不歸昨夜水沒釣魚磯蹋盡蓮根終無藕著多桺絮不成衣桐樹元栽金井西月明照見影離離不比蘇公隄畔桺烏鴉飛過鷓鴣樓

題畫

樓閣參差霞綺開
峰巒重複水縈迴
赤闌橋外垂楊下
步月吹笙向此來

吳中

一作蘇臺懷古

望中煙草古長洲
不見當時麋鹿遊
滿目越來溪上水
流將春夢過杭州

三月廿日題所寓屋壁

梓樹花開破屋東
鄰牆花信幾番風
閉門睡過兼旬雨
春事依依是夢中

六月五日偶成

坐看青苔欲上衣一池春水靄餘暉荒邨盡日無車馬時有

殘雲伴鶴歸

雲林子之生有一鶴飛集于林上後避地江陰華亭鶴亦翔舞不去雲林沒鶴去不還

正月廿六日漫題

泖雲汀樹晚離離飲罷人歸野渡遲睡起香銷金鵲尾獨聽疎雨打窗時

二月十五日雨作

風軒紅杏散餘霞隄草青青桃欲花寒食清明看又近滿川煙雨亂鳴鼃

秋容軒

碧花翠蔓引牽牛叢竹黃葵意更幽不用田疇三日雨已輸糴秬十分秋

題畫

南望銅官曉色新三株松下一茅亭何當濯足臨前澗坐石

閑書相鶴經

追和蘇文忠墨蹟卷中詩韻

奎章閣下掌絲綸清淺蓬萊又幾春三十六宮秋寂寂金盤
露冷泣仙人

聞竹枝歌因效其聲二首

鈿山湖影接松江橘葉青青柿葉黃要寫新愁一作詩寄音信西

風斷鴈不成行

江流不住楚山青船到潯陽幾日程不忍寄將雙淚去門前

潮落又潮生

姚榮公嘗有詩云開元寺裏常同宿笠澤湖邊每共過誰說江南君去後更無人聽竹枝歌爲先生作也

剖瓜仕女圖

月彎削破翠團團六月人間風露寒誰覓東陵故侯去但知

翠屋薦金盤

晚照軒偶題

南湖春水碧於天夢作沙鷗狎釣船綠樹拂簷風雨急覺來
依舊北窗眠

畫竹贈申彥學

吳松江水似清湘煙雨孤篷道路長寫出無聲斷腸句鷓鴣
嘯處竹蒼蒼

題秋江圖

長江秋色渺無邊鴻鴈來時水拍天七十二灣明月夜荻花
楓葉覆漁船

偶成

紫燕低飛不動塵黃鸝嬌小未勝春東風綠遍門前草暮雨
寒煙愁殺人

題畫贈僧

笠澤依稀雪意寒澄懷軒裏酒杯乾篝燈染筆三更後遠岫

疎林亦耐看

雲林題畫詩最多其自題小畫二詩云逸筆縱橫意到成燒香弄翰了餘生窗前竹樹依苔石寒雨蕭條待晚晴可謂自贊

素衣詩素衣內自省也督輸官租羈繫憂憤思棄田

廬斂裳宵遁焉

至正乙未

素衣涅兮在彼公庭載傷迨隘中心怔營彼苛者虎胡恤爾
氓視氓如猺寧辟尤詬禮以自持省焉內疚雖曰先業念毋
盪失守而不逞致此幽鬱身辱親殆孝違義屈蔚蔚荒塗行
邁靡通雖雖鳴鳳世莫之逢夕風淒薄曷其有旦吁嗟民生
實罹百患先師遺訓豈或敢忘簞瓢稱賢樂道無殃予獨何
爲悽其悲傷空谷有芝窈窕且廓爰宅希靜菽水和樂載弋
載釣我心不忤安以致養寤寐忘憂修我初服息焉優游

送甘允從北上

翔鴻縱高姿流水去不息枉道別友生揚舲望京國婉孌前
途憩蕭條餘景匿神京衣冠會左右金陽宅驅馬流星絲垂

軒春霧集嘉子玉質朗早通金閨籍行逢明主顧入補詞臣
職束帶向晨趨陪讌終日昃芳年易爲曉所願崇令德英英
白雲飛渺渺青山隔秋風應節起萬里思親客遲子返舊居
銜杯數相覲

荅徐良夫

雲臥雨聲集庭樹颯以秋身同孤飛鶴心若不繫舟燕俎登
松菌匏尊斟澗流蘭芳日彫悴吾生行歸休不作螻蟻夢遊
神鳳麟洲青山澹相對白髮忽滿頭仙去行冉冉風鳴竹修
修諒哉伐木詩鳥嚶尚相求居吳二十載未及茲山遊君才
如鮑謝摘詞亦云優歡然敬愛客能不爲爾畱桑土夙所徹
戶牖何綢繆地無車馬塵路轉巖穴幽旣晴引飛屨回望林
間樓

秋夜

此詩從乾坤清氣
錄入與集中稍異

空林溥露氣疎鐘時獨聞清夜息羣動高居無俗氛恬淡誠
吾事榮名非所欣樂哉詠王風忘年棲白雲

八月廿三日芙蓉花下畱南宮岳山人飲明日岳山
人過玉山南宮老矣不知復幾聚首觀花聽琴情不
能堪因賦長句并簡玉山

芙蓉著花已爛熳濁酒彈琴聊少停數聲別鵠隔江渚一醉
秋天空玉鉶况當賓客欲行邁忍使風雨卽飄零攀條掇英
重惆悵但願花開長不醒

寄王道士宗晉

王君舊隱地聞更結茅茨鶴氅春裁芋鵝羣雪泛池時歌綠
水曲不負碧山期夜雨生芳一作春草令人起夢思

送僧

聞說四明道山川似若耶去依阿育塢還宿梵王家野井一作市

封殘雪江船聚晚沙光公強健否持底作生涯

贈王光大

荆溪王隱士相見每從容借地仍栽竹巢雲獨傍松青苔盤石淨嘉樹綠陰重約我同棲遁嵩高第幾峰

桂花

桂花畱晚色簾影淡秋光靡靡風還落菲菲夜未央玉繩低鉞月金鴨罷焚香忽起故園想泠然歸夢長

題畫

甫里林居靜江湖遠浸山漁舟衝雨出巢鶴帶雲還漉酒松肪滑數茵楮雪閒春風一來過似泊武陵灣

寄張德常

卜宅近溪西雲煙咫尺迷晝眠同野鶴晨起候林雞舊種松三徑春栽菊滿畦來禽與青李囊致不封題

六月六日盧氏客樓對雨呈維寅

無家隨地客小閣看雲眠涉夏雨寒甚似秋風颯然舞鸞悲
鏡影飛鴈落箏絃好轉船頭去江湖萬里天

因吳國良過玉山草堂輒賦長句奉寄

玉山樹色隱朝陽更著漁莊近草堂何處唱歌聲欵乃隔雲
濯足向滄浪珍羞每送青絲絡佳句多投古錦囊幾問擢船

尋好事辟疆園圃定非常

玉山主人欲延楊鐵厓于家塾鐵厓報曰必得當世
清雅高潔之士如倪雲林者以一札至即如約耳玉山

因託雲林素相習者操舟出邀至玉山人家玉山已構別業悉如蕭閑清閤之製雲林
驚喜請見玉山玉山告以鐵厓之意欣然致書焉自是三人相與結驩往來無間

東林隱所寄陸徵士

寢扉桃李晝陰陰耕鑿居人有遠心一夜池塘春草綠孤邨
風雨落花深不嗔野老羣爭席時有遊魚出聽琴白髮多情
陸徵士松間石上續幽吟

次韻郊九成見寄

郭外青山舊結廬微茫野逕望中無殘生竟抱煙霞癖好事
猶傳海岳圖夜壁松風懸雅樂秋池菊水酌商飮儻從世事
求玄賞好趁輕舟看浴鳧

懷歸

久客懷歸思惘然松間茆屋女蘿牽三杯桃李春風酒一榻
菰蒲夜雨船鴻迹偶曾畱雪渚鶴情原只在芝田他鄉未若
還家樂綠樹年年叫杜鵑

題竹

歎息真成汗漫遊經春歷夏又嗟秋林居已是能鳴士顧我
寧非不繫舟江渚出吟聊自適竹梢清淚浩難收王孫莫道
歸來好芳草天涯恨未休

雲林詩句挺秀多可存者五言如靡蕪細雨溼桃李春風寒湘簾閑秋水風蓮墮粉衣
卷簾微雨裏岸幘晚風餘墨沼鵝羣白雲窗藥蕊紅山色排簷入江波照眼明野竹
寒煙外霜柯夕照邊七言如午夜月明風滿帳千厓人靜鶴眠松春池雨後泉應滿庭
樹雲移影更長翳日長林藏伏虎際天春水浴輕鷗忽有故人騎馬至即呼稚子出門

迎煙邊去鳥莫山碧衣上飛花春雨香溪船斫鱸雲生柁松室聞猿月滿枝半席白雲
臨碧澗四更落月挂長松圍棋終日對急雨解帶六月如高秋即此數語可想見其人

題鄭所南蘭

秋風蘭蕙化爲茅南國淒涼氣已消只有所南心不改淚泉
和墨寫離騷

清明日風雨淒然舟泊東林西澣步過伯璇徵君高
齋焚香瀾茗出示燕文貴秋山蕭寺圖展玩良久因

賦一絕

野棠花落過清明春事怱怱夢裏驚倚櫂微吟沙際路半江
煙雨莫潮生

舊本作清明後顯云野棠花落又清明楊柳去青人耦耕春物闌珊成底事半江疎雨莫潮生

國寶照磨有平野軒在揚州城郭中今寓吳十許年
矣至正丙午九月十一日在開元寺爲寫此圖并詩以
贈

雪筠霜木影差差平野風煙望遠時回首十年吳苑夢揚州

依約鬢成絲

煙雨中過石湖三絕

煙雨山前度石湖一奩秋影玉平鋪何須更翦松江水好染空青作畫圖

姑蘇城外短長橋煙雨空濛又晚潮載酒曾經此行樂醉乘江月臥吹簫

愁不能醒已白頭滄江波上狎輕鷗鷗情與老初無染一葉輕軀總是愁

自題設色山水贈孟膚徵君

秋潮夜落空江渚晚樹離離含宿雨伊軋中流間櫓聲臥聽漁人隔煙語

十七日過與之洛澗山莊畱宿復大雪作及明起視戶外巖岫如玉琢削竹樹壓倒徑無行蹤飄瞥竟日

至莫未已雪淡尺餘賦詩畱別

世途縈荏苒歲晏不知歸密雪竹林夜挑燈共掩扉稍移神
慮靜高詠玄言微遇此巖中賞初心悵多違

李徵君將還揚州因言沈郎官在吳下賦此以寄

二月桃始花淮南客還家階前疎雨落堂上春衣薄爲言沈
約在吳中玉壺青絲酒如空春風相過蕙草綠芳菲滿堂樂
未終

送元度北游

荷鐻空林春雨餘艤舟沙岸燕初飛去尋天上仙人佩
顧山中隱者居霜月四更提劍舞田園二頃帶經鋤蘭榮柳密
南簷下佇子雲間枉尺書

悼頂山寺清上人


杯渡前溪見水源偶來佩芷服蘭蓀香臺猶帶山窗影經卷

長依松樹根雲起晴峯還有觸雪消春野不畱痕倏然我已
忘言說翠竹黃花自滿園

薩仲明爲丞相府掾時僦居京師名其軒曰半野後
買宅延陵亦揭是名于軒因雨宿其下遂爲賦詩云
何意開軒名半野身存魏闕思江湖斜侵瓜圃通花藥稍傍
薇垣近竹梧千里秋風催斫鱸九霄晨露浥飛鳧如今別買
荒城宅自埽風林候野夫

題所畫雲林小景圖

赤城霞暖神芝秀洞裏桃花不記春何事却將山水脚鍾陵
市上踏紅塵








PL
2534
1K8
v.21

靜思處士郭鈺



鈺字彥章別號靜思吉水人壯年盛氣負奇適當元季
之亂晚際明興以茂才徵不就年逾六十竟以貧死其
春夜寒詩序云余值時危一窮到骨薪米不給恒自謂
不敢僥倖今春雨雪連旬擁牛衣以當長夜寒砭肌骨
遂成疙瘩其詩云少壯幾時頭欲白夜闌山鬼瞰孤燈
亦可哀已靜思詩清麗有法格律整嚴其於離亂窮愁
之作尤悽惋動人殆所謂詩窮者歟嘉靖間八世孫廷
昭哀集其詩刻之羅念菴曰靜思爲吾族志行之甥經
歷艱難閭里流離之狀皆目見之當時故實可裨野史
其贈吾族秀賓詩有云聖賢去我遠縻茲糟粕味當其
得意時何如卿相貴嗚呼此詩人所以窮餓終身而不
悔也念菴此言可謂深知靜思者

題郭伯澄西崦山居

白日上東山晴光射西崦西崦山人開曉關一襟煖翠濃如
染門前流水玉虹明樹上啼鶯金羽輕自埽落花客初到共
題修竹詩先成十載戰塵迷道路西崦只今成久住移竹春
溪長子孫種梅晚歲爲賓主丈夫揚睂天地間山林朝市俱
等閑出爲公卿入爲士古人高節非難攀聞君近年深閉戶
烏帽青燈讀書苦劒寒新淬冰雪光松老終無棟梁具西崦
山溪竹徑微我來欲共薜蘿衣一朝富貴逼君去燕雀空羨
冥鴻飛

採蕨歌

朝採蕨南山側暮採蕨北山北穿雲伐石飛星裂手脚凍皴
腰欲折紫芽初長粉如脂瘦根蟠屈蛟蛇結吞聲出門腹已
飢猿啼風擺藤蘿衣長鑱短笠日將暮攀援垠塢何當歸朝

採薇莫採薇東鄰老翁更淒惻抱薇轉死長松根妻子眼穿
淚成血情知世亂百憂煎得歸茅屋心懸懸癡兒啼怒炊煙
晚打門又索軍需錢君不見將軍擁旌節紅樓夜醉梨花月
題秋江送別圖送楊亨衢少府參安成軍事

楊少府紫騮馬黃金鞭團花戰袍繡兩肩腰下雕弓懸迴若
秋鷹解條錠縱之颯颯凌千仞之蒼煙酒酣拔劔玉龍舞喝
令西飛白日回中天簸海腥風白波立壓空殺氣玄雲連緣
邊諸將亦無數晝擁旌旗夜撾鼓豹韜合變待參謀太守掄
才君獨去送君江上君甚歡江風吹雪蘆花寒知君心事如
秋水故應寫入畫圖看問誰畫者謝君績不畫琵琶美人泣
舟子揚帆發棹歌主人解劔停盃立我亦從軍今四年男兒
姓名何足憐老親白髮長相憶只得還家種薄田

送友人從軍兼呈謝君績參軍

元詩選
歎息復歎息歎息長書空殺賊五年無寸功今者又送君從
戎七星戰袍襯金甲三山尖帽飄猩紅牙旂曉發玉花驄猛
士雙劒立西東爺娘妻子不用哭上馬更勸黃金鍾黃金鍾
琥珀濃豪氣千尺搖晴虹明日軍門揖主將論軍未可皆雷
同安成之寇容易攻廬陵凋弊遺民窮自非奇謀浹擒縱煩
費日久誰當供君家伯仲盡少年正好變化扳飛龍頗聞幕
府多才雄爲我問信毋恩恩我有大羽箭不殺南飛鴻要如
魯仲連繫書射入聊城中祇緣骨相不受封不如扁舟歸去
長伴滄浪翁

貽郭恆

月懸松露明鵲啼浦煙破遙想山中人此時正思我我行忽
墮滄江邊度盡春風無一錢向來自是釣鰲客至今思拍洪
崖肩洪崖不可招蓬萊在何處鋪遍閑愁芳草路千樹綠陰

晝如雨錦字書成人不來銀燭花殘誰與度近日聞君多好
懷雪色白紵佳人裁小樓紈扇低徘徊釀酒好近榴花開榴
花開我歸來

母棄子同劉茂才賦

母棄子子幼情可憐子長母還去爲子宜思愆龍爭虎鬪事
翻覆寶玦王孫捐骨肉十年母子安茅屋菽水真情無不足
奈何一朝辭故幃子也慟哭牽母衣母今棄兒不敢怨父在
深恩母當念母如不聞竟不留黃昏門掩青燈愁負米歸來
飲殘泣他家兒女何綢繆噫噓噓邇來萬事足悲咤負德辜
恩滿天下丈夫盡爲溫飽謀婦人何得母重嫁

龍伯淵席上和周子諒長歌兼呈諸君子

伯夷登西山魯連蹈東海烈士懷苦心海枯石爛終無改蕭
蕭華髮吹秋霜夜煮白石充飢腸人情俯仰今異昔惟有青

山似故鄉桐江江上一攜手公子華筵誰不有賦筆每慚崔
顥詩持盃願飲茅容酒銀燭花高照坐空笑談頗有前賢風
好懷傾寫向誰是或執螭蜺嘲神龍老我疎狂眼常白欲麾
凍蠅清几格不須浪說管鮑交眼中誰有真顏色百年聚散
如搏沙東風燕子還西家羣仙天上擷飛霞君歸好醉瓊林
花

題劉履初所藏莫慶善鷹

日光懸秋雙翮齊欲飛不飛愁雲低足無條鋌腹無食空林
尚恐難安棲筆力精到天機微莫生所畫詩我題君不見天
下太平角端語狐兔草間何足數

控郎馬酬別蕭茂才

控郎馬妾心悲畱郎駐郎苦辭少年只願封侯早不惜蛾眉
鏡中老銀鞍金勒珊瑚鞭白水青山千里道控郎馬郎駐鞍

郎飲莫須盡酒醒郎衣寒郎心懸懸五雲下教妾若爲控郎
馬馬蹄好向御街行蛾眉不向妝臺畫

長相思

長相思相思者誰自從送上馬夜夜愁空幃曉窺玉鏡雙蛾
眉怨君却是憐君時湖水漫秋藕花白傷心落日鴛鴦飛爲
君種取女蘿草寒藤長過青松枝爲君護取珊瑚枕啼痕滅
盡生網絲人生有情甘白首何乃不得長相隨蕭蕭風雨喔
喔鳴雞相思者誰夢寐見之

瑤花

花白色而變
殘紅而碧

瑤臺仙子初相見迴立天風飄雪練東華夢破歸去遲素衣
總被緇塵染芳心不委春蝶狂水晶簾捲凝清香臙脂洗紅
畱殘暈海雲翦碧浮霓裳揚州瓊花舊同譜零落誰知到南
土聞君愛花最有情亭臺五月清無暑君不見花開今日多

有酒不飲君如何

秋夜讀劉昕賓旭子夜歌因效其體賦二首

子夜歌歌罷其如明月何
牽牛織女永相望不教精衛填銀河
妾心本如秋月白妾顏不共春風發
玉兔擣藥三千年近見嫦娥搔白髮

子夜歌承君蛺蝶雙花羅羅衣秋來不堪著
梧桐樹上涼風多銀燭作花好消息
又想歸期在明日并刀不翦相思愁
相思誤盡曾相識

同李主敬賦周煉師漁樵耕牧詩四章

子何爲漁碧海之丘長虹爲綸月爲鉤
六鼇昂首相向愁眼看海水不揚波
扁舟穩繫珊瑚柯邂逅徐家兒與女
拔劒屠龍共君煮煙淡淡雨疎疎
人間彈鋏食無魚吁嗟歸來乎吾
與爾漁

子何爲樵閬苑之東瓊林玉樹朝露濃攜斤盡翦荆榛叢松
下童子知何客長日圍碁看不得笑殺吳剛愁滿霜千古桂
枝礙明月石磊磊路迢迢人間飢火燒心焦吁嗟歸來乎吾
與爾樵

子何爲耕瀛洲之曲玉山分雨秧苗綠蒼龍爲耘虎收穀炊
煙晨起蒸爲雲銀河晝洗塵沙昏釀成九霞爲君壽何必休
糧苦長瘦樹陰陰草青青人間作苦秋無成吁嗟歸來乎吾
與爾耕

子何爲牧蓬萊之麓自駕青牛度函谷鶴羣鹿子還相逐芝
草松間長未齊紫苔竹下行迹迷南山羣羊化爲石日斜歸
去空無攜水泠泠山簇簇人間岐路往還復吁嗟歸來乎吾
與爾牧

簡王志元二首

戰塵暗南國白日無晶輝客行何慘戚途窮不忘歸語及國
家事老氣晴虹飛朝飲南山水夕採西山薇嗟彼反側子捐
軀逐輕肥寒餓良細事大義有是非

海月上蒼茫照我中庭正香霧出簾遲微風動花影泠泠綠
綺琴拂拭塵埃淨一彈作新聲再彈成雅韻三彈曲未終感
激誰與聽肅衿遲子來無負春宵永

同周愷子諒賦老人會詩

時危親戚散況乃多賤貧睠茲老人會爲樂難具陳生子競
榮達志養俱獲伸朝出共寮案夕歸爲比鄰異姓歡愛洽不
殊骨肉親起居迭相送婉愉盡情真繫我豈無母半菽長苦
辛願言敷治化枯槁皆同春

濠石晚樵因簡李撫伯謙

出山復入山流泉遞迎送暝入黃葉深溼分白雲重棘荆攢

逕危側身抱淡恐春花自芳妍春鳥自鳴呀悠悠徒旅間何
由免寒凍老親嗟我勤歎息中腸痛肩頰只自憐囊罄當誰
控學劒惜已遲讀書亦何用國步政艱危高官選才勇李君
舊知己風格鬱清聳光怪匣中龍文采雲間鳳庭幃壽且康
甘旨日相奉避地雖云同樂事誰能共知君懷遠略臨機不
妄動戰爭奈未已發策必奇中何當展才力青雲縱飛鞚

悲廬陵

并序

至正十六年丙申冬袁州兵逼城屯藤橋丁酉正月義
士廬陵陳瓘出屯城北之青湖二月吳都事命兵校明
某下桐江計事不報入蘭溪召不至五月桐江李彬誅
六月袁州兵退秋明某歸遂以其屬屯太和之永和十
一月明某矯殺騎將林伯顏武端不問十二月全參政
笞其部將某某戊戌正月朔庚子戊午參政兵亂逐鎮

撫吳林三月梁太守卒安成兵自去冬侵掠北境旦莫
至四月至桐江五月初四退初十戊申分宜義士袁雲
飛導汚兵至桐江己酉義士劉照與戰于吉水之灘頭
庚戌明某以都事之衆降辛亥傳于城錄事張元祚與
攝監郡雅某降全叅政奔贛裨將裨將降叅謀鄉貢進
士吉水蕭彝翁死之是日陳瓘召安成兵入城六月吳
都事將其屬居吉水之蘆兜此吉安再陷之略也

峩峩青原山洋洋白鷺水炳炳照輿圖磊磊足多士四忠與
一節流風甚伊邇往往舉義旗事由匹夫始連兵七年間省
臣兼節制朝廷寄安危幕府保姦宄勢驕改令圖反側久窺
伺紅旂遡江來羣雄盡風靡今日賣降人昨朝清議子奈何
英雄姿因之穢青史朝爲龍與虎夕爲狗與彘流芳動百年
遺臭亦千祀嗟余父母邦何忍獨淩訐所恨寧馨兒磔磔不

得試賴有蕭參謀殺身刷浚恥我欲裁白雲緘情問生死哀
歌裂肝腸臨風淚如洗

送羅彥思往閩中候迎大父

天倫有真樂家慶傳新圖人生百年內於焉始爲娛爾翁老
京國風霜搖鬢鬚爾父奉慈幃干戈沈里閭豈無饘與粥朝
夕不得俱眼穿孤飛雲心折反哺鳥近者消息真萬里神明
扶沈思供子職內外懸君軀投袂出門去父命何勤渠朝迎
莫望返少壯輕畏途見翁問起居同舍相驚呼孫已如翁長
子應似翁懼時危久離別會面當何如歸期諒不遠春酒爲
君酤再拜千歲壽親戚多歡愉鄉相何足道勝事世所無願
言慎前路明發毋躊躇

早秋陪楊和吉曉登前山望桐江

白鶴導晨從涼颺起林杪振衣凌高岡極目窮幽眇蕭蕭草

樹秋歷歷人煙曉依微玄潭觀羣仙在林表下有塚繫累世
事誰能了桐江滙章水晴漲何渺渺曾不瞬息間一帶紫沙
小無怪豪傑區煙蕪怨啼鳥盛衰兩相乘玄悟良獨少君今
脫塵羈相從得閑眺題名剡石苔借蔭憩叢篠白紵含餘清
稍覺心情悄山市門初開飛塵已紛擾

秋夕王楚善過宿

片雨灑空庭梧桐響殘滴窗戶涵清風孤燈夜寥閨渺懷平
生親睽違不相識公子幸過從爲之長歎息意曠塵慮空語
到聰明入山逕披榛蕪晤言永今夕物變心自傷事往嗟何
及遠大與子期無踵炎涼迹

送別李騰還鄉

別離古云苦況值兵未休慈烏夕反哺蝮蛇寒出遊料事每
成錯去住難自謀東風捲飛雨添我雙淚流憑君見親舊道

此情悠悠

黃氏容安樓

君家高樓高百尺樓間把酒無虛日極目欲窮千里心誰謂
區區僅容膝捲簾半空雲氣入孤鶴長鳴楚天碧醉拍闌干
呼月來萬壑松風夜吹笛天上玉京十二樓羣仙不帶人間
愁曉飛霞佩來相訪攜我共作丹丘遊今日之日君我畱爲
君題詩樓上頭笑指樓前大江水古今人物共風流

賦清溪

清溪之水抱幽谷盤渦細浪相逐蹙半篙晴日蕩金鱗一帶
秋煙溜寒玉溪上仙翁絕塵俗開門俯溪飲溪綠白鳥飛來
明鏡中垂楊鎖斷闌干曲窈窕春花亞修竹修竹何人共碁
局紫蘿爲蓋草爲褥如輞川圖懸一幅嗟我早年厭羈束五
湖風月醉心目祇今是處沸鯨波把釣從君事亦足

秋塘曲

高荷擁翠秋滿塘
花開不見聞花香
老魚吹波紫萍碎
花下飛起雙鴛鴦
鴛鴦相逐低回翔
藕絲易斷愁心長
玉箏不彈轆轤悄
一簪華髮凝秋霜

冰山謠

黑風鼉鼉海波立
冰山嵯峨聳千尺
樓觀晴連蜃氣高
金銀夜貫虹光赤
上有異物騎於菟
左手鞭熊右麾驅
彎弓射天鬼神泣
憑陵殺氣搖荆吳
狡兔爰爰何所得
百計穿窬作三穴
父老相逢不敢言
夜對妻孥淚成血
一朝白日中天開
冰山融液非人推
淋漓后土滿泥滓
笑聲變作啼聲哀
前者已傾後者踣
出門却恨乾坤窄
秦關逆旅商君愁
楚國飛車觀起裂
早知冰山不可保
何不委身平地好
從今寄語問津人
風雨西山薇蕨老

美人折花歌

美人折花粉牆曲花前背立雲鬟綠乍愛薔薇染絳霞還惜
海棠破紅玉素手纖纖羅袖殷心情凝想金刀寒低枝未吐
精神少高花開遍顏色殘花刺鈎衣花落手草根露溼弓鞬
繡紫蝶黃蜂俱有情飛撲餘香趁人久情知人老不似花花
枝折殘良可嗟明朝棄擲妝臺側綠陰青子愁天涯

送遠曲

爲君治行近一月今晨竟作怱怱別枕邊紈扇鏡中花一時
盡變傷心色妾雖不見邊城秋君亦不識空閨愁憶君便如
君憶妾雙淚豈爲他人流才貌如君長刺促少年心事何時
足歸期未定須寄書誤人莫誤燈花卜

悲武昌

武昌兵甲雄天下王孫節制何爲者白馬將軍飛渡江壯士

彎弓不敢射王船未過鸚鵡洲紅旂已簇黃鶴樓美人散走
東南道一絲楊柳千絲愁戰鬼銜冤夜淚哭王孫獨在淮南
宿淮南美酒不論錢老兵猶唱河西曲九江昨夜羽書傳九
江太守愁心懸焉得將書報天子哀哉不識顏平原

郭恆惠牙刷得雪字

老氣稜稜齒如鐵曾咀姦腴噴腥血倦游十載舌空存欲挽
銀河漱芳潔南州牙刷寄來日去膩滌煩一金直短簪削成
玳瑁輕冰絲綴鎖銀驥密朱脣皓齒嬌春風口脂面藥生顏
色瓊漿曉嗽凝華池玉塵晝談灑晴雪輔車老去長相依餘
論於君安所惜但當置我近清流莫遣孫郎空漱石

贈彭將軍

將軍昔從布衣起便欲賭命報天子里中父老得開顏刺虎
斬蛟良細事幾年汗馬鏖戰塵君門九重誰得陳羽檄飛雲

白日莫牙旂捲雨滄江昏中書大臣擁貔虎吐氣如雲蓋南
土豫章城頭鳴老鴉匹馬夜出杉關去楚山蒼蒼楚水清草
莽之臣何重輕但得嚴君脫虎口皇天后土相知心誰想長
材不終棄控搏造化真兒戲東鄰早結丞相歡種瓜不到青
門地君家屋前山水幽正好歸來尋舊遊座上衣冠戲綵日
窻前燈火讀書秋我欲從君語疇昔悠悠世事嗟何及滄波
東逝魚西飛獨振布袍三歎息

負薪女

山下女兒雙髻垂上山負薪哭聲悲辛勤主家奉晨炊主翁
頭白諸郎癡干戈未解骨肉離生來不識妍與媼長笑鄰姬
畫蛾眉金屏孔雀何光輝琬弓羽箭來者誰綠楊終日青驄
嘶人生年少如駒馳鴛鴦翡翠皆雙飛愁思百結心自知負
薪拭淚背人揮黃昏四壁寒蟬啼

題秋山風雨圖

平生最愛米家畫君之此圖妙天下鳥分歸路雲不開樹壓
懸崖雨如瀉倚江茅屋何人住蘆竹蕭蕭出無路似我還山
煙雨中愁來只讀秋陽賦

從軍別

將軍披甲控紫驕美人挽轡雙淚流六月炎埃人命脆軍期
稍緩君須畱彼爲兄弟此爲仇朝爲公相夕爲囚歲歲年年
苦征戰黃金誰足誰封侯煙塵暗天南北阻英雄盡合回田
畝當時兒戲應門戶不謂虛名絆官府馬鳴蕭蕭渡江浦重
喚奚奴再三語將軍臨陣爾爲御莫把長鞭鞭馬去

和荅銓弟

弟云在贛日有誦爾
詩兩辱問起居者

別來兩見春日滿愁思誰云春夜短十八灘頭鳴棹歌吳姬
勸酒銀瓶煖中江開帆先到家意濃不計歸程賒但云老兄

久埋沒詩句何得隨飛槎諸公傳誦無新舊相憐似是平生
友事業青雲如鼠肝文章白髮羞牛後長年凍餓茫無涯不
敢仰天生怨嗟先生歸去且種菊詞客愁來空饅瓜

猛虎行

猛虎長嘯風滿谷十載山中往來熟朝瞰牛羊莫殺人眈眈
不畏弓刀逐山翁死後空茅屋山下行入早投宿妖狐憑威
作人語跳梁白日欺樵牧南來壯士怒相觸彎弓射虎穿虎
腹閃爍雙睛甘就戮髑髏作枕皮爲褥人生何必書多讀能
事自足驚殊俗何當更斬長橋蛟老夫雖死關心目

贈劉子倫

廬陵周愷文章伯語語談君不易得嗟余終日走風塵到今
未覩真顏色聞君早歲抱奇節曾中磊落太平策玉龍霜冷
光欲飛蒼隼秋高影孤掣交游四海多才傑自合貢之天子

闕綵筆題詩衡岳雲畫船撾鼓西湖月衣冠王謝自風流賓
客秦黃最超越往年仗劒奮忠烈戰袍紅濺猩鼯血草檄未
吐陳琳詞種柳已近淵明宅酒酣氣漲漱天風一聲長嘯層
崖裂登山臨水憺忘歸聽雨看雲頗愁絕茫茫世事應難測
英雄莫遣頭空白寒盡春生剗雪霜海闊天高排羽翮何當
攜手銅駝陌蓬萊羣仙朝帝側醉浥溟波鱣六鼇老懷浩蕩
從君說

滄洲灌夫詩爲周子諒賦

往年曾踏滄洲路滄洲仙人畱我住紫霞裁翦成春衣到今
挂在珊瑚樹十載人間走塵霧惟愛周郎讀書處雲氣寒淩
連竹松江波晴漲搖窓戶清曉中庭遺鶴羽太乙青藜夜相
語晚菰春韭東西畦鳥啼桑陰日當午浦雲分送疎疎雨抱
瓮歸來不知苦嗟我已負滄洲期羨君獨得滄洲趣江山今

古武陵源姓名伯仲蘇公圃畦外有田多種黍長使糟牀壓
香醕招隱先須招我來到門不用分賓主

葵花歎

朝見葵花長歎息莫見葵花重於邑白日攜光萬彙蘇寸心
炯炯誰能識蠟光膩粉花正開翠袖捧出黃金盃再拜君王
千歲壽六龍迎駕扶桑來朱門厭逢車馬客移花遠置山巖
側不辭辛苦灌葵根遮莫浮雲翳空碧

桐江宴集和周子諒韻

岸巾長嘯吾與君讓君筆力飛春雲蒹葭枯折吳江濱芝蘭
却許濃香薰今夕何夕歌聲聞江山重到吾已老慚愧詩成
瘦如鳥坐中少年美詞藻琪樹交花照晴昊懷抱一時盡傾
倒玉瓶行酒盃如飛爭雄得雋酒滿衣持觥御史令莫違斫
魚烹鴈頤指揮荊州吾土還相依江上雲荒月欲爛客囊空

元詩選
貯閑愁滿不謂相逢重展轉交情豈必論
淡淡黃鵠一飛天地遠

送宋仲觀迎親江陵

戰塵飛空暗南北出門每恨山河窄
況復荊州千里遙君家嚴親久爲客
天南鴈杳音塵絕十七年間愁百結
昨者忽傳消息真健步如仙髻如雪
上堂白母喜欲顛明朝便買西江船
奉迎歸養無不足高官可棄金可捐
東鄰失子西失母君家具慶寧非天
別君豈必送行曲望君却賦歸來篇
舊聞荆襄樹旗羽客行不免多愁苦
嚴君能保千金軀豈無歸夢到鄉土
老大還家樂且閑溪柳山花總如故
君今去去須早歸白髮慈親倚門莫

題李尚文少府所藏枯柳寒鴉圖

江邊獨柳飛羣鴉敗枝殘葉秋風斜
石泉可飲不可啄似聞

落日鳴啞啞一段淒涼幽思足忽憶看花過韋曲上林春早
聽啼鶯太液波晴寫黃鵠

征婦別

征婦臨行曉妝薄上堂辭姑雙淚落含情欲訴哭聲長一段
淒涼動林壑從夫不辭行路羞婦去誰爲養姑謀婦人在軍
古所忌今者召募如追囚十年婦姑共甘苦一室倒懸空四
顧小郎早沒更無人却把晨昏託鄰婦情知送兒是埋兒姑
年老太莫苦悲萬一軍中廢機杼減米換衣當寄歸小旂叫
呼催早別出門便成千里隔今夜不聞喚婦聲愁心共挂天
邊月

題蕭質所藏終南雪霽圖

玉龍銜燭晴光吐怪底空檐響殘雨南山一夜服還丹滄浪
之髭總如故公子昨朝愁出戶錦袍圍春醉歌舞赤脚老樵

拾斷薪畫史何由得淡趣早梅回煖動精神凍雀翻叢動毛
羽筆端生意開紈素恍然不計寒宵苦泥滑迢迢江上路行
客茅檐不少住世間捷徑渺何許已有扁舟候江滸隔浦長
橋似灞陵何如著我騎驢去黑貂擁醉詩思多明日歸來爲
君賦

春莫吟

玉壺酤酒青絲絡啼鳥勸人滿盃酌落紅滿地晴香消溼翠
如煙午陰薄畫樓玲瓏隔彩霞樓前雙鵲鳴喳喳想見吳帆
北風起王孫明日當還家

荊軻詞

燕山雪飛青宮閉氍毹夜煖沈沈醉北斗黃金何足多一筋
淡恩美人臂寒風蕭蕭度易水匕首光芒泣神鬼畢竟明年
祖龍死恨不報君爲君喜

張良詠

韓成未死思報秦漢燒棧道吾兵神韓成已死思報楚始知
漢王乃天與昨日相從赤松子今日已見淮陰死控御天下
漢業崇不受控御真英雄

王猛詠

五馬渡江老臣泣垂死丹心在王室當年非不思南來王謝
豈能生羽翼魏相張儀尚爲秦聊借羌苻展才力江南雖僻
不可圖青史千年誰獨識

春夜吟

月色如水花如雲美人樓上歌迴文樓鴉飛起玉階樹香風
吹動殷紅裙去年寄書到君側書中只寫思君切情知人老
髮如絲君歸不恨緣君白插花記月夜未央他人苦短我苦
長若使驅車到家日天涯芳草愁茫茫

狂客行

美人當窻捲珠箔狂客花陰彈黃雀黃雀低回嬌不飛金丸
偏著搔頭落與君未展平生親奈何調笑如無人萬一樓頭
是夫婿百年恨怨將誰陳君心誤認雙蝴蝶搖蕩迷魂招不
得

射虎行贈射虎人

昨日射虎南山顛悲風蕭蕭眼力穿今日射虎北山下虎血
濺衣山路夜朝朝射虎無空歸家人望斷孤雲飛度嶺踰山
弓力健虎肉共分不辭遠府司帖下問虎皮高枕髑髏醉不
知虎昔咆哮百獸走一死寧知在君手鼻端出火耳生風拔
劍起舞氣如虹昨夜空邨見漁火牛羊不收犬長卧作詩贈
君毛髮寒煩君爲我謝上官君不見昔日劉昆稱長者虎北
渡河不須射

秋望

長嘯動巖壑秋風生滿林片雲隨鴈度疎雨約蟬吟燕馬關
山遠吳船歲月深歸來蘇季子何用苦多金

從軍

減袖作戎衣爲儒事却非心肝同感激名位却卑微浼浼黃
塵合悠悠白旆飛將軍先陷陣奪得紫驪歸

苦雨

雨寒滯茅屋昏曉候春晴欹枕江聲近捲簾雲氣生花開從
過眼麥倒最關情況復轉輸苦邊隅未息兵

入城

不見平安報酸風雜鼓鼙雨寒催日短雲黑壓城低枕席啼
痕滿鄉關去路迷將軍多異見誰與慰烝黎

復愁

猛士憑城險四郊
今若何纔聞一馬獻
已費百金多江雨舟
無渡山雲鳥獨過
君王不相負諸將
且須和

歲除前三日

一歲餘三日還鄉鳥道通
論兵無衆寡淩勝在英雄
短髮思親白衰容待酒紅
出門親舊滿共訴客囊空

王志元邀度歲不及赴敬荅以詩

東門問來使晚歲許相迎
野樹懸雲氣江波挾雨聲
虎飢寒更出驢瘦滑難行
好是城南酒燈前只自傾

除夕

短日如年度寧知歲又殘
鄉關一水隔風雪五更寒
寄食囊垂罄更衣帶盡寬
主人供帳好獨作太平看

江路

江路雪稜層囊空仗友朋
炊煙晨減米乞火夜分燈
白鳥踰

青章蒼松舞翠藤鄉關長在望歸夢久無憑

憶弟

時危思共濟謀拙阻相聞念母誰無子持家爾不羣江煙寒
織雨山鳥暝穿雲悵望歸無計悲啼向夜分

和王志元雨晴

客枕愁春雨漁歌荅晚晴殘雲棲樹溼新水與橋平穉子買
魚至主人窺筍生酒來卽傾倒何問阻歸程

春雨

日夜雨懸懸問春春可憐好花俱薄命似我負芳年雲氣低
簾外江聲到枕前何時是寒食早已禁廚煙

哭吳林鎮撫

幕府十年別煙塵暗楚關全家歸浙右匹馬老兵間劒術終
難試銘旌復不還故人誰在側魂斷萬重山

山館

偏側不敢怨飛騰殊未能野猿時送果山鬼夜吹燈口腹久
爲累語言難盡憑白頭方檢束飽肉愧飢鷹

黃州有警聞從弟銑已過興國度早晚可抵家

戎馬壓黃州君先理去舟艱難千里遠貧賤一身浮宿將今
誰在親王只自謀長江如失險鄉國足深憂

憶從弟鐸

憶昨王師捷還鄉近五年艱危惟我共俯仰得誰憐茅屋秋
風裏烽煙夕照邊亂離今轉甚思爾只高眠

和虞學士春興八首

官河春水湧輕濤來往千艘不用篙江浦女遊遺玉珮瑤池
仙降獻金桃鞦韆拔地煙花暝闌闔中天日月高早歲功名
看得意扶搖風力送鴻毛

鳴珮天階委碧莎雪消太液漲晴波玉盤露浥仙人掌宮錦
花添織女梭王子問安回輦近儒臣進講賜金多明朝引見
狔狼使樂府新傳天馬歌

沙苑煙晴苜蓿肥朝回天馬錦爲韉詞臣會送歸青瑣進士
傳呼換白衣雲氣曉依宮樹近春陰晝護苑花飛君王又進
長生藥萬里樓船海上歸

城上觚稜霧靄迷角聲吹徹鼓聲齊雲生水殿龍常現月滿
官松鶴竝棲風俗元存中國舊天文竝拱北辰低倚樓欲問
通霄路誰借青雲百尺梯

萬里驅車入帝關十年棲息一枝安承恩數對麒麟殿却老
何資龍虎丹金水漲波融雪盡碧桃分蕊到春闌江南却憶
看紅藥紈扇羅衣不識寒

清明煙散柳枝斜宮樹沈沈點白鴉煖霧撲簾成細雨朔風

吹面射飛沙江南最憶王孫草天上催宣宰相麻十載滄洲
孤舊約鹿車何日共還家

柳林笳鼓曉晴饒王子春蒐出近郊雲錦宮袍攢萬馬鐵絲
箭鏃落雙鷗蒲萄壓酒開銀瓮野鹿充庖藉白茅共說從官
文采盛不聞舊尹賦祈招

浩蕩天風駕海航忍從兒女問耕桑珠聯魚目知誰識劒吐
龍光不自藏司馬倦遊曾建節買臣歸去密懷章只今豈是
無詞賦材俊中朝少薦揚

賦得越王臺送萬載敖司令之官

層臺高與越山齊南斗諸星入地低海氣秋澄鴻鴈到野煙
春合鷓鴣啼官船北走輪珠翠幕府南開振鼓鼙側想到官
多暇日登臨長聽玉驄嘶

寄阮弘濟兼簡楊亨衢少府

舊時文物數江東誰似風流阮嗣宗紅袖醉歌金縷曲牙旂
歸導玉花驄神仙元與塵埃隔賓客多應氣槩同寄語龍泉
楊少府園花不減舊時紅

和虞學士登宜春臺

萬家平地擁高臺窻戶層層近日開鶴致瓊花迎帝子龍持
貝葉禮如來雲依老樹秋如畫峽束飛濤雪作堆惆悵當年
歌舞地碧桃開落幾千回

澄虛亭

匹馬江上行且停蒼松夾道風泠泠波光倒吞落日白雲氣
下接炊煙青山僧獨行埽殘葉小鳥雙飛迺遠汀主人邀客
領奇勝賦詩把酒澄虛亭

哭宜春義士彭維凱

并序

維凱復袁州遣迎監郡某元帥以下歸視事守土將某

元言選
忌其功遂殺之

風折旗竿卧落暉殘兵揮淚脫戎衣徒聞卽墨田單在不見
成都鄧艾歸獻凱何時承寵渥爭名自古抱危機宜春元帥
還相問近報洪州未解圍

宿七里山

并序

十一月二十二日余始得逸歸值臨江兵至楚金追斬
九十九級軍聲始復大振

寒松霧暗月西頽人語無聲鬼語哀郡國忍聞侯景詔朝廷
初棄戴淵才風傳輦鼓驚魂戰天入鄉關望眼開骨肉死生
俱未卜淚痕血點滿蒼苔

二月二十七日間故鄉寇退

銅駝荆棘換東風消息南州久不通芳草得春煙漲綠野棠
無主雨飄紅琯戈元帥登壇暇寶玦王孫哭路窮滿眼親朋

總悽惻相逢但索語音同

寄龍子雨

書到山中收淚看出門愁散楚天寬落花春盡休文瘦細雨
更長范叔寒金帶宦情違俗久綈袍交態見君難欲爲後會
知何日酒熟還家得盡歡

贈劉明道

義旗獻凱滿南州君擁兵符控上流隔岸人煙鄰虎穴中江
雪浪送龍舟劒鳴秋匣玄霜下馬浴晴波紫霧浮白羽指揮
能事集底須萬里始封侯

秋日還山聞南省消息示從弟銓

南國風高聞好音鄰翁酒熟晚相尋鴈飛漢苑書來往竹暗
湘江淚淺淡茅屋暫歸秋四壁柳營煩費日千金瘡痍早使
能蘇息獨抱長貧亦素心

分府同知瑤童相公大閱之日天使適至喜而賦詩

奉寄劉賓旭參軍二首

鼓角緣邊永夜哀使車忽自海南來中朝舊法三章在大將
新圖八陣開玉帳分明傳號令金臺雜選貯賢才早看送喜
麒麟殿五色雲中進壽盃

侯印軍符塞紫衢儒生白髮混泥塗兒騎竹馬談兵法地盡
桃源入戰圖雙劍舞閑歌激烈一燈愁絕照清癯山中薇蕨
秋風老心折孤邨反哺烏

晚過山莊

草滿畬田落照斜溪行盡日少人家自傷直性從工謁誰在
窮途不怨嗟香火氤氲王子廟旌旗明滅長官衙主人問客
知名姓始肯開門喚煮茶

送朱鵬舉照磨赴江西省掾

花外銀鞍鞚紫騮省郎文采自風流英雄舊總三千士美譽
新傳十一州山擁宜春溪帶甲江通章貢小容舟晨趨黃閣
參籌畫願審安危拓遠謀

卽事

并序

時監郡納速兒丁改除廣西監憲而省都事吳八都刺
提軍始至

西上官船日報頻倚門收淚問行人潁川太守終難借細柳
將軍始是真木落秋高懸殺氣律回寒谷見陽春不辭斗粟
輸軍府但覓山巖著老身

寄劉賓旭

舊日相逢玉雪姿三年幕府鬢如絲波濤入海屠龍苦風雨
還山買犢遲到定能頻換酒花開應不廢題詩只憐雙劍
牀頭吼又是鄰雞報曉時

殘年

久愁兵氣漲秋林不謂殘年寇轉深
四野天青烽火近五更霜白鼓聲沈
金張富貴皆非舊管樂人材不到今
江上米船看漸少捷書未報更關心

和周霽海吳鎮撫詩就呈李伯傳明府

牛斗秋高劒氣橫幾人馬上取功名
扇揮白羽臨風迴甲鎖黃金射日明
賈詡自期能料敵山濤誰謂不知兵
官軍蓄銳何時發久厭城頭鼓角聲

風雨舟中作

憔悴江頭路已窮小舟隔岸復相通
歸雲亂擁青山樹飛雨斜穿白浪風
避地數年成老醜累人一飯尚西東
憑誰爲息鯨蛟怒容我滄浪作釣翁

感事

荆徐千里混干戈日日君王候凱歌上相出師三月罷南人
待援六年過未休練卒誅求盡暫脫歸囚反側多獨拜將壇
須國士掄材誰似漢蕭何

道逢八十翁

八十老翁行步奔存亡共訴斷愁魂千金歌舞隨流水六載
干戈棄故園晚竈燎衣籬竹盡春牛換米草蓑存情知青史
無名姓短策猶期報國恩

小除夕

當年臘日還鄉早弟勸兄酬何怨嗟腸斷此時同避地眼穿
永夜倍思家鄉關去鴈渾無信風雨寒燈不作花最是五更
情調苦城南吹角北吹笳

奉和龍西雨自洪見寄

青樓風月故相干慷慨樽前舞地寬錦繡春明花富貴琅玕

畫靜竹平安杉關旗鼓元戎勝閩海舟車去客歡舊日交親
應有問一蓑煙雨楚江寒

和寄龍長史

扇外風塵素不干湖光遙送酒船寬錦箋傳草春詞好銀燭
燒花夜枕安四海交遊空老大百年世事半悲歡子真谷口
溪相憶黃獨無苗風雪寒

和寄從弟鐸

畏途阻絕卜支干夕見鄉書意始寬癡腹於人淡有累驚魂
從此暫相安弟兄相顧三人在風雨還孤一日歡春色故園
付流水白鷗應怪舊盟寒

和寄從弟銓

腐儒憂國淚闌干江海容身何處寬驚報每愁諸弟隔臨危
但祝老親安對牀風雨長相憶負米晨昏不盡歡最苦二郎

獨冥漠晚煙原上鵲鴒寒

寄從弟銓

舊廬每愛桂花秋風月涼宵足勸酬盜賊未平身漸老弟兄
相望淚空流經年避地魚鰕尾何日還鄉鳥白頭側想早春
佳氣好掌珠初見慰深愁

簡王志元

收淚看花花轉紅花前心事想君同幽燕車馬從天下吳楚
舟航與海通貴賤不應懸趙孟去畱終擬報曹公石田秋雨
喧雞鶩早附冥鴻萬里風

用王冕韻送解元祿茂才

時危結屋傍巖阿野逕春煙匝翠蘿四海俊賢唐貢舉百年
父老漢謳歌山涵霧雨藏玄豹水會陂塘散白鷺地僻此時
賓客少松陰埽石坐長哦

寄楊和吉歐陽文周

黃鵠一飛幾千里高標矯矯離風塵
宗元有恨爲司馬郭泰無名與黨人
富貴致身何用早是非論事或難真
二君舊日皆知已旅食他鄉莫厭貧

悼已

種竹經年長未齊半枯半死近窗西
天風飄鴈隨雲沒山鬼憑狐當晝啼
世亂獨懷徐庶母家貧久累買臣妻
眼前事事堪腸斷欲問西山路轉迷

春懷

前水推懷後水催推愁不盡載愁來
雪消海上蘇卿老春到江南庾信哀
客路但聞啼鳥樂人情不及野花開
交游況復疎還往獨對青山勸一盃

社日

甲子頻書入短篇細推五戊卜春田讀書未有平戎策止酒
聊輸祭社錢紅樹花穠春向晚畫橋柳暝雨如煙舊來歌舞
今誰在燕子茅檐只自憐

己亥六月初五日

不惜千金一笑揮危途驚定始傷悲問安慈母翻成泣乞米
貧交不療飢總謂魯連曾却敵謾傳李涉舊能詩只從鄰曲
多豪客無怪荆吳滿戰旗

和友人別怨

風急長空舞落花獨收殘淚莫還家畫闌砌曲圍芳草綠樹
庭空噪亂鴉不見韓娥沈漢水空傳蔡琰按胡笳遙知今夕
天涯路鄉夢難成月易斜

和劉淵見寄

南國干戈積九年四年相別最相憐病看菱葉疑非我飢啖

松花似得仙青鳥謾期春後到白雲不埽夜溪眠故人半在
無消息讀罷君書倍愴然

晚眺

眼看淮海待澄清骨滿邊城苦戰爭老大不堪思往事飢寒
久已厭吾生煙淡薜荔棲烏急風響蒹葭落鴈鳴惆悵故人
書不到別來十載最關情

送從姪淳

路窮淮汴草離離志士空嗟歲月馳敵面人心山萬疊緣愁
客鬢雪千絲風悲洛浦海鳬至月冷漢宮金狄移從古戰危
頻易將君王見事獨何遲

晚秋鰲溪宴集

菊花香滿酒如傾不謂艱危有笑聲驚座令嚴觥錄事揮毫
氣壓楮先生虛嵐紫翠籠秋色落木紅黃透晚晴却憶桃源

舊時路漁郎重到不勝情

雪中負米晚歸傷題七字句因簡李尚文少府

蕭索風煙暗五陵羣黎愁苦復誰憑
早年識字知何用垂老爲農病未能
負米晚歸沙上雪拾薪寒煮澗中冰
不眠永夜瞻牛斗光怪猶疑劒氣騰

早春試筆

臘雪畱寒壓草廬陽春攜煖散天衢
喜聞諸將黃金印共捧中朝赤伏符
詩句且題新甲子酒盃不愧舊屠蘇
洗兵雨至應須早半畝瓜田得自鉏

聞龍西雨自閩海間道抵家患目疾缺於展覲先寄此詩

萬里征帆海上回畏途行盡始驚猜
入門兒女牽衣笑問字親朋載酒來
書有浮沈誰與送眼無青白故難開
蕭蘭晚歲

俱彫瘁佳句惟應到野梅

和羅習之見寄因簡劉淵

昨日尋君恨不逢
離愁散入暮煙中
古陂淨瀉秋千頃
歸路斜分月半弓
年少向人偏骯髒
時危臨事始疏通
論心長欲書燈共
無奈君西我復東

二月初晴題淦西居人樓壁

老去才名久退潛
樓前晴景逐人添
雲連野樹深藏逕
風捲溪花亂入簾
遠信忽傳閩徼外
閑愁盡挂楚山尖
春光流轉曾相識
獨怪經年雪滿髯

三月十三日夜宿淦西山絕頂

夜登絕頂幾千尺
臨曉始知歸路遙
水滿大江舟宿塵飛
客路馬蕭蕭
山河勢窄如懸網
雲漢光低不作橋
十二年間多少恨
春來不共凍痕消

懷羅達則

溪山杖屨每相違，況復經年去不歸。
移席花間春雨至，倚樓江上暮雲飛。
鄉書到手兼悲喜，世事關心有是非。
池上祇今新綠滿，待君同製芰荷衣。

簡羅伯英

并序

庚寅辛卯年間，余與伯英俱客桐江。上時有賓從甚盛，自兵亂十四年，惟余伯英重到，不能不重感焉。

大藥霜髭竟不玄，白魚無計滿千仙。
別離歲月落花雨，歌舞樓臺芳草煙。
世事榮枯分一日，人生感慨萃中年。
劉郎恨滿玄都觀，重到題詩共幾篇。

乙巳夏五月，茶陵永新兵奄至，遂走淦西。暑雨涉旬，米薪俱乏，旅途苦甚，因賦詩示諸同行。

白髮遺民真可哀，途窮猶望北兵來。
關河割據將成讖，將相

經綸豈乏材足繭荒山走風雨腹飢淡夜吼春雷主翁清曉
催人發又報烽煙逼楚臺

寄宋竹坡

久欲從君借竹看東風又長碧琅玕午陰坐久晴雲落夜漏
眠遲白露溥韭葉連畦從料理菊花分逕共平安洞簫一曲
裁新管石上雙吹翠袖寒

和楊茂才閑居

板橋通徑薜蘿深濃翠浮衣竹十尋啼鳥漸馴時近客歸雲
不動似知心翦苔盤石移碁局添火香篝續水沈賦筆惟應
潘岳好恨無樽酒與同斟

丁未人日

誤喜新年七日晴黑光盪日更分明陰陽元自相消長夸夏
何能息戰爭高視山河分王氣不知金石載虛名麴生廢瘡

交情絕看徧梅花晚獨行

荅楊和吉韻

白髮侵尋莫景來埽除無策覆空盃江山每與愁俱到風雨
不知花盡開往事設存元祐迹少年何羨洛陽才惟君於我
過從近穉子朝朝埽綠苔

訪友人別墅

陰森萬木曉蒼茫路轉山腰問草堂池湧慢波萍葉散窻涵
細雨橘花香讀書程度輸年少中酒心情厭日長公子飄飄
才思闊何妨高詠伴滄浪

和李士周韻

春雲乘雨午橋陰病眼看花負夙心漢水盡堪添綠酒燕臺
何得築黃金手攀楊柳親曾種路出桃源不易尋畢竟知音
眼前少塵埃三尺暗桐琴

寄李亨衢

君住仙壇歸路遙
人間塵慮盡冰消
微風半脫烏紗帽
明月閑吹紫玉簫
出水芙蓉鳴翡翠
繞牆薜荔護芭蕉
日長應共羅浮客
時復松花酒一瓢

和酬宋竹坡韻

寄詩問我山中事
性懶家貧一事無
春瓮酒香梅未落
午窗夢起鳥相呼
舊來叔夜交游絕
老去文通筆硯枯
鷗社共盟君未棄
何須馳志向伊吾

寄王進士

并序

伏覩前鄉貢進士王禮子讓所刻長畱天地間集辱收
謬作廁其間心竊愧焉而誤名爲昂因筆寄意

老去羣書逐夢忘
青燈白髮夜淒涼
平時誰信班生策
落日空懷陸氏莊
天爲國家生俊傑
地居臺閣盛文章
鄙夫空谷

逃名久不謂人間有郭昂

寄贈皇厓壇劉鍊師

壇下溪中出白石如水晶

神仙宮館近青冥紫翠峰巒開畫屏日射水晶江石白雲封
琥珀嶺松青虎司丹鼎知畱訣鶴立瑤壇聽說經相約安期
今夕至靈風遙想滿虛櫺

病目寄宋時舉

丁丁伐木最關情病起秋風畏客程隔霧看花生眼纈誓天
止酒閑愁城荒邨茅屋白煙起落日楓林紅葉明青壁丹崖
長在望矚孱瘦影獨心驚

和荅彭中和

長向春山數別期春花次第報君知舟迴剡曲緣何事劒合
延平在幾時庭院煖風花氣入池塘微雨鳥聲低瓦頭酒熟
邀誰共惆望歸雲獨拄頤

二十六日晴過諶塘

布袍稍覺曉寒輕
晴色偏饒雙眼明
山逕黃泥攢虎迹
寺門蒼樹挂猿聲
重來誰與同心膽
老去惟思避姓名
枯柳橋西曾識面
獨回青眼遠相迎

和袁方茂才秋夜宴集

下馬階除問錦幃
羅衣花白縷金圍
月明湖水龍吟細
雲度吳山鴈到稀
楊柳舞低牙板促
木犀香滿羽觴飛
袁郎自是風流客
舊約秦臺願不違

靜思詩佳句多可存者五言如燈影搖鄉夢雨聲添客愁天邊春色早窗外莫寒分
樓山涵雨煎茶竹送風七言如官酒滿傳鸚鵡蓋宮花飛點鸛鵒裘野迥虹光分
莫雨天晴木葉響秋風池漫暖紅花弄影窻涵溼翠竹成科急風亂颭蕭蕭雪斜日殘明橘
柚金雲韜月色歸天闕雨壓寒聲欺布袍鳥銜朱果珊瑚碎竹放青梢翡翠迷松下紫
苔雷虎跡雨中蒼檜作龍吟屋前老樹雷雲宿竹外茅亭向水安海棠春暗飄香盡鸚
鵡起天寒喚客遲風燕入簾梢落絮雨龍歸洞駕輕雲千里鴈聲雲外斷一春花事雨中
殘竹徑排墩雷坐客柳塘分水過比鄰鶯敵高風疑不動鴈分歸路整相排雨中春懶
鶯如我花外晚愁鵲逼人酒送餘春盃滿百月明歸路影成三離愁百斛如雲散涼意
一襟隨雨來雜葉篆從兒學寫松花酒待客同斟風撼竹樓憑雨勢雲歸溪樹作秋陰
折花林動飛紅雨洗硯池虛散紫雲太史未頒周正朔遺民思覩漢衣冠蔡寇遂煩唐

宰相漢儀猶待魯諸生三邊烽燧晨傳箭千騎弓刀晝繞營客行落日凝愁思人隔夢
煙聞笑聲愁來刁斗聲相續老去屠蘇酒到遲鄭虔早被才名誤見錯終期社稷安投
暗自慚輕白鮮知音還擬鑄黃金鶴語漫傳遼海樹龍文長想陽山雲病骨五更秋氣
入佳期千里月光同梁震每稱前進士潮陵誰識舊將軍對酒不辭今日醉看花却憶
去年人汗馬功名知命薄蠹魚文字漫心勞錢牧齋所選列朝詩甲集前
編具載元末詩人獨不及靜思豈當時未及見其全書耶因爲附補於此

袁寅亮讀書浚山萬木之中以避暑文瞻爲賦長句

因次韻以寄

獨向陰崖結構牢一時文采擅風騷雲間客見疑猶淺山下
人行望始高蒼樹攀巢馴鵲鵲翠藤結蔓挂猿猱遙知高卧
多標致何問長齋代骨毛洗耳未應徒見許攢眉但恐不容
陶山僧進謁多題竹野老相過或獻桃綿蕞暫陳存故事棘
闥嚴備遠周遭鑿平巖罅安書籍埽集松花醪酒醪醪後賦
詩題石壁興來送客釣江皋蘇門傲睨惟閑笑康樂登臨豈
憚勞雨霽傍松延薜荔晚涼疏水灌蒲萄明朝使者求顏闔
只此山中不用逃

題分宜縣橋

雲從溪北生雨過溪南響溪上蓑笠翁倚闌看水長

重到山家

紅雨長茶芽東風吹柳花行人今日到先自補窗紗

吳姬別思

霜月五更殘如何去又還誤簪釵鳳小落在枕屏間

題春江送別圖

君上孤舟妾上樓望中煙雨意中愁江波若會離情苦一夜東風水倒流

四時詞四首

煖雲飛撲玉驄歸簾捲香風酒力微夜坐久憐明月好細鋪花影繡羅衣

日射嫣紅安石榴波涵空翠木蘭舟美人調笑渡江去半榻

柳風碁不收

鶴認琪花欲下遲蓬萊仙客遣催詩情淡寫到相思處秋露芙蓉開滿池

疎林晴旭散啼鴉高閣朱簾窄地遮爲問王孫歸也未玉梅開到北枝花

訪龍長史不遇

鸚鵡窻深鎖翠寒松花不埽紫苔乾自將名姓題修竹延桂樓前第五竿

題扇

桺樹晴虹隱畫橋藕花微雨過歸橈波光倒蘸紅樓影照見佳人弄玉簫

宜春贈別

此首元詩體
要作郭昂

微茫煙浪浦帆開一曲琵琶淚滿腮江水不如潮水好送人

東去復西來

辛卯聞徐州警報

塞河詔下選丁男明日彭城野戰酣
愁殺翰林歐學士白頭騎馬望江南

發家信

寒硯敲冰帶淚磨故園消息近如何
老妻不信愁深淺歸日應憐白髮多

章臺怨

桺繞章臺萬縷金春風送別最傷心
如今莫問長條盡并與章臺無處尋

和宋五別後見寄

誤將鸚鵡教詩成每到人來喚姓名
從此西園蹤迹少萬絲煙桺鎖春晴

二月十七日有感

花匝疎篁水遶門幾回扶月醉西園青燈昨夜挑殘雨空認
春衫舊補痕

偶興

高柳著花懸紫煙歸舟離恨滿晴川六年杜牧傷遲莫況復
如今二十年

涼夜

竹外涼風畱晚坐驚斷蛩聲山葉墮天河何處是熊星新月
纖纖碧雲破

洞口人家

松樹廻環四五家機梭長日響咿啞西風裏得隳_此色偏與
籬東木槿花

秋浦晚歸

芙蓉開後涉波頻落日廻舟獨愴神
鷗鳥幾回相見熟故穿菱葉避歸人

對月寄友人

相逢之處月嬋娟願托襟期共百年
語盡人間始知月自不長圓

四月十五夜對月感舊

早年蹤迹水萍浮垂老漂流未得休
今夕人情今夕酒舊時月色舊時愁

妾薄命

孤鸞窺鏡翦情緣淚血沾襟十五年
誰信舊時歌舞伴相逢猶自妒嬋娟

四月十五日江上獨行因思去兩年
憂患之日感恨

次舊韻

拔石滄浪竟不浮雲林自合早歸休漁舟點點前江去載盡
斜陽不載愁

六月二十九日觀雨

青山山下是吾廬六月丘園草盡枯憑仗西風吹雨去官田
今歲又添租

題龍旗梅

硯冰敲碎碧雲殘蜂蝶無飛花意閑記得共尋林處士煖寒
清曉到孤山

題鄒自春石屏巫山圖

一片屏開十二峰陽臺去路有無中午窻香雪
猶似

行雲到楚宮

閏十一月朔日山路見梅

蓓蕾微傳春信真幾回夢想玉精神不知月落參橫處猶有

孤眠惆悵人

乙巳年余避地彭老家還再過之倏爾十人而人改
物換可感者多矣因賦

舊題塵暗小樓間花鳥庭空白日閑鳥自不鳴

谷愁

何得不相關

贈別

醉挽征衫折柳枝柳花飛處不勝悲東風過後西風起待得
青條又幾時

江望

盡把離愁種驛亭春風吹入草青青傷心爲問行舟客東過
清江停不停

春日憶蕭韶

雲歸長宿北山頭誤逐東風過小樓帶得舊時蕉葉雨數聲

敲碎客中愁

寄遠

萬點飛花風外過紅埋泥土白隨波閑愁散與停春客君在江南想獨多

春日過山家題羅帕

冰絲縷縷繫淩恩青鳥飛來每斷魂畱得薔薇香易滅只從燈下認啼痕

無題

遊絲風煖颭飛花窈窕簫聲隔彩霞畢竟神仙難換骨自分丹火煮胡麻

有感寄宋五

春夜情濃夢覺空爛柯不省遇仙童人間翻手恩

襄王憶夢中

怨別

病起銀屏滿藥塵
夜窻愁絕月窺人
寒燈不作雙啼痕
點點勻

周處士霆震

霆震字亨遠吉之安成人以先世居石門田西故又號石田子初云生於前至元之季宋之先輩遺老尚在執經考業遍於諸公之廬若王梅邊彭魯齋龍麀洲趙青山諸公皆器重之科舉行再試不利乃杜門授經專意古文辭尤爲申齋桂隱二劉所識賞晚遭至正之亂東西奔走作爲詩歌多哀怨之音明洪武十二年卒時年八十有八矣門人私諡曰清節先生廬陵晏鉉葺其遺藁曰石初集老友梅閒張瑩稱其沈著痛快慷慨抑揚非勉強步驟者所能及近時詩文一變蹈襲梁隋以夸淫靡麗爲工纖弱妍媚爲巧是皆先生之罪人石初之序梅閒也亦曰近時談者糠粃前聞或冠以虞邵菴之序而名唐音有所謂始音正始遺響者孟郊賈島姚合

李賀諸家悉在所黜或託范德機之名選少陵集止取三百十一篇以求合於夫子刪詩之數承譌踵謬轉相迷惑而不自知蓋石初天性介特其持論之嚴固非時好之所能易也

美人昔燕趙

美人昔燕趙歲久江漢間軒窗粲明霞被服羅綺紈頽怒恆有持含魂詎敢攀一朝強暴陵相從卽歡顏傾身作歌舞豫恐恩意闌新聲與嬌態取媚巧百端主家隔風塵庭宇深且完豈無昔共處永夜青燈寒魂夢各所依寧復相往還沈沈九秋霜履屨思蒹葭娟娟中天月照影畱空山盛時槩無虞末路良獨難棄置勿重陳使人摧肺肝

濯濯江漢女

濯濯江漢女幽貞出良家十年守空幃夫壻天之涯良夜秉

明燭悉心務絲麻憶昨秋風起河洛昏塵沙傷彼朱絲絃逸
響趨淫哇朝爲御溝柳莫作陌上花世態固應爾委置勿復
嗟所悲在新春雨露凝朝華感此淡閉門淵冰慮彌加藏玉
萬仞岡守護盤龍蛇投珠千頃陂光燄驚魚鰕夫壻會有期
豈問歲月賒寸心如皦日終始宜無瑕

大風發屋雨雹文集

大風西北來屋瓦去如走麗譙雙闕壯關鍵決樞紐蒼蒼泮
宮柏枝葉互紛糾移時折偃蹇巧力無措手西禪鐵浮圖摧
仆如拉朽臨江戰樓飛夾巷坊額剖恍疑會羣龍奮發交怒
吼泰山恐崩裂寧復計培塿老夫閉門卧雨雹散窗牖倉皇
正衣冠力疾坐良久天威俄咫尺性命亦何有默悟貴存心
淵冰慎吾守

歲莫簡張梅閒

憶昔慕遠遊朝華沐春露焉知喪亂後林杪秋葉蠹閒關西
州門寒日收踽步尚餘平生友示我廣平賦耿耿河漢輝幽
幽冰雪度終慚媚求悅寧悔貞取妒朗吟發孤音明月落庭
戶世事殊未涯歲年忽云莫有美君子心永言金石固

殘髮

殘髮不可紛晨昏日加梳顧慚雨露沐此豈冠冕徒夜來秋
風淅傲兀驚頭顱亂離亦已極時序復易徂青燈一斗酒不
樂將何如

哀枉

春心注成湮晝夜淅長育枯梢晴自芳寒燒雨仍綠如何冤
死魂不及閒草木

二月十六日晚青兵逼城紅不戰而潰暫匿近壕小
屋多走橫谿

孤藩酣春霖戰艦一時集喧呼驚棄甲填道戈可拾黃昏煙
燄起近郭俛藏蟄夜深相隨行間道衆岌岌敗走餘羣醜邪
徑俄掩襲叫號互失亡顛仆免繫紮策羸叟狼顧襁孺婦飲
泣帶褌衣苟完靴沾足難給相失但聞聲疑路翻却立屢休
幸雞鳴襟袖寒氣溼貫魚累童稚前阻後惶急縈回阡陌間
恆恐追騎及重岡釋心掉湛若恩露裛推挽達人煙開顏見
春汲兒扶集悲喜幼兒贅橫溪蕭氏親故走迎揖坐定飢渴生酒漿更
勸挹驚魂久徐定強笑寄於悵翻思墮危機性命在呼吸家
鄉固殘毀所幸存井邑杖策歸去來戒此輕出入

古金城謠

并序

國家承平百年武備寢弛盜發徐潁熾於漢淮武昌南
紀雄藩一旦灰滅洪省堅壁寇蔓延諸郡水陸犬牙北
來名將相繼道殞丞相出督步騎直抵高郵事垂成以

讒廢方面多貴遊子弟貪鄙庸才虛張戰功肆意罔上
誅求冤濫慘酷百端重以吏習舞文旁羅鷹犬意所欲
陷卽誣與賊通其弊有不忍言者間存一二廉介則又
矜獨斷昧遠圖坐失機會民日以敝盜日以滋廬壽舒
三州屏蔽上流廬壽旣沒舒獨當鋒鏑之衝至正十年
壬申進士余闕以淮西元帥之節來鎮廣設方略招徠
補葺備戰守豐軍儲賊飲恨不得逞朝廷嘉其功授淮
南叅知政事自是日與賊遇受違凡四十有二大小二
百餘戰江西賴以苟安坐視弗援十八年正月丙午城
遂陷公一門爭先赴死闔郡無一生降賊黨舉手加額
稱余元帥天下一人購得其尸城下池中禮葬之傷哉
寄痛哭於長歌使後人哀也

昆侖烈風撼坤軸日車斂轡咸池浴六龍飲渴呼不聞赤螳

玄蠶厭人肉荆襄弗支廬壽孤江東掃地如摧枯忠臣當代
誰第一七載舒州天下無東南此地關形勝天柱之峰屹千
仞當年赤髯走曹瞞天爲孫吳產公瑾我公千載遙相望崎
嶇恆以弱擊強孤城大小二百戰食盡北拜天無光當關援
劒蒼龍吼盡室肯汙姦黨手摧鋒闔郡無生降羣盜言之皆
稽首堂堂省憲羅公卿建官分閫日募兵哀哉坐視無寸策
遂使流血西江平向來不曉皇宮意名將南征死相繼一時
貪暴聚庸才玩寇偷安饕富貴河流浩浩龍門西燕山萬騎
攢霜蹄英雄暴骨心未死去作海色催朝雞玉衣飛舞空中
見太息孤忠塵百戰五陵元氣待天還睢陽誰續中丞傳

斷臂吟

黃埃兒帝夫死官倦遊逆旅心骨酸浚閨玉臂辱汙賤引斧
落之身始安紛紛五季窮爭戰迎送君臣如驛傳天將人紀

付女英貞節特從倉卒見傷哉殘形忍顧雛飲血仰天弔影
孤間關痛絕妾薄命行止隨地哀征夫征衣屢浣憂泥汗招
魂不來迫曠莫妾心自割臂可捐腸斷從夫去時路殘雲低
空沒栖烏落月不照秋桑枯泉流出山誓終始取義寧顧千
金軀妾悲望鄉淚頻滴兒戀母懷啼繞膝一心抱恨向青天
他日山頭願爲石

武昌桺

武昌桺青如許舊恨新愁千萬縷宮鶯去盡野雞栖憔悴江
南誰是主朔風一夕捲栖鴉春日鶯啼憶舊家流落王孫重
繫馬雨晴天氣屬楊花

李潯陽死節歌

并序

李侯治潯陽之二載紅巾賊發蘄黃倚蔡醜爲聲援勢
浸逼郡數告急於省省議調兵武昌興國相繼沒南北

道梗潯陽厄侯力疾獎率民義誓不與賊俱生郡將悉
所部先遁侯轉戰力盡猶持短兵奮擊慷慨指天父子
同遇害嗚呼李侯可謂仁義之勇矣彼滔滔者獨何心
哉侯家潁川名黼字子威曾祖而下仕皆通顯發身監
學泰定丙寅鄉試魁上都丁卯進士第一死節壬辰春
年五十有六

蜀川會漢投匡廬潯陽之厄江西樞李侯仗節忠貫日存沒
誓與城池俱夫何郡將弛練卒世祿忍負私其軀寇來談笑
啓關遁坐使邑井成丘墟侯時力疾短兵奮臣首當血心當
刳魂歸謁帝慟伏闕塗地肝腦民何辜臣衷願瀝付渠荅臣
首欲飛宜僕姑誓堅紅壁殲衆醜却掃淮蔡匡全吳黃塵四
低黑風淡赤豹騰駕蒼蚪呼山川幾劫鑄英氣上遡古昔誰
其徒平原汗馬河北重江淮安堵睢陽孤顏張凜凜心未死

迴立千載誠相孚况聞有子殊激烈義在從父輕頭顱石頭
之袁姑孰卞兩間忠孝何時無紛紛賣降與棄甲仰視汗喘
呀長吁惟公蓋自元氣立顧盼所取皆詩書當年射策首多
士已分一念金無渝勗哉謀國慎所托古今大勇惟真儒

兵前鼓

朝衙操過出近午莫歸斷續卒三伍鼓聲祇以迎送神漫把
旗旄揭飛虎鋒交昨者沒旗頭今晨隊長血髑髏貴人按轡
不爲動但訝日食無珍羞領兵官晏出早還鄉人多以供頓弗備受責戎徒抵掌羣嘲戲
志士拊膺殊奪氣朝朝莫莫鼓鼙鼙蟻聚羶腥了無媿張侯
援枹華三周襴衡正色披岑牟世間壯士古未有此聲慷慨
曾聞不

農謠

萬田草生農務忙飯牛夜半飢且僵侵晨荷耒散阡陌和買

犒軍官取將高堂大嚼飲繼燭持遺妻子豐括囊蒼頭廬兒
飽欲死義丁疇敢染指嘗鋤耨漫勞犢方稚十步九頓空徬
徨將軍大笑不負腹東臯南畝從渠荒

普顏副使政績歌

并序

壬辰寇陷武昌順流而下省郎中普顏伯華諭於衆曰
若其直擣真陽事未可知儻轉而南無能爲矣吾受國
厚恩發身監學忝進士先誓死必報遣人閒道馳書奉
百金歸別父母建議盡撤城外民居寇始渡江官軍小
衄母弟佛奴死之公單騎殿小橋寇不敢逼衆遂翕從
奉平章公道同左丞章伯顏竭志守城逆黨雲集攻圍
五十有四日大敗而還散亡略盡江南遂爲天下雄非
公長才贊畫平章左丞聽用其言詎至是邪朝廷論功
除本道廉訪副使於是公之愈無窮矣遠近士大夫

作爲公歌詩頌其美俟太史氏擇焉公世家山東希古
其字也邑士劉子真近歸自洪具道本末如此

近時有客湖上歸能話郎中身許國朝廷取士數十年誰謂
書生無寸策江州李侯死可書郎中百戰全洪都昔年廷對
俱第一鸞鳳固與羣飛殊當其練兵首陳義謂賊南征非所
忌環城撤屋民始疑事急方知爲上計家書閒道馳山東百
金歸報壽乃翁小臣於此誓生死仰視白日昭其忠翔風雲
低吹戰血母弟魂歸寶刀折倉皇勁氣吐寸心立馬危橋萬
夫決相臣攬轡從天回將軍鞞鼓轟春雷爲公破敵捐萬死
顧盼妖賊如山摧君王
加褒異浚副當年設科意碧霄
雨露湛恩浚官轉霜臺弘國器漢廷寥寥渤海龔廣陵張綱
尤罕逢使君宴坐試浚省談笑憲府看平戎

石初集多記元末兵興以來之事最爲詳悉鄉先達陳一德序云江南
野史誰復健筆而集中隱約散見皆可爲國史補故錄其尤者存之

杜鵑行

哀王孫作也

我不暇自哀古帝魂春來却念今王孫
王孫馬蹄去何處但見黃鶴落日故宇煙塵昏
我昔帝蜀空名存絕憐王孫玉牒尊
春宮天鵲壓酥酪凝香夕帳貂皮溫
紫茸吳姬河西曲白馬怯薛鷹條捫
居民咫尺甚天上冠冕臣僕羣趨奔
漢川一炬寇飛度四載寒食如荒邨
暴骸泣霜關月老恨血埋雨江波渾
投鞭七寶委道側落花送客慚春恩
勸歸我亦久流落幾欲出口聲復吞
莫道人生歸去好江南無復弔王孫

過玉成砦

玉成三面堅如鐵穿井無泉援兵絕
去年此際萬人登已是如今髑髏骨
刃飛丁壯屠嬰孩婦女分配囊貲財
浪傳古昔險堪恃曠劫竟墮昆明灰
我來似涉羊腸坂道遇遺黎拭愁眼
故人何處覓遊魂

陳德新主戰剛於永新罵不絕口而死

雲樹鴉啼寒日晚

城關西

雞鳴海東黃塵起落日關山氣如水餘民隨竭欲無生月費
給軍須萬計尚書前時來使臣近者太守宴將軍割鮮飲醇
互來往白晝走馬邀紅裙

兵部尚書黃昭奉詔遠出按兵撫建間其行營
經歷伍章安成醫生也榮遇京師出黃幕下自

撫抵吉以督兵爲名招權納賂郡守梁水寨都事吳
相與玩寇偷安酒食徵逐無虛日殆承平時所未有布衣小儒寸心赤咄咄

書空長太息閭閻無奈覆盆何帝禁九重方盱食

海潮吟

北風翻天送高梢西江浪起如海潮千艘平城箭飛雨城潰
曾不煩兵交馮夷啓扉衆爭赴萬棟煙氛畢方怒司徒命盡
換州營國公匹馬杉關去溯流西上旌旗紅列城樓櫓轉盼
空干戈七載徧宇內朝野狼顧無英雄悲哉上下交征利四
維不張巧蒙蔽憂來却憶賈長沙痛哭當年繼流涕豫章逝
水通錢塘漢川北度趨洛陽洗日咸池佳氣王聞雞矯首向

扶桑

郡城高

郡城高昔人墮廢今人勞城中居民負土石城上畚鍤卒伍

操去年外壕滾地底

吳員外張錄事

今年內城插天起

紅

紅旗東接漢

陽小白壁西沈顛江水

江參政

杵聲未改築者殊人事往往如傳

車荒碑斷礎悉輿致仙宮梵宇空無餘歡呼攔街走童孺明

年移家城裏住抱關舊卒鬢如絲淚墮鴉啼城下樹城堅池

浚侔金湯此地他年爲戰場

喜雪

并序

庚子臘月初旬雪再作十九日大雪至二十一日彌甚

淡可數尺三日乃止辛丑元日蚤起雪塞門十三日夜

半又雪皆平地尺淡喜而賦之

殘年新春凍不開大雪五度漫空來南州病熱已十載造化

有此真奇哉夜聞朔風撼天柱恍惚萬馬隨奔雷乾坤正氣
有先至密運亭毒茲其媒雲旗乍翻搖若水濤霜却卷飛龍
堆女媧廢煉溪縮手河伯失據俄驚魃玄冥振轡祝融遁怒
勢欲遣昆岡摧卧龍潛蛟起奔走舞鶴翔鳳爭徘徊瑤池觴
罷洒餘瀝漢皋相贈投瓊瑰蒼山一夕頭盡白貧戶得句侵
晨推朱門豈必異衡宇埋沒弱柳餘枯梅我疑真宰偶戲劇
往往玩世如嬰孩故將空色種天上大巧六出無根芟要令
六合反混沌寧許萬象蒙塵埃兆豐呈瑞悉餘事解后淨洗
昆明灰西流壺嶠應自反咫尺清淺移蓬萊內廷稱賀論邊
事坐想敕使傳宣催蔡州鵞池久安堵整頓宇宙須雄才涓
人自昔負高見遠去求馬何時回燕山從爾溪一丈埽地爲
築黃金臺

犬雞歎

雄雞奮翼銜怒蛙蛙被啄取聲咿啞犬來雞斃蛙竟逸轉步
犬驚逢惡蛇兩強相厄須俱殞過客驚怪頻咨嗟君不見下
宮將軍輕杵臼綠珠金谷來孫秀世閒萬事每如斯莫負尊
前卯時酒

虎墮井

并序 十二月十三日庚寅

神岡距郡十里虎晝攫人轉身竹籬陷入智井衆共殪之
郭西猛虎勢莫當攫人白晝來神岡暗中推墮若有物智井
百尺籬根藏凍泉收聲翬爲土轆轤綆斷苔蘚蒼眼花誤落
爪牙廢棄置有待摧強梁酸風飛沙寒日黃四郊流血皆戰
場乘時吞噬恆妥尾翼以俟鬼高駝翔北平將軍老且死泰
山哭聲哀怨長豈知鑿地古設險邂逅一蹶由天吁嗟此
物肆無忌妄意流毒窺城牆千夫駭汗手莫措造次坎窞侔
千將君不見東門狡兔殪牽犬西江孽蛟終自戕貫盈有兆

此未悟來者紛紛投土囊

人食人

鬻體夜哭天難補曠劫生人半爲虎味甘同類日磨牙腸腹
滾於北邙土郊關之外衢路傍旦莫反接如驅羊喧呼朵頤
擇肥哉快刀一落爭取將憑陵大嚼剗心燎競賭兇觥夸飲
酬不知劒吼已相隨後日還貽鬻體笑陰風腐餘犬鼠爭白
晝鬼語偕人行銜冤抱痛連死骨著地春草無由生睢陽愛
姬忍喋血長安仇家俊臣舌攄忠疾惡古或聞未覩烹魚互
吞滅五雲滾處藏飛龍天路艱險何日通皇心萬一憫遺子
再與六合開鴻蒙

埋冤樹

并序

郡城西郊官道側有樹名埋冤往來必於此少息因賦
託興庶幾有位者聞而動心焉

出城十里西南去行役經過倦休處崔嵬古榦絡蒼藤相傳
此是埋冤樹樹名那得呼埋冤閱人累歲官道邊朝吁械繫
逮詞訟夕敝鞭朴逋稅錢富豪招權逞濫入孱弱破家哀子
立幾人飲恨淚徹泉樹不能言天爲泣埋冤得名良可悲郡
中守今知不知

延平龍劒歌

并序

鄧克明率江西之黨攻延平江州八月破之日鄧亦大
敗奔還失亡甚衆

延平之淵深復深白日下照蒼龍吟古來此處會靈物中有
未死英雄心黑風一夕噓蜃氣坐看海州俱陸沈咄哉蝮蛇
敢流毒鼓召妖孽紛來侵老龍掉尾纔一怒百怪灑血腥淋
淋書生投筆起大叫稽首再拜皇穹臨龍兮龍兮爾之潛也
已千載豐城故鄉昨失守宜扣天闔勅牛斗下取老蛟心血

剖指揮九日付羿弓馳檄風雷殲巨醜胡乃坐觀潯陽肆鯨
鯢魑魅魍魎羣相隨剗肌剔髓四海靡遂令魚腸豪曹甘毀
折岐山之鳳鳴聲絕忠臣扼腕空白頭赤子拊心眼流血時
哉好從檀谿踊躍起的盧呼取黃熊赤豹來清都并與宋帝
獨驅之長刀龍門將軍天山之三箭神會大冶飛昆吾迅掃
六合塵模糊我當遠求華陰土助爾光芒增快覩問天洗甲
挽銀河蘇息蒼生溥霖雨

山邨

寥落驚回首艱危厭久生野人羞費揖山石苦畱行坡雨初
畦菜園霜未破橙小邨風物古暫喜話農耕

閔隴吟

隴戍通恆代河關控魯齊日經亡國淡天入戰場低土帳千
羊酪青郊萬馬蹄悲歌頻勸酒送客去安西

寇至

羣醜發禾川中宵羽檄傳才收緣岸戍已漲近城煙掠貨舟
相次毆人騎獨先兒孫猶九口兩地寸心懸

石初集又載喜康子至一首序云幼兒淹滯劉氏館中夜劫者壞大門而入急呼宿客
父子起走出遇寇二客趨東廂影堂寇追躡之父死子傷吾兒避西廂匿神龕側幸免
死生之異在毫髮閒於其來也且喜且悲其頷聯云及今相見日是汝有生初詞意切
至他如風雨重陽云鷹臺人化前千載鴈塞書沈外九州中秋云天意未知何日定月華
空似昔年來紀事云天地豈忘心懣懣
山河未放影分明數語備見亂離之慘

雜咏三首

海宇久承平風塵忽四驚官僚生閒道黎庶死乘城壯士天
山箭將軍細柳營寥寥千載事憂世與誰評

穎蔡俄中起荆襄轉盼休兵符畱北府臣節仗南州萬宇聲
華劫千官富貴羞聖恩覃雨露未必乏嘉猷

所至失堅城宜令鼠輩輕茫茫誰報國草草衆興兵吳楚縣
三戶河山隔上京幾時蘇北望飛騎報塵清

卽事

古驛浚春雨荒城帶落暉雞豚當道泯煙火隔江微所至無
完室相逢盡短衣干戈乘劫運暫與聖恩違

羅郭

首義羅明遠傾家郭楚金俊功隨日起遺恨與年浚白日重
泉影青天萬古心如何有位者翻不計浮沈

感遇

病髮梳頻減愁根日夜浚世方迷貨色天未厭風塵臣分誰
憂國君心本愛民歲寒餘勁草灑血贛江濱

寄吳

章卧病客中

亂山岐路鴈行斜籬落酣煙菊自花我昔郡城行冒雨君今
孤館卧思家濟時孰是囊中穎避地除非海上槎一郡幸存
唯二邑戍樓何日罷吹笳

感秋

鬢如疎葉挂林端，帶減腰圍逐月寬。
久病秋深心易怯，多愁夜永夢難安。
暗蛩入戶輪清苦，落月窺窗進薄寒。
屈指青春平，東風隨意馬頭看。

九日二首

西風慘淡郡城樓，誰復黃花插滿頭。
訪舊愁經墟路曉，登高怕見戰場秋。
鳴鸞閣在金笳集，戲馬臺空鳥鼠留。
尚欲遠尋雷煥友，提攜雙劍出南州。

荒荒萸菊負登臨，莽莽乾坤互古今。
淮浪逆舟寒日淡，楚山連戍暮雲深。
孤生自滴思親淚，先父宋淳祐九年九月九日生多難誰攄報國心。
道路幾時辭逆旅，關河無地避秋砧。

登城

世祖艱難德澤深，風悲城郭怕登臨。
九朝天下俄川決，七載

江南竟陸沈馬首空傳當日價雞聲不到莫年心雨門外
青青草過客魂銷淚滿襟

民哀

痛哭羣庸誤主恩遺民無路叩天關荒涼甲第有焦土倉卒
淊閨無固門青血傳餐供士卒黃金爲土贖兒孫囊膠誰造
昆侖頂念此長河駭浪渾

冰盤雪藕

清徹冰盤壓蔗漿酒酣雪藕近華堂凝寒色映瑤華脆真白
絲連翠袖香金掌曾聞承玉露瓊臺忽見擣玄霜文園近日
真消渴莫種蓮根引恨長

和雨困簡張梅閒韻

天氣渾疑挾楚氛雨淫愁向早春聞紅淹小圃違芳信綠泛
回塘亂縠紋遠樹鳥飛邨舍沒淡煙人立野橋分空餘落旣

鄰翁髣髴倒蝸涎似篆文

清和華道士蕭宗元

月滿虛堂奏帝歸仙風吹送紫雲衣
九還欲致三花聚一悟能消萬劫非
老樹鶴棲存夜氣清池魚躍見天機
黃冠免得山陰客未信詩盟與願違

立秋

京洛風塵竟未休送迎爲上敝貂裘
蕭條人物常如夕慘澹乾坤又入秋
勅使經年遺北海戰場近日在南州
紛紛雞鶩羣爭入誰向滄江友白鷗

寇來自北見城中蕭然散入邨落

斷鴈雲低欲度遲鵲巢何許寄南枝
寇兵已厭空城住官馬猶從閒道馳
萬骨白邊寒月夜孤煙青處夕陽時
經年北道無消息望眼頻穿淚暗垂

次韻劉道原九日

曠劫何當洗塼埃，凌高欲藉海爲杯。
巫山雨暗猿相引，汾水雲深鴈不來。
新釀偶憑茅舍漉，寒花時向槿籬開。
仲宣幸有荊州託，未厭吟邊數往回。

懷古

關河渺渺幾浮沈，落日秋風萬古心。
二頃畱人輕六國，一壺玩世重千金。
亂來耆舊傳聞泯，老去英雄悔恨深。
輸與蘇門長嘯者，不教車馬浣山林。

擬復愁六首

一燼城門火餘灰，已復寒小兒爭炙手。
猶作燎原看殺氣，頻年盛南昌。
接武昌，帝城春有路，昨夜夢錢塘。
旌旆簇雕鞍，花袍紫鳳團。
路人潛側目，敢謂沐猴冠。
天驥鹽中蹶，瑤釵井底沈。
如何起阡陌，坐致萬黃金。

屏迹譙樓下
淡追少壯時
卧聽更漏鼓
雙淚落如絲
徙封餘赤螳
逐氣布青蠅
欲市金臺駿
黃河又不冰

戲筆

西園蹴鞠醉蒲萄
北里琵琶紫錦條
堪笑東家頭白者
一燈深夜讀離騷

北山口號二首

蘄黃連結蔡州城
風靡江東莫敢膺
千里南來今送死
天知忠節在廬陵

天嶽東回納潁川
山峰斷處是青天
螺湖橋下清流水
畱向槎灘送戰船

軍中苦樂謠九首

半臂纏腰帽卷氊
剪裙荷葉腿齊編
市西橋外看屠狗
笑擲并刀賭酒錢

堆帽紅纓閒黑纓粉青宦袴短黃裙酒樓突過行人避近日
新充水砦軍

旌表門前路幾彎浮圖坡下日銜山馬上長身單白紵雙雙
緩轡打球還

短髮風欺破帽斜日西洗足踏紅沙妻孥待哺不遑卹流汗
擔柴赴主家

疊石支牀擁敗墻抱關擊柝日隨緣松燈自抱芒屨了要辦
明朝買菜錢

劒鋒交處奮身跳箭集征袍血未消奪得紅巾衝陣馬歸途
乾被長官要

官船公子抱琵琶笑指娼船白藕花今夜江頭好風月買魚
載酒宿誰家

團扇題詩愛越羅畫船載酒沸笙歌何人夜讀張巡傳獨占

秋江月色多

十里長洲列戰船
白頭吟客坐看天
何時得見三階正
獨寄蓬窗夜不眠

宿州歌

客有自中興來能言四川閬亂遣兵出援主將日置酒高會收其子女玉帛而西宿州南北之咽喉也知州廉能在任十二載遠近歸心因不納拜見之禮責以軍前供給知州既行宿州遂陷

萬騎連雲發
蜀都宿州一擲似擣蒲
幕僚摺得流星檄
牙帳朝酣睡未蘇

楊柳枝詞四首

并序

偶憶丁酉春客自邑中來誦王大初一絕落句云多情
只有城南柳舞盡長條更短條
蓋指失身而事修飾者
戲續之

離宮別館短長亭
忘却江南舊日春
是處人家種楊柳
往來繫馬解畱人

背立東風淡畫眉
斷腸煙雨一枝枝
隋宮漢苑春無主
莫向江南話別離

移栽楊柳受風多
南畔行人北畔過
莫道浮萍是飛絮
好隨流水到官河

舞絮含愁入酒家
何因得近瑣窗紗
春風萬一無拘束
放去錢塘逐落花

籬閒小花

小小閑花分外紅
野人籬落自春風
江南多少繁華地
盡在寒煙蔓草中

雨中

桺塘分路市橋斜
海燕雙飛識故家
一月閉門聽夜雨
隔牆落盡碧桃花

最閑園丁王逢

逢字原吉江陰人弱冠有文名至正中嘗作河清頌行臺及憲司交薦之皆以疾辭世居江上之黃山自號席帽山人避地無錫梁鴻山未幾遷松之青龍江名所寓曰梧溪精舍自號梧溪子蓋以大母徐嘗手植雙梧于故里之橫江志不忘也又徙上海之烏涇築草堂以居曰最閑園自號最閑園丁明初以文學錄用其子通事令掖以父老泣請命罷之年七十卒洪武戊辰歲也有梧溪詩集七卷錢牧齋列朝詩集載之前編謂原吉當張氏據吳大府交辟堅卧不就而又稱其爲張氏畫策使降元以拒臺此何說也張士德之敗在丁酉三月其時張氏尚未降元也而謂其于楚公之亡有餘恫焉未知其爲元乎抑爲張氏也原吉一老布衣沐浴于維新

之化者二十年其子已通仕籍矣而謂其故國舊君之
思至于此極西山之餓洛邑之頑未知其又何所處也
牧齋好爲曲說至引謝皋羽犁眉公爲喻抑何其不相
類乎然原古之詩志在乎元則成其爲元而已矣故附
于遺民之例而錄之

虞美人行贈邵倅

大王氣蓋世力拔山七十餘戰龍蛇間得人爲霸失人虜有
妾如花無死所夜寒蒼蒼星月高不惜傾身帳中舞大王恩
深淺東海青血熒熒春草在當時早化劍雙飛四面楚歌那
慷慨芒碭山開五色雲雌雉竟與雄鷺羣嗚呼後世亂紛紛
非君擇臣臣亦當擇君

危腦帽歌讀五代前蜀史有感而作

白兜羅青衲襖金鴉翠翎七寶飾圓方反正無定式國人戴

之天下惜後宮如花醉妝美君王無心冠帶理大木晝拔貪
狼風猶汎樓船濟江水承平禮樂亦草草豈但當時帽危腦
可憐來者忘喪元紅纓末亂如雲擾君不見玉帛萬國先王
朝會弁如星麗九霄鳳凰麒麟在郊極夔龍前殿奏簫韶

天門行

天門高高俯四極寸田尺地登版籍澤梁無禁漁者多瀚海
橫戈恣克斥去年官饗私旰攘今年私醴官價償屠燒縣邑
誠細事大將不死鯨鯢鄉

謂李羅帖
木兒左丞

烹羊椎牛醉以酒腰纏白

帶紅帕首定盟歃血許自新禦寇征蠻復何有國家承平歲
月久念汝紛紛迫餬口羽林堅銳莫汝撓慎勿輕誇好身手
春風桺黃開陣雲號令始見真將軍

李羅帖木兒討方國真兵敗被
執爲求招安至正辛卯歲也

銀瓶娘子辭

并序

娘子宋岳鄂王女聞王被收負銀瓶投井苑祠今在浙

西憲司之左逢感其節孝敬爲之辭

蒼梧月落烏號霜寒泉幽凝金井牀綺疏光流大星白夢驚
萬里長城亡女郎報父收囹圄匍匐將身贖無所官家聖明
如漢主妾心愧死縋縈女井臨交衢下通海海枯衢遷井不
改銀瓶同沈意有在萬歲千春露神采魂今歸來風冷然思
陵無樹容啼鵲先王墓水西湖邊

任月山少監職貢圖引

好風東來快雨俱夫須亭觀職貢圖厥酋高鼻深目胡冠插
翟尾服繡襦革帶鞮鞢貂襜褕左女執盞右執壺手容恭如
下大夫酋妻髻椎將湛盧五采雜珮相縈紆轉顧飛虎飛龍
旗鏤耳者殿帕首驅瓔珞袒跣兩侏儒一檠木難珊瑚株一
戴玉琢狻猊鑪神髮髻狀乳貙復誰牽之鬣髮鬚最後我
弁飾寶珠若將入朝謹進趨禿奚踉蹌亦在途錦膊驄帶汗

血駒尊貴卑賤各爾殊經營意匠窮錙銖唐稱二閭道元吳
今也少監稱京都少監材抱豈畫史禹跡曾爲帝親理河伯
川后備任使無支祈氏甘胥靡大德延祐貞觀比輦陸航海
填筐篚鳥言夷面遠能邇少監臨古不無以趙公商公暨高
李頡頏霄漢嗟已矣霽雲曙開儼斧扆包茅不入穎誰泚周
編大書王會禮安得臣臣奉天紀陋儒作歌歌正始

淮安忠武王箭歌題垂虹橋亭

淮王昔下江南城萬竈兵擁雙霓旌錦裘繡帽白玉帶金戈
鐵馬紅鞶纓阜鵬羽箭三十六一一插向魴魚簞鹿麕晝號
猿抱木王師所過全生育彤弓親授聖天子弓影射入東吳
水水波恍漫銅柱標仰見浮屠半霄起王當是時戢武功指
顧草樹生春風宋家降璽朝莫得思罷貫革垂無窮浮屠上
層龍所宮寶盤紺碧蓮花同弦張滿月報騶發忽露半筍薌

雲中鑢歌啁轟鼓笳競父老頓足驪聲應泗州使返睢陽
漢關將入天山定兩賢成敗關衰盛雄材逸氣王誰並我浮
扁舟五湖興載拜何由重安靖猛士經過合溪省

揚子舟中望鵝鼻山時聞黔南消息

山環芙蓉城私怪鵝鼻狀奔濤鎖長薄大石山名凜相抗勢雄

千軍壘氣尅萬鍾藏草樹春不蕃莓苔滑難傷剛風過靈雨
復值桃花漲破暝鷗鷺盤乘陰龍魚王飄鼓一葦間攬之膽
增壯謝安晉元臣豈跼江海量蒼生方顛連其敢遂疎放黔
陽百粵地黃霧吹虎嘯再觀神秀姿不止西北向焞焞蒼精
出閃閃白月漾三叫馮夷宮吾奚獨惆悵

題烈女廟

并序

女何江陰人少有容操五季時避亂前湖舟中賊持兵
犯之何泣曰吾身墮汝手肯從吾禱之于天于父母乎

賊由是少懈何乃起立且拜且祈乘間竟投水苑後里
父夢見何曰吾當血食此地伺湖成田則廟貌祀我既
而果然今廟在華藏寺南郡志所載略異逢蓋得先大
母所傳云

遺廟湖陰四百年斑斑江竹映嬋娟魚龍水落萑蒲外鷄犬
村成檠柘邊不待清名垂女史尚存貞魄降神弦君王社稷
今焉在伏臘柔盛自儼然帷箔夜涼臨月榻珮環晨響起雲
輶湘靈鼓瑟虞風盛蔡琰聞笳漢鼎遷嗟彼生還羞故國何
如死節報皇天明妝靚服黃塵裏重爲傷時涕泗漣

錢塘春感六首

紫蜀輶車從六龍盡隨仙曲度青空蒼山樓闕旃林裏赤羽
旌麾野廟中百姓未忘周大賚成都元有漢遺風流鶯不管
傷春恨衝落桃花滿樹紅

王氣凌虛散曉霞
虎闌麟閣靜煙花
中天日月迂黃道
滄海風雲冷翠華
望帝神遊夔子國
烏衣夢隔野人家
當時舉目山河異
豈但紅顏泣塞笳

周南風俗漢衣冠
五色雲中憶駐蹕
璽瓊檜高藏白獸
蕊珠花發降文鸞
河通織女機絲溼
雨歇巫娥翠黛寒
滿地吳山誰灑淚
一江春水獨凭闌

日華初動袞衣明
劒佩千官隱繡楹
五色黼黻開玉座
九重湯藥下銀罌
書題鳳尾仙曹喜
恩浹螭坳學士榮
文化有餘戎事略
銅駝草露不勝情

瑤池青鳥集觚稜
白塔金鳬閟夜燈
雲母帳虛星采動
水晶宮冷露華凝
驪山草暗墟周業
鄠塢花繁失漢陵
白馬素車江海上
依然潮汐撼西興

金爵觚稜月向低
泠泠清磬萬松西
五門曙色開龍尾
十日

春寒健馬蹄紅霧不收花氣合綠波初漲柳條齊遺民暗憶
名都會尚繞湖濬唱大堤

讀謝太皇詔藁

半壁星河兩鬢絲月華長照素簾垂衣冠在野收亡命烽火
連營倒義旗天地晝昏憂社稷江淮春漲泣孤嫠十行哀詔
無多字落葉虛窗萬古思

讀國信大使郝公帛書

西北皇華早東南白髮侵雪霜蘇武節江海魏牟心獨夜占
秦分清秋動越吟蒹葭黃葉莫苜蓿紫雲深野曠風鳴籟河
橫月映參擇巢幽鳥遠催織候蟲臨衣攬重裁褐貂餘舊賜
金不知年號改那計使音沈國久虛皮幣家應詠藁砧豚魚
曾信及鴻鴈豈難任素帛辭新館敦弓入上林虞人天與僂
奇事感來今

公羈旅日有以鴈四十餉公內一鴈體質稍異命畜之于後鴈見公輒
張翮引吭而鳴公感悟擇日率從者二十七人具香北拜二人昇鴈蹠

其前手書尺帛親繫鴈足且致祝曰累臣某敢煩鴈卿通信朝廷鴈其保重欲再拜鴈奮身入雲而去未幾虞人獲之于苑中以所繫帛書託近侍以聞上惻然曰四十騎畱江南曾無一人鴈比乎遂進師南伐越二年宋亡書今藏諸祕監河南主客劉澹齋云

憶舊遊二首

醉酒高陽里題詩左氏莊
碧雲垂草帶紅旭散花房
流水循除活飛絲拂鬢長
座中誰潦倒遺却紫香囊

紫纍妨過馬青苔委佩魚
名通天上籍腹有架間書
春水浮齋艦山雲落板車
尚懷仁里好耕鑿對休居

題垂虹橋亭

長虹垂絕岸形勢壓東吳
風雨三江合梯航百粵趨
葑田連沮洳鮫室亂魚鳧
私怪鴟夷子初心握霸圖

感宋遺事

五月無花草滿原天回南極夜
當門龍香一篆魂同返猶藉
君王舊賜恩

至元十三年正月伯顏丞相入杭二月起宋三宮赴上都五月見世祖皇帝尋命幼主爲檢校大司徒封瀛國公十二日內人安康朱夫人安

定陳夫人二侍兒失其姓浴罷蕭襟閉門焚香于地並雉經苑衣中有清江紙書云不免辱國幸免辱身不辱父母免辱六親藝祖受命立國以仁中興南渡踰三百春躬受宋祿羞爲北臣大難旣至守于一貞焚香設誓代書諸紳忠臣義士期以自新丙子五月吉日泣血書

自乾封歸省祖壠過大南嶺向玉山

從親客殊鄉所忻塵事屏茲承有方役願言千里騁朝辭縣北山午踰虛南嶺溼嵐沍浮陰高日下疎耿亂田麥蕃牕絕壁松秀整登登復輿勞委委蘿徑永異跡辨夔足獨往見僧影冲襟曠寬曠玄趣集溪靜丘墓躬汛埽庭闈念定省僕夫戒期程烏啼復予警

復如乾封晚經漁浦

窮曠經漁浦寒水白于練總總星東出獵獵風北轉眼中獸蹄過笛裏魚狀變稍聞刁斗應漸喜煙火見誰家長林根繫艇沙渚面天含瀟湘思山錯吳越甸承平謝憂患少壯忘羈賤瓜橋往未遑雲源訪殊僂明涉子陵灘桂酒同一奠

敬題諭淮安朱安撫詔後

附詔文云大元皇帝聖旨諭淮安州安撫朱煥據陳楚客奏臣與朱安撫同年

又有通家之好自戊午歸順之後不相見者十有八載今王師平伐諸道並進數內一路領連河清河將士攻取淮東未附州郡竊恐城陷之日玉石俱焚臣于古人情分不容絨默且彼所以嬰城自守者無他原其本心但未知趨向之方初無執迷抗拒之意今大江南北西至全蜀悉入版圖若蒙聖慈特發使命宣示德音開其生路彼亦識時達變之士也寧不以數萬生靈爲念乎臣昧死上言伏候勅旨准奏今遣使特旨前去宣布天信若能識時達變可保富貴應在城守禦將帥同謀歸順者意不殊此故茲詔示想宜知悉至元十二年七月漢兒字書

九鼎沸莫止大厦傾莫支太陰初陽不得燭下土小龍望望
閩之陞六宮掩泣向北去孤臣憑城尚南顧也知天命有所
歸忍爲生靈貸生路當時不死良爲此至今人說姜與李君
家富貴八十年露臺風館啼猩鬼世事茫茫難具論遺詔幸
得傳諸孫烏絲細字書題罷黃葉乘秋正打門

聽鄭廷美彈琴

畫闌月照芙蓉霜博山水暖薔薇香石屏石几青黛光鄭鄉
君子琴中堂榴裙蕙帶辭羅洞玉珮珠璣脫飛鞵何處春淡

雲滿林小巢並語梧花鳳君不見湘靈鼓瑟湘江澌苦竹祠
荒愁暮雨遺音一聽增感傷使我無言重懷古重懷古鷄喔
喔明星爛熳東城角誰家尚奏桑間樂

婦董行

并序

婦董滕人劉進妻也進與兄順並以勇稱金季山東亂
盜蜂起因共募丁壯保里閭天兵駐嶧山進單騎覘之
中流矢死順徙家淮南舉室溺淮水董爲宋招撫呂文
德裨將所獲欲犯之度不免乃謂曰夫喪不遠家難薦
臻一身流離挽在旦莫死生非我有願將軍勿疑夜果
生一男先是順已入濟州愬于石太尉珪曰順有弟不
幸沒于敵其妻在孕爲南軍拘幽舟中萬一不得收遺
息使弟爲厲實順之罪也惟明公是圖石爲發步卒三
百人跡其所往次淮揚始知董所在陰使人偵之生子

蓋三日矣及見具道順意董悲感不自勝且拭淚曰妾以妊不得先夫死今幸不辱先所天使有後皆伯賜敢名此子曰伯祐以志不忘遂抱授偵者目送數十步投江以死至正五年秋進玄孫士行語其事于逢逢高其節義作詩哀之

北軍南軍和議時兩壘對立龍鸞旗羣雄棋峙國瓦解乃與婦董光門楣星辰錯亂風雲氣乾坤造就冰雪姿渾家性命葬魚腹一舸涕淚隨鴟夷長眠自足爲義鬼後死只望予孤兒兒在腹中兵在目憶夫心頭臂消肉日晝慘慘陰靈啼夜黑冥冥波浪觸馬駝磧遠暗塵土鷄犬村空疎樹木嶧山誰收白玉骨蔡州地陷黃金屋太尉前歸明主化招撫姑存寡妻宿羞看人面問消息強通語笑寬羈束伯順見義勇著鞭銳士協力鋒爭先道傍弩伏荆棘底掌上珠還江海邊將門

有後傳世世墓祭無所從年年湘妃摻袂遡寥廓漢女結珮
窮幽玄縞衣綦巾共縹緲文魚赤鯁長周旋唇亡未久齒亦
喪獨聞其風猶凜然中原山河想如故目斷幾點滕州煙

逢爲是詩已士行復述順一事尤卓卓順旣得伯祐以行時董苑事覺招撫發步卒亟追之賴左右弓弩手散去還白太尉甚義之處之麾下凡兩致太尉命往觀太祖皇帝手魚兒泊之行營賜金幣鞍馬且命撫循邢磁魏黃十餘城用寧謐上功受黃金符官昭勇大將軍行右副元帥濟兗單州等處管民長官在官十餘年士民翕服晚有子五人未老棄官以伯祐襲其爵爲奉訓大夫濟州管民長官是年至元元年也故錄于詩後以俟執史筆者采焉

簡黃大癡尊師

十年淞上籍仙關猿鶴如童守大還故舊盡騎箕尾去漁樵
長共水雲閑吹笙夜半桃花碧倚杖春深竹筍斑顧我丹臺
名有在幾時來隱陸機山

過丘以敬管句吳山別業

梓潼祠畔敞林扉隱隱鷄聲落翠微銅篆解將還省署銀魚
忘却挂朝衣石崖溜雨藤根白蘿落綠雲瓠子肥想見秋風

遂高隱中原野馬正狂飛

奉題執禮和台平章丹山隱玉峯石時寓江陰

昭代優勲舊平章謝鬪班堂開新綠野玉隱小丹山
瞻皖文璫錯孚尹氣往還崑丘玄圃畔台嶠赤城間
不假工璫琢元承帝寵頒靜容賓從仰明燭鬼神奸
秩禮均恒岱謙光俯粵蠻儼持周勃節秀擁楚巫鬟
樹錯珊瑚朶苔封翡翠斑座裊聯綺轂車轂映朱殷
或跂雙么鳳時窺一白鵬爐香嵐勃勃簷雨瀑潺潺
地縮三鰲島天長九虎關文饒淫翫好靈運癖躋攀
日月由來繞風雲不暫間殷曾求傳說漢亦聘商顏
金匱盟藏券青春詔賜環皇基同永固國步羅多艱
館閣題千首琮璜價百鐙願移銘盛烈褒史著人寰

奉寄趙伯器參政尹時中負外五十韻

詔立淮南省符張閫外兵風雷朝煥發牛斗夜精明參政材

超偉元僚器老成武林多樹政禁籞舊蜚英鳳暖文章蔚鯤
秋羽翼橫天池今並奮嶰管後和鳴地要尤膏沃時危必戰
爭輔車依海岱衣帶限蠻荆玉葉開王邸煙花匝子城萬艘
鹽雪積千里稻雲平織貝殊珍粲紅樓豔曲縈並緣胥狡黠
貨殖駟驕盈汝襁初萌起河流漫妄行鎮綏增屏翰贊畫授
權衡愛稼須除螣憐牛貴搏蝨式蛙曾霸主斬馬乃書生青
汗三千牘丹心一寸誠相臣連萬騎郡邑望雙旌甕社湖移
蚌縹絲井露鯨里無安堵樂野有望塵驚舄鹵煙侵燧孤嫠
膽碎鉦五賢迷古轍六詠歇新賡瓦礫皆王土逋逃本爾氓
長驅勞組練盡埽愧櫓槍喻擬相如檄降懲白起坑跋胡狼
曷備毒尾蠱難撓濟猛收神略疏恩渙虜情佇聞鹿柵下莫
作鬼方征回鶻卑唐室天驕撓漢營乾坤一羽扇社稷幾羊
羹扶杜交加影芙蓉梟娜莖超然延爽笏肅若衛寒更慮念

真如是功勲孰與京誓清懷晉逃虛左慕齊嬰好定龍蟠價
毋登狗盜名石洪重眉辟韓愈建封迎故典何其盛斯文與
有榮中州襟陝隴上國掖幽并麟閣將來繪鷄壇宿昔盟芻
蕘言慎擇葵藿義同傾契闊商參恨栖遲畎畝耕小齋餘苜
蒿四境半蕪菁酒憶涓涓縹魴炊箇箇賴悲歌垂短褐慷慨
睠長纓親病常憂懼身奇鮮弟兄君公終隱迹克國燁家聲
楚角關山晚吳陵草樹晴鷲知幽谷候鴈識大江程報政梅
全發封詩月迴清遙應語何遜開閤少陰鏗

贈別浙省黑黑左丞國寶自常州移鎮徽州三十韻

時歲癸巳

武德興元運文恬近百年一隅初難作四境遂兵連斧戢朝
元早彤弓授命專馮岑材並濟李郭駕爭先路入延陵邑星
分左轄躔著名黃閣上虛位紫宮前汗血駒千匹跼踣十兩

甌帳寒龍守劒城。曙虎飛旃跡埽齊門。瑟身親楚醴筵慧山。
屏列野震澤鏡涵天。刁斗軍中堠鉏犁亂後田。白無遺朽骨。
青有續炊煙。插羽書閒署。封泥詔撫邊。陣容催畫鼓。逢蠶氣動。
樓船舊政猶霜肅。新安素地偏蜨精。嘗感夢帝子。或逢仙漆。
葉雲羞密茶花雪。妬妍誦弦家。櫛比冠蓋里班聯。鄒魯流風。
洽甌蠻習俗。遷比來疲賦歛。況復值戈鋌。餼稍官曹待謳歌。
父老傳挽屯吳幼節。總體漢文淵。裴度歸休近羊公。卧治優。
鼎彝今燁赫。韋布數周旋。小閣牛行多長楸。鵲試拳王融五。
雜組孫武十三篇。華夏殘河汴神州。歸薊燕殄除纔。蚋蠅睥。
睨滿鯨鱣狂斐言。姑及高明義莫捐。憂君尚有疏儻寄麥光。
牋

題沈氏別墅

小築洄塘上。春陰水顰寒。桺遮蓮葉艇。花礙竹皮冠。生理尋

常足開心一寸寬
知予厭奔走絕口不言官

壬辰冬十一月避亂綺山簡丘文中貢原父二教授
雲掩金戈日風生鐵馬塵亂離誰事主貧賤獨爲民
鷄犬人煙絕
黽黽草木鄰喜聞同舍語天已厭荆榛

仙茅塢

夜宿仙茅塢金鰲湧亂山天風來海外煙火落人間
白石思同煮青蘿喜獨攀
絺衣弄華月公子亦忘還

登越城故基

吳王臺對越王城
歲歲春風燕麥生
一片范家湖上月照人
心事獨分明

和張率性經歷竹枝詞二首

溪上鵝兒桺色黃
溪邊花樹妾身長
浮藻可是無情物
采得歸來好遺郎

道傍花發野薔薇綠刺長條絆客衣不及沙邊水楊柳葉間
開眼望郎歸

無家燕

嗟嗟無家燕飛上商人舟商人南北心舟影東西流芹漂春
雨外花落莫雲頭豈不懷故栖烽暗黃鶴樓樓有十二簾一
一誰見收衆雛被焚蕩雙翅亦斂孳含情盼鬼蝶失意依訓
猴茅茨固低小理勢難久畱昔本烏衣君今學南冠囚燕燕
何足道重貽王孫憂

此詩爲淮楚陷沒諸
藩王避難浮海而作

秋夜歎

大星芒鬣張小星光華開皇天示兵象勝地今蒿萊河岳氣
不分燭龍安在哉參贊道豈謬積陰故遲回疎風夜蕭蕭野
燐紛往來安知非遊魂相視白骨哀汨汨飲馬窟雲冥望鄉
臺于時負肝膽慷慨思雄材

積雨齊居

積雨生夏寒盛陰失朝景白鳥巢依閣青梧葉垂井幽觀知
候變遠引忘世稷淮水方漫淫吾甘繫煙艇

帖侯歌

并序

昌國州達魯花赤高昌帖木兒平章買住之猶子也海
寇犯境侯連與戰破之衆寡不敵或勸侯遁去侯曰是
吾死所也遂死之江浙省參政樊執敬爲文遣使致祭
請謚于朝逢爲作歌云

仙居縣丞寇海邦白晝突入干矛鏖帖侯親騎大宛馬快劍
躍出蒼龍雙鬚張背裂赫如虎殺氣雄風助虓武髑髏擲地
血飛雨短兵未接寇偃鼓天南弧矢夜掩光狼角赭赤雲玄
黃洪濤鯨鯢去咫尺再戰身與城存亡艤艫千百水犀手主
者誰歟仆旗走岳立不轉縱殺之殉忠國家良亦厚君不見

台州牧長金兜鍪氣節自是名臣流情鍾兒女挫堅銳卒墜
賊計空貽羞男兒真僞那料得長松古柏寒增色鴻飛冥冥
我何及落日荒山淚橫臆

送宋宗道歸洛陽

選郎分手楚天涯萬里春明穩到家庭下已生書帶草馬頭
初見米囊花汴淮淩漫經梁苑星斗參差犯漢槎中國未應
風俗異舊京寧覺路途賒鮫宮獻珮當明月鵠殿吹笙隱太
霞貂弊世憐蘇季子賦成人哭賈長沙若爲撫事傷遺跡正
用懷才待物華聞道鄉閭諸父母杖藜期看馬卿車

毗陵秋懷

老兵爲說劉都統起坐舟中思滿襟玄武城危寒日短紫駝
塵暗朔風臨江山不盡新亭淚天地長縣卽墨心宋祚未移
中道死至今劒井蟄龍吟

泊常州城下有老兵能道劉都統事劉名師勇山東文安人至元十一年元師渡江過常州知州趙

汝鑒遁通判錢彬以城降師勇與都統王安節殿師張彥克復之以姚嘗知州事安節出戰不利彥尋以衆降師勇登埤拒戰攻圍五十餘日城陷嘗戰死安節被執不屈赴之師勇從八騎走所向披靡間道赴行在扈二王入閩至紹興疽發背卒或曰國初吳城外僧舍有一老僧長七尺許居十餘年未嘗面北坐人詰其姓名輒不荅死之日僧開其篋笥得師勇官誥豈其人耶抑其騎士耶不可考矣

夜宴葉氏莊曉登悠然樓作

百尺飛樓俯碧湍六峯秀色繞闌干杏花落盡東風惡燕子歸來社雨寒夢裏香煙生繡幌酒醒紅蠟膩銅盤一春樂意朝來好千里家書席上看

送朱自明辟閩憲奏差

閩中烏府小清都列郡山巒紫翠紆王化直來天北極文星多聚海南隅暖塵花氣隨驄馬春日榕陰滿鷓鴣況有翰林持使節憲郎應得效馳驅

翰林指歐陽學士時除閩使

奉題先世所藏嚴子陵小像

千仞臺臨七里灘羊裘鶴髮老魚竿客星帝座分天象潁水

箕山並曉寒遂起後塵甘黨錮尚存餘烈愧南冠桂叢葦聳
蘋花薄悵望高風一羽翰

題馬洲書院

并序

馬洲書院者孔聖五十二代孫元虔昆季所建也其五
世祖若罕高抗不羣長于春秋當宋南渡自闕里將之
衢畱滯泰興見河流達南江詢之老人曰此龍開河也
西北通淮泗因嘆曰吾洙泗龍泉之支流其在茲乎遂
築室河上與其子端志各授弟子業從遊日衆乃有菑
田百畝人助以力官復其稅戒子孫治生勿求富讀書
勿求榮邑大夫嘉之易名龍開河曰敷教示崇化也年
六十卒葬河之陽端志克守父道薦辟不就淳祐元年
冬邑燬于北兵元虔避地是洲咸淳間書院落成教授
復如初然皆無後今崇聖寺旁惟破屋蔓草遺像瓦爐

而已逢懼變遷殆盡故敘其槩于辟間庶後之起廢者
得以考焉詩曰

蚪斗秦皆廢靈光魯獨存豆籩漂海國丹雘暗淮村苔蘚花
侵礎蒲蘆葉擁門青春淡霧潦白日老乾坤德化三王並威
儀百代尊郊麟初隱遁野兕遂崩奔先輩俱冥漠諸生罷講
論斷編塵樹冷遺像網蟲昏盡變衣冠俗終歸禮義源江南
遊學士瞻拜敢忘言

送郡知事李仲常還金華

列郡歌岑晔孤城頌李膺文華仙掌露人品玉壺冰畫本黃
荃學詩兼畢曜能關河千里道風雨十年燈薦鶚知無忝登
龍貴早承朔雲低紫禁東壁映青綾郎署新帷幄儒門古豆
登黿梁初隱見羽檄遂飛騰軍事諸曹服元僚太守稱笑容
秋獨卧驃騎日同興衆仰寬民力誰堪作帝肱埽除塵瀕洞

屏蔽雪侵陵野戍銷鋒鏑田家罷棘矜昆侖天柱正宸極秦
階升顧此心常切多君興遠乘崇桃紅霧歛豐草綠波增喻
蜀漢司馬歸吳張季鷹宦情輕比蜨行色澹于僧三洞金晶
發雙溪白練激過家饒賞咏來紙細絨滕

塞上曲五首

木葉滿關河轅門肅珮珂將軍提劒舞烈士擊壺歌月黑輝
銅獸風高嘯紫駝不堪城上角五夜落梅多

將令傳中間交驩浹兩軍地形龍虎踞陣伍烏蛇分清野輝
燕日黃河瀉岱雲生靈如有賴絳灌不無文

月照小長安風生大將壇虎皮開玉帳牛耳割銅盤伯氣寒
逾肅軍聲夜不謹皇天眷西顧慎取一泥丸

幃革帶鉤膺聯鑣獵楚陵白肥霜後兔青沒海東鷹千里榛
蕪闡三年稻穀登中郎示閒暇呼酒出房烝

諸夏皇威立三邊虜氣衰角弓分虎圈乳酒下龍墀逢蟪蛄
氛遠麗更窟宅移輿圖欲盡入中道勿頒師

聞武昌廬州二藩王渡海歸朝

茅土分封在金章渡海歸事殊生馬角心愧著戎衣星月晶
光並山河帶礪非秋風紫塞上依舊鴈南飛

和張率性推官小遊仙詞二首

西王春宴百娉婷玉碧桃花滿洞局自飲一杯瑤屑露東風
吹夢不曾醒

雲幢煙節紫霞裾齊御冷風集步虛若受人間塵一點長門
又屬漢相如

登雙鳳普福宮東樓贈吳道傳時周境存隱君同席
二首

道人獨坐覽輝輝樓海底青天入座流燕子飛來又飛去遊絲

挂在玉簾鉤

樓殿岩堯上赤霞水紋蟠鳳卧靈槎石棊盤靜香煙直簾下
雙頭百合花

望江郎石

仲春天氣佳萬象欣改色我行六峯外遙見江郎石二儀闢
混沌牽牛委晶魄鼎列台輔姿玉蘊珪璋德三神浮瀛海噴
薄東一極鉅鼇因戴之仙宮晃金碧斯連厚坤軸乃棄姑篋
域直上青蓮花或隕樵舍側安知非異境自與三神敵于時
攬溪秀雲霧忽中冪微風稍飄颻空翠疑亂滴雜英敷陽豔
嘉木生午寂交交黃鳥音好在千丈壁二年思晤對百里今
咫尺煙波動落照道路陰已久尚戀女媧功躊躇望西北

觀錢塘江潮時敎化平章大謙江上

蒼蒼吳越山對峙東江腹江開白銀甕一浪天四蹴金晶王

高秋風露氣轉肅常年駭壯觀委蒼雷擊轂今年官增威旌
麾被川陸羅衣繡龍鳳玉帶緣蠶粟牙牀錦屏帷蠻毯隨步
蹙溫溫香卷陣婉婉眉鬬綠微聞伊梁音淶酒光動穀鮮醲
片晌盡望姓空側目懼成庾郎哀竊效杜陵哭冥頑鱗一作鱣魚
彙屢覆舟萬斛梟雄扈將軍謂福建扈海元帥竟作机上肉大浸交烽
火血膏腥草木地媪爲之愁兼恐河源縮熟聞靈胥廟歲祭
莫敢黷三叫三酹觴願與赤水族錢王射強弩至今有遺鏃
何當起英魂少助八州督時汝潁等州陷中原日無事海寓蒙景福尚
虞多戕殘洒淚逃亡屋

往敷名

一作陽明

開化二鄉掩骼

分藩多賢勞不敏忝賓客雖無官守縻亦復與言責二鄉虔
劉禍慘甚長平厄先王制禮經孟春當掩骼僕夫有難色款
段纔任策驢驢度岡坂眇眇循數澤稍稍煙微青歷歷野四

白遊魂行草上遺老候道側我豈物役徒茲來出心臆皇天
久下憫赤子非寇敵鳴鳥何不仁銜啄血更瀝因歌戰城南
風悲淚狼籍

憂傷四首上樊時中參政蘇伯修運使

古青徐十連五屬桑棗墟黃河失經人化魚呂梁設險豺爲
徒船多纔通玉帛貢車多始登牛馬途守無官軍法度疎居
無鉅室城隍虛欲去鹵掠當何如

合置官軍
合實郡縣

古青徐歲久致君

心煩紆

竹笠黃

時有盜戴竹
笠拒官軍

黃金兜鍪勢相當兜鍪本居大將壇左劍

右印增威光邊隅將校望塵拜州縣曹佐聞風僵況從元首
授元柄稍忤言意違軍令不因菑疫自焚船那致生靈輕隕
命竹笠黃兜鍪相當難走藏兜鍪旦晚先戎行

官柳場青芒芒野鷹交飛撲馬驤年年十月轅門張元戎始

來坐虎牀翼舒箕哆魚麗行鼓進金退兵家常起伏見譏孫
武子句卒貽笑曹成王千夫散盡旌旗定偏裨隊伍相呼應
幾處私恩誤主恩一回酒令行軍令酒醉邊隅事不聞邊隅
擾擾多煙氛

江海孺家家浮生多在船船居無租出無禁競賣田宅行鹽
錢私鹽漸多法漸密隩裏干戈攘白日尋常惡孽不冝除本
固枝蕃禍非一虎符龍節王者師赦過錄功先自欺諫臣上
疏劾已晚蔓延及今歸咎誰地官合爲弘遠計鹽價減徵同
賦稅盜源旣清民瘼除五風十雨歌康衢

小七首歌

水精生苗月牙直彗芒披雲電流隙蟄蛇斷尾短草間海鷗
褪翎霜雪色宋斤魯削讓隋刻金錯錐刀豈其敵吳鴻扈稽
飛著體不曾爲主開邊鄙嗟茲神物久泥滓用之可以報國

士簷冰卓筯日黯空稍玩股掌生雄風鮫魚室卧縞帶影長
鉞辟易萬雉墉古昔客堪秦王曾幾什翠鳳咸陽宮由來意
氣泰山重命甘燎毛不旋踵誰隳古制鑄小之佩稱衣冠加
琤琤我歌三嘆淚滿裾曹鱗豫聶無時無

客金陵遇有以茂才異等爲薦者以病歸泊龍灣二
首寄丁仲容婁行所二先輩

拖樓醺酒出金陵病後衣裳體不勝風雨滿江寒
何處髮鬚鬢周璆實下諸侯榻王式虛蒙博士徵一曲離歌
凝客思幾行疎樹隔漁燈

鳳凰臺上酒如川醉擬題詩李謫仙鑿齒已成耆舊傳真長
空覓孝廉船十年螢案書連屋八月龍灣浪拍天無那病懷
兼旅思白雲遙望夕陽邊

送于子實辟淮閫掾

淮海風高急鼓鼙潁州風起照淮西餽糧幾道通流馬樓櫓
重城望火鷄星入夜寒芒角動地連秋暝瘴氛低君今掉鞅
元戎幕官慰流亡父老啼

宮中行樂詞六首

羽獵罷長楊宸遊入未央鸞開雙畫扇鶴舞百霓裳玉盞瓊
花露金盤紫蔗霜長門誰閉月流影在倉琅

望幸影娥池微吟紈扇詞露盤迎月早宮漏出花遲珮雜鑾
和響雲連雉尾移君王官時顧從愛趙昭儀

明月窺彤管雙星直罽軒宴分王母樂詔擬薛濤箋穀雨親
蠶近花朝拾翠連魚龍曼衍戲吹進玉階前

積翠澌波闊披香暖殿開天低烽火樹日動蔓金苔獺髓勻
猶溼羊車過不回賸陳列女史萬一漢皇來

芍藥爲離草鴛鴦是匹禽君無神女夢妾有楚王心日短黃

金屋宵長綠綺琴相將戒霜露拜月繡簾陰

金鑰魚司夜瑤箏鴈列春後庭通綺閣清路接芳塵同備二千數誰辭第一人君王壽萬歲行樂此時均

景陽井

踏臂歌殘辟月昏驪龍猶藉井生存石闌漫漶臙脂色不侶湘筠染淚痕

過楊負外別業

負外名秉字文載濟南人官浙省負外郎以累斥至正十六年淮張之辟乃遺訓二子卣卓自經

翠羽無溪巢麝香無隱穴由來老蚌珠淚泣滄海月於乎楊負外竟類膏自熱憶昨佐南省四境正騷屑朝廷忌漢軍事莫敢說遂罹池魚殃遘被桺惠黜寄身傍江潭乃心在王室星躔錯吳分氣候乖鄒律天風搖青蘋徒步空短髮譙玄初謝遣龔勝終守節譬如百鍊鋼不撓從寸折又如合抱松豈藉澗底蘖我時浮扁舟鷗外候朝日荒郊無畱景別業自

淡鬱時清議勸忠公冤果昭晰大名流天地當與河水竭結
交貞卓間遺言見餘烈

三貞篇寄納麟哈刺參政幕下僚友

梧西女陳氏顏色絕勝玉阿耶燈窗下古傳常暗讀義須嫁
官人麻臬心所足兵麾忽東指烽火蔓平陸魚鼈遭顛連鷄
狗同追逐猘獠哆其口反噬机上肉母子泣相誓寧死不汝
辱春輝黯門楣寒日照鬼錄皇天實鑒臨家廟爲慘肅

陳氏母曾宋直

講確之七世孫女

髮婦

惠婦吳俱縣人

亦在難自判受命獨臂血濺賊衽賊歎爲

歛縮差差白刃間偉節驚耳目荒野雲雪暮緬想會溪竹水

流風悲鳴星迸萬羽鏃回首陷沒地何限委溝瀆大參行當

來卹典具簡櫝前湖百世紀

謂五代時烈女何氏

明妝儼車服從以雙素

鸞配享疇敢黷孤蓬任漂轉餘齒寄草木倡茲三貞篇庶月

矯浮俗

送楊子明知事從觀孫元帥分制沿江州郡

寒日動大江鞍馬散滄洲
漚光滅沒外迴見冰梁浮
壯士無人色旗羽風颼颼
楊君志弧矢笑被黑貂裘
祭輶千仞岡掉鞅萬斛舟
先聲掠淮甸遙制三邊州
元帥統將權言責在軍謀
一言關興喪跬步分陽秋
天地屬閉塞波伏蛟龍湫
孤煙起天際薄暮青轉幽
百里靜鷄犬豈但窮兵由
雪買薺麥生猶聞鑄戈矛
頻年竭土壤經時委川溝
行其所無事凋瘵或少瘳
耀德不觀兵當今第一籌
君昔甚惻隱曲宥千俘囚
歸裝輕于葉廉價重琳球
敝邑蒙薦臨多暇獲讌游
鳳凰巢阿閣黃鵠宜遠投
菰竹霜實繁知止疇與侔
蘆根短刺水鷺斯空啾啾
顧予麋鹿姿蓬蒿翳林丘
行藏任本性道義期加修

夜坐

落日秋氣昏回溪夜噴薄
幽花敬露榭孤螢墮風閣
沖襟謝

煩歎廣簞生離索躡履望明河南天正飛鵲

義僧行

世降道淪喪盛事罕見之我歌義僧行蘄取國士知
僧臻生夏浦俗號徐大師勇敢重意氣赤手可獵麋
張忠郭解流任俠不計貲臻願出門下致死誓不移
盜尋寇馬洲魚肉乎蒸黎元戎堅營壁大姓溪溝池
壯哉張父子分率脫項兒父擒子死難家不得斂屍
臻聞切齒恨恨死不同時夜卽操斧刀奮身斫籬籬
徑入牛宮內斧斷張繫維手殺盜六人力挽間道
歸妻孥拜堂下金幣謝所私上公賜巾裳欲以好爵
縻幡然掉臂辭還山弄摩尼方今國步艱中外罹瘡
痍銅虎盡懸綬鐵馬誰搴旗嗟爾匹夫臻足張三軍
威何不食君祿爲君靖淮夷收名魯仲連千載爲等
期天秋黃葉脫日暮玄雲馳歌詩節鼓吹用壯吾熊
羆

壯士歌

明月皎皎白玉盤
大星煌煌黃金丸
壯士解甲投馬鞍
蒺藜草深衣夜寒
劒頭飲血何時乾

寒機女辭

鴛鴦機滿東西舍
雪繭繰來日相射
世俗競染紅藍花
妾心鍾愛金絲柘
君王錦繡焚殿前天孫鳳梭蛛網懸
織成雲霧製龍袞萬一熏香分御筵

君家桺

君家桺萬株一色鵝黃酒
龍鱗波暖裊翠煙
飛花直渡江南天
倉庚立曉燕穿午薄暮啄木聲丁然
腹中樹蝕皮齧馬舊陰半減
金城下長條短條屬行人
猶有持斤睨之者
秋來大地落葉鳴心憶陽春淚如瀉

夜何長三疊寄周參政伯溫鄔僉院本初

夜何長日苦短夜長復寒日不暖
溪林火薄鵲鳴滿尾頰
魚游纂纂千年古鐵紫氣纏赤帝
當之白蛇斷中朝老臣雙
珮蒼憂心鬱紆寢息忘鳳凰在笈
驥服箱雪埋石棧冰河梁
夜何長六龍回轡東扶桑

夜何長日苦短夜長復寒日不暖
蒼梧九疑雲思遠驚鴻亂
落夫差苑漢家騎尉雙龍蒼酒酣
起舞隘八荒疾風吹沙百
草霜玉釭朱火青凝光夜何長帝
車高轉天中央

夜何長日苦短夜長復寒日不暖
欃槍參旗燭雲罕樹樹梅
花落羗管江南布衣雙鬢蒼歲闌
獨立氣慨慷夜冠禮樂制
孔良路迢無由貢明堂夜何長
啓明耿耿天東方

奉陪神保大王宴朱將軍第聞彈白翎雀引

并序

白翎雀燕漠間鳥也初世皇命伶官石德閭製白翎雀
曲及進曰何其末有孤嫠怨悲之音石德閭未之改而

已傳焉戊戌冬淮藩朱將軍宴大王于私第逢忝坐末
時夜電霰交下衆賓相次執盞起爲王壽逢亦起王命
左右鼓是曲且語製曲之始俾歌詠之逢謂續事本實
左氏所先故鋪陳興龍大略而不暇他及也

玄陰五天雪欲作將軍西第夜張幕銅盤蠟光紅照灼四坐
傾聽白翎雀雀生烏桓朔部落大樸之氣元磅礴地椒野榛
極廣莫穹廬離離散駝駱黃羊蘆酒雜湮酪鷹狗畋獵代耕
獲太王肇基不城郭青春建橐宵罷柝聖澤滂沛蔓綿絡風
淳俗龐法度約乾端坤倪露冲漠羽毛麟介並飛躍庭祠歲
饗咽管籥雄雌和鳴莫我樂帝皇赫然太陽若八表晃蕩氛
盡却前驅屈盧從繁弱睢盱喟萬狀錯遂朝玉帛解組縛
大明宮開夾花萼文監武衛盛材略蔥珩穀璧映霜鏐五雲
夔龍奏韶濩九苞鳳凰降寥廓德音威儀匪予度萬姓拭目

瞻阿閣軒轅伶倫兩冥冥八十年來事非昨優塵雜亂人道
削咬哇哀淫頌聲鑠皇孫讓賢執鼓鐸巾冪鵲尾黃金杓穀
烝體薦嚼復嚼巴渝舞隊驩回薄供奉革鞜衣狐貉銀箏載
前酒載酌延秋門溪魚守鑰緱山遠度吹笙鶴淮南昔者鷄
舐藥千乘之國棄弊蹻方今羣雄自開拓拔刃把稍爭刺斫
爲臣義同葵與藿將軍固合鞭先著蓮壺漏沈薇露涸枯梢
號寒風隕籜百禽啁噍電霰霍冰花亂點真珠箔箔中呱呱
情陡惡供奉若爾停弦索吁嗟白翎將焉託有客淚下甘丘
壑

奉陪杭右丞程禮部以文字文憲僉子貞魯縣丞道
原宴周左丞伯溫館舍時聞河南李平章恢復中原
西湖館舍開新秋三峯倒影紫翠流白馬彫戈駐達道金魚
玉佩羅林丘二孤五老獨神往八公六逸同天遊時維小康

況大比萬乘少紆東南憂如澠之酒官寺送風生酒波鱗甲
動荔子漿凝赤露香鵝肪炙作黃冰凍歌袖頻熏婆律膏渴
羗解奏參差鳳右丞閱閱霄漢逼諸叟文章臺閣重罽恩駿
駿落日涼菱花遺葉掩冉光驚飛先自有烏鵲寡宿未必無
鴛鴦堯封禹跡煙莽蒼宣髮固短憂心長側聞汴破濟欲下
百姓亦望臨淮王山人厭亂喜莫量笑整冠帶爲舉觴醉後
不登嚴武牀

歎病駝

狂夫東遊乘白驪道路適遇病橐駝紫毛無復好容色肉鞍
尚聳雙坡陀南人從來不夢此私怪目擊臨干戈泉渠元自
控蕃落天苑畢竟連銀河吳郊楚甸水草淺任重却欲千斤
過青袍朝士爲起立茜帽番僧時撫摩熱風吹塵鼻出火積
雨成潦瘡生窠牛蝨狗蝨苦嘔血未由驅除知奈何頻年出

師數百萬熊羆獅豹相奔波豈期獨後苑溝壑餘光所及良
已多老奚首怕短袴靴手持鞭策涕泗沱憶昔灤京避暑日
氣骨礪嵒從鑿和沈沈金甕夾捫馬裊裊錦帶懸靈鼉服勞
輦下藉鬚刷屈跡澤畔甘蹉跎疇能推廣愛烏義沒齒仰飼
公田禾

長樂未央玉璽歌爲秦景容總管賦

赤龍銜日照赤子白蛇橫斃烏騅苑東風吹冷咸陽灰長樂
未央連闕起昆吾寶刀截瓊肪陰文小篆雲漢章盤螭作紐
徑二寸歷歲四百傳天王黃星字明銅爵舞銅仙淚泣如絲
雨盜將神器竟不歸璽亦漂淪頻易主使君購得心良苦君
不見豐城有劒氣上衝米船也貫滄江虹陋歌先附蘇卿鴻

歲星漸高贈王伯統進士

歲星漸高辰星光鎮星不動天中央熒惑退舍太白斂晝芒

南斗尚爾雲微茫有美一人被褐裳思君思鄉垂十霜馭娑
駘盪氣鬱蒼王屋石室爰相望願陪先驅弧四張歲星輔日
照八極還種祭田汾水陽

簡鄔同僉

南粵稱臣陸賈勞漢廷何憂璽書褒恩波遂與三吳闊爽氣
真連北斗高鷺囀羽林交杖杜馬閑沙苑暗蒲萄天心厭亂
民懷德未說關河恃虎牢

送王季德主事祠南鎮還京

千羽春明玉宸間皇華躬遣祀稽山蓬萊雲霧隨封檢敷落
仙曹降珮環宣室舊承前席問樓船今駕海濤還東南父老
憂時切落日扶藜得重攀

秋感六首

吳門葉落季鷹船朔堦霜橫白鴈天三楚樓臺餘夢澤兩京

形勢自甘泉采雲帳幄冷風滿瓊樹花枝辟月圓本是宣光
中興日腐儒長夜泣遺編

紛紛攘攘厭黃巾妖血徒膏草野塵馬化一龍猶王晉楚存
三戶未亡秦颶風天靜浮青海朔漠山高直紫宸莫爲鬼方
勞外伐槩弧箕服最愁人

豆苗瓜蔓未應稀菰米蓴絲積漸肥南極有星天半隱東維
無地海全歸連城不換相如璧百結何妨子夏衣回首故山
荆棘外幾年空翠鎖煙霏

茗花薺葉繞林扉獨立蒼寒見紫微夜久長庚隨月上天清
高鳥帶霜飛東南吳會三江入百二秦封六國歸烈士莫年
心未已無言思解白登圍

南越東吳帶楚皋頻年醉眼送飛毛滄洲露白蒹葭滿甲第
秋聲蟋蟀高九日天涯桑落酒三軍城上柘黃袍試觀漢後

詩人作獨覺遺風屬阮陶

鯨魚風息淨江波
軋軋機絲響薜蘿
華髮道途秋日短
曠裏樓閣莫陰多
浮查受宿炎州翠
細草從眠墨沼鵝
心自隱憂身自逸
幾時天馬渡滹沱

簡陳韋羗負外

陳基敬初

幕府淡嚴午漏遲
簾文簾影碧參差
總傳白馬陳從事
每念青袍杜拾遺
大地風塵憂未解
扁舟江海去無期
涼天鴈叫芙蓉發
許奏軍中鼓吹辭

陪淮南僚友汎舟吳江城下

波伏魚龍夜不驚
菱花千頃湛虛明
吳儂似怪青絲馬
漢月重臨白帝城
世說竇融功第一
獨憐阮籍醉平生
樓船簫鼓中流發
喜及東南早罷兵

送薛鶴齋真人代祀天妃還京

蓬萊宮裏上卿班
代祀天妃隔歲還
日遶五文皆御氣
海浮一髮是成山
風霆夜護龍鸞節
雲霧朝披玉雪顏
聖渥旣隆玄化盛
轉輸應盡入秦關

畱別陸芳潤張孟膚田仲耘王孟翼

楓葉殷紅枳實肥
蘋風蕭颯芰荷衣
自甘許汜求田去
不擬劉蕡下第歸
日落大荒狼夜哭
天含積水鶴雲飛
諸君有待乘槎使
直犯星河織女機

題虎樹亭

宋聰禪師住華亭時有二虎噬人師降伏之命名曰大青小青師卒虎亦死弟子瘞之塔傍踰年生銀杏樹二今主僧隱公

闕亭樹間
扁曰虎樹

舟泊東西客詩招
大小青山高白月
墮草偃黑風腥植
物鍾英爽精藍被
寵靈涼陰慎翦伐
畱護石函經

過馬天章水村居

嘉興馬錄判歸築
水村居土銼長腰
米蓴羹巨口魚青
衫沾

露薄華髮向秋疎尚爾丹心壯無時去玉除

近故二首

近故儒林老于予起嘆嗟清秋書柿葉落日賦桃花碑碣畱
吳滿雲山向越賒多情楚宮月來照未栖鴉

近故維揚老威儀本漢官才高三禮賦心折一泥丸露氣金
盤溼簫聲碧落寒空餘茂苑樹鶻血幾時乾

成廷珪寓維揚卒于至正末年二詩爲成而作

鄰飲

蠟炬繞紅鸞盆花玉露溥無家憎月色多難薄春寒毛穎時
旌鬼黃金少鑄官西鄰濁酒熟得罄一回歡

聞畿甸消息

白草生畿甸黃沙走塞庭直憂星入斗兼畏雨淋鈴殿閣餘
龍氣衣冠自鵠形吳粳斷供餉隴麥向人青

和惠子及雨中

桃花昨夜愁盡發燕子今春疑不來雪衣鸚鵡亦可怪錯喚
主人非一回

題李唐江山煙雨圖

煙雨樓臺晻靄間畫圖渾是浙江山中原板蕩誰回首只有
春隨北鴈還

馬頭曲

馬頭者大都名姬也始爲黃禪太子寵黃禪伏誅沒入以賜太平
王王薨子唐其勢畱之唐其勢被殺復沒賜字哥字哥國語

力士也

和戎漢明妃亡吳越西子鬼妾賜元臣孰受盧弓矢
前時楚襄夢今夕伶玄妾瓊斷藍橋漿紅流御溝葉
萱圖爲李恒題于茂清軒中

暄風宜男花涼日忘憂草一種兩含情親容夢中老

游鯉山

舊名由里山

鄉山三十三游鯉奠郊南巖然獨高大秀掩東諸嵐土剛蒿

炎精崖仄削劒鐔我嘗挹飛翠遠在滄江潭波濤與伏興雲
霧相吐含恍然穆王駕八駿左右驂又如琴高仙脚踏朝蔚
藍久思覓徽號新喜遂幽揆太白賦九華後來成美談狂歌
繼其武林間免愧慚春風綠瑤草秋霜紅石楠行將修月斤
爲鑿避世龕蛟龍正格鬪鯢化誰其堪

次鰕妾岸

常熟州

朝辭鳳巢村晚次鰕妾岸起望大角間太白光有爛方羅杜
陵苦未已崔旰亂鬢毛掠蝙蝠竹裏鳴鴉鳴同曹迫憂悸相
視名錯喚前途非樂土殊昧賢達筭誰家繚崇垣轆轤卧井
幹餘歌久悽惋酣宴同清晏寧知楚幙烏不寤吳宮燕蕭晨
理舟楫回首重悲嘆

讀貞燕記有懷魯道原提學

天涯老孤臣想象賦貞燕空梁泥屢落故渚冰自泮影託明

鏡驚夢接長門鴈飛雲軒不歸自語清商怨

元貞二年雙燕巢于燕人柳湯佐之家一夕家人以燈照窺其雄驚墜猫食之雌彷徨悲鳴不已朝夕守巢哺諸雛成翼而去明年雌獨來復巢其處人視巢生二卵疑其受偶徐伺之則抱獨之殼爾自是春去秋來凡六稔觀者譁然目爲貞燕云長沙馮子振記

義鄧

吾鄉有鄧添千里負主骨晨夜竄草間宛轉時虜窟胼胝苦
何辭性命間一髮日車昏盪覆虹暈或抱月魂氣相衝塘鳥
獸亦猶狖經過百戰地青春暗消歇淡幸主有靈全生及城
闕主母悲喜集流淚心激越主妾事他人空庭自花發王昔
爲龍蛇公論不可沒但感衣食恩疎戚均賞罰在家爲義奴
在軍爲義卒庶幾銜土烏尚愧擊蛇鵠淒淒薦霜露暫暫上
參伐不見秦舞陽悲風動天鉞

排難行

贈王
子中

相如全趙璧子敬存家瓊臣子奉君父由來義當然我爲排

難行期播今後賢至正十六年楚氛蔽吳天南臺塔御史盡
室方顛連風波萍浮寄墟落匏孤懸內無虵蜉援外絕鴻鴈
傳縮地漫勞想拔宅欲假仙形勢轉倉皇一日猶三年君聞
急友義側身入烽煙得子猛虎穴摘珠驪龍淵菱花奩影合
桂樹月魄圓青青驄馬駒環珥映後先相看喜至骨欲語翻
淚漣報之錦繡段長謝賦歸田遂令鷄鳴客遠愧齊魯連我
時載茶具蕩漾五湖船蕭蕭春陰莫載歌伐木篇

贈窮獨叟

窮陰結長寒木介河生漸曠野獨獸號異鄉孤臣悲薜衣帶
胡繩三年限朝儀豈徒無炊火顧有麻斬齊身幸免污辱言
之淚交頤脫急藉朱家弔古裏要離邇風酒三酹老氣吞畎
耜誓刳梟獍肉用塞烏鳥饑漢酬張良志吳乞伍負師行歌
獨漉篇以繼從軍詩

登崑山寺謁劉龍洲墓

陰崖鼈裙披蕭寺壓其左前無容馬地而公靈永妥綽有高
世風荷雷誓埋我懇懇中興論汎汎岳陽舸竹西旌佩間爲
士非瑣瑣我來行吟久顧影歎復坐上下百年餘同遇時坎
坷疎嵐冒川暝歸鳶跼跼墮怒焉上孤舟星流亂漁火

游卜將軍墓祠

將軍名珍字文超唐西河人
有功業在崑山民至今祠焉

時危短吾裾薄游東崑野有唐將軍瑩肅肅風露下木葉金
甲動土花碧血洒居然神兵栖夜思石麟馬二蛇顧首尾勢
若無禦者當時陣或然威福巫得假靈烏拂人首疎火散村
社炭炭婁江波壯裏託申寫

題畱侯小像

漢高三尺劒子房三寸舌剛柔兩相濟秦降楚隨滅君不見
乾坤狡兔飛鳥秋脫使子房無世仇箕栖飲老一作死則休

史騾兒

騾燕人善琵琶至治間蒙上愛幸上使酒縱威福無敢諫者一日御紫檀殿飲命騾弦而歌之騾以殿前歡曲應制有酒神仙之句怒叱左右殺之後問騾不在悔曰騾以酒諷我也前和州同知李澄言于逢欲傳其事逢為賦一辭澄字仲溪開州人翰林承旨惟中先

生從子也

虎帖耳豹俛首青天白日雷電走尚食黃羊光祿酒史騾曲
曲春風手蕭王馬蹴滹沱冰亞父玉碎鴻門斗鳳凰鍛翻蚌
珠剖趙女含瑟秦娥罷缶飲中八仙方下來御溝濺赤花飛
柳君不見龍生逆鱗海岳寒鳴呼史騾乃敢干和州孤臣說
舊語梨園弟子更新譜

三月十二屬予初度時客舍承朱僉樞攜僚佐見過

我生三月之仲丁長庚輔日當奎星命居旄頭身驛馬薄有

抱負多飄零鸛鸛嘗貫金陵酒蛟龍幸護錢塘乙酉十二月予護母視泊錢塘

鄰舟多為風潮作覆魯連海上隱行歌吳王臺前辭下走清齋庚果廿七

種短疏劉蕢四三首才名從知造物惡心臟空夢神人剖亥

科舉罷或勸予學律因感
異夢見心藏皆五色遂止 茲辰客舍風雨俱湯餅尚少囊中蚨正冠

試誦蓼莪什衝泥適來櫻筍廚帳士彈箏玉連瑣廬兒執爨

貂檐褕落花簌簌香埽途闔座氣作思馳驅箕不以簸斗不

顛仰面大笑真吾徒

題蔡琰還漢圖

銅臺春淡邊草綠琰因名父千金贖殘生既免羶裘鬼哀哀

莫盡蘆笳曲舊時漢妝慵復理感義懷慚歸董祀入朝好語

亂世雄賤妾不為天地容爾其忠事山陽公

合肥束遂菴學正為畫君山酹月圖長歌奉謝

憶攜蓉城霞吾鄉酒名醉賞君山雪興酣俯崖面三酹大江月靈奇

秘怪不可說回首十年塵土熱束卿想像作此圖如見當時

眼為豁是山傑立氣皓鮮四八賓從咸華顛吾鄉有三十三山君山為之主銀濤

絲紫料角海料角地名遠在通州玉臺鏡露峨眉煙峨眉嘴即在君山下槎牙亂樹拔

虎窟撇捩小艇吞龍淵樵子罷斧僧罷磬木瓢一箇滄茫前
君不見江山元與天地闢有月無人景虛擲崑崙東來幾萬
里衣冠雲散三千客三千客後世屢易曉事僅有羅春伯事見郡志
龜趺榴鬣鬼照火鼇背蒼涼獸交迹君不見采石紫綺裘赤
壁洞簫歌樂者信曠達齷齪將如何歲云莫矣雙鬢皤夢恍
茅屋牽青蘿廣寒白兔下相杵貝闕鮫女趨鳴梭卿聞大叫
當就隱指日莫問魯陽戈

浦東女

浦東鉅室多豪奢浦東編戶長咨嗟丁男殉俗各出贅紅女
不暇親桑麻鵲鳩呼雨棟花紫大麥飲香勝小米一方青布
齊裹頭赤脚踏車爭卷水水低岸高力易歇反水上田愁漏
缺穀種看如瓜子金野鴉不銜田鼠竊黃草衣薄風披披日
色照面蒼煙姿南鄰北伴更貧苦糠粃糜粉隨朝齏阿嬈送

茶相向語鉅室新爲州府主妻拜夫人婢亦榮繡幃朱輪照
鄉土羊牛下來鷄欲栖汪汪淚眼數行啼女自身長苦非一
歸路白楊斑竹西

胥門柳

今年胥門十一月楊柳青青寒不脫雕戈白馬黃鬚郎朝朝
忍見行人別行人吳頭或楚尾心趁飛花度黑水避暑鑾輿
狩未回都人南望思投箸都人泣向都官道塞北江南柳還
好風纏露沐恩旣殊報荅春光願終老君不聞虎狼之秦六
國雄可憐千丈泰山松至今稱是大夫封

劉夫人

劉夫人至正太尉吳王嬪笄珈車服置弗御澹煙常鎖雙眉
春中州援疆敵在目叔貴日驕彊日蹙背城借一王本心孤
埋狐搢將軍欲夫人勇決烈女義百口樓居親舉燧片時陰

慘萬古生月明風清珮音至君不見男兒成敗古有之孰以
楚霸輕虞姬蘇民安得夫人祠烏栖白鳬庶少衰

讀閩僧謙牧隱所題鴈宕大龍湫西瀑布常雲展旗
天柱卓筆雙高峯詩予爲之色動槩括一首

鴈宕龍湫氣混濛展旗卓筆勢爭雄翠珪霄漢雙鸞影玉立
東南一柱功興入常雲飛夏雪醉看高瀑挂晴虹總慚尊者
空諸有萬木圍巖夜自風

冥鴻亭偶題二首時歲戊戌

春陰過却幾番風野店山櫻霧雨中新水綠塘鵝並浴嫩寒
茅閣燕微通大兒稍熟春秋例幼女歡趨組繡功四十今年
渾意足酒炊香滿巷西東

一家無事樂清寧寄目冥鴻野外亭江水未分南北限月明
常後畢箕星子生猫櫟垂垂赤蔓長鴉藤故故青天意物情

應有在且須料理相牛經

聞何上海子敬毀淫祠開鄉校因寄四韻

魚米駢登橘柚垂備聞佳政起溪思
女巫罷進神弦曲鄉校新陳魯頌詩
風葉畫埋公館靜霜鐘寒度海雲遲
高天鴻鵠東回首亦欲朝陽借一枝

無錫寓隱謝王左丞彥熙攜酒饌遠過

玉帳旂旌拂紫冥樓船神物護青萍
風雲密擁將軍樹江海孤懸處士星
溪愧草茅優簡拔未忘蒲柳易飄零
竹西歌吹高陽酒喜爲尋春過野亭

十二月廿二日爲重陽王真人誕辰是日立春在淞
江長春道院瞻拜真人及七真像敬題薛一山丹房
寒盡東風破曉陰真人遺像儼如臨
山中霞熟千年醞海上蓮開七朶金
朔地興王資化力鈞天朝帝動仙音
私忻泉石

膏肓久終日凝神紫氣淡

無題五首

五緯南行秋氣高
大河諸將走兒曹
投鞍尚得齊熊耳
卷甲何堪棄虎牢
汧隴馬肥青苜蓿
甘梁酒壓紫蒲萄
神州比似仙山固
誰料長風掣巨鰲

天槍幾夜直鉤陳
車駕高秋重北巡
總謂羽林無猛士
不緣金屋有佳人
廣寒霓仗閒華月
太液龍舟動白蘋
雪滿上京勞大饗
西風華岳弔秦民

白衣艣艣渡吳兵
赤羽旌旗奪趙營
灤水天迴龍虎氣
榆林風逐馬駝聲
靚妝宮女愁啼竹
白髮祠官憶薦櫻
猶有海鷹神不王
鴛鴦高去塞雲平

五城月落靜朝鷄
萬竈煙消入水犀
椒闥珮琚遺白草
木天圖籍冷青藜
北臣舊說齊王肅
南仕新聞漢日碑
天意人心

竟何在虎林還控鴈門西

十載羣雄百戰疲金城萬雉自湯池地分玉冊盟俱在露仄
銅盤影不支中夜馬羣風北向當年車轍日南馳獨憐石鼓
眠秋草猶是宣王頌美辭

後無題五首

一國三公狐貉衣四郊多壘鳥蛇圍天街不辨玄黃馬宮漏
稀傳日月闌嵇紹可能畱濺血謝玄邴及總戎機祇應大駕
懲西楚弗對虞歌北渡歸

吐蕃回紇使何如馮翊扶風守太疎范蠡不辭句踐難樂生
何忍惠王書銀河珠斗低沙幕乳酒黃羊減拂廬北陸漸寒
冰雪早六龍好扈五雲車

回首崑崙五色天疎風落日重個儻駕驂八駿非忘鎬臺置
千金舊慕燕地限上林雲過鴈雪封西嶺樹啼鵲遠慚行在

周廬士橫草無功日晏眠

險塞居庸未易廟望鄉臺上望鄉多君心不隔丹墀草祖誓
無忘黑水河前後炎劉中運歇東西元魏百年過愁來莫較
興衰理只在當時德若何

黃河清淺海塵揚陝月關雲氣慘蒼寧復明珠專篋社尚論
玉兔踞金牀衣冠並入梁園宴簡冊潛回孔壁光私幸老歸
忘世事梧桐朝影對溪堂

錢牧齋曰無題前後十首皆感悼王師入燕京中北狩之事

覽周左丞伯溫壬辰歲拜御史扈從集感舊傷今敬

題五十韻

華夸今代壹畿甸上京遙游豫循常度恬熙屬累朝六飛龍
夾日獨角豸昂霄御史箴何忝賢臣頌早超咨諏新境俗觀
采衆風謠文用彌邦典忠惟振憲條執徐當景運仲呂浸炎
歊愠解民心結煩除聖念焦雨工趨汛埽市令薄征徭大口

謹移蹕庸關肅衛刁縉雲峯立曉薌月水涵宵徼道臣臣俊
清塵騎騎驍豹驅嚴御勒駝象妥鑾鑣儀仗真如畫車徒不
敢囂侏言來部落皮幣贄荒要岳牧恭迎舜封人願祝堯六
宮程緩緩列寺思飄飄絲裊雙行鞚珍鳴雜佩瑤寶鈿榆莢
小錦罽草花嬌繡襖珠鞵絡香鬟玉步搖婕妤辭並載王母
會頻邀拾翠溪沙嶺梯虹復澗橋天長躔北日斗近建南杓
珍味高陀鼠丹馨散地椒廬兒分逐兔土屋競停雕白貉衣
溫座黃羊酪凍瓢桓城金合沓灤關紫嶢嶢社稷尊王統山
河固廟祧明明神爽降秩秩禮文饒寵遂光幽朔畋同閱獮
苗蹕林酺已舉款塞福皆徼棕殿三呼歲楓墀九奏簫祝融
回酷暑少昊戒靈飈舊制先回輶良辰次起輶謝恩多帝胄
紀實得臺僚至治音俱雅於皇德孔昭相如慚禪議謀父感
祈招蕞爾蘄興侵紛然穎煽妖漕輸橫蜃鱷衡祀闕管蕭邊

警初傳箭軍容半珥貂薦添烽埃迫有甚火雲驕袞服中垂
拱微垣外寂寥幾多遺鶴髮曾共望鷄翹二洛遙通晉三韓
復入遼不無雙國士正賴一嫖姚求劒舟難刻更弦瑟好調
扶顛須砥柱撥亂豈芻蕘戎幙辭巢父詩壇老伍喬式瞻阿
閣鳳馴止泮林鴉併論公殊蹟吾知邁董鼂

寄僕正字

君遷正字職秩視校書郎太乙藜分焰銅仙露湛光鵷班清
漏裏鶴駕霽雲傷署轉宮花密溝迂御柳長芸窗填竹素蓬
觀啓銀鐺魚豕知訛舛鉛黃屬訂詳聖王經貫道家世桂名
坊一氣根幽朔羣英萃豫章比蒙青眼待益見白眉良傳癖
稱元凱文宗得子昂冠將峩獬廌豺已避康莊大器遭斯運
凡材信彼蒼哭親嵐瘴邑懷友月蘿房病謝臺臣薦書煩驛
使將暖餘牛背日寒遠馬蹄霜野褐方山帽畦蔬德操桑策

陳憐賈誼裾曳恥鄒陽任性何孤僻傷時或慨慷園丘虛墜
墳太廟攝丞嘗珥筆誰丹扈紆金盡玉堂海涵思靡極哀補
責宜償十樣牋霞粲雙壺酒雪香珠璣新傑作龍虎古雄疆
好約重觴詠秦淮夜對牀

簡夏嘉定

百里繞吳煙重過喜地偏淡城遲閉戶細港倒回船莫汝鯉
開甲秋原木放綿民風返淳厚正賴使君賢

乙未八月避地前湖三首

兩地初讎殺全家屢苑生守臣無大過雄長自相爭魑魅闕
當屋鵲鵲啼過城前湖落木外排難愧齊卿

借地安樵爨秋煙滿桂叢禍因貧賤少詩到亂離工有妹音
徽隔諸兒起卧同數畦烏口稻滿待熟天風

竹底秋光薄牆根朝日暄稍通鄰曲好淡荷野人恩細雨菰

生米新霜芋長孫加餐向茅屋醒眼看乾坤

丙申八月紀事時自鄉里入吳還華館遂卜隱鴻山
寸舌解重圍長歌振短衣不成巢父去空似魯連歸蔡港沙
田薄黃山宰木稀伯鸞吾所慕梅李況魚肥

常州江陰再失無錫告警病中自鴻山將遷海上

病就山中隱烽催海上舟連城新鬼哭淡壁大臣羞赤青躔
金火炎風汗馬牛遙占女兄弟先已下長洲

至正丙午三月廿八日自橫泖遷居烏涇宋張驥院
故居有林塘竹石因扁堂曰儉德園曰最間得詩凡

六首 錄三

卜宅賓賢里生涯始有涯憂緣常念亂貧爲數移家徑合交
枝果簾當獨樹花池臺幾峯石相友卧煙霞

鄰曲敦新好園林恍昔游衣冠時徑入棊枰夜忘收已遂蓴

羹興何煩杞國憂人生貴行樂兩鬢颯先秋

無才甘在野多懶愜行園石露漙雲氣池風損水痕草淡眠
雉子林靜習鴉孫擬著幽居錄漁樵共討論

得兒掖書時戊申歲

客夢躬畊隴兒書報過家月明山怨鶴天黑道橫蛇寶氣空
遺水春程不見花衰容愧耆舊猶語玉人車

此詩記戊申歲正明
太祖改元之年也

舟過吳門感懷二首

躍馬橫戈東楚陞據吳連越萬熊貔風雲首護平淮表日月
中昏鎮海旗玉帳歌殘壺盡缺天門夢覺翮雙垂南州孺子
爲民在愧忝黃瓊太尉知

強兵富境望賢豪戴縑垂纓恨爾曹一聚劫灰私屬盡三邊

陰雨國殤號江光東際湯池闊山勢西來甲觀高形勝不殊

人事改扁舟誰醉月中

膠張氏之據浙西也原古有功名之望焉故首章末句
如此其間吳門消息有云盡擬田單收故上不期高

幹損雄才又云三弟傲羣情懈十月城圍百戰休尤多痛惜之意至于稱士德爲孤忠謂東吳爲唇齒是則書生之見而已矣

題心覺元上人觀露軒

上人吾鄰人跌坐中竺嶺澹然觀朝露月落萬籟靜豐林始如沫萎萃颯以冷石牀仰嵌竇餘滴下微影世皆汨塵勞天或示短景忘言理溪詣收視妙獨領茂陵和玉屑

一作淒清蟬暫吸

有

恤鶴知警雲溪粥魚鳴盂鉢躬自整

趙善長山水

畫師今趙原東吳諒無雙寸毫九鼎重烏獲力靡扛翠樹擁羽旂溪崦敞雲窗參差見壘罍不無酒盈缸老山石黃色插脚琉璃江隱若赤壁壘勢壓曹魏邦何當柔猛虎蛟鱷遂我降欠伸列仙崖嚏咳漁蠻石

唐昭儀李漸榮辭

日繫包桑地瓜剖宮闈去尺非唐有庭春草合車斷音忝備

昭儀奉卮酒御香紫袖纖垂手載拜載祝南山壽龍須席轉
蓮炬移狼角斬天猗突牖不辭隕命同君后女三禍前妾忠
後無人爲語巢賊奴莫使兒知環柱走

宋婉容王氏辭

并序

徽宗在北四太子請王婉容妻黏罕子上遣之婉容大
哭曰何忍一身事兩主就輿中奪刀自刎苑太子嘆異
擇地葬之且爲立碑曰貞婦冢事載俞文豹吹劍錄

二宮有警無嚴蹕賤妾徒爲虜雛匹假如青冢向黃昏不若
金刀照白日白濡一縷願隨終煙沙漫漫霜雪容令人想見
旌貞石氣敵雙高湖上峯

原吉詩于忠孝節義之事往往三致意焉表
微闡幽美不勝記茲特採其尤者錄之云

夜過蒼墩江隱居

白茅蕭蕭風色昏歸人自語煙際村我騎蹇驢童抱尊記得
君家忘却門徑穿竹入背江路傍是梁朝敬宗墓月中對鶴

吹洞簫露水琤然落高樹

題崔白百鴈圖

爲宣城黃
宜之題

老愚離羣影久孤客來笑示百鴈圖揩眇試數失兩箇莫喻
畫意翻令呼得非長門報秋使或是大窖傳書奴不然一舉
千里高鴻俱其餘泖汨碌瑣徒且唼且息翔且呼營營鄭圃
田之稷睢睢齊海隅之菰遑知爾更銜爾蘆瓠肥卒至烹人
厨小而曰騏亦就笏邇聞澤梁弛禁官罷虞麋鹿魚鼈同少
蘇羽儀好在春雲衢

金世宗太子允恭百駿圖

爲舒德
源題

金家武元靖燕徼嘗誚徽宗癖花鳥允恭不作大訓方畫馬
却慕江都王此圖遺脫前後幅尚餘龍媒羣角逐息鷄草黃
霜殺菽王氣榮光等蕉鹿山人塵迷朔南目溪頭姑飲歸田
犢

葛稚川移居圖爲友生朱仲矩題

仲矩名禹方

典午三綱紊無紀賊奴內向伯仁苑辭徵尚蹈公以此終託
丹砂去朝市千年盛事傳畫史野夫獲睹朱氏邸壯肩餽糧
幼琴几杖懸藥瓢風靡靡長襦老婢手執箠躬驅其羊羊顧
子兩健受牽頭角頗鵷尾殿隨亦忻喜公披仙經瞳炯水琅
琅餘音恍入耳後驂夫人謝釵餌膝上髻嬰玉雪美句漏尚
遠羅浮邇若有函關氣騰紫天丁山靈狀僑佹開鑿空青洞
扉啓雲霞輸漿石供髓二麗精華晨夜委金光秀發三花蕊
飄飄上昇碧寥止同時許邁行加砥一門翁孫良可儼波散
豆者顙遺泚嗟今凡民苦流徙落木空村淚如洗

趙文敏公山水爲董竹林山長題

并序

公于畫左題云至大三年六月望日爲吳彥良畫并詩
有岸靜樹陰合溪晴雲氣流之句想在鷗波亭作也彥

良嘉禾人

何山弁山秀可掬上若下若蒼苔綠翰林學士偶歸來亭倚
鷗波送飛鵠鵠飛盡沒滄茫境衣上青天倒搖影鹿頭舫子
湖州歌想帶南風覺淒冷冰盤瓜李進仲姬管夫人字生綃畫就復
題詩鄭虔三絕世無有於乎何幸再見至大三年時

宋制置彭大雅瑪瑙椀歌周伯溫參政徵賦

并序

今太尉開藩之三月適江浙參政周公分省江淮延飲
齋閣歡甚以予避地無錫說王左丞晟勸張楚公歸元
特出瑪瑙椀曰此宋彭大雅燕饗舊物子才器足以當
之遂引滿酌之再氣酣思湧率爾走筆以紀清賞非求

知他人也

小序與列朝詩集所載稍有異同

詩曰

淮藩開吳豪俠滿歌鍾地屬姑蘇館相儒獨爲緩頰生笑出
彭公瑪瑙椀血乾智伯髀不腥黃土瑩錯紅水精妖墓蝕月

魄半苑虹光霞氣歎且盈隱若陣偃邊將營彭公彭公古烈士重慶孤城亦勞止天忘西顧二十年畝盡東南數千里武侯祝文何乃偉敗由宋祚民今祀太湖底寧魚米豐官廨喜與間門同酒波棹面動峽影想見制置師犒飄風中再酌庶沃礫磊曾君不見漢家將軍五郡封班氏天與世史功詩狂昭諫客吳越存心唐室人憐忠嗚呼尚友吾豈敢醉墨慘澹雲飛鴻

七月間河南平章凶問

六月妖星芒角白幾夜徘徊天市側尋聞盜殺李上公窮旅孤臣淚沾臆當時寬猛制萑澤安得受降翻受敵上公忠名垂竹帛書生奚爲費禕惜東南風動旗黃色蒲梢天馬長依

北

壬寅六月田豐王士誠刺殺李忠襄于濟南城下先是順帝見星變嘆曰當損大將馳使戒諭忠襄正此詩所謂妖星芒角也

謝中政院判買住昂霄枉過予龍江寓隱

三年江館閉斜曛一日星輅下紫氛老我已非佳子弟壯公
曾是故將軍未央雙闕雲端見長樂疎鐘月下聞還語中原
縶絲盡六宮知愛石榴裙

送吳照磨赴李司徒幕兼簡張郎中

司徒分鎮越王臺甌婺山光入望來堂上修文閒將略幙中
求舊得賢才鑑湖木落魚梁見紫塞風高鴈路開莫禁白頭
狂賀老酒船仍蕩月明回

時方
禁酒

寄婁上俞士平提學陸良貴秦文仲二教授

朱紱青袍映後先邇來愁過買臣年壚頭相釀囊須罄地下
誰游劒莫懸淮浪白滔迴魯日塞氛黃隔姓劉天賤名忝在
齊民版爲報新蕪傍泖田

寄陸宅之進士錢思復提學全希言學正

花開花落雪盈顱三地相望一信無梁震不慚前進士杜陵

寧是老狂夫長淮浪接江逾闊南極星聯斗不孤想與窮經
全學正酒香鄰社杖同扶

經游小來涇簡木仲毅

髯參歸隱小郊垞亂日曾聞險備經風黑浪高羅刹海月明
天度使臣星東都先見逢萌得廣武重游阮籍醒最是故家
春草暗杜鵑啼殺忍同聽

夢騎驢

蹇驢雙耳卓東風前導青衣一小童石澗倒涵嵐氣白海霞
高貫日輪紅桃花芝草經行異鶴髮鷄皮語笑同却待朝天
驚夢失春醒無奈雨簾櫳

重游澱山

黿戴小蓬萊方諸宮影開崖根龍洞闢山脈虎丘來疎磬重
煙水殘碑半雨苔因之裏故國游鴈落清哀

古宮怨二首

萬年枝上月團團一色珠衣立露寒獨有君王遙認得扇開
雙尾簇紅鸞

誤報迎鑾出禁宮階前草是鴈來紅玉顏豈就秋枯落萬一
和親在選中

雜題四首

洄塘昨夜綠波增偶策交州鬼面藤一雨百花香洗盡流春
砑上立魚鷹

几杖琴尊共一丘燕歸巢近午香篝游絲不挂山人眼直趁
東風入別樓

水涼風攪一池荷睡眼醒來手自摩數席雲陰亂疎樾髻孫
驚報鶴羣過

藻池岸匝水仙開滿面香飄玉蝶梅遺事罷書山館寂鼠狼

行過雉鷄來

江邊竹枝詞八首

游鯉客山高刺雲天門山小舊稱君插江鵝鼻移沙脈愁殺
浪撞黃歇墳

亂石呀聲大小灣石中無玉作連環楚江風浪吳煙雨翠鎖
修眉八字山

社酒吹香新燕飛游人裙幄占灣磯如刀江鱗白盈尺不獨
河魴天下稀

南北兩江朝莫潮郎心不動妾心搖馬駝少箇天燈塔暗雨
烏風看作標

北望大江南望城席帽馬鞍並山名屏障橫儂是小山漁泊尸水

口風門過一生

石筏橫津蛟莫窺近山張弩或眠旗儂作神衫與神女祈水

祈風郎不知

巫子驚湍天下聞商人望拜小龍君
茹蘆草染榴紅紙好翦
凌波十幅裙

潮落蟆山連狗沙黃泥鞦浦趁江斜
阿儂十指年嬌小曾比
箇中春荻芽

狗叫沙在蔡港西北歲產荻茅予家
分佃頃半沙與蝦墓山鞦浦相連

朱家奴阮辭

淮陰三月花開枳使君苑作殊方鬼
眼看骨肉不敢收奉虜
稱奴聽頤指經遼涉海三歲久以蝗
爲糲麥爲酒爨骸齧骨
何足論親見徐山墮天狗今年始得
聞道歸城郭良是人民
非主家日給太倉粟殘生猶著使君
衣攬衣拭淚使君室涼
月蕭蕭風瑟瑟回頭還語玉雪孤
勿辭貧賤善保軀瞻屋未
辨雌雄烏

重過望亭新城二堡

丙申冬
張氏築

憶昔扁舟自西下二堡相望無一舍吳藩判樞翻覆兒窄衫
小弓矜騎射歸人重經但流水豆隴彎彎低復起長途遺庶
數十家三四酒旗風靡靡君不見邠公遷岐山衛人城楚丘
外患內修古所侔成同敗異嗟世

會別馬穎漁

別業歸來千里餘泰山傾蓋喜無如青衫不污新豐酒白髮
終乘下澤車地入東南空驛騎雪消齊魯足淮魚彼行此住
情俱得尚約鷄肥落木初

寄錢泰窩陳雲軒二遺叟

天轉雲東上六符有懷無寐枕同孤紫芝隱曲歌商皓烈火
殘經補漢儒私地春先梅老發盛陰雷疾草狂蘇祖生遲旦
疎殊甚不計中流少一壺

喜顏守仁教授畱園館信宿

前朝進士過林扃信宿論心爲竦聽雲氣夜蟠雄劒紫天光
寒入舊檀青不同嘉樹生南國猶夢鯢魚化北溟老我歸田
有龍具僅堪供卧讀牛經

同誼書記游查山畱題淨無餘西南林壑

地湧叢林小翠屏海吞孤嶂半螺青巖扉老衲忘人我石甃
神丹護甲丁吳甸土寒黃耳魄秦山草歇白蛇腥放歌適在
風埃表幢節浮空若下聽

辛酉雜題一作古裏二首

遺經姑置楚包茅新筆恭書蠱上爻利益崑溟珠象郡道湮
鄒魯鳳麟郊看雲杖名暮影齊中角滴露酒名春聲落枕凹自判

優游不堪事鵲鷗添室翠分巢

是歲征雲南元梁王自縊

槿籬莎徑入林堂春作無牽午漏長音歇野鷺新綠淺影浮
潭鯽小紅香誰家數應中和節十畝寒輕二月霜忍世貫緼袍

償酒債時人將謂獨醒狂

書西厦時洪武丙寅沿海築城

牀頭鴟卧久空金壁上
蝸行尚有琴孺子成名狂
阮籍霸才無主老陳琳
虹霓氣冠登萊市
蝙蝠羣飛顧陸林
環海煙沙翻萬畝
連村霜月抱孤衾

秋詞

香散天街靜玉珂
露臺風殿夜如何
星從河漢淡中落
秋在梧桐疎處多
鸞影不曾離寶鑑
蛛絲幾已綴金梭
君王蘭館詢遺事
却擬鸞車共載過

書無題後凡三首偶感燕太子丹事

火流南斗紫垣虛
芳草王孫思愴如
淮潦浸天魚有帛
塞庭連雪鴈無書
不同趙朔藏文祿
終異秦嬰袒素車
漆女中心漫於邑
杞民西望幾踟躕

塞空霜木抱狼雌草暗江南罷射麋秦地舊歸燕質子瀛封
曾昇宋孤兒愁邊返照窺牆榻夢裏驚塵喪韞觿莫識白翎

終曲語蛟龍雲雨發無時

元世祖聽彈白翎雀曰何其曲終有淒怨之聲乎

幾年薪膽泣孤嬰一夕南風馬角生似見流星離斗分謬傳

靈武直咸京九苞雛鳳冲霄翼三匝慈烏落月情縱少當時

趙雲將卧龍終始漢臣名

錢牧齋曰洪武七年遣元幼主之子買里八刺北歸此詩記其事故有舊歸質子及南風馬角之句太祖

封買里的八刺爲崇禮侯故曰瀛封曾昇宋孤兒也

茂庠卿邀費孟彩同知陪酌背孰堂旣同晚步口號

罷酒出前楹霜寒著面輕林腰煙帛束天角火鋒生卧木橋

通野疎簷水隔城寬袍曳筇竹俱老愧宵征

題泖塔時主僧賢如愚不在

何年宰堵聳奇觀勢若蛟龍上糾盤秦縣赭衣淪鬼國

泖係先秦因倦縣

梵家寶藏壓驚驚湍野瞻雨黑重燈夜天卧空青一鏡寒欲買

扁舟占漁戶老緣無力候衡官

甲子冬偶書

雲東亂定少新知江左書來有跋兒才盡罷爲文自祭醒狂
寧要畱相隨天家青女催衣急漏水金人上箭遲却喜故妻
原上樹十年羈羽託淡枝

乙丑秋書

腰痛非千米眊昏漸廢書靜知天運密老與堠程疎綠古黃
甘外紅鮮白小初兒歸共貧樂容易歲云除

園館雜書二首


竹樹藏山石作門魚缸水帶洗花痕鶯聲又在鷄聲外老不
勝官只住村

殊鄉春色不曾濃才力新兼病思慵一枕清風聞格磔半瓶

香雪漫蓰蓉

香雪
酒名





PL
2534
K8
122

雲顥天民葉顥



顥字景南金華人少壯有志事功未嘗干謁人罕知者
晚遭元季之亂結廬城山東隅名其地曰雲顥自號雲
顥天民既而移居山之西隅與雲顥相望不數里時得
以幅巾野服輕鞵瘦策從樵夫芻叟相往還其閒自序
所作詩以為薪桂老而雲山高寒音調古而巖谷絕響
故名之曰樵雲獨唱長孫雍編次成帙曾孫戶部尚書

淇重刻之廣東布政使安丘袁凱為之序云

錢牧齋列朝詩集所載葉樵雲

顥字伯愷洪武中登進士官行人司副免歸按集中說琳荆山人云大德庚子春
生我及此公以年計之當洪武戊申景南年六十有九矣其獨樂歌云屈指今年
七十五集中詩皆高曠之言絕無及仕宦者袁布政序云使先生後生數年際我朝
之明盛與一時後又並列庶職其事業必有可觀惜其不然而徒於言語文字間見
之其志不亦可哀矣乎袁序作於成化間不應有誤牧齋所云未知何所據也又
震澤編所載東山葉顥字伯昂嘗以鄉貢為和靖書院山長此則又一同名姓者耳

題松雲齋十五韻

青松如舞蛟白雲如游龍龍游化甘霖與世為年豐蛟舞散

清影利爪挈高穹二者無限奇盡入幽人宮幽人室懸磬隱
約松雲中松秀悅耳目雲生盪心胷讀書坐雲石鼓琴雜松
風無往不自得淡喜世慮空披雲採松花何啻食萬鍾萬鍾
食有盡松花味無窮松雲幸無恙天地同始終扶筇一相顧
摩雲撫孤松問松幾何年適與雲會同松靜了不言雲去尋
無蹤廻首萬峰頂但見山重重

三月望夕翫月

長空蟾吐魄良夜何團團皎如青銅鏡璨比白玉盤試浴海
波底飛上青楓端徘徊嵩岱間宇宙生清寒神光常不泯畱
作千載看

江南懷古

仗劒出西遊來
帝王州登高望故國感慨彈箏篴長歌四
五發雲物慘不收歌聲忽悲壯江漢不敢流
峩峩天目山王

氣今已休英主從北來長驅勢莫留浮雲捲旌旗天兵動戈
矛國破佳人死時危志士憂遂令歌舞地夜雨鳴松楸野殿
莓苔古荒城鳥鼠秋茫茫古帝魂千古不可求神飛故宮遠
月出西陵幽淒涼白雲鄉寂莫芳草洲我欲弔古蹟落日寒
颼颼無言一尊酒悲風起閑愁

讀書山月下

讀書山月下月色流巖扉松風吹毛髮草露沾裳衣研精掇
玄奧竭思窮幽微興亡空感慨今古誰是非孔孟幾千載斯
文愈光輝蚩蚩愚下士去此將安歸

舉酒春風前

舉酒春風前勿訝衰顏紅藉茲麴蘖媒成彼醞釀功頓使鐵
石腸化爲歡悅容喜色浮鬚眉和氣填心胷浩浩六合間廣
扇淳厚風兒女豈知此唯醉芳花叢

圍碁白日靜

圍碁白日靜舉袂清風吹神機衆未識妙著時出奇我老
天字內白雪凝鬚眉坐閱幾輪贏歷觀迭興衰古今豪傑輩謀
略正類碁局終一大笑驚起山雲飛

舞劒清夜闌

舞劒清夜闌孤燈耿中堂一舞空奸邪再舞摧豪強頻起爲
君舞月出雲飛揚氣衝牛斗暗影動蛟龍翔悲風轉蕭颯壯
志彌慨慷時哉不可逢石匣深韜藏

漁父曲

雨過暮雲收江空涼月出輕蓑獨釣翁一曲秋風笛宿鷺忽
驚飛點破煙波碧

東籬丙辰季秋作

曳杖東籬下層巒列環岫南山如有情青翠俯相就松桂二

老蒼煙霏乍無有孤雲屢出奇羣峰競呈秀圖彩寫晴嵐琴
音漱寒溜采采黃金英芳香滿衣袖

秋懷次童中州韻二首

長空好明月燦爛今夕晴萬里皆月色四顧無人聲徘徊下
青松照我茅屋明我望長歎息悠然萬感生取杯挹清光
和此松露傾嚙之清肺腑快我平生情

桂魄延秋景松廳生夕涼良宵兩相值蕭瑟流清光風聲驚
客鬢月影照我牀徊徨不成寐轉覺歲月長起坐問風月而
我誰老蒼風靜月不言耿耿天中央

疎齋晚步

睡足白雲窩行吟青草坡夕輝流月屐空翠溼煙蓑

遊三洞金盆諸峰絕句

錄三

徘徊三洞天拚作十日畱何當約安期共爲千載遊

大山巖而尊小山婉而秀往來兩山間巖霏溼吟袖
犬吠人家近鳥啼春晝晴澗草有幽色野花無定名

莫愁煙艇

莫愁江上艇月夜扣舷歌甚欲尋遺迹江空煙浪多

美許士謙選壯丁有法

烏臺憲史天下奇姓字久爲人所知風霜面目松柏操鐵石
腸肚冰玉肌羣兇肆虐干天誅潢池弄兵如小兒中原在處
皆反側擾攘豈獨東南垂寓兵於農古王制憲史於此力主
之羽書差兵以萬計頃刻而集敢後期厲兵秣馬在此舉指
日要斬蚩尤旗廓平天宇清海嶽獻俘受馘朝丹墀東州老
翁頭雪白拭目願見承平時南山有石踞如虎攜歸我欲鐫

公碑

辛丑歲軍亂後李元常賦詩傷感予次其韻

亂後依然舊城郭青山不老秋雲薄人民皆非可奈何歲月
無情隨逝波短世功名何暇論相逢存沒驚相問夜寒兒女
泣牛衣紫鳳天吳顛倒披訪舊驚心生百感兩脚如麻春不
煖祇多幽滯哭酸風何人背面啼春紅

登九龍山訪孝標遺迹月下飲酒

杖藜扶我登九龍輕鞵短袂隨天風九龍飛去幾千載雲閑
青老秋山空孝標先生骨應朽清名與山同始終荒煙衰草
迷古洞唯有皎皎栖青楓酒邊半醉弄明月月光忽落杯酒
中舉杯歡笑和月吸清光散入曾次照我突兀礧魄之孤衷
平生所蘊剛毅氣洞然明白無隱容信知古人嗜好不在酒
愛其果能助發英銳之志醞釀麴蘖之奇功興懷不盡下山
去明月又在天南東

金華尉趙德夫祈雨有感

陽烏赫赫明高穹火雲不雨天西東晴波渴飲千丈虹嘉穀
槁死生蟲蟲金華趙宰亦憫農陳辭涕泣呼天公食天之祿
因農功視農不救寧爲忠下人無罪天所容願爲斯責歸微
躬志誠直通龍伯宮須臾遣出雙玉龍利爪排空怒且雄阿
香推車海若從鞭雲駕雨隨天風下與世人爲年豐要令飢
旅顏回童少焉雲散天宇空神龍却歸潭水中廟閑山空鼓
鼕鼕

春雪

百花憔悴東風寒六花爛熳開正繁東君似欲誇富貴瓊臺
玉榭真珠闌綠楊無力晴拋絮青松不老雲生樹貪觀天女
跨鸞歸失却仙人騎鶴處斜斜整整復霏霏却憶銜枚入蔡
圍奇功未立英雄老壯志雖存氣力衰酒酣舞劍情難歇指
點銀瓶莫教竭醉中猶自憶當時鷺鴨城邊一池月

沙溪清隱

繞屋一灣水綠迎軒數朶峰青沙路鷗盟新定雲松鶴夢初醒

九日寄興

庚申歲

黃菊香殘夜雨烏紗醉落秋風回首十年舊事亂雲流水西東

月夜梅邊卽事

香裏寒雲滿溪月明津渡人迷夢入江南舊路夕陽流水橋西

示小兒阿真牡丹荼蘼春莫各一首

絳色羅裳綠色襦沈香亭北理腰肢含風笑日嬌無力恰似楊妃睡起時

一點檀心氣味長白人無語舞霓裳千紅萬紫消磨盡猶有

風吹不斷香

老紅新綠駐煙波無奈青皇促駕何又是一年春事了杜鵑聲裏夕陽多

晚步

偶隨芳草踏斜暉石徑雲深翠滴衣兩袖天風明月上杖頭挑得樹陰歸

次韻周安道憲史仲春雨窗書懷十首

錄三

茶鼎松濤翻細浪桃谿花雨湧香泉旋尋筍蕨春山下不枉江南二月天

中
愁悶無過酒消遣情懷正要詩燕子不來春又半一簾

海棠時

嬾鶯慵燕語衰紅羞綠怨溼難開晴窗悞聽山禽樂又是鳴鳩喚雨來

用前韻序山家幽寂之趣呈前人十首 錄三

夕陽香徑逐東風
疲策輕扶數落紅
信步偶隨流水去
不知身到白雲中

雲舒山色千峰秀
雨過蛙聲兩部鳴
多謝知心峰頂月
夜深長到寢牀明

一任猿驚野鶴猜
老懷笑口要頻開
高眠蕙帳春風暖
不怕雷聲入枕來

霜天曉角

耿耿星河曙欲流
角聲悲壯起層樓
滿江明月清霜重
人與梅花一樣愁

冬景十絕

李從道題澤詩社出題至治己未至己亥四十年矣 錄四

鷺立寒江

青苔白石魚鱗腥
盡日獨拳寒雨汀
疑是晴江沙上雪
黃昏

一點不分明

霜天曉角

城上征人吹角聲月寒霜重聲冥冥孤舟萬里南遷客起著
衣裳帶夢聽

江路梅香

漠漠江雲路不分小橋流水夕陽邨吟翁馬上頻回首一陣
東風暗斷魂

書舍寒燈

青燈黃卷伴更長花落銀釭午夜香異日長檠珠翠處苦心
寒燄莫相忘

丁酉仲冬卽景

錄二

雲巢鶴睡

煙梢淡處穩棲翎標格孤高迥出羣只恐聽琴驚夢醒踏翻

松頂一巢雲

月嶺猿啼

樹頭清嘯兩三聲
紙帳梅花睡欲成
喚醒冷泉亭上夢
嶺雲飛動月初明

故圃梅花

身世水雲鄉
冰肌玉色裳
靈均千載恨
和靖一生忙
南國遺高躅
東風遞暗香
久同松柏操
有學杏桃妝
冷淡孤山月
高寒半夜霜
鶴猿常款狎
蜂蝶任猖狂

送應空谷上人遊吳尋師二首
僕於湖山泉石有疇

昔之好末章故及之

錄一

落日南朝寺
吟筇幾度登
欲尋前日路
去訪昔年僧
浙水生新浪
吳雲暗舊燈
阿師如到彼
爲謝嶺南能

題應上人淨溪精舍

一室纖塵絕爐煙貝葉經每呼明月至常遣白雲局竹色侵
虛幌荷香襲小亭晚來開瓦牖放入數峰青

感懷

天步艱難日人情向背秋慚無醫世術喜免抱官囚發憤尋
青史消愁數白鷗草廬諸葛輩幸出爲時謀

午窗睡起偶吟閑花落硯池小兒士廉率爾應聲曰
香絮粘碁局遂足成一律

睡醒碧窗虛無人松影移庭空晴晝永徑靜夕陽遲香絮粘
碁局閑花落硯池
煙樹鳥飛過白雲枝

己酉新正

天地風霜盡乾坤氣象和曆添新歲月春滿舊山河梅柳芳
容穉松篁老態多屠蘇成醉飲歡笑白雲窩

七月望夕予曳杖步月直造峰頂高吟朗咏劃然長

嘯興盡而返明日山下居人咸言聞清嘯驚醒塵夢者數十家予因賦詩以紀其事云

藜杖策風輕芒屨步月明鶴翻青徑影猿度翠巖聲苔露沾衣冷松泉漱石清崇岡發長嘯塵世夢驚醒

採蓮歌

越女淞江頭煙波萬頃愁往來荷葉浦蕩漾木蘭舟鳥闊香雲冷江空明月秋清謳三四曲聲斷白蘋洲

春晴

曉洞雲歸溼春山草木新天桃含宿雨嫩柳裊輕塵蝶翅寒尤怯蜂衙晚漸陳香風簇羅綺已有踏青人

日莫江邨雜興

釣艇已收緡無人滾閉門雲生沙上石月出水南邨寂莫寒潮遠微茫煙浪昏孤舟中夜笛感慨動吟魂

山莊卽事

策杖步松關，銜杯看遠山。
青鞵陪月去，翠袖裏雲還。
芳草斜陽外，落花流水閒。
山林多樂意，無夢到塵寰。

江邨晚景

野水溪橋外，荒邨八九家。
雨晴漁網曬，風定酒旗斜。
紅樹霜江葉，黃蘆月岸花。
何當從此隱，重整釣雲槎。

春遊晚歸

小雨雜煙霏，晴光弄夕暉。
薦紅侵酒罈，空翠潤琴徽。
風襲吟翁帽，雲香野客衣。
殷勤花徑月，寒影照人歸。

次韻賈逢源見寄

短髮凋秋鬢，天風快晚晴。
閑唯欣有味，老不歎無成。
白石和雲煮，青山帶月耕。
無心少年事，慷慨樂從征。

重九後菊

癡蜨狂蜂未用疑從來根性嬾趨時情知不少爭先輩故遣
遲開殿後枝斜日園林方冷淡西風天地特清奇芳苞小蘂
秋香老不是淵明斷不知

題幽居

隔谿春色雨三花近水樓臺四五家濁酒不妨畱客醉好山
長是被雲遮松根淨埽彈琴石桺下常維釣月槎路狹不容
車馬到只騎黃犢訪煙霞

乙未八月二十二夜夢宿山寺與僧講道論詩不覺
夜分僧賦一聯云鶴向白雲棲處宿僧從青嶂影邊
歸覺而微改其句足成一律云

天風吹夢過招提瘦策迢迢扣夕扉鶴揀白雲枝上宿僧從
青嶂月邊歸杉松韻古調清樂苔蘚痕深染弊衣多謝山靈
能念舊此心焉敢忘煙扉

二月江城見梅二首

二月江城第一枝怕寒故故著花遲不嫌豔杏天桃俗甘受
狂蜂妒蝶疑月落西湖驚舊夢雪消南國憶當時樓頭亦有
霜天角嬾對春風煖日吹

桃杏紛紛正得時疎梅高潔合知幾如何萬卉嬌春日猶有
孤芳駐夕暉未要板橋尋蠟屐最宜沙路試羅衣輕鞦小扇
孤山下絕勝逋仙踏雪歸

懷湖山隱者

并序

湖山隱者不知何許人往來湖山閒茅衣草履竹策紗
巾問其姓名則笑而不答蹤跡似詭異而辭情慷慨神
思清遠未易量者寡結交少許可性不喜譽人而亦不
沽譽於人也嘗與人談論古今斟酌時事一言不相合
引而去之不復回顧近不知所之云

湖海無求放逸人不將清夢出丘林
喜吹異代秋風笛解鼓空山夜月琴
驚歎時危如有意貪眠雲煖又無心
邇來蹤跡難尋覓高卧岑巒萬疊淡

次槎字韻述懷

形容枯似飽霜槎身老空山處士家
一徑梅香雲滿地半窗花影月籠紗
常穿謝氏登山屐慣設孫郎餉客瓜
離亂固非疇昔比池塘難得爲官蛙

喜余仲揚陪樞掾俞公芳催兵海道歲晚遠歸

羽檄催軍歲晚歸海南消息定何如
腰邊雖少封侯印囊底應多盪寇書
越水閩山牽舊夢蠻煙瘴雨襲輕車
短衣匹馬男兒事莫戀丘園月下鋤

至正戊戌九日感懷賦十律見意云

吳楓初冷水痕收塞鴈南飛渡遠洲
歲月無情天地老江山

不盡古今愁黃花謾引杯中物白髮空驚鏡裏秋却笑桓溫清讌後終然無夢到神州

謾多離思繞東籬舉目江山異昔時落日邊城悲鼓角西風天地動旌旗荒邨亂後愁無酒野老曾中喜有詩風景不同人事別菊花何必上寒枝

門掩東籬處士家每逢佳節惜年華黃花有恨驚秋老白髮無情對日斜杜牧仙遊詩寡和王弘人去酒須賒烏紗醉裏西風冷千古令人憶孟嘉

誰復攜壺上翠微干戈爛熳酒尊稀西風細雨黃花瘦衰草荒煙白鴈飛落日有時懷故國舊居無主鎖空扉龍山回首尤非昔長使英雄淚滿衣

晚對南山飲濁醪少舒幽憤醉醺醺雲邊黃菊紉芳珮世上紅塵襲弊袍陶令官閑身尚健孟嘉帽落趣殊高登臨我亦

秋風客虛負人呼一世豪

雲鎖當年落帽臺滿山黃菊爲誰開久無異士高人識長有
狂蜂妒蝶猜斜日東籬增感慨西風南國正塵埃如何得似
承平舊與客攜壺共酒杯

慵整東籬貫酒餅白衣望斷夕陽亭征鴻北渡煙塵冷戰馬
南嘶草木腥嫩菊半開香未老奇峰相對眼終青何當得與
淵明約共醉秋風不願醒

風急登高野客傷悲笳聲裏過重陽正須擊劒論孤憤何暇
攜壺舉一觴白骨不埋新戰恨黃花空發舊枝香寒煙冷日
東籬下西望柴桑路更長

悠悠江影鴈南飛黃菊飄香蝶滿枝斜日西風彭澤酒殊方
異國杜陵詩煙巒慘澹山林暮霜葉蕭疎草木悲醉後不思
時節異半欹烏帽任風吹

四言詩
滿城風雨晚淒淒
城北城南盡戰車
無藥可能醫世亂
有錢常欲買山居
牀頭小瓮開新釀
屋底明窗讀故書
園菊豈知吾輩意
清香惟解繞茅廬

元宵雪感懷次韻

金帳羊羔酒裏仙
醉觀皓鶴下瑤天
寒英忽舞顛狂絮
香燄俄開爛熳蓮
閭苑有花春未老
芳城不夜月空圓
茅齋僵卧袁夫子
也翫鰲山嬾去眠

乙巳正月十二日雪中感懷

梅李爭妍冷更榮
楊花飛絮溼尤輕
雪梢香凍鴛聲澀
月樹光寒蜨影清
兒女祇貪金帳樂
英雄空老玉關情
自憐衰朽心猶壯
夢裏麾兵入蔡城

曲江老人錢惟善

惟善字思復錢塘人領至正辛巳鄉薦官至副提舉張氏據吳退隱吳江之筒川又移居華亭明洪武初卒思復長於毛氏詩學強記而多才鄉試時以羅剎江賦命題鎖院三千人不知羅剎江之爲曲江也思復引枚乘七發爲據其首句云惟羅剎之巨江今實發源於太末大爲主司所稱由是知名號曲江居士又自號心白道人所著江月松風集陳衆仲爲之序謂當壯盛之年未嘗有紛華之悅觀其爲詩妥適清雋娓娓乎有唐人之流風焉思復與楊廉夫倡和有句云笠澤水寒魚尾赤洞庭霜落樹頭紅又云漢史丁公那及齒陶詩甲子不書元蓋有感而言之也

錢思復江月松風集十二卷焦澹園經籍志不載錢牧齋列朝詩集錄思復詩九首得之賴良

大雅集所載者而已練川陸子垂家藏思復手書詩集後歸於秀州曹倦圃友人金亦陶鈔得之合之甫里許氏所藏與陸氏原本無異倦圃云余家藏元人真蹟有思

復詩乃知江月松風集尚多遺佚思復以書名卷明流傳人間者隨見當補入也

對月酌酒

對月不飲酒何以陶吾生明輝散空白照我千載情泠然輒忘寐但覺風露清寒蛩雜羣籟天地皆秋聲流光不可駐長江終夜鳴酒盡月欲墮浩歌倚曾城

送酸齋學士之西川

薊北文章客風流迴不羣潮聲秋別夢月色夜畱君三峽吞秦樹千峰抹楚雲形骸捐水石來往更殷勤

靈璧手印篇

并序

漢以江都王女細君嫁烏孫王女過靈璧嘗扶以石後人鐫石爲模腕節分明故述其事而爲之辭

漢香飛入烏孫國踰白龍堆行絕域萬里窮愁天一方曾駐鳴鑣倚靈璧靈璧亭亭立空雪石痕不爛黥脂節神飈吹影

高撩秋提雲欲補中原月穹廬作室牆以旂珮環魂託胡歌
傳當時雙淚灑成血血成碧色苔花堅青塚相望去不歸歸
時定化黃鵠飛千年恨隔瓊城夢漢使者過空沾衣

王氏節婦詩

并序

丙子歲天台王氏妻爲兵所掠至嵎縣青楓嶺嚙指題
五十六字石上投嶧江而死迄今血書宛然泰定初邑
徐丞始上其事請立廟旌之晉張仲舉首倡作詩一章
邀好事者同賦又聞丙子間襄陽賈尚書兒婦韓魏公
五世孫也岳州破被虜之明日以衣帛嚙指書長詩渡
江中流自溺而死其詩多有可稱者有江南無謝安塞
北有王猛之句士大夫咸膾炙之因感其節同其事類
故并及之云

昔年襄陽賈尚書兒嬾韓氏身葬魚當以血濺雲錦襦至今

波蕩青瓊琚，嚙指堂堂丈夫氣。乃見蒼茫甲兵際，倚舷不忍
渡中流。翻然直向龍宮逝，嗟嗟赤城王氏妻。青楓嶺滑愁雲
低，嶂江水黑幽魂啼。峭壁萬仞無由梯，望夫不來歸路迷。石
痕雨碧風淒淒，君臣失國時所偶。兒女喪家我何有，丹精貫
日昭不朽。朝廷立廟嶂江口，荆揚孰謂風俗媮。嗚呼貞節無
與儔，二女允也忠義流。他年太史須編收。

八月十五夜風雨後見月有懷

天柱峰高月華碧，自古人間風雨隔。飄然欲撥蟾窟游，萬里
陰霾妒良夕。玄雲忽開黃道明，顧兔涵秋抱冰魄。嫦娥偷藥
長少年，桂子薌霏羽衣溼。飛仙挾我凌太清，萬丈寒光湛虛
白。美人不來空夜涼，白紵歌闌露花積。

送曹克明員外之湖廣省

錢唐西望武昌城，天際飛艎幾日程。三峽波濤下江漢，九疑

雲霧接巫衡笑談落落蕭曹佐登覽蒼蒼屈宋情更把文風
變丹雘不須銅柱紀南征

題杜甫麻鞋見天子圖

四郊多壘未還鄉又別潼關謁鳳翔九廟君臣同避難十年
弟妹各殊方中興百戰洗兵甲萬里一身愁虎狼寂莫當時
窮獨叟按圖懷古恨茫茫

故宮春望次平禹成韻

登臨休賦黍離章千里江流接大荒劒鎖血華空楚舞鏡埋
香骨失秦妝薜蘿山鬼啼螢苑荆棘銅駝卧鹿場寂莫萬年
枝上月夜淡猶照舊宮牆

早發葑門得風直抵阜林泊

白龍廟前風浪生扁舟初離闔閭城嬋娟霜月鴈千里顛倒
衣裳雞五更櫓咎漁歌江入夢帆迎野色樹移程葦閒何限

秋蕭瑟愁絕胡笳出塞聲

述懷

倦游湖海十年餘人物如雲想國初貞觀名臣重房杜建安
才子數應徐聞雞起舞關河壯射虎歸來事業疎便欲巢松
尋五老短檠依舊滿牀書

宮詞二首和符安理鎮撫韻

放生池上月沈鉤掖樹如雲易得秋鐘動景陽梳洗早轆轤
聲轉井幹樓

夢驚鴛瓦落宮牆殿鎖長秋怨夜涼教授後庭今白髮舊時
博士漢披香

懷陳子敬王子仁

倦游年少滯江南憂患驚心百不堪韶海有人遺白葛洞庭
無客寄黃甘涼風拂袵聽喉轉夜雨移鐙覆手談寂莫歲寒

梅共我月明索笑碧雲檐

洛陽陌

驅車洛陽陌周道何逶遲玉帛走侯甸金湯固城池潘令好
桃李阮生多路岐銅駝卧荆棘索靖獨先知

長安道

車馬如流水樓臺結彩虹王孫來戚里豪士遇扶風不覩衣
冠盛空聞意氣雄鳶肩亦何事日莫醉新豐

關山月

落落漢時月蕭蕭古戰場揚輝子卿節逐影細君裝高映玉
關外低沈青海傍不似閨中夜祇照繡鴛鴦

折楊柳

何處好楊柳攀條贈遠行花飛渡江水客醉蹋歌聲秋色彫
榆塞春陰接鳳城一枝不敢折爲近亞夫營

湘淚竹管

黃陵廟前捐珮玦龍影搖文織湘血翠帷塵滴不乾雲湘水
無聲楚魂咽蠻娘弄作吳娥吟五音嘹亮生枯節一聲直向
天上聞手挾飛仙挽秋月嗚嗚似向煙中語十二螺鬟排律
呂黃鶴樓空人不還斷腸聲裏招神女

早起

披衣起危坐心清聞曉鐘流光入窗白月澹西南峰游魚躍
風藻幽禽翻水松青山如膏沐遠樹煙爲容舟人與漁子菰
蒲淡處逢

保叔塔

金刹天開畫鐵檐風語鈴野雲秋共白江樹晚逾青鑿屋巖
藏雨黏崖石墜星下看湖上客歌吹正沈冥

送著作兼善赴奎章典籤

龍飛天子中興年使者弓旌集俊賢
閭闔早朝班玉筍瀛洲夜直賜金蓮
五經同異須劉向三絕才名數鄭虔
黼黻當時遺老在長歌黃鵠送樓船

題金明池圖

金明池涌橐駝虹駕幸瓊林
歲歲同貔虎羽儀陳鹵簿魚龍
角觝戲珠宮樂游臺殿今成沼
習戰旌旗昔蔽空寂莫畫圖傳
後鑒六飛回首塞塵紅

悼西山猿

光祿敲松喚不還
黑衣何處落潺湲
慣曾索果西湖上
無復號弓楚峽間
挂月影沈千尺樹
嘯雲聲斷萬重山
羈雌寂莫成孤怨
更約他生獻玉環

題廣微天師昇龍圖

噓氣乘雲薄太清
墨卿靈怪硯池腥
波濤光彩失雙劍
風雨

晦冥驅六丁朱火騰空超碧落翠鱗垂水捲滄溟真人上挾
飛仙去安得攀髯過洞庭

春游曲和傅子通韻

蛾眉曉壓黛雲冷蟻波淥泛秋蛇影千金難買能賦人轆轤
聲沈舊宮井青絲不梳慵蚤起十二螺鬟翠相倚鸚鵡解言
天上愁紅雨香漂御溝水羲車急急催飛光杯中淺淡愁短
長東鄰誰唱斷腸曲游絲落絮春茫茫

劉時中待制見和定山十詠作詩以謝

玉堂學士來湘中笑攬衡霍吞雲夢西瞻峨眉呼太白南望
蒼梧登祝融射魚昔號玄真子樵青隨處攜詩筒扁舟匹馬
萬里外曾渡瀛海過崆峒識荆再拜二十載棄繻誰復憐終
童辭官錢唐聽江雨願言擊壤歌元豐定山品題自靈屹
然當道江爭雄雲泉靈洞自奇絕燒丹嘗聞畱葛洪浮山下

鎖蛟龍窟百川砥柱爲之東五雲高標太古雪月輪直上清
虛宮招提翬飛翥龍鳳漁子暝宿蘆花風是間勝槩難指數
作者往往皆名公山靈昨夜見我夢喜得珠玉傳無窮杖屨
何時此幽討潤色舊觀重發幪問公前身竟誰是香山居士
東坡翁

江聲得五字

小海歌闌渺平楚中流日莫猶鳴櫓怪疑鐵笛和龍吟清應
冰絃出魚舞響入蘆花暗長潮寒吞樹影晴飛雨遡源欲聽
巫峽秋夢繞蛾眉月三五

奉和太常博士柳公浦陽十詠詩

錄四

龍峰孤塔

歸然特立梵王宮梯級惟容鳥道通翠壁雲綃紅劫火鐵檐
鈴雨落秋風高標插漢蒼龍左倒影橫江白鶴東何日捫蘿

四百廿二
元言選
尋勝迹不愁千里目難窮

南江夕照

目盡江南送夕陽空明直下接魚梁千重雲岫連平遠五色
霜林映渺茫孤鶩倒飛天上下長虹高卧水中央白雲紅稻
多秋思付與詩翁了醉鄉

東嶺秋陰

青山失色暗丹楓廣野平林杳靄中半嶺無雲時慘淡尺天
不雨亦空濛冥冥南向藏玄豹漠漠東開見白鴻高處夕佳
難攬結埽除陰翳待雄風

昭靈仙迹

肌膚冰雪藐神人此地昭靈迹未陳華表鶴歸終解語鼎湖
龍起復攀鱗雨香寶穡瓊田曉露冷琪花碧澗春仙馭時隨
青鳥去定陪崑圃宴羣真

述懷寄光遠并簡城南諸友二首

野人無事久忘機
有信紛華有是非
花信欲闌鶯百轉
麥芒初長雉雙飛
書中歲月仍爲客
枕上江山屢夢歸
時復思君倚淡樹
不知殘雨溼春衣

青青草色接平蕪
翠涌千峰入座隅
戴勝晨呼採桑女
於菟夜警牧豬奴
羽觴洛水聞修禊
單袷溫泉想舞雩
欲泛蘭舟過春渚
一樓煙雨似西湖

書懷

春夢渾難記年光
不可畱絮輕隨野馬
黠熟醉林鳩綠樹淡
藏徑青山直上樓
功名等閑事一笑拂
吳鉤

送李德夫福建運司書吏

吳柳初黃越樹丹
照人秋色送征鞍
雲隨親舍回揚子
山引郵城入候官
萬石鹽饒輸海賦
兩潮魚上助盤餐
武夷我有

南游約欲借扶搖駕羽翰

與默齋先生聯句成口號

官柳新晴啼乳鴉外甥昨夜喜還家
河魴江鱗都供酌獨奈春寒惱杏花

粉團花下夜飲

萬花碎翦玉團團晴雪飛香夜不寒
恰似玉人相對立酒尊移月近前看

九月晦日張機仲同宿明慶亭會堂上人房是夜讀
羅昭諫詩

寶坊金碧近閭閻閣道沈沈警夜嚴
萬石華鯉驚海獸四檐鐵鳳語蜚廉
傷時我豈同昭諫覓句師能及道潛
一榻茶煙清夢熟因思松瀑灑冰簾

元宵偶作

彈壓城池夜屬橐放鐙那復事奢豪水晶宮裏香風細曾見
神山駕六鼇

正月十六日遊湖上

東風杖屨偶相從試傍新隄覓舊蹤花竹園池通一徑金銀
樓閣倚千峰林煙日午青先暝湖水天寒綠未濃賣酒壚頭
人似玉抱琴時復醉臨邛

張園雜賦二首

清夜無眠壘鼓催竹梢垂露點蒼苔滿池月色如霜白一片
鼃聲似雨來

螢火隨風撩亂飛樹頭殘雨滴人衣無端疎竹偏宜月寒碧
蕭蕭光入扉

送李可度

暫駕仙舟絕海濤未應歸夢又金鼇漢家長者爲延尉江左

四百十四
元言送
參軍辟掾曹十月蛟鼉淮浪靜九天鷹隼朔雲高匡時有用
須公等莫遣吳霜點鬢毛

送陳衆仲之官翰林應奉

畫鷁齊飛發棹謳泛江幾日過揚州曉雲最白梅花驛春雨
初香杜若洲一代文章關氣運十年館閣擅風流綠波草色
連天遠不是尋常送別愁

和季文山齋早春二首

方壺元不離人間倚遍東風十二闌煙雨樓臺春似畫水雲
窗戶晝生寒遙知洗鼎煎茶待定許敲門借竹看醉後石橋
花爛熳翠禽啁哢在檐端

落梅風細小窗寒石上餘香點點斑不惜壺觴千日醉只愁
庭館一春閑澗雲生白元非雨江樹排青更有山攜取畫圖
溪上去鶴聲應到夢魂間

題子昂疎竹遠山圖

玉立湘江闊東風不自持巫山何處是春雨埽蛾眉

晚雨過白塔

宋宮傳是唐朝寺白塔崔嵬寢殿前夏雨染成千樹綠
莫嵐散作一江煙蒼苔門外銅鋪暗細柳營中畫角傳
寂莫葫蘆宮井畔野人拾得舊金鈿

送王舉之入京就簡樵谷

短衣匹馬佩吳鉤欲寫關河萬古愁射鴈秋風高紫塞
聽鷺春
春色滿皇州黃塵驛路三千里白玉京城十二樓無酒
送君懷抱惡過江爲覓故人舟

題魯彥康所藏范寬山水手軸

看雲終日坐蒼苔溪上千峰紫翠堆種竹人家臨水住
抱琴客子過橋來欲書盤谷先生序更把潯陽處士杯
他日卜居

能似畫草堂題作小蓬萊

寄呂彥孚

覓句隱烏几談經坐虎皮乾坤秋已半風雨夜何其聚散偏
相憶窮愁不自悲但令交有道莫惜鬢成絲

至元六年庚辰十又二月庚辰朔己亥大雨雪戊申
復雨雪至七年辛巳正月朔旦己酉雨雪大作癸丑

甲寅復大雪因賦詩以記

城郭雪深三四尺窮谷大川那可量虎狼憑威肆貪虐雀鳥
凍死何哀傷海中三山失顏色堯時十日無晶光梅花相看
夜忘寐門外不知迴野航

極目亭

南望富春渚雲山縱復橫野陰低驛樹秋色帶州城千古共
登覽一江空戰爭海門遙見白應是晚潮生

雨後登吳山過城隍廟眺望

偶向吳山高處望，淒涼猶自覺繁華。
百年香火祠神宇，二月笙歌賣酒家。
渺渺風帆來海島，冥冥江樹接煙沙。
倚闌貪看西湖上，古木荒城日又斜。

漁邨意

丙穴魚來江盡頭，玄真卜築更深幽。
對門燈火三家市，何處煙波萬里舟。
明月竹枝揚子夜，西風木葉洞庭秋。
棹歌一曲閑來往，指點儂家鸚鵡洲。

一峰晴雪

石名

醉倚崔嵬夢剡溪，覺來翻訝衆峰低。
孤標想見天山北，萬里飛來蜀國西。
每怪珠光含霽月，不知玉氣吞晴霓。
風流欲喚坡仙起，雪浪齋中共品題。

題馬遠畫商山四皓圖

已剖巴陵橘猶歌商嶺芝避秦非避漢一出繫安危

題宋徽宗畫狸奴銜魚圖

徽廟宸翰世已無銜魚隨意寫狸奴鸞輿北狩知何處惆悵
春風看畫圖

送賈元英之照潭

照潭遙望九華山弓馬蕭蕭日莫還夢裏無題惟寄內曾中
有策欲平蠻落花閉戶眠黃犬明月開籠放白鷗絳灌何曾
輕賈誼早隨鸛鷺入朝班

西湖竹枝詞四首

貧家教妾自當壚馬上郎君不敢呼折得荷花待誰贈葉間
紅淚滴成珠

春日高樓聞竹枝梨花如雪柳如絲珠簾不被東風捲只有
空梁燕子知

日莫天寒野水濱孤山愁絕四無鄰誰家處子如冰雪行傍梅花不見人

阿姨住近段家橋山妒蛾眉柳妒腰東山井頭黑雲起早廻

家去怕風潮

西湖志餘稱思復以羅刹江賦得名常作西湖竹枝詞十首有云阿姨住近段家橋瞿元範戲之云此段家橋創見却與羅刹江不同也

瞿宗吉嘗盡和之云昨夜相逢第一橋自將羅帶繫郎腰願郎得似長江水日日如期兩度潮又云裏湖外湖波渺茫兩岸人家多種桑採桑不怕霧露溼惟願朝朝逢著郎大爲思復獎許

篆冢歌

并序

雲間善篆以所書瘞之細林山中題曰篆冢爰來徵詩

遂賦長句以寄

雲間者朱芾孟辯也又見董佐才詩

包羲卦畫龜龍出頡脩造書鬼夜泣俯觀鳥獸迹號迹依類象形文字立以迄五代咸東封改易殊體靡有同周官保氏教國子六書大義開羣蒙太史籀文古少異小篆從省由秦始倉頡爰歷博學篇三家著述初傳世秦燔經籍獄訟熾乃

當隸書趨約易古文雖絕漢章行尉律學童仍課試東閣祭
酒太岳孫夙嘗受業賈氏門憫悼俗圖昧所向博采籀占加
討論揭示上下明指事轉注假借形聲意立一爲端亥畢終
分別部居不雜廁互千萬古知字原昭若列星麗躔次中興
斯學曰陽冰入室操戈何背戾二徐訓釋浩江河仲也祛妄
言不頗

徐楚金著祛妄
辨李陽冰之誤

吳興張有爾傑出復古正俗訂舛訛布衣

道士錢道住玩世端如郭忠恕三十六舉僅成篇蟬蛻遺蹤
不知處席中如帶惡安西鼓皮離禹良可吁漢家去古尚未
遠成皋印文猶重摹雲間苦嗜古手校科蟲辨魚魯明窗淨
几風日佳臨模一掃千番楮商彝周鼓真吾師螭匾沈著沙
畫錐鸞迴鳳翥龍夭矯長戈短劒相交馳書草日積充棟櫓
保愛何啻璧與珪細林山中一抔土緇笈緘滕重閉之於乎
楔帖藏玉匣終致溫韜舉茱萸亦恐虹光夜燭天定有竊開

窺筆法豕頭草鳴寒蛩薶文瘞筆同高風後三千年見白日
好事應營馬鬣封

清逸齋

神仙官府曾爲吏一日乘風卽掉頭太白豈惟凌鮑謝元卿
只合友羊求門前種樹雲連屋湖上聽潮月滿樓遙憶五經
名隱地峩睂高聳蜀天秋

杏花

等鶯期燕引遊蜂知隔垂楊第幾重壇近緇帷忘畫永宮催
羯鼓助春濃絳煙輕潤香鬚衰紅雪乾團粉淚鎔寂莫曲江
人不見貞元朝士憶時雍

送魏好義尹分水賦十六瀨

東來衆水發新安歷歷桐川第二灘萬壘冷雲藏亂石一江
春雨落驚湍青山隔樹連漁浦白鳥迎潮入釣壇地占客星

高隱處時飛鳬舄上巖端

次陳君瑞遊鳳凰山光明寺

左瞻劒戟龍門竝上脫冠巾
鳳髻雙齋近木魚鳴晝廡行遲
松鼠落晴窗雲淡不覺山藏寺
溪漲應隨雨到江未識此中
真樂地三生先喜俗緣降

偶成

苔花洗春雨藉此聽潺湲終日無客至
滿樓都是山

和王仁仲見寄

齒髮已如許江湖何所之忽收前月信
未和去年詩至寶懷
雙髻新愁理亂絲爲親能捧檄此意獨余知

華布衣幼武

幼武字彥清號栖碧無錫州人家素饒財少孤奉母名聲藉甚諸公間人有援之仕者力辭不就明洪武乙卯卒年六十九京口陳子貞戲題其藁曰黃楊謂其愛詩甚篤而奪于多事未肆然爲之如黃楊之厄閏而不長也今觀其集中所載云只尺黃楊樹婆娑枝榦重葉深團翡翠根古踞虬龍歲歷風霜久時霑雨露濃未應逢閏厄堅質比寒松則其所以取名之意或別有在歟

送族姪擴之通州

吾族最全盛家聲詩禮傳自遭喪亂後誰能事陳編猶子苦好學鄉閭稱獨賢文采珊瑚枝照映棠棣篇時同竹林會嘯咏相周旋一朝攜酒至別我荒城邊問渠欲何之言將適通川通川渺何許遠在滄海壖府侯朱夫子招我開講筵老懷

極慰喜汝去毋畱連吹墟千里外感激故人憐修程盡努力
慎勿中道捐蛟龍起春雷鵬鶚搏秋天物遇各有時立功須
盛年此行非草草著鞭空爾先要登青雲路忠義尚勉旃舟
發梁溪水帆拂狼山煙骨肉重相思兩地心懸懸長江浩無
波擊楫秋風前行當賦清句懷此山中泉

次元翬見寄韻

通衢一傾蓋分首猶惜別況是忘年交離緒那可說蟬鳴野
外秋鴈叫沙頭月永保松柏姿同盟歲寒節

鴈南飛

至正十年秋
懷遠人作

鴈南飛飛不住莫莫朝朝不穩棲飛向水窮山盡處水窮山
盡天南頭年來有客離家愁天空無雲明月夜千里萬里清
光流家園零落秋風遍人間鴈聲淚如綫鴈兮鴈兮可奈何
稻梁多處多網羅

編籬曲

編竹籬密密編朝禦雞犬入莫防豺虎穿交加編聯互相倚
竹密藤纏堅莫比春風披拂百花開一片繁華如錦綺君不
見西家有籬編不密夜夜驚呼防盜賊願言兄弟莫相疑明
日齊心編竹籬

義兵行

風蕭蕭雨淒淒義兵起程行路迷腰刀手槍耀光輝青衫白
帽行隊齊問渠遠行將何之官司召募征江西妻兒父母夾
道號我今與汝生別離生別離不得已在家出征同一死麥
禾滿田穗將結皇天淫雨無時歇去年秋旱號飢寒今年夏
麥不得餐幸逢此地無爭戰供給軍需民力乾生爲浙西農
死爲江西卒回首語妻兒何處收吾骨率土皆王民安敢辭
苦役但愧扶犁手疇能用矛戟願得將相俱賢才埽除盜賊

無纖埃義兵歸來舊田里賣刀買牛復生理

養竹軒歌爲周莊吳達子道賦

高軒公子良不俗不種奇花種修竹奇花照眼一時紅修竹
虛心萬年綠春雷擊地新筍生龍角森森那忍觸自鉏暖土
厚栽培手挈銀鉶細澆沃淡根埽除螻蟻窟香葉終期鳳凰
宿日使霑濡雨露恩歲寒豈憚冰霜酷猗猗繞戶矗琅玕含
霧連煙比淇澳招搖皓月金瑣碎勾引清風聲夏玉炎天展
簟臥蒼雪春日聽鶯泛醺醪可能一日暫相忘坐對此君看
不足君不見白樂天重言養竹比養賢又不見東坡詩無竹
士俗不可醫君今有竹善培養會看直拂青雲上

茶蘼歌

丹葩醉染猩猩血素萼便娟比霜雪呈妖逞豔豈足貴含芳
嗜潔誇清絕茶蘼飽浥春雨膏玲瓏翦刻英瓊瑶千金腦麝

和淑質萬箇玉蝶縈柔條坐看明月花梢上
便應題作清虛牘醉眠花底不須歸
狼籍苔茵空撫掌先生愛花何太濃對
花一飲揮千鍾昔逢端伯稱韻友我欲
結好慚衰容莫教搖落西風後賈島畱
題傳不朽憐君爲作茶蘼歌多情又釀
醪酒

風棚

百尺虛結構松風起四簷遂令秋滿屋
何用晝垂簾蔽日雲常在當窻雨不霑
翛然無限意叢竹淨相兼

清坐

驅馳欣暫息清坐感餘春細雨偏宜草
疎簾不隔塵山禽時引子庭鶴晚隨人
幾負林泉約空嗟頭上巾

客樓夜雨

城郭易爲熱江雲起不難電光生夜白
雨氣入樓寒書葉仍

防潤鐙花不耐看，祇緣聽亦慣。竟夕睡偏安。

宿蠡口

春風吹短櫂，迤邐望歸程。刁斗溪邊戍，旌旗野外營。市橋人

迹少，官路馬蹏輕。

一作平

欲向

一作過

東湖去

一作宿

邊烽永夜明

一作止夜行

久雨

江雨灑還稀，江雲溼更低。不愁吳水闊，惟恨楚山迷。野鶴思高舉，林鳥慕穩棲。漸看晴景好，可得溷塗泥。

宿隱微山房

二月蘭舟泊上宮，春雲不雨玉壇空。苔生白石斑斑綠，魚養丹池箇箇紅。對酒燭分花底夜，出簾香散竹間風。高寒未覺仙臺遠，只比相逢似夢中。

遊碧浪湖簡同行沈高士

浮玉山邊晚繫舟，菰蔣蕭瑟似新秋。碧天萬里寫銀漢，明月

一輪當柁樓每媿塵勞成白首喜從仙御作清遊酒杯未落
南風起又挂歸帆托順流

次楊文昭見寄韻

一別故人知幾時相思每誦隔年題兵戈滿眼愁無那風雨
連牀夢轉迷遙矚層城堅鐵石俯憐荒野困塗泥興來每欲
操舟去竚待西邨罷鼓鞀

斑竹簾

湘妃淚灑碧琅玕翦織疎簾拭未乾細縷引風空隔暑溼痕
含雨欲生寒鐙前照耀琉璃潔月下爛斑玳瑁看直榦盡輸
兵革用高堂舒卷莫摧殘

顓陽山顧碧溪詩卷

聞說山中顧隱君幽居不與俗人羣愛看舞鶴護蒼蘚淨埽
落花畱白雲李愿已刊盤谷序稚圭休擬北山文一溪春水

連天碧甯著孤舟載月分

寒食感懷

寒食維舟江上邨臨風西望黯銷魂花將春色歸流水雲繫
愁心入故園丘壘不知誰灑埽藤蘿應復自滋蕃衰年尚作
無家客只合當時住鹿門

寄趙易窗高士慶雲岡上人

昨宵風雨釀春寒曉色開晴露未乾棋局定須尋李遠杖藜
還甯過蘇端繙經坐榻呼龍守點易虛窗倩鶴看暫假飛鳬
挽飛錫樵蘇不爨罄交懽

秋夜有感

澤國秋來夜氣涼飄零猶自未還鄉蟬蛄泣露梧桐井絡緯
縹風薜荔牆只尺故園千里夢亂離華髮十年霜仲宣樓上
長迴首烽火連山欲斷腸

次韻題畫

海石涵秋水風篁生晚涼孤篷初歇雨和月度瀟湘

江南曲

郎上渡江船妾倚江邊樹空挽桺絲長繫郎船不住

擬比紅兒賦解語花二首

綽約柔情不自勝翠圍紅繞幾層層隔簾立盡闌干月却訝
真真喚即應

霧縠雲綃淡淡妝微風吹散鬱金香臨風一片傷春意欲向
何人訴斷腸

題桃花十二紅圖

枝上棲禽五色毛睡酣花氣日初高江南一覺繇華夢滿地
荆榛叫百勞

春日偶成二首

城頭楊柳綠如雲
城下官河水拍春
一片江山元不改
畫船都是異鄉人

船頭細雨溼漁蓑
船尾桃花漾碧波
借問東君知得否
江南春色已無多

桃源圖

流水桃花世外春
漁郎曾此得通津
當年只記秦猶在
不道山河又屬人

雲林畫山水竹石

秋雲無影樹無聲
湛湛長江鏡面平
遠岫煙銷明月上
小亭危坐看潮生

次韻曲林春雪

賸喜漫天飛玉蝶
不嫌幽谷阻黃鸝
夜深錯認催花雨
夢覺驚聞折竹聲

丁孝子鶴年

鶴年以字行一字永庚西域人也曾祖阿老丁爲巨商
以其貲歸元世祖世爲顯官父職馬祿丁官武昌縣達
魯花亦有惠政畱葬焉鶴年年十八值兵亂倉卒奉母
走鎮江母歿鹽酪不入口者五年避地越江上又徙四
明行臺省交辟不就時方氏淡忌色目人鶴年轉徙逃
匿旅食海鄉爲童子師或寄居僧舍賣藥以自給先是
生母馮阻絕東邨病死瘞廢宅中道旣通鶴年還武昌
痛哭行求夢其母以告蹤跡得之齧血沁骨棺斂以葬
晚年屏絕酒肉廬父墓以終其身明永樂間卒烏斯道
爲作丁孝子傳戴叔能作高士傳以申屠蟠擬之序其詩
謂注意之淡用工之至尤在于五七言近體澹居老人
題海巢集亦云忠義慷慨有騷雅之遺意鶴年家世仕

元諸兄之登進士第者三人遭時兵亂不忘故國嘗有句云行蹤不逐臬東徙心事惟隨鴈北飛亦可悲也錄其詩爲元季諸人後勁而兩兄之作附焉

採蓮曲

採蓮復採蓮仍唱採蓮曲若欲知苦心須食蓮中肉採蓮復採蓮踟躕一何久不愁花妒容惟恐刺傷手採蓮復採蓮藕亦不可棄中有不斷絲似妾纏絲意採蓮復採蓮爭如採荷好花謝葉獨存團圓以終老採蓮復採蓮湖水清且淡徒能照妾面不能照妾心採蓮復採蓮下有孤鴛鴦秋花不結實夜夜守空房蓮開花覆水蓮謝藕在泥不學青萍葉隨波東復西朝採竝蒂蓮莫綰同心結不學楊柳枝含嚔送離別蓮舟何處來同住西湖口郎憐波上花妾愛泥中藕藕有青白節花有豔冶容郎心異妾心三歎掩歸篷

此詩誤作絕句乃是古樂府西洲曲等體耳

題天柱山圖

拔翠五雲中擎天不計功誰能凌絕頂看取日升東

畫蟬

飲露身何潔吟風韻更長斜陽千萬樹無處避螳螂

題江亭柳色圖

有懷故人
劉庸道

昔年醺酒地江漢一茅亭同會人何在東風柳又青

次先兄太守題竹韻

先兄死事之十有七年于故史董文中家見所作因雪涕謹次其韻

玉筍謝朝班西風海國寒無人知苦節落日下長安

長江萬里圖二首

將歸武昌自賦

長江千萬里何處是儂鄉忽見晴川樹依稀認漢陽
長嘯還江國遲回別海鄉春潮如有意相送過潯陽

題落花芳草白頭翁

草長連朝雨花殘一夜風青春畱不住嗁殺白頭翁

汨汨

汨汨在塵埃，羈懷不暫開。
病將顏玉去，愁送鬢絲來。
招隱慚高蹈，扶顛乏大才。
行藏成兩失，回首有餘哀。

送四兄往杭後寄

臨別強言笑，獨歸情轉哀。
離魂悽欲斷，孤抱鬱難開。
太守隄邊桺，徵君宅畔梅。
過逢如見憶，煩寄一枝來。

逃禪室臥病簡諸禪侶

高秋多病客，古寺寄黃昏。
野迴常疑虎，天寒早閉門。
離愁銜下影，鄉淚枕邊痕。
賴有諸禪侶，情親似弟昆。

登北固山多景樓

風月無邊地，乾坤有此樓。
城隨山北固，潮蹴海西流。
眼界寬三島，襟襟隘九州。
階前遺狠石，誰復話安劉。

幽期

何處赴幽期青林白谷陞
谷虛秋氣早林茂曙光遲
談罷風生塵歌闌月在巵
謀身良自足何補國安危

春日海邨三首

地僻囂塵遠人稀習俗淳
花時恒獨往隨意蹋晴春
斑竹過頭杖烏紗折角巾
蕭然多古意何媿葛天民

門巷絕輪蹄春深綠草齊
風光不相負泉石且幽棲
卷幔通花氣移牀避燕泥
時時得佳句自向竹間題

每恨韶華晚仍嗟老病催
閉門花落盡隱几鳥飛回
引睡書千卷消愁酒一杯
平生志士氣此日已成灰

一作孰相恢

寓慈湖僧舍次龍子高提舉韻

迢遞過蘭若淹畱爲竹林
疎鐘雲嶠迴孤燭雨窗深
長嘯非懷昔狂歌豈避今
祇緣諸漏盡不受一塵侵

武昌南湖度夏

南浦幽棲地當門罨畫開青山入雲去白雨渡湖來石潤生
龍氣川光媚蚌胎芙蕖三百頃何處著炎埃

客懷

此生何坎壈終歲客他鄉病骨驚秋早愁心識夜長文章非
豹隱韜略豈鷹揚磨滅餘方寸還同百鍊剛

病衰

病骨秋增痛衰容日減華臉霞憐竹葉鬢雪妒菱花往事嗟
何及歸程望轉賒少年歌舞地此日屬誰家

題畫

荒荒野日低漠漠江雲冷喬林延莫光澄波浴秋影高人千
載懷乾坤一漁艇

歲晏百憂集二首

歲晏百憂集獨坐彈鳴琴琴聲久不諧何以怡我心拂衣出

門去荊棘當道滾還歸茅屋底抱膝梁父吟
歲晏百憂集擊節發商歌商歌未終調淚下如懸河故鄉渺
何許北斗南嵯峨有家不可歸無家將奈河

悼亡

別時如玉人歸來死生隔日莫泣孤墳音容杳難得惟餘墳
上草猶帶羅袞色

逃禪室述懷十六韻

出處兩茫然低徊每自憐本無經國術仍乏買山錢故邑三
千里他鄉二十年力微歸計杳身遠客心懸桃李誰家樹禾
麻傍舍田鶉衣秋屢結蝸室歲頻遷逝水終難復寒灰更不
然久要成齟齬多病復沈綿仰衷情倦棲遲野性便延徐
誰下榻訪戴獨迴船恥灑窮途泣閒修淨土緣談玄分上下
味道悉中邊有相皆虛妄無才幸苟全棲雲同白鹿飲露效

玄蟬高蹈慚真隱狂歌媿昔賢惟餘空念在山寺日逃禪

送鐵佛寺盟長老還襄陽

盟居襄陽父死方在殯遇亂奉母逃難江南餘三十年常與藏鑰于蔣山主武昌

鐵佛寺而重興之及今道路既通乃奉母北歸而葬其父喪士大夫以爲方外所未有咸作詩文美之鶴年因製五言排律二十韻附卷末

襄漢揚波日江湖避地時行行隨老母處處禮名師雲水元
無住風塵信所之睦州勤奉養江革備艱危掌鑰鍾山下傳
鐙鄂渚湄剩翻龍藏典幾咏鶴樓詩溪嘅叢林廢真成一木
支銅山頻閱世鐵佛重開基法几雕文具霽旛刺綵絲雲鐘
晨縹緲月殿夜參差已悟無生法還興罔極悲他鄉流徙遠
先壟奉遷遲瀕洞今方息旋歸故可期望雲雙淚瀉計日寸
心馳官桺催飛錫曇花侑奠儀旣明埋玉理豈是繫珠癡定
應牛眠兆母生觸鹿疑春暉憐舊線秋露薦新祠生死俱無
憾諸方起孝思

贈相者姜奉先

宋忠臣姜才之孫

德祐忠臣好孫子爛爛目光巖電紫人間富貴等浮雲瑣瑣
何須挂屑齒灩澦險蜀道難曳裾旁人多厚顏畱取乾坤雙
老眼夕陽牛背看青山

題餘姚葉敬常州判海隄卷

補先兄太
守遺缺

陰霓夜吼風雨急坤維震蕩玄溟立桑田變海人爲魚葉侯
訴天天爲泣侯奉天罰誅妖霓下平水土安羣黎嶙峋老骨
不冝朽化作姚江捍海隄海隄蜿蜒如削壁橫截狂瀾三萬
尺隄內耕桑隄外漁民物欣欣始生息潮頭月落曉早鴉柴
門半啓臨漚沙桺根白舫賣魚市花底青帘沽酒家花桺邨
邨各安堵世變侯仙倏成古侯雖已矣遺愛存時聽叢祠咽
簫鼓人生何必九鼎榮廟食貴有千載名君不聞一杯河水
波瓠子沈馬親勤漢皇祀又不聞一帶江波泛蜀都刻犀厭
勝秦人愚江平河塞世猶駭何況堂堂障滄海論功不啻濟

川才砥柱東南千萬載嗚呼只今四海俱橫流平地風波沈九州蒼生引領望援溺州縣有官非葉侯禦災誰復憂民憂

寄武昌南山白雲老人

姓衛字均執先人時故舊家居未嘗入城市聞鶴年辛苦遠還遣子弟問遺不絕鶴年足

疾日劇弗克往拜牀下謹奉拙詩少致謝忱云

故人家住南山下心與白雲共瀟灑芝草遙賡黃綺歌蓮花近入宗雷社嗟予江海避風塵白首歸來失所親青眼相看如昔日只有南山與故人

兀兀

數莖白髮鏡中新兀兀窮年媿此身萬里雲霄雙倦翼一作羽千尋江漢一窮鱗望鄉薄莫憑西日去國中宵禮北辰客路漸遙身漸老此生何以報君親

勞勞

閭闔排雲事已休勞勞猶恥爲身謀數莖白髮未爲老一寸

丹心都是愁燕代地高山北峙荆陽天闊水東流英雄已去
空形勝劒氣中宵射斗牛

脫太師

淮海重聞斧鉞臨一時黎庶盡傾心雷霆聲播天威遠霖雨
恩添帝澤淡暗室有蠅污白壁明廷無象鑄黃金風塵未息
英雄死坐對江山慨古今

靳公子

中朝公子多才俊蕭灑風塵獨靳侯白鴈久無天上信黑貂
漸敝雪中裘虛堂簾影遲遲晝別館鐙光淡淡秋到手淡杯
須劇飲醉鄉消得古今愁

故宮人

粉愁香怨不勝情強整殘妝對老兵別殿金蓮餘故步後庭
玉樹變新聲眼穿鴈字雲連塞夢斷羊車月滿城天上桃開

王母去世人誰識許飛瓊

雪後泛東湖

雪後湖山玉作圍小舟乘興弄清輝貪看月裏鸞回舞不覺
風前鷁退飛雲母屏空春閨寂水晶宮冷晚霏微仙家一笑
乾坤老誰馭瑶池八駿歸

題鳳浦方氏梧竹軒

鳳鳥曾聞此地過至今梧竹滿丘阿政懷翦葉書周史却恨
翻枝入楚歌金井月明秋影薄石壇風細晚涼多中郎去後
知音少共負奇才奈老何

存齋詩話云時作者已滿
卷此詩一出皆爲斂衽

莫春感懷二首

杜宇聲聲喚客愁故園何處此登樓落花飛絮成春夢剩水
殘山異昔遊歌扇多情明月在舞衣無跡彩雲收東皇去後
韶華盡老圃寒香別有秋

四十無聞嬾慢身放情丘壑任天真悠悠往事杯中物赫赫
時名扇外塵短策看雲松寺晚疎簾聽雨草堂春山花水鳥
皆知已百遍相過不厭頻

奉寄王宣慰兼呈九靈先生

別館新成足宴游珊珊環珮總名流獨推南郭爲高士共識
東陵是故侯天上鸞花三月夢人間風雨五更愁行藏盡付
浮雲外爛醉豐年黍稌秋

奉寄九靈先生二首

先生嘗爲
予作傳

挾海懷山謁紫宸擬將忠孝報君親忽從華表聞遼鶴却抱
遺經泣魯麟喪亂行藏心似鐵蹉跎勲業鬢如銀萬言椽筆
今無用閑向林泉紀逸民

花柳邨邨接海濱攜家隨處避風塵衣冠栗里猶存晉雞犬
桃源久絕秦坐對青山渾不厭忘機白鳥自相親也知出處

關時運豈但逃名效隱淪

寄定海故將軍邵公輔

往事浮雲杳莫攀壯懷未展鬢先斑
不聞奉使通銀漢空見將軍老玉關
故壘荒涼千騎盡滄溟浩蕩一鷗閑
風塵隨處嚴訶止愁殺田間野獵還

逃禪室與蘇伊舉話舊有感

不學揚雄事草玄且隨蘇晉暫逃禪
無錐可卓香巖地有柱難擎杞國天
謾詫丹霞燒木佛誰憐青露泣銅仙
茫茫東海皆魚鼈何處堪容魯仲連

寄餘姚滑伯仁先生

獨木橋邊薜荔門全家移住水雲邨
猿聲專夜丹山靜蜃氣橫秋碧海昏
詩卷自書新甲子藥壺別貯小乾坤
陶漁耕稼遺風在差勝桃源長子孫

題太守兄遺橐後

太守兄死事之明年于篋中得遺詩一卷伏讀之次不知涕泗之橫流也敬題一詩于後以紀哀思云

海國期年政化成肩輿隨處看春耕正欣雞犬無驚擾詎意
鯨鯢有鬪爭遙島月明虛燕寢故山雲冷失佳城夢回詩句
難重得腸斷池塘草又生

兵後還武昌二首

避亂移家大海隈楚雲湘月首頻回歸期實誤王孫草遠信
虛憑驛使梅天地無情時屢改江山有待我重來白頭哀怨
知多少欲賦慙無庾信才

亂後還家兩鬢蒼物情人事總堪傷西風古塚遊狐兔落日
荒郊臥虎狼五柳久非陶令宅百花今豈杜陵莊舊遊回首
都成夢獨數殘更坐夜長

哭陣亡仲兄烈瞻萬戶

獨騎鐵馬突重圍斬將搃旗疾似飛金虎分符開幕府玉龍

五方三
橫劒衛邦畿委身殉國心方盡裹骨還鄉願竟違病臥滄江
憐弱弟看雲徒有淚沾衣

題昌國普陀寺二首

寺在浙江寧波府東南海島間即昌國州之故墟也

神鼇屹立戴崔嵬
倂瞰滄溟水一杯積翠自天開
罨畫布金隨地起樓臺
祈靈漢使乘槎到傳法梁僧折葦來
若使祖龍知勝槩豈應驅石訪蓬萊

昆明劫火忽重然
宇內名山悉變遷古刹獨存龍伯國
豐碑猶記兔兒年
三更日浴咸池水八月潮吞渤海天
雲涉靈槎如可御便應長往問羣仙

樊口隱居

爲武昌李均玉作

萬里雲霄斂翼回
挂冠高臥大江隈春溪門巷先生柳
雪後園林處士梅
翠擁樊山邀杖屨綠浮漢水映尊罍
誰能領取坡仙鶴月下吹簫共往來

戲贈劉雲翁

千金不惜買新聲
贏得風流老更成
銀鑊蒲萄浮臘蟻
金屏窈窕轉春鶯
香凝宴寢頻開席
花暗閑房合度笙
夜燕未終賓客醉
莫將明燭照華纓

長江萬里圖

右逾越雋左蓬壺
萬里提封入壯圖
斷石雲屯山擁蜀
驚濤雪立海吞吳
蟠桃有實來青鳥
若木無枝駐赤烏
秦漢經營人盡去
獨畱形勝在寰區

錢唐懷古

錢塘佳麗冠南州
故國繇華逐水流
龍虎已消王霸氣
江山空鎖古今愁
吳臣廟冷潮喧夜
宋主陵荒塿倚秋
最是西湖歌舞地
數聲漁笛散鳬鷗

戲贈應修吉

硯溪居士神仙侶短髮蕭蕭雪滿簪暖老恨無燕趙玉養生
賴有坎離金牀頭酒熟畱僧飲席上詩成對客吟歲晚山空
誰是伴北窗梅月最知心

重到西湖

湧金風月昔追歡一旦狂歌變永歎錦繡湖山兵氣合金銀
樓閣劫灰寒雪晴林墅梅何在霜冷蘇隄柳自殘欲買畫船
尋舊約荒煙野水浩漫漫

夜宿染上人溪舍

雲去禪關戶牖空清溪碧樹有無中倒涵天影魚吞月逆戰
秋聲犬吠風見性本圖先作佛勞形翻媿早成翁杜陵老去
歸無計來往那辭惱贊公

觀太守兄昌國勸農

東臯風日媚新晴太守躬耕曉出城裊裊雙旌穿柳過蕭蕭

五馬蹋花行杖藜父老陪諮訪騎竹兒童主送迎豈意兵荒
南北遍化行滄海獨昇平

寄西湖林一貞先生

錦繡湖山世絕稀東風不放賞心違芙蓉楊柳臨清淺佛刹
仙宮繞翠微畫舫載春天上坐紫駟馱醉月中歸高情獨有
林和靖門掩晴空看鶴飛

送人歸故園

故園休道已休兵客裏那堪送客行老去別懷殊作惡亂餘
歸計倍關情孤邨月落羣雞叫絕塞天清一鴈橫到日所親
如見問浪遊江海負平生

寄胡敬文縣尹

胡遂初真人海上漕舟北還得應奉兄
書云湖廣親朋兵後僅二公寄以詩

湖北衣冠藹士林十年兵革盡消沈崑岡火後餘雙壁錦里
書回抵萬金鳬舄趨朝天闕近霓裳度曲月宮深誰知海上

垂綸者去國長懸萬里心

海巢

海上巢居海若降三山
眼底小如缸已攀若木爲華表更立
搏桑作翠幢蛟室夜光晴燭戶蜃樓秋影冷涵窗
鷓鴣夢斷無因到唯有同棲鶴一雙

渡鄞江後寄陸時敏陳可立

小艇橫江捷似飛故人凝睇送將歸
過山殘照明紗帽渡水浮雲亂芡衣
沙鳥水鷗同泛泛岸花汀草各依依
風塵來往慙經濟擬看漁叢坐釣磯

元夕

鐙火樓臺錦繡筵誰家簫鼓夜喧闐
光移星斗天逾近影倒山河月正圓
金鎖開關明似晝銅壺傳漏迴如年
五雲不奏霓裳曲空使揚州望眼穿

遷葬後還四明途中寄武昌親友

浪遊吳越任荆湘來往那辭道路長
篋內有書慙歷國邸中無綬敢誇鄉
潮生別浦江雲白塵起征途野日黃
若問離人行役苦一宵九夢在瀧岡

夢得先妣墓一首小序云己未夏五月還武昌遷葬兵後陵谷變遷先妣封樹竟迷所在久尋不得露禱大雪中冬十一月二十日夜忽感異夢翌日遂得其處賦詩一首以紀歲月其詩曰慈顏幽翳香難知風雪孤筇遍訪之極浦空江泥滑滑荒岡斷壟塚壘壘那知恍惚魂歸夜正是呼號淚盡時孝格皇天吾豈敢聊同烏鳥報恩私

九日登定海虎蹲山

東海十年多契闊西風九日獨登臨
天高雲靜鴈初度水碧沙明龍自吟
籬下菊花憐我瘦杯中竹葉爲誰深
憑高眺遠無窮恨去國懷鄉一寸心

避地

避地長年大海東蕭條生計野人同
淡春耒耜孤邨雨落日帆檣遠浦風
那得文章偕隱豹聊將音問託歸鴻
平生自恨

無仙骨五色蓬萊只尺中

異鄉清明

十年瀕洞家何在萬里清明客未歸
雨飈風偃花亂落泥融沙暖燕交飛
煙生榆柳推還速雲鎖松楸拜埽違
旅鴈盡回音問斷側身長望淚頻揮

寓奉化寺寄菩提寺主

菩提嶺外空王寺丹磴行穿虎豹羣
萬壑濤聲巖下瀑千峰雨氣屋頭雲
海龍送水金鉉貯天女懷香寶鼎焚
慙媿無緣塵土客朝朝鐘鼓下方聞

奉寄恕中韞禪師

曾向名山識異人心如木石氣如春
坐禪霜葉秋埋膝行道天花日繞身
有鉢相傳元是幻無錐可卓本非貧
惟餘潭底

中秋月對寫龍峰面目真

時畱龍峰傳鐙

題東湖青山寺古鼎銘長老鍾秀閣

手開樓閣貯羣經
面對湖山衛百靈
玉鏡夜寒通沆瀣
翠屏秋靜倒空青
避煙鶴起檐間樹
行雨龍歸几上鉶
我亦逃禪雲水客
便應蕭散共松扃

悼湖心寺壁東文上人

祇林一葉墮秋霜
回首滄洲淚兩行
几上殘經塵已暗
篋中遺藁墨猶香
雲迷圓澤三生石
月冷維摩十笏房
想像清容何處記
寒梅的的竹蒼蒼

山居詩二首呈諸道侶

日日看山眼倍明
更無一事可關情
埽開積雪巖前走

一作坐領

取閑雲隴上行
不共羽人談太易
嬾從衲子話無生
劃然時發蘇門嘯
遙荅風聲及水聲

嬾散形骸不自持
黃冠聊束鬢邊絲
頻來猿鶴渾相識
久混

龍蛇竟不知養拙最宜情澹泊全生淡藉德支離看雲本自忘飢渴况有冰泉與石芝

自詠五首

長淮橫潰禍非輕坐見中流砥柱傾太守九江先效死諸公四海尚偷生風雲意氣慙豪傑雨露恩榮負聖明一望神州一搔首天南天北若爲情

一夜西風到海濱樓船東出海揚塵生慚黃歇三千客死慕田橫五百人紀歲自應書甲子朝元誰共守庚申悲歌撫罷龍泉劒獨立蒼茫望北辰

堂堂至正最多才萬國同文壽域開漠北諸生登第去越南計吏進賢來鳳韶九奏黃金殿鶴駕三朝白玉臺回首黃塵揚碧海五雲無處覓蓬萊

六軍遙駐墨河濱故國丘墟詎忍聞露冷金銅應獨泣火炎

玉石竟俱焚虞淵日莫無還景禹穴秋淡有斷雲草澤遺民
今白髮憑高無奈思紛紛

九鼎神州竟陸沈儵生江海復山林頻繇誰在隆中顧憔悴
惟餘澤畔吟嚙雪心危天日遠看雲淚盡歲時淡百年家國
無窮事可得忘機老漢陰

上明州太守茶子俊

還武昌遷葬
告牒而作

漢江東抱楚山流先壘猶餘土一坏廟冷桐鄉耆舊逝田荒
栗里子孫愁兵戈隔夢三千里霜露傷心二十秋荒隧天寒
烏鳥下空林日落白狐遊碑焚斷石經時變盤出遺金有夜
偷過客尚知來下馬仙人誰復指眠牛擬從樊口遷京口遙
別沙頭下石頭高士束芻思致奠故人惠麥久維舟已知多
病垂垂老敢爲長貧故故畱爲政幸逢宗正恕申情當念子
平憂劬勞罔報生何益存沒沾恩死必酬願及清明三月節

一盂麥飯灑松楸

過安慶追悼余文貞公

將軍疋馬入舒城，擊賊頻煩訓義兵。
孝以保家忠徇國，聚而出戰散歸耕。
園侔月暈全無隙，捷振天威大有聲。
游說飛書徒間諜，輸誠仗節愈堅貞。
雲梯屢却妖氛豁，露布交馳殺氣平。
千里荆揚憑保障，七年淮海賴澄清。
山溪楔獫獫殲還出江，闊鯨鯢斬更橫。
外援內儲俱斷絕，裹瘡飲血獨支撐。
天昏苦霧埋營壘，日落陰風卷旆旌。
甘與張巡爲厲鬼，肯同王衍誤蒼生。
三千將士皆從死，百二山河亦繼傾。
靜對風霆思號令，遙從箕尾識精誠。
頌碑不媿詞臣色，哀詔偏傷聖主情。
願爲執鞭生不遂，臨風三酹重沾纓。

讀應奉兄登科記愴然傷懷因成八韻

射策彤庭被寵榮，遺經三復若爲情。
重傷趙璧經時毀，翻恨

隋珠徹夜明洪範有書傳太乙佳城無郭葬長庚青雲路斷
甘淪沒碧海塵飛苦變更自信爲臣當委質誰能向賊更求
生家貧寡弱遺妻子道遠存亡隔弟兄一旦音容成永訣十
年涕淚鎮交橫茫茫原隰無求處獨立長風送鴈聲

題建昌王子中橋亭八景

橋亭風景洞天如中有儒仙舊隱廬春漲按藍涵蟠螭

澧波春漲內有

石梁

曉嵐滴翠溼芙蕖

龍澹朝嵐內有長山峻嶺

受詩華嶽浮丘館

中華翠巘峰頭有浮丘仙宇

說劍香鑪許令居

香鑪紫煙峰頭有許旌陽仙居

雲外懸崖飛屐上

天寶懸崖

雨中沃壤

帶經鉏

田東墓雨

疎鐘鯨吼霜華重

聖容僧鐘

長笛龍吟月色虛

雲原仙笛

老我塵

寰懷勝景追遊早晚命中車

敬書宸翰後

神龍歸臥北溟波愁絕陰山敕勒歌惟有遺珠光奪目萬年

畱得照山河

此云宸翰蓋指庚申君手跡也

題第郎天馬圖

春明立仗氣如山
顧盼俄空十二閑
一去瑤池消息斷
西風吹影落人間

莫春

楊花榆莢攪晴空
上界春歸下界同
蜂蝶紛紛竟何在
獨畱杜宇怨殘紅

題畫

江樹青紅江草黃
好山不斷楚天長
雲中樓觀無人住
只有秋聲送夕陽

題萬歲山玩月圖

金銀樓觀蔚嵯峨
琪樹風涼秋漸多
徙倚危闌倍惆悵
月中猶見舊山河

題畫葡萄

故人毛楚哲作

西域葡萄事已非故人揮灑出天機
碧雲涼冷驪龍睡拾得遺珠月下歸

梧桐

井梧徹夜下霜風錦繡園林瞬息空
老盡秋容何足惜鳳巢吹墮月明中

聞簫

給喪未必無周勃乞食誰能辨伍員
昨日英雄今日恨洞簫忍向亂中聞

聞鴈

月落江城轉四更旅魂和夢到灤京
醒來獨背寒鐙坐風送長空鴈幾聲

題梅花扇面寄五十僉憲

憶向西湖蹋早春萬花如玉月如銀
一枝照影臨清淺滿面

冰霜似故人

題族兄馬子英進士梅花

池館春深看牡丹五陵車馬隘長安誰知凜凜冰霜際却是梅花守歲寒

贈表兄賽景初

景初故咸陽王賽英赤之孫也

蕭條門巷舊王孫旋寫黃旄換綠尊富貴儻來還自去只畱清氣在乾坤

題鴈

兵戈故國日彫殘野蔓荒煙白骨寒目送飛鴻度關塞有書無處報平安

紅梅

姑射仙人鍊玉砂丹光晴貫洞中霞無端半夜東風起吹作江南第一花

水仙花二首

湘雲冉冉月依依翠袖霓裳作隊歸怪底香風吹不斷水晶
宮裏宴江妃

影娥池上曉

一作晚

涼多羅襪生塵水不波一夜碧雲凝作夢醒

來無奈月明多

一作何

竹枝詞二首

竹雞啼處一聲聲山雨來時郎欲行蜀天恰似離人眼十日
都無一日晴

水上摘蓮青的的泥中采藕白纖纖却笑同根不同味蓮心

清苦藕芽甜

集中又載紅蓮白藕詩用意相近其一云紅蓮白藕兩相宜欲采臨流意轉遲蓮子總
甜心獨苦藕芽雖美腹多絲其二云采蓮采藕湖水潯阿儂蹋歌郎賞音多虛少實如
郎意外甜內
苦似儂心

題定海樂節婦劉氏沿江泣尋夫屍卷

怨入江雲結晝陰
潮痕清淺淚痕深
白頭重見黃泉下
方盡寒鐙一寸心

題唐申王三駿圖

三駿英英出渥洼
太平芻束飽天家
誰知百戰平河北
汗血功歸獅子花

戲題明皇照夜白圖

天上麒麟天下稀
月中幾送八姨歸
君王寓目應追悔
誤看乘鸞度羽衣

武昌南湖度夏

湖山新雨洗炎埃
萬朶青蓮鏡裏開
日暮菱歌動南浦
女郎雙槳盪舟來

贈李仙姑

何年萼綠華來降
地仙家
花擁青鸞節
香隨白鹿車
清輝迴

雪月玄想結雲霞不赴瑤池宴桃開幾度花

次小孤山

峽束千雷怒擊撞危峰屹立壓驚瀧山聯廬霍朝三楚水落
荆揚限九江鎮海重關當第一擎天孤柱故無雙珮環月夜
知何處露溼蓬萊玉女窗

題風雨歸舟圖

昔向滄浪弔獨醒中流風雨正揚舲江空風卷潮頭白野曠
雲迷峴首青挂席正思遺珮浦推篷已過濯纓亭襄陽耆舊
今安在撫几長歌對畫屏

寄張左轡

張生脫略今有年食無梁肉眠無氍毹丈夫旣與世不偶貧賤
甯爲人所憐齊眉已喜孟光敬翦髮况聞陶母賢拂衣歸來
好共隱與爾共耕沮溺田

元帥吉雅謨丁

吉雅謨丁字元德崔年之從兄至正間進士官浙東僉都元帥事

寄邁里古思院判

將軍辛苦事戎行麾下論兵總俊良
沙漠蘇卿多感慨鑑湖賀老自清狂
風塵滿眼青山舊天地無私白髮長
萬里君親俱在念扁舟何日賦滄浪

遊定水寺寄杜堯臣

水紋藤簟竹方牀山閣重陰雨後涼
新月梧桐秋已老碧梧一作孤燈機杼夜初長
白魚入饌松醪熟紅稻供炊筍脯香
雲樹芝泉隨處好一時清賞甯相忘

題天童寺朝元閣

海內兵塵已十年上方鐘鼓獨依然
史臣錫號承天寵中使

甬香出御筵山列九龍蟠紫翠樓開五鳳敞雲煙籃輿亦有
登山約擬聽松風借榻眠

贈陳章甫

三十年前鬢未蒼曾陪宰相入鴈行解衣換酒尋常醉躍馬
看花取次忙亂後已非前日夢老來那復少年狂黃冠野服
新妝束穩把長竿釣海鄉

鶴年弟盡弃紉綺故習清心學道特遺楮帳資其澹
泊之好仍侑以詩

誰擣霜藤萬杵勻製成鶴帳隔塵氛香生蘆絮秋將老夢熟
梅花夜未分枕上不迷巫峽雨牀頭常對剡溪雲竹鑪松火
茶煙暖一段清貞盡屬君

秋過弟鶴年書館夜話

弟兄惟吾老宗族有君知萬里尚爲客百年能幾時秋清妨

熟寐夜靜話貞期明日恩恩別還生兩地思

題畫竹爲董文中賦

雨過蛟龍起風生翡翠寒但存清白在日日是平安

應奉愛理沙

愛理沙字允中鶴年之次兄至正間進士官應奉翰林文字

題九靈山房圖

戴叔能讀書處時叔能避地明州

夢裏家

一作鄉

山十載違丹青咫尺是耶非墨池新水春還滿書

閣浮雲晚更飛張翰見機先引去管寧避亂久忘一作無歸人生

若解幽棲意處處林丘

一作丘園

有薜薇

題前餘姚州判官葉敬常海隄遺卷

潮汐東來勢蹴天一隄橫捍萬家全陵遷谷變人誰在海晏
河清事獨賢曉日山川神禹跡秋風禾黍有虞田河渠他日

書成績應竝宣房與代傳

題鍾秀閣

爲東湖古鼎
銘長老作

檻外澄湖平不流窗間疊嶂屹將浮煙霞五色錦屏曉風月
雙清瑤鏡秋蒼蘆濃香吹法席芙蓉涼影蕩仙舟結巢擬倚
雲松住迴首朝簪媿未投

吳惟善

惟善字

鶴年表兄樊川人

寄武昌諸友

黃鵠山前漢水濱一時英俊總能文金釵佐酒年俱少銀燭
鈔書夜每分鴈杳魚沈勞遠思狼貪羊狠絕前聞兵戈故國
知誰在目送西南日暮雲

寄東海鶴年賢弟

鶴皋東望接三山海上羣仙日扣關虎守月鑪丹鍊就龍吟

霜匣劒飛還故園松菊餘三逕老屋煙霞恰半間爲問林泉
逃世者如公今有幾人閒

小遊仙

河漢無聲海月寒長鯨吸浪洞庭乾一聲鐵笛風雲動人在
危樓第幾闌

玉山主人顧瑛

瑛一名阿瑛別名德輝字仲瑛崑山人世居界溪之上
輕財結客年三十始折節讀書購古書名畫三代以來
彝鼎秘玩集錄鑒賞無虛日舉茂才署會稽教諭辟行
省屬官皆不就年四十以家產付其子元臣卜築玉山
草堂園池亭榭餼館聲伎之盛甲于天下四方名士若
張仲舉楊廉夫柯九思李孝光鄭明德倪元鎮方外若
張伯雨于彥成琦元璞輩常主其家日夜置酒賦詩有
二妓曰小璫花南枝秀者每遇宴會輒命侑觴一時風
流文雅著稱東南焉淮張據吳避隱嘉興之合溪母喪
歸綽溪張氏再辟之斷髮廬墓緇閱釋典自稱金粟道人
至正末元臣爲水軍副都萬戶恩封武略將軍水軍
千戶飛騎尉錢唐縣男洪武元年以元臣爲元故官例

徙臨濠二年三月卒年六十自爲壙志戒其子以紵衣
桐帽襖鞵布襪纏裹入土嘗自題其像曰儒衣僧帽道
人鞵天下青山骨可埋若說向時豪俠與五陵鞍馬洛
陽街所著有玉山璞藁會粹一時高人勝流分題宴集
之作爲玉山名勝集又第其篋笥所藏都爲一集曰草
堂雅集又有玉山餞別寄贈詩及玉山紀游詩則汝易
袁華所編也李一初曰玉山草堂良辰美景士友羣集
四方之能爲文辭者凡過蘇必之焉歡意濃浹隨興所
至羅尊俎陳硯席列坐分題無間賓主仙翁釋子亦往
往而在長短雜體靡所不有可謂盛矣壬申秋余同犀
月訪大臨于界溪得上綽墩尋玉山遺址遙望山色湖
光而緬想當年草堂文酒之會真吾家千載一佳話也

金粟冢中秋日燕集

綽山古佳城左股接昆丘水作青龍來九派盤遭週道人金
粟冢在彼山之幽團團青桂樹枝葉相蜷膠石削華表立碑
刻金窠鏤人身無百年胡乃三彭仇四大偶一失九丹不能
瘳肉血潰臭腐不朽唯髑髏棄之道路旁行者得溺溲狐狸
與蠅蚋食噉紛相讎欲貽後之人以掩面目羞烏兔互出沒
急行不入郵縱一作繼有萬丈繩誰能繫之畱煖穴競螻蟻涼風
滅蜉蝣榮名乃何物汲汲將奚求金谷珊瑚樹天網一作網一夕
收美人化黃壤燕子巢空樓大印佩六國散金馳八騶一朝
不得志車裂狗九州秦皇與漢武靈藥採仙洲玉棺葬地底
金鳧出海陬梨花自寒食夜雨鬼啾啾飛錢化蝴蝶走鱗驚
鵠鷗混沌鑿不死儻忽何能休丈夫不解事老大傷白頭何
如種秫米壓酒日日筍今夕三五夕我已爲君謀長瓶置十
斛百結青絲兒截江取紫蟹攀樹摘紅榴周垣設茵席矮几

陳脯脩步登白雲屏待月豁醉眸劃然白蝦蟆抱出黃金球
又若摩尼珠躍出驪龍湫吐吞大地影晃漾東南浮老兔王
杵臼擣作人間秋寶城三千里縮景歸遐搜宮殿魚鱗騫草
一作林木秋雲稠素娥騎彩鸞舞雪翻霓裘手折瓊樹花競拂金
精流化為五素芒落我白瑤甌持滿向君語借箸請為籌十
載苦國難豪傑紛戈矛鴻門碎玉斗桃園宰烏牛戰血濺野
草餓莩填荒溝我時別一作挈妻孥夜汎茗雪舟有兒握一作縮兵符
承乏萬戶侯三年盡一作效忠歸身作抱官囚平生萬卷書怒焚
遭鬱攸廬墓讀內典守節事清修親友散如雪雲樹空悠悠
獨爾數君子艱棘見何由今聞王師出卒伍皆兜鍪弄刀走
官馬千里風颼颼桓桓李將軍大旗畫蚩尤去秋奪汴城今
復追大酋屯兵泗水上添竈扼賊喉東南貢米粟連綱起歌
謳我曹幸無恙坐見恢皇猷酒旗指南斗今茲會綢繆請起

各稱壽我亦相勸酌羣才盡敏捷用作釣詩鉤青山忽大笑
此意君知不呼童酌大白酌此土一坏他時蓋棺了神隨和
氣游巾一作申插空中華撒手鞭蒼虬東海招若士西池訪阿緱
共看麻姑爪當座擘筵篴不必兒女淚暗灑窀穸愁達哉司
空圖吾今乃其儔大書勒崖壁永絕生前遊

玉山主人嘗作生壙自爲銘曰嘉樹蔽日涼颼散煙展席
藉草待月臨川簪蓋既合飲芳割鮮歌斯哭斯以終餘年

趙仲穆畫看雲圖

青山與浮雲終日淡相守山爲雲窟宅雲爲山戶牖無心成
白衣有意變蒼狗人情亦如雲寄語看雲叟

巫峽雲濤石屏志

謝家綠玉屏不琢龜甲形方若陟釐紙粉縹帶苔青秀潔庚
庚絕文理十二巫峯橫隱起芙蓉照影立亭亭遠落巴江一
江水素湍洄湧翻綠濤長風吹雲白月高三峽濤聲滿人耳

箇中獨欠孤猿號胡僧設有金壺汁洒向素縑圖不得女媧
鍊石作五彩點染料應無此色此石產景由天工略假石人
磨削功石色欲盡玉色起汎沈天碧涵清空君不聞大食貢
石瑩如玉中有奇松四時綠六月涼風卷翠濤瑟瑟秋聲戰
空屋又不聞楊家古屏刻水精中有爲雲之美人海綃衣裳
爲煙霧姓名自語非真真二物化去固已久價重隋珠難再
有君家玉屏獨在世勿落忍人豪奪手我聞故人楊鐵仙束
帶拜之如米顛起來發狂捉鐵筆醉墨寫入青瑤鐫何日乘
舟上魚復喚取巴童唱巴曲更借丹丘粉墨屏對案巫山真
面目

余嘗往震澤聞松陵謝氏伯仲賢而好事而余水仙之舟未得一造其所今高君叔
彬攜此卷至別業求題且知楊鐵崖亦到湖上由是益知其賢而好事故製長詩
一篇寄題寶屏他日或飲君薔薇花下幸出此爲張本云

至正乙巳七月廿一日金粟道人顧阿瑛書于合溪別業

王鸞謠

并序

楊廉夫昔有二鐵笛字之曰鐵龍今亡其一偶得蒼玉

簫一枚字爲玉鸞以配鐵龍廉夫喜甚復以書來索賦
玉鸞謠志來自云至正甲午三月旣望界溪顧瑛書于

柳塘春

七寶城中夜吹笛舞按白鸞三十隻箇中小玉號細腰尾拂
廣陵秋月白伐毛脫骨秋風裏素頸圓長尺有咫中虛一竅
混沌通上有連珠七星子羿妻久閉結璘臺弄玉求之遺簫
史調得仙家別鵲聲吹落虎頭金粟耳桂園仙伯楊鐵翁昔
秦洞庭雙鐵龍雌龍入海去不返雄龍鰥處瓊林宮宮中夜
夜泣寒雨幽咽悲啼作人語燃犀莫照玉鏡臺買絲難繫藍
橋杵虎頭憐之爲媾婚并刀翦紙招鸞魂鸞之來兮洞房曉
恍然枕席生春溫鐵仙翁笑拍手左瓊瓊右柳柳瓊瓊細舞
柳柳歌起勸虎頭三進酒畫堂龜甲開屏風翠煙凝暖春雲
濃大瓶酒瀉鸚鵡綠滿頭花插鴛鴦紅鸞兮運居巢龍兮弄

橫竹君山月落大江秋黃姑星殞崑岡玉不須再奏合歡辭且
聽和鸞太平曲太平曲斷還續一轉一拍相節促諧宮協徵
宣八風寒谷能令生五穀鸞龍臺上鳳皇來萬歲八音調王
燭

花游曲同張貞居游石湖和楊廉夫韻

真娘墓下花溟濛碧梢小鳥啼春風蘭舟搖搖落花裏唱徹
吳歌弄吳水十三女子楊柳門青絲盤髻鬱金裙折花賣眼
一回步蛺蝶雙飛上春墓老仙醉弄鐵笛來瑤花起作回風
杯興酣鯨吸瑪瑙椀立按鳴箏促象板午光小落行春西碧
桃花下題新題西家忽遣青鳥使致書殷勤招再四當筵奪
得鳳頭牋大寫仙人踟躕篇

棲雲軒

春雲壓簾飛不起暖氣籠蔥百餘里桃花亭亭笑酣春谿邊

浣花染谿水武陵才人碧窗底青霓衣裳白霞裏翠煙默染
猩猩毛冰綃凝文露華洗山光入眼青青迷小鳥向人啼復
啼前村後村樹如蓋桺花起舞迴風低雲師雨師浩無據驅
雲勞勞向何處請君勸師一杯酒更借白雲檐下住

雪夜泊楓橋

江城殘雪裏人發剡溪舟花急風翻去潮生水逆流傷心憐
去鴈幽興託盟鷗寄語東蒙叟春山擬共游

寫柏子庭卷

虛舟元不繫湖海至今稱悟得庭前柏方爲物外僧空空無
我相落落有誰應官向東山住東山氣倍增

和韻二首

喔喔雞鳴桑樹顛江村風景只依然人行紅葉黃花裏雁過
西風落日邊南市津頭無酒旆東湖渡口有魚船北山巖壑

秋偏靜借看蒲團枕石眠

夏潮平沒白鷗沙舫舫風生起浪花爲向船頭置美酒恰如
天上汎浮槎銀盤雪落千絲鱸玉手冰分五色瓜明日山中
看疎雨共將詩句寄丹霞

次韻送吳國良

桐軒隱者重相訪草閣能畱十日歸快雪半消春水闊扁舟
又逐白鷗飛侶聞迂叟耕梅里每過山家款竹扉期子幾時
來慰我共披鶴氅坐漁磯

海洲夜景

三沙宛在海當中隱見珊瑚樹色紅神島由來連弱水樓船
欲去引剛風東方日出鮫人國半夜潮生織女宮却憶題詩
繡衣使高秋會過玉山東

題宋徽宗仙山樓觀圖

宣和天子昔神游鳳駕行空過玉樓此去有人言赤馬歸來
無處逐青牛分明艮岳通玄圃想像方壺接祖洲莫把仙山
作圖畫瓊花琪樹不勝秋

天寶宮詞十二首寓感

草堂雅集本作唐宮詞次
鐵雅先生無題韻十首

天寶雞坊寵賈昌不教

一作
常

蝴蝶上

一作
滿

釵梁錦裯晝浴天驕子

絳節朝看王大娘

王母也

芍藥金闌開內苑蒲萄玉觥酌西涼月

支十萬資膳粉獨有三娥

一作
姨

素面妝

五家第宅近天家侍女都封繫臂紗池上桃開銷恨樹閣中

香進助情花風迴輦道鸞鈴遠日射龍顏雉扇斜韓虢並駙

官廐馬醉攬丞相踏堤沙

此首與第九首
草堂雅集不載

蓮花池畔暑風涼玉竹迴文寶簾光貪倚畫屏調

一作
看

翡翠誤

開金鎖放鴛鴦輕綃披霧誇新浴墮髻欹雲銜晚妝笑語女

牛私語處長生殿下月中央

五色卿雲護帝城春風無處不關情小花靜院偷吹笛淡月
閑房背合箏鳳爪劈柑封鈿合龍頭瀉酒下瑤罌後宮學做
金錢會香水蘭盆浴化生

龍旂翠

一作孔

蓋擁鸞幢步輦追隨幸曲江鳥道正通天上路羊

車直到竹間窗桃花桺葉元無匹

一作限

燕子鸞兒各有雙中貴

向人言近事風流陳裏帝先降

秘閣香殘日影移燈分青玉刻蟠螭琵琶鳳結紅文木絃索
蠶繅綠水絲金屋有花頻賭酒玉杵無子不彈碁傳宣趣發
明駝使南海今年進荔枝

近臣諧謔侶枚皋侍宴承恩得錦袍扇賜方空描蛺蝶局看
雙陸賭櫻桃翰林醉進清平調光祿新呈玉

一作五

色醪密奏君

王好將息昨朝馬上打圍勞

號國來朝不動塵障泥一色繡麒麟朱衣小隊高呵道粉筆

新圖徧寫真寶雀玉蟬簪翠髻銀鵝金鳳踏文茵一從羯鼓
催春後不信司花別有神

十三女子擘箏篴選作梨園第一流却道荷花真解語豈知
萱草本忘憂紅鸞不照淡宮命翠鳳常看破鏡羞舞得太平
并萬歲五年誰賜錦纏頭

五王馬上打球歸贏得宮花獻貴妃樂起閤門邊奏少禍因
臺寺諫書稀侍兒隨幸皆頒紫骰子蒙恩亦賜緋娣一作姝妹相
從習歌舞何人能製柘黃衣

新製霓裳按舞腰笑他飛燕怕風飄玉蠶一作簪倒臥蟠條脫金
鳳斜飛上步搖雲母屏開一作箭齊奏樂沈香火底並一作坐吹簫只

因野鹿銜花去從此君王罷早朝

宮衣窄窄小黃門躑躅初開賜縹盆夜月不窺鸚鵡塚春風
每憶鳳皇園愛收花露消心渴怕解金珂見爪痕只有椒房

老宮監白頭一一話開元

鐵雅評曰十詩綿聯
綽麗消得錦半臂也

次韻劉季章治中邀夏仲信郎中游永安湖

湖上筵開張水戲卷幔涼風吹短蒲大魚聽樂浪頭出小艇
賣花城內無丙鼎庚庚識饕餮甲煎斑斑炙鷓鴣酒酣賦詩
動海色覩紙楷書能寄吾

次韻觀帖之什

水如燕尾出湖分合入長溪直一作且到門韋杜桑麻元兩曲朱
陳鷄犬却通村換羊賣馬囊中帖剝癭縣匏竹裏尊昨日煩
君來閱賞扁舟短纜繫籬根

次韻癸卯除夕

仰觀北斗轉遙天春在寒爐爆竹邊夜列粉盤循舊俗曉看
羅帕賀新年燒餘葶蘆生當路雪後梅花開滿煙不用鞭灰
覓如願客囊剩有酒家錢

夜宿三塔次陳元朗韻

水落南湖不露沙又牽舫子到僧家春浮大斗娟娟酒寒隔
虛櫺薄薄紗半夜塔一作檐鈴傳梵語一林江月照梅花坐來詩
句生枯吻指點銀瓶索煮茶

武島上梅花

波蕩漾鏡中天瑤樹春迴玉苔雨青青空落月雲
漠漠不成煙緱山侶照影疑逢洛浦仙王母欲來
青鳥下暗香如水夜如年

趙子期尚書于省幕創軒曰小瀛洲題詩要余與明
德同賦

鳳皇池上神仙宅五色卿雲接帝家金水暖通蓬島浪紫薇
香度垣花中天草木春霑澤滄海星辰夜挂槎聞道朝堂
清議了題詩好爲護蟬紗

寄鄭明德

我愛廛居鄭有道屢辭徵幣臥松雲年來短髮籠紗帽客至
新詩寫練裘八上只畱招隱賦人前每讀送窮文清時已見
文名盛日日高車訪隱君

游天平題文正公祠

魏公勲業垂前代百世高風道並隆立廟東吳見遺像出師
西夏有全功山迴鳥道千盤盡天入龍門一罅通赫赫皇
昭祀典烝嘗亦與武侯同

寄楊鐵崖

錦衣坊口揚雄宅飲馬
水波風信東來春事早湖光
回去夕陽多館娃隔水啼鴛燕子填門列鳳鵝無那老狂
狂更甚劒簫猶倚小紅歌

戲荅陸靜遠

秋水藍橋一尺強，愁聞玉杵擣玄霜。
東籬老子烏紗薄，西郭佳人翠袖長。
古寺竹深禪榻靜，晴窗花落硯池香。
西風鶴背三更夢，笑看瑤花作醉鄉。

堯文文學過訪賦別兼簡鶴齋薛真人

名毅夫

二首

草堂五月少人過，門巷春泥柰雨何。
滿樹枇杷鶯竊盡，一堦芳草蟻行多。
因思諸葛吟梁父，却笑蘇秦謾揣摩。
老我衰年無白髮，從今也合號涪皤。

憶昨相過寂寞濱，白頭傾蓋豈如新。
驚回赤壁三更夢，開遍桃花一樹一作度春。
顧我老爲思櫪馬，憐君遠作倚一作賦樓人。
黃公壚畔三株樹，畱待來時醉挂巾。

虎丘十詠

千頃雲

觸石起膚寸，悠然散千頃。
我來坐東軒，妙趣心獨領。

小吳軒

雪沒羣山盡天垂落日縣馮虛俯城郭隱見一絲煙

劒池

地坼重淵積人亡寶劒藏千年斷崖月何處照龍光

試劒石

劒試一痕秋崖傾水斷流如何百年後不斬趙高頭

五臺山

海湧如來室清涼卽五臺春風山頂雪飛度鴈門來

生公臺

生公聚白石塵拂天花墜可憐塵中人不解點頭意

塔影

塔倚高標立樓深一竅虛海風吹幻影顛倒落方諸

致爽閣

高閣對西山飛嵐落几間開襟致秋爽心與白雲閑

真娘墓

何處真娘墓雲埋斷石根夜淡風雨急誰喚海棠魂

陸羽井

雪霽春泉碧苔侵石甃青如何陸鴻漸不入品茶經

題吳性存所藏趙仲穆竹枝雙螭圖

閣道春風度湘簾夜月初多情雙螭蛺蝶也解逐羊車

趙仲穆臨李伯時鳳頭驄

君王不愛碧銜霞獨愛真龍被紫花珍重王孫親貌得錦巾

袂送野人家

房山畫

渴龍飲海海水寬鐵網下截珊瑚寒道人醉臥叫寒玉金粉
亂落松花壇

補之竹卷

碧眼胡兒叫橫玉落日如盆照茅屋美人清夢斷梅花却寫
相思在修竹

張仲舉待制以京口海上口號見寄瑛以吳下時事
荅之五首

白晝驚風海上號水軍三萬盡乘濤書生不解參軍事也向
船頭著戰袍

冉冉長蛇漢水東噓成黑霧滿虛空腥風怪雨重陰底化作
黃虬不是龍

莫辨黃鐘瓦缶聲且攜斗酒聽春鶯河西金盞新翻譜漢語
夸音唱滿城

紅綠油牌去復來長身碧眼更頽頽口傳催辦軍需事一日
能無一百迴

和糴糧船去若飛兼春帶夏未曾歸用錢贈米該加七納戶
身縣百結衣

乙未和孟天暉都司見寄五首

江頭日日惜芳時三月春光兩鬢絲拔劍自歌還自舞邑人
誰識虎頭癡

治安無策濟時艱始信金銷壯士顏怪底颶風翻漲海浪頭
一直過狼山

獵獵東風吹火旗水軍三萬盡精肥一春殺賊知多少箇箇
身穿濺血衣

婁上人家不識春簷頭蛛網亦生塵朱門桃李皆零落只有
東風未嫁人

聞道君王自早參每虛前席問江南何人醫手如秦緩有客
能碁侶李憨

題趙子昂畫楚江春曉

東方旭日出曛曛照見巴江曲
侶弓莫遣猿聲到巫峽山頭
猶有楚王宮

往鳳陽次虎丘

桺條折盡尚東風
杼柚人家戶戶空
祇有虎丘山色好
不堪又在客愁中

題文湖州竹

湖州昔在湖州日日逢人寫竹枝
一段枯梢作三折分明
雪後上窗時

西湖竹枝詞二首

素雲缺月挂秋河
聽得臨風白苧歌
湖水西來流不斷
海潮東去是風波

陌上採桑桑葉稀
家中看蠶怕蠶饑
大姑要織回文錦
小姑

要織嫁時衣

二詩見鐵崖西湖竹枝唱和序云仲瑛才性高曠尤善小
李詩及今樂府海內文士樂與之交推爲片玉山人云

新安梅和張師夔

寶地生春玉氣新
苔煙如霧翠光勻
山僧分得維摩供
二素雲中別有春

謝靜遠惠紙

蜀郡金花新著樣
剡溪玉板舊齊名
荷君寄我黔川雪
猶帶漣漪瀉月聲

謝靜遠惠蜜梅

江南煙雨未全黃
誰使青酸墮蜜房
娥媚已能知魏證
典刑時復見中郎

玉山草堂口占

臨池醉吸杯中月
隔屋香傳藥上花
狂煞會稽于外史
秋風吹墮小烏紗

楊鐵崖玉山記云崑隱君顧仲瑛氏其家世在崑之西界溪之上既與其仲為東西第
 又稍為園池別墅治屋廬其中名其前之軒曰釣月中之室曰芝雲東曰可詩齋西曰
 讀書舍後壘石為山山前之亭曰種玉登山而憩住者小蓬萊山邊之樓曰小游仙最
 後之堂曰碧梧翠竹又有湖光山色之樓過浣花之溪而草堂在焉所謂柳塘春漁莊
 者又其東偏之景也臨池之軒曰金粟影此虎頭之癡絕者合而稱之則曰玉山佳處
 也按名勝集尚有書畫舫春暉樓秋華亭淡香亭君子亭雪巢春草池綠波亭絳雪亭
 聽雪齋白雲海來龜軒拜石壇寒翠亭等處記中不載楊君自為崑山大家亭館有三十六處鐵崖吳詠云三十六橋明月夜姑蘇城裏有瓊花
 末為崑山大家亭館有三十六處鐵崖吳詠云三十六橋明月夜姑蘇城裏有瓊花
 即此謂也今合記中與名勝集所
 載止有二十八處餘皆不可攷矣

玉山佳處以愛汝玉山草堂靜分韻得靜字

蘭風蕩蕩叢薄高宇日色靜林迴泛春聲簾疎散清影褰裳石
 蘿古濯纓水花冷於焉奉華觴聊以娛晝永

次韻永嘉曹新民玉山席上作

詩人得句題茅屋客子乘流泛小舸老眼看花起春霧醉眠
 聽雨響秋濤弓盤舞按銀鵝隊水調聲傳金鳳槽與爾共傾
 千日酒呼童換却五雲袍

以炯如流水涵青蘋分韻得流字

附龍門山釋良琦元璞序云
 去年夏六月十有八日余與延

陵吳伯恭雲臺散吏鄒九成訪玉山草堂主人畱半月酣飲賦詩無虛日當時以爲人生歡會之難未知明年又在何處慨然爲之興懷今年五月中澣復與延陵吳水西隴西李立放舟溪上迂疎散逸其樂又過于前所寓者及視舊所題詩章則伯恭在數百里外雲臺方進漕掾口趨大府以簿書從事得周旋相與談笑者匡廬山人在焉飲散步月以炯如流水涵青蘋分韻賦詩如左書之于卷以示今之所寓者如此而後之所寓者不知其可必不可必也時至正庚寅五月十八日吳龍門山良琦書

幽人雅愛玉山好
官作清酣竟日畱
梧竹一庭涼欲雨
池臺五月氣涵秋
月中獨鶴如人立
花外疎螢入幔流
莫笑虎頭癡絕甚
題詩直欲擬湯休

以冰衡玉壺縣清秋分韻得壺字

附遂昌鄭元祐明德序云至正十年龍集庚寅秋七

月廿有一日吳僧宣無言訪顧仲瑛于玉山時遂昌鄭元祐先在焉匡廬于立彥成則仲瑛之客也款之春暉樓上行酒對奕已而觴詠于芝雲堂酒半興洽分冰衡玉壺懸清秋爲韻相與賦詩以紀一時邂逅之樂仲瑛得壺字詩先成莒城趙善長作畫以代詩坐客不能成詩者各罰酒一觥

鄭玄于鵠本清好
況有名僧侶仲殊
濠上魚肥應受釣
廚中酒熟莫教酤
雨花落座成金粟
露凝寒貯玉壺
更向飛樓賭碁槩
香囊畱得未全輸

以丹桂五枝芳分韻得五字

附匡廬于立彥成序云七月二十五日金華王子克過玉山夜飲芝雲堂上酒

酣賦詩以丹桂五枝芳為韻余得丹字蓋子克黃太史里人又其高第門生也挾所學由京師來就鄉試于南省沂銀河攀月桂且有日故余詩多歸美之是日約琦元璞表子英不至明日二公來遂足韻寫詩次第于後

南州孟秋月維日二十五迴風吹層霄飛雲過疎雨客從金
華來款曲置樽俎況有匡廬仙貌古心亦古襟期事蕭散笑
傲忘賓主哀絃發秦聲修眉善胡舞秋輝能娛人夜色滿庭
戶脩脩風葉鳴泫泫露花吐春波杯中月不照墳上土緬裒
琦龍門扁舟下南浦

以玉山亭館分韻得金粟影

附晉寧張耒仲舉序云至正十

代祀歸至姑蘇顧君仲瑛延于玉山時鄭君明德李君廷璧于君彥成刻君九成華君伯翔草堂主人方外友本元元璞二公酒半歡甚即席以玉山亭館分題者九人予以過賓屬為小引未知昔賢梓澤蘭亭如今之會也耶

飛軒下瞰芙蓉渚檻外幽花月中吐天風寂寂吹古香清露
泠泠溼秋圃雲梯萬丈手可攀居然夢落清虛府庭中擣藥

玉兔愁樹下乘鸞素娥舞瓊樓玉殿千娉婷中有癯仙淡睂
宇問我西湖舊風月何侶東華軟塵土寒光倒落影娥池的
皦明珠承翠羽但見山河影動搖獨有清輝照今古覺來作
詩思茫然金粟霏霏下如雨

以夜闌更秉燭相對如夢寐分韻得夢字

附弋陽山樵李纘序云至正十一年

冬十月廿三日玉山隱君宴其客王德輔胡伯明表子英李纘酒酣忽
鄉雲臺陸良貴泛舸而來隱君復呼酒盡歡匡廬先生以夜闌更秉
燭相對如夢寐分韻賦詩時坐客止八人遂虛二韻夫人生百年憂患
之秋多燕樂之日少而泥友朋南北東西迄無定居則今日之簪盍夫
豈偶然哉弋陽
山樵李纘謹敘

涼風振林木惻惻初寒動肅客桃花源張筵鳴玉洞落日照
金樽飛雪栖畫棟談玄味妙理謔笑雜微諷取琴雪巢彈共
聽金石弄嘉會固難并聚散恍春夢明發大江舟天闊孤鴻
送

釣月軒分題

并序

至正十年七月初五日琦龍門過玉山畱數日將泛蘭
陵之舟而未果十二日起文高先生雨中見過復畱周
旋是日飲酒釣月軒中秋暑乍退雨止復作龍門琦以
舊雨不來今雨來分題余得舊字

秋暑困人如中酒涼雨淒風忽相逗堦下決明花正鮮池上
芙蓉香欲瘦山人欲歸不得歸西夏郎官却相候當軒不復
問寒溫羣口誇詩如健鬪秋娘起拂紅綃袖素壁看題今已
舊舊雨不來今雨來故交那在新交右坐聽飛溜落虛簷侶
與冰絃聲合奏清歡聊欲紀文字長席還當陳俎豆人生有
酒不爲樂何異飛蚊聚昏晝玉山醉倒嵇叔夜紫芝光浮元
德秀君今此行良不苟請君一觴爲君壽風簾官燭暗秋屏
歸期已在黃昏後

芝雲堂以風林纖月落分韻得纖字

附于彥成序云至正十
年七月六日吳水西琦

龍門偕隴西李雲山乘潮下婁江過界溪詩來道問訊玉山主人命騎追
還草堂暖酌芝雲露氣已下微日又在林樹間酒半快甚欲賦詠紀興以
風林纖月落分韻拈題惟李雲山狂歌清嘯
不能成章罰三大觥逃去是日註成者三人

空堂清飲夜厭厭坐久情淡酒屢添龍氣當天河鼓溼翠痕
浮樹月鉤纖梧桐葉落鳴金井絡緯聲多近繡簾我欲分題
紀良集詩成還慰老夫潛

至正十年秋七月十有三日
起文高先生自姑蘇汎
舟攜酒殺過玉山會飲芝雲堂上座客于匡山琦龍
門相與談詩疊疊不絕酒半龍門分藍田日暖玉生
煙爲韻余揆得藍字坐無長幼能詩者咸賦焉

高堂政在玉山南竹色梧陰積翠嵐秀結紫芝雲作蓋光生
珠樹玉如藍每勞飛鳥花間使時有翔鸞月下驂客至酒尊
聊劇飲僧來麈尾聽清談行杯長待纖歌發分韻還將險字
疾佛印固知元九九文殊何必說三三莫忘石上三生約且

盡山中十日酣當檻荷開香屢度隔牀花落雨同麈鹿門何
處真成隱雞舌他年自可含送別江亭一作頭折楊柳西風應愧
雪盈簪

余與楊君鐵崖別兩年矣庚寅嘉平之朔君自淞泖
過余溪上適永嘉曹新民自武林至相與飲酒芝雲
堂明日鐵崖將赴任曹君亦有茂異之舉同往武林
信歡會之甚難而分攜之獨易安可不痛飲盡興以
洗此憤憤之衷因以對酒當歌爲韻賦詩如左于匡
廬屬瑛序數語爲識

江空莫雲合歲晚雪霰多佳人美無度嚴裝徑相過夜宴芝
雲館明發玉山阿繁聲落虛溜急袖翻迴波客有子曹子調
笑春風歌歌終易離別別去愁蹉跎相思梅花發不飲當如
何

是日秦淮海泛舟過淖湖向夕未歸余與桂天香坐
芝雲堂以佇之堂陰枇杷始華爛炯如雪乃移桃笙
樹底據磐石相與奕碁遂勝其紫絲囊而罷于是小
蟠桃執文犀觥起賀金縷衣軋鳳頭琴余亦擘古阮
唯子雖切撮口也酒甚歡而天香鬱鬱有潸然之態俄而淮海
歸且示以舟中所詠余用韻并紀其事云

王子岡頭秋杳冥石牀摘阮素琴停枇杷花開如雪白楊柳
葉落帶煙青每聞投壺笑玉女不堪鼓瑟怨湘靈酒闌秉燭
坐溪夜細雨小寒生翠屏

可詩齋以客從遠方來遺我雙鯉魚平聲字分韻得
方字

附汝陽秦華子英序云至正乙未秋九月平江等處水軍都萬戶納麟哈剌公拜江湖行省參知政事奉旨統兵常鎮時寧海所正干

戶顧元臣在行間越明年二月寧海君由無錫道太湖入杭維時姑蘇樵李之壤杳如吳越音聞不相知者二載今年春二月寧海君以功陞水軍都府副都萬戶奉省檄道天台航海而歸時秋閏九月也玉山嘉子之歸乃置酒會友朋于可詩齋寧海君綵衣金符照耀左

右春卿行酒侃侃餘餘嗚呼父丁之親君臣之義鮮有能兩全者今寧海君能據誠致義陞秩三品居重慶之下奉溫清之養可謂上不負聖天子下不負所學矣座客皆能賦者遂以客從遠方來遺我雙鯉魚以平聲循次分韻予得從字敬序廿六端玉山翁名瑛字仲瑛余則汝陽袁華今年爲至正十七年云爾

海上風颿侶馬狂歸來仍喜佩銀章三年報國存忠直一旦見親全義方祖逖誓江期復晉董徽仗節樂還鄉聖恩已見金雞放醉飲寧辭累十觴

海虞山人繆叔正扁舟相過以慰別後之思余謂兵後朋舊星散得一頃相見曠如隔世遂邀汝陽袁子英天平范君本彭城錢好學榮城趙善長扶風馬孟昭聚首可詩齋內諸公亦樂就飲或攜肴或挈果共成真率之會由是皆盡歡飲酒酣各賦詩以紀走筆而就興有未盡者復能酬倡以樂永夜余以詩先成叔正俾余敘數語于篇首緬思烽火隔江近在百里

今夕之會誠不易得況後會無期乎吳宮花草婁江
風月今皆走麋鹿于瓦礫場矣獨吾草堂宛在溪上
余雖祝髮尚能與諸公觴詠其下共忘此身于干戈
之世豈非夢游于已公之茅屋乎善長秉筆作圖于
卷余索孟昭楷書以識時丙申歲己亥月乙亥日齋
之主人顧瑛序而復賦詩曰

木葉紛紛亂打窗淒風淒雨暗空江世間甲子今爲晉戶裏
庚申不到龐此膝豈因兒輩屈壯心寧受酒杯降與君相見
頭俱白莫惜清談對夜缸

和繆叔正韻

白雲開處見山稜我欲躋攀力未勝歲晚不爲干祿士前身
應是小乘僧竹林載酒邀山簡草閣裁詩愧薛能結習未除
閒未盡焚香且對佛前燈

和柑字韻

一飲寧辭十日酣
濁醪到手味偏甘
新詩謾賦宮槐陌
好事爭傳海岳菴
霜後兩螯看紫蟹
樽前一味出黃柑
料應堂北梅花樹
今歲開時只向南

和馬孟昭韻

淒風何處起
擊柝報嚴更
共此可憐夜
相看太瘦生
燈挑簷雨落
茶煮石泉鳴
猶有彌明叟
聯詩慰逸一作最薄情

呈繆叔正

百里扁舟能作客
入門款語侶無依
阿翁九月新成服
老父三冬未見歸
江上黑風兼雨至
樹頭紅葉帶霜飛
傷心我亦如君切
有子天涯未授衣

碧梧翠竹堂以暗水流花徑春星帶草堂分韻得星

字

附延陵吳克恭寅夫序云己丑之歲六月徂暑余問津桃源溯流玉山之下玉山人館余以草堂芝雲之間日飲無不佳適有客自郡城至者移于

碧梧翠竹之陰蓋堂構之清美玉山之最佳處也集者會稽外史于立
吳龍門僧琦瘍醫劉起吳郡張雲畫史從序後至之客則聊城高晉吳
興郊韶玉山主人及其子衡暨余八十人以杜甫氏暗水流花徑春星帶
草堂之韻分韻各詠言紀實不能詩者罰酒二兕觥罰者二人明日其
一人逸去雖敗乃公事亦蘭亭之遺意也從序以畫事免詩而爲圖
時炎雨旣霽涼陰如秋琴姬小璫英翠屏素真三人侍坐與立趨飲
俱雅音是集也人不知暑坐無雜言信曰雅
哉余延陵吳克恭玉山人名瑛日二十有八

高堂梧與竹
靉靆排空青
涼飈忽飛來
落我生色屏
爲君燕坐列
綺席吳歌趙
舞雙娉婷尊
香翠縷雪齒
齒蔗漿玉盃
冰冷冷人生
良會不可遇
況復聚散如
浮萍分明感
此眼前事鬢
邊白髮皆星
星華亭夜鶴
怨明月何如
荷鍾隨劉伶
中山有酒十
日醉汨羅羈
人千古醒蒲
萄酒玻璃瓶
可以駐君之
色延君齡脫
吾帽忘吾形
美人聽我重
丁寧更借白
玉手進酒且
莫停酒中之
趣通仙靈玉
笙吹月聲冷
冷與爾同躡
雙鳳翎

以滿城風雨近重陽分韻得滿字

附番陽蕭景微序云至正
辛卯余自句吳還會稽飲

酒玉山而別當是時已有行路難行之嘆繼而荆蠻淮夷山戎海寇整日嘯
並起赤白囊旁午道路驅馳鋒鏑間又復相見因相與道寒溫慰勞良
苦玉山為設讌高會梧竹堂上在座皆俊彥能文章歌舞盡妙選客
有置酒而嘆者余笑曰子何為是拘拘也夫天下之理未有往而不復
器之久不用者迫國家至隆極治幾及百年當聖明之世而不靖于四
方或者天將以武德訓定禍亂大啓有元無疆之休諸君有文武才將
乘風雲之會依日月之光且有日余也尚拭目以觀太平之盛何暇作
愁嘆語邪玉山揚解而起曰子誠知言哉于是飲酒樂甚明當重九遂
以滿城風雨近重陽為韻分賦如
左壬辰九月八日番陽蕭景微敘

西風吹長江舟楫幾欲斷仙人遠方來羽服自蕭散頗言官
軍中殺賊盡左袒時艱會面難取醉那容緩菊開重陽華對
酒莫辭滿賡歌雜絲竹言笑亦侃侃月明梧竹間夜色良可款

湖光山色樓口占四首

并序

至正十年五月十八日余與延陵吳水西龍門僧元璞
匡山于外史避暑于樓中時輕雲過雨霽光如秋各占
四絕句云

天風吹雨過湖去溪水流雲出樹間樓上幽人不知暑鉤簾

把酒看虞山

晴山遠樹青如薺野水新秧綠似苔落日湖光三萬頃盡隨飛鳥帶將迴

雨隨牛跡坡坡綠雲轉山腰樹樹齊江閣晚添涼侶洗隔林時有野鷺啼

紫茸香浮蒼筤樹金莖露滴芭蕉花幽人倚樹看過雨山童隔竹煮新茶

以危樓高百尺分韻得危字

并序

七月初五日余會于匡山琦龍門于樓上輕風吹衣爽氣浮動纖月旣出乃移樽樓外閣橋團飲時瑤笙與琴聲歌聲齊發泠泠天表如霓裳羽衣落我清夢遂各賦詩以紀

樓上笙歌合奏時湖山當席最相宜風吹輕袂身疑舉人立

飛橋意不危
蜃氣欲浮河
漢動秋光已近女
牛期潘郎容易
頭如雪且醉花前
雙玉卮

以凍合玉樓寒起粟分韻得凍字

附于彥成序云至正十年冬溫如春民爲來歲癘疹

憂嘉平之望凝雲畫合風格格作老臬聲雨霰交下頃刻積雪偏林野適郊雲臺自吳門張雲槎自茂苑吳國良自義興不期而集相與痛飲湖光山色樓上以凍合玉樓寒起粟分韻賦詩國良以吹簫陳惟允以彈琴趙善長以畫序首各免詩張雲槎興盡而返時詩不成者命佐酒女奴小瑤池小蟠桃金縷衣各罰酒二觥余乃于立得樓字賦詩于後

積雪未消春意動
千里登臨游目縱
月明初度影娥池
曙色稍侵鳴玉洞
佳人象管怯初寒
銀瓶梅萼猶含凍
白髮休嫌舞袖長
張燈夜促飛觴送

以吳東山水分題得陽山

樓曰湖光山色蕭爽夷曠殊快人意憑序云界涇顧君仲瑛有

高一覽吳東山水盡在八席下余與諸文彥因得以適洞心駭目之觀遂卽席用山水命題各賦詩以紀其事時五月底陽前一日也

別起高樓臨碧溪
繞樓青山雲約齊
陽山獨出衆山上
却立陽湖西
復西天風吹山岼
不起倒落芙蓉明
鏡裏影娥池上

曲闌干徧倚秋光三百里白雲不化五彩虹化爲天矯之白
龍一朝挾子上天去霈澤下土昭神功土人結祠倚靈洞雨
氣腥翻海波動紙錢窸窣蜥蜴飛女巫擊鼓歌迎送茲山本
是秦餘杭越兵晝獲夫差王不知誰是公孫聖空谷苔聲吳
乃亾只今此地愁雲黑鐵馬將軍金作勒漢蛇曷一作不識劒雌
雄秦鹿應迷路南北山下花開一色紅花下千頭鹿養茸銜
花日獻黃面老挾羣時入青蓮宮聞道青霜落林谷斤斧丁
丁驚鳥宿千年白鶴忽飛歸失却長松舊時綠君今坐看樓
上頭析韻賦詩浮玉舟憑高一覽青未了底事仲宣生遠愁
明朝更踏東山路傀儡湖中觀競渡酒花灩灩泛昌陽醉歸
扶上樓頭去

柳塘春口占四首

附于彥成序云至正十二年正月下澣春雪方霽飲酒柳塘上春光與春色相盪因詠王臨川鴨綠我爲黃之句

各口占四絕以紀時序嗟乎世故之艱難人事之不齊得一適之樂如此者可不載諸詩墨以識當時之所寓況南北東西理無定止焉知

後之會者歟席上賦詩者三人主則王
山顧君客子英表君余匡廬于立彥成也

二月看看已過半春風尚爾不放晴楊柳長堤飛鳥過鷓鴣
新水沒灘平

溪上草亭絕低小春來有客日相過便須對柳開春酒坐看
晴色上新鵝

鳥啼殘雨適一作過平皋魚逐輕波趁小舠獨愛大堤楊柳樹又

牽春意一作色上柔條

小亭結在灤西頭況復春半雨初收柳垂新綠枝枝弱水轉
回塘漫漫流

以柳塘春水漫分韻得柳字

并序

余去春避地于吳興之商溪始識天民於溪上之大慈
隱寺天民讀書尚節義落落有古人風故與余甚浹洽
及余之歸遠餞于洪城溪亭臨溪泣別則其交情可見

矣今又能駕輕舟歷數百里之險途來問訊余之祝髮
其義之篤情之深非尋常泛交結面者之比也余敬借
此詩美之且以餞其歸以簡無隱老禪求一轉語也

剝啄誰扣門乃是忘年友遠從商溪來過我繩樞牖入門無
一言但覺驚我醜我醜我自知削髮事三有學佛亦何補用
以脫塵垢全我濁世身薦我生身毋羨君顏色好濯濯春月
柳不爲時所趨甘著儒冠守卽今一相見意思兩彌厚春風
吹楊花落我杯中酒願持滿滿杯再起爲君壽君其勿我辭
罄此埽愁帚不聞亂軍中食人如食狗苗獠虐已甚橫殺掠
人婦自古戎旅間此事十八九若以樂土言無出乎湖右未
知干戈世能免餓莩否忍君遽云別更欲周旋久橫塘新水
發舟楫不肖後君今必欲歸爲語無隱叟願施七寶牀大作
獅子吼

漁莊以解釣鱸魚有幾人平聲字分韻得人字

附于彦成序云

至正庚寅七月十一日飲酒漁莊上時雨初過芙蓉始著數花翡翠飛闌檻間漁童舉網得二尺鱸于是相與樂甚主人分韻賦詩主則王

山隱君客則琦龍門于匡蘆行酒

者小璫英余則于彥成弁其首簡

芙蓉始花秋水新小莊落日酒相親漁童樵青解歌舞茶竈
筆牀隨主賓龍門山人碧玉塵會稽外史白綸巾尊羹鱸膾
我所愛吟對西風懷遠人

歛歌二首

附河南陸仁良貴序云至正辛卯秋九月十四日玉山讌客于漁莊之上芙蓉如城水禽交飛臨流展席俯見游鯉日既夕

矣天宇微肅月色與水光蕩搖櫺檻間遐情逸思使人浩然有凌雲之想玉山俾侍姬小璫英調鳴箏飛觴傳令歡飲盡酣玉山口占二絕命坐客屬賦之賦成令漁童樵青乘小榜倚歌于蒼茫煙浦中韻度清曠音節婉麗則知三湘五湖蕭條寂寞那得有此樂也賦得二十章名曰漁莊歛歌云河南陸仁序

返照移晴入綺窗芙蓉楊柳滿秋江漁童歛乃一作樵青蕩舟去驚
起錦鳬飛一雙

金杯素手玉嬋娟照見青天月子圓錦箏彈盡鴛鴦曲都在

秋風十四絃

金粟影以荷淨納涼時分韻得涼字

附于彦成序云夜坐金粟池上涼雨初過荷氣

浮動秋思翛然各分韻口占成詩以紀事時七月十日也

翠沼新秋浴夜光畫闌古

一作芳

樹發天香西風陳陳廉纖雨荷

葉荷花不奈涼

書畫舫和鐵崖韻

玉山主人引婁水其居之西野主為桃花溪厠水之亭四楹上蓬下板俯橋翼然侶艦窗其沈影與波

動若有纜而走者楊廉夫嘗吹鐵笛其中客和小海之歌不異扣舷者之為中無他長物唯琴瑟筆硯多者書與畫耳遂以米芾氏所名書畫舫命之云

春水畫船如屋裏船頭吹笛隔花聞并刀落手碎玉斗柳蜜

分香屬紫雲上客日傳金帖子美人夜織錦迴文高堂醉臥

罷氈月宵信東家帳有蚊

玉山主人與楊鐵崖飲于書畫舫侍姬素雲行椰子酒相與聯句畢鐵崖乘興奏鐵龍之笛復命

素雲行椰子酒玉山口占云鐵笛一聲停素雲鐵崖擊節遂足成一詩俾玉山人次韻并錄于此黃公壚西逢故人坐客各以能詩聞椰漿半斗破明月鐵笛一聲停素雲繭紙題詩寫章草瓜皮看鼎辨周文人生嘉會不有述何異市中羣聚蚊時至正八年以上已日也

以春水船如天上坐老年花侶霧中看平聲字分韻

得如字

附鄭明德序云久以物景艱棘不到界溪溪之上顧君仲瑛甫讀書績學尊賢好士當太平之時無事不過從也睽違幾年

近以嘉平之三日扣君之扉荷君留連不忍言別已而河東李君廷璧甫亦拏舟來訪遂置酒書畫舫夜參半酒已酣析杜律句春水船如天上坐老年花侶霧中看平聲字為韻人各賦詩而俾遂昌鄭元祐為序

為人性癖愛幽居結得幽居畫舫如沙嘴曉風開幔入簷牙

晴日落窗虛廚空尚有仙家

一作人

酒歲晏能來長者車汲澗綆

寒因煮茗鑿冰船發為叉魚米顛癡絕尤耽畫鄭老窮愁却

著書爐篆寶香薰篤耨硯泓春水滴蟾蜍紙浮玉色供臨搨

月吐虹光照卷舒許結老年三絕社須君好事寫歸歟

餞謝子蘭分韻詩

并序

至正戊戌秋九月毘陵謝君子蘭過玉山中謂予言曰
僕旅寓合塘之上今年夏秋苦霖雨田皆白波與陂湖
相通所居復卑下老妻稚子不遑寧處兼乏樵蘇之所
今于泗川里得屋一區主于友人管伯齡其里亢爽宜

禾麥予乃攜硯田而就耕焉故來言別予遂置酒于書
畫舫邀恢公復初袁君子英陸君元祥朱君伯盛以江
東日暮雲分韻同餞余得東字子蘭得江字亦賦詩畱
別餘字各有所屬云

先生祖實康樂公于今爲庶稱老翁派流白鶴溪上住鄉里
羣豪趨下風叩門過我驚我儂一作頭戴笠子心忡忡談空說

有丘壑志抗塵走俗山澤容自言千里竄荆棘此身飄泊如

飛蓬山妻未老髮半一作

已

禿紉鍼主饋全婦功大兒學詩次學

禮小兒五尺儒門童前年去年兵蔽野單堠雙堠人舉烽孤
舟如葉載雨雪朝浮暮泛西復東寒蠅穴窗苑鑽紙泥龜曳
尾生脫筒只今僦屋在美里黍穗雨黑波搖空米如買珠薪
束桂壞壁四立鳴哀蛩杜陵遷居憂國難阮籍命駕嗟途窮
鷦鷯無枝何所寄烏鵲三匝將奚從結心泗川得管子爲借

一畝幽人宮我爲斯文雅識面遲遲細語傾淡衷我開船屋
秋水中綠波碧樹紅芙蓉推窗面面遠山入引鉤箇箇游魚
逢好事獨許米老得清賞當與岑參同畫張神筆駭瘡鬼書
著芸香辟蠹蟲槽頭夜滴百斛酒佳菊爛發花叢叢蟹斫兩
螯白雪滿橘摘並蒂黃金重薦君之酒餞君別莫辭大酌玻
璃鍾君不見繞屋水流流入淞五湖四海三江通君歸只在
泗川上百里那消風一篷君好去莫怱怱足衣足食可御冬
回首虹光貫明月新詩多附高飛鴻

和岳季堅韻

附義興岳榆季堅序云至正戊戌四月余自虎林抵吳城
遂擎舟造玉山草堂以慰契闊畱五日余不別而往與

王叔明張禹錫同寓山寺泰來峯樓居玉山主人與表子英適與相遇
同飲清真觀竹池西軒玉山謂兵甲蜩集朋友星散會合誠難期再
過草堂少爲行樂而科役遽興愁嘆百出叔明亦謂艱難之際交
游之情正宜相勞玉山別後二日即同載如約玉山置酒梧竹間飲散于
芝雲堂前復坐池上書畫舫中翫月啜茶同集者表子英盧公武范
君本余念出處寔起離合不偶援筆賦詩以簡同志并賦云

梧桐葉大午陰垂展席臨風晚更宜客自遠方來不易月從

大一作第海上應遲王猷愛竹非無宅山簡觀魚別有池洗餞政
當傾契闊臨行毋惜重題詩

春暉樓以攀桂仰天高分韻得高字

附豫章熊自得夢祥序
云至正壬辰七月廿六日

余自淮楚來于時道途梗阻雖近郡不相往來獨余以六月達吳凡相知者
莫不驚訝余之迂而捷也越數日即謁玉山主人于草堂中而匡廬山人
在焉相與議論時務凡可驚可愕可憂可慮者不少余乃曰于斯時也
弛張繫乎理不繫乎時升降在乎人不在乎位其所謂得失安危又何
足滯礙於衷邪玉山主人方執玉塵長嘯意氣自如時適當中秋之
夕天宇清霽月色滿池樓臺花木隱映高下是猶天中之畫畫中
之天乃張筵設席女樂雜沓縱酒盡歡同飲者匡廬仙于立彥成表
華子英張守中大本玉山復辟手古阮與胡琴齊絲竹并歌聲相為表
裏釐然有古雅之意余亦以玉簫和之酒既醉玉山乃以攀桂仰天高為
韻分闋賦詩詩成者興趣橫生模寫風景殆無不備復畫為圖所賦詩
于上亦足以紀一時之勝嗚呼于是時能以詩酒為樂傲睨物表者幾
人能不以汲汲皇皇于世故者又幾人觀是圖讀是詩者寧無感乎
余則引其首乃

豫章熊夢祥也

朱樓隔水度飛橋翫月張筵快酒豪同向鏡中看玉兔恰如
海上踏金鰲影搖大地山河動光射玄洲殿宇高明日中秋
湖上去更攜紅袖泛輕舸

以紅藥當堦翻分韻得翻字

附岳季堅序云至正庚子孟夏黃鶴山人岳榆與相臺翟君文中自

吳城拏舟至海虞復過崑山訪顧君仲瑛草堂值春暉樓前芍藥盛開仲瑛重置酒樓上是日雷雨新霽風日淡蕩趙善長折金帶圍一朶插瓶中及以紅白花擎繞攢簇朱伯盛督行酒全集者七人天基道士于方外既伯盛善長先醉仲瑛謂人事惟艱天時自適友朋盡著寧無一語以紀其行樂乎遂以紅藥當堦翻一句分韻賦詩者之中仲瑛子英并榆得藥字詩成爲序其首實四月十一日也

靈雨沐霽景初暎散朝暄林鷺哢餘春砌藥開當軒泣妝露
泥泥舞袂風翻翻流光不我邁久懷遲君論于以樂樽壘于
馬傾笑言

秋華亭以天上秋期近分韻得秋字

附于彥成序云至正十年七月六日玉山主人

置酒小東山秋華亭上歌舞少間羣姬狎坐庭中時夜將半秋聲露氣在竹樹間曲水縈帶山石下與銀漢同流脩然若若人間世因分題賦

韻如左

開宴秋華亭子上共看織女會牽牛星槎有路連雲渡銀河一作
漢無聲帶月流取醉不辭良夜飲追歡猶侶少年遊分曹賭
酒詩爲令狎坐猜花手作闌最愛柳腰和影瘦更聽鷺舌弄

春柔金莖露落仙人掌錦瑟聲傳帝子愁絡緯豈知都是怨
芙蓉莫恨不禁秋碧空珠斗一作紫薇花下微風動重欲移樽爲客畱

七月九日復飲秋華亭上天香襲人幽花倚石時猩

紅輒琴寶笏合曲瓊花起舞蘭陵美人度觴與琦龍

門行酒余爲作詩以紀良會就邀匡山龍門同韻

又到秋華亭子上東山秋一作爽氣正清妍僧一作堦前落葉不須埽

石上幽花自可憐越國女兒嬌娜娜蘭陵酒色淨娟娟淡樽

賸一作盛有清香在畱待瑤笙月下傳

春草池綠波亭以銀漢無聲轉玉盤分韻得聲字附吳

興沈明遠自誠序云玉山顧君仲瑛樂游好奇聞吳興山水清遠嘗放舟
過余水竹居每與登何山泛玉湖輒盡興而返問于余曰子安知吾鄉玉
山月色日接于心目固可樂也抑豈若余來游觀之爲樂與今年莫春
余過吳舍于流水寺仲瑛聞余之至遂入城府相見劇談數日而去
秋八月十有四日仲瑛復以書致余曰當秋高氣爽玉山中能來一游乎
及余來時龍門琦元璞開士先至數日已遂握手入西園歷覽清勝是
夜月魄既滿涼空一碧天香水影交暎上下殆非人間世仲瑛乃張樂置
酒于湖山樓酒半移席綠波池上同席者會稽王德輔從子倫仲瑛之季

晉道仲瑛命小璫華詞箏南枝秀倚曲舉杯屬客曰人生會合不可常
 今夕之飲可不盡歡邪去年茲集如山陰道士于彥成輩今皆在天外
 雖欲同此樂邈不可得乃以銀漢無聲轉玉盤分韻賦詩元璞得銀字
 德輔得漢字仲瑛得聲字余得無字詩不成者罰酒一觥明日詩成
 登卷俾余為小引云余則吳興沈明遠
 自誠也時則至正辛卯中秋既生魄

據牀坐看月華生

一作明

水氣浮空夜氣清蜃闕珠宮寒作市銀

盤玉露靜無聲芳筵累吸杯中物彩鳳雙吹樹底笙不見山

陰狂道士相思只在越王城

次琦元璞韻

附元璞序云去年春余與玉山主者避難于雪上家之舊藏書畫多失去今年二月余自松陵放舟過玉山冲時美

容渚之軒新成主人與余登眺其上洗人心目不覺神情曠然與去年難中不同也及觀所補詩卷因漫製云

去歲一春同作客今春相見却

一作各

身閒亭開翠柳紅桃外魚

躍綠波春草間自笑淵明居栗里也隨惠遠入廬山何當共

下吳江釣坐向船頭語入還

時余舍俗元璞住吳江之無礙寺故云

夜坐口占

虛亭月色不勝寒況坐綠波亭上看啼斷候蛩秋寂寂好懷

正在曲

一作倚

闌于

絳雪亭秋日海棠花

并序

得商鼎靈石者數輩日相玩賞以遣世慮一日同覩此
花于脫葉間露紅蓓蕾于炎風赫日中甚可驚訝後三
日而花大拆一作效乃延汝陽莒城二公魚鼈斫鱸嘗新芻
蓮花白酒與花神洗妝少焉清風南來明月東上頓思
匡山寓于越香山阻于杭龍門歸吳江而無信道路梗
絕莫知何在余子元臣孤身守忠存沒未保向之看花
觴詠者唯汝陽一人而已對花傷感一作懷漸成不樂而罷
酒越五日而河南陸仁良貴太原王楷叔正同舟泊溪
上是晚鬱蒸尤甚而此花尚畱數十朵在亟命書童張
席露坐樹傍相與折花劇飲各詠言之嗚呼花不以寒
暑而間人乃有吳越之阻世殊事異能不慨然余向時

絳雪亭詩卷兵至時爲好事者持去就俾莒城貌圖于
前余賦唐律一首于後請坐客相次以紀時丙申七月
廿八日也

怪底海棠能狡獪今年當暑著花鮮露黏蝶粉生珠一作朱汗日
炙猩紅上紫綿夢斷馬嵬一作嵬坡春信遠神游金谷晚妝妍獨憐
向歲題詩者不見燒燈花樹前

聽雪齋以夜色飛花合春聲度竹淡分韻得聲字

附西

夏昂吉起文序云至正九年冬泛舟界溪上訪玉山主人時積雪在樹凍光著
戶牖間主人榼酒宴客于聽雪齋中命二娃唱歌行酒雪霰復作夜氣
襲人客有岸中起舞唱青天歌聲如怒雷于是衆客樂甚飲遂大醉
匡廬道士誠童子取雪水煮茶主人具紙筆以齋中春題分韻賦詩
者十人俾書成卷各列姓名于左是
會十有二月望日也西夏昂吉書

虛館晝生白飛花照眼明隔簾時有影著地靜無聲夾坐人
如玉淡杯酒屢傾清歡竟成醉淡月破雲生

白雲海銘辭

鄭元祐記云丙申春界溪顧仲瑛奉其母陶夫人避兵于
商溪商溪在吳興東南僻絕處以君平尊賢下士裹糧

具舟相從于溪上者不絕夫人甘肱之味溫清之奉一切如家庭居無何病氣決而卒奉函骨歸葬綽墩之先隴仲瑛念母不見結樓于碧梧翠竹之堂後名之曰白雲海新朝聞君才名將授以祿秋君以衰經固辭祝髮家居日誦大乘經以薦母

虞山幾千疊千疊白雲飛出山變蒼狗入山爲白衣不如化作雙白鶴飛向白雲深處落向余能解說前身不是當初舊城郭

次文質韻

白雲淡白雲淡白雲飛來知我心笑看觸石起膚寸斯須變作漫天陰山人驅雲飛出牖一道龍光射南斗大星落落小星明萬物區區等芻狗舉手招歸懷抱裏三日顛風吹不起怒排雨脚走空來卷入銀河一泓水四野紛紛未倒戈其奈山人不出何有時乘雲釣東海世上空尋張志和萬松嶺上雲如絮天賜山人作霖一作東注明朝說與雲中君白雲之樓是常住

再疊前韻

白雲淡白雲淡高樓結在雲中心樓中之人白雲友日日醉
臥梨花陰大笑白衣對戶牖肘後黃金大于斗草間逐兔縱
得之九鼎熱油烹走狗爭如高臥高樓裏未一作不聽催歸聽喚
起釣竿不釣北溟魚酒杯倒吸西江水何須逐日怒揮戈其
若花開雪落何空將朽索馭快馬籊雲放轡追羲和樓外晴
雲擘飛絮手拍闌干目如注青山排闥四海來面面青山白
雲住

三疊前韻

君不見白雲在山如海淡世人不解白雲心不從神龍降甘
澤肯從靈女爲朝陰又不見白雲出山飛入牖維南有箕北
有斗世人再拜仰天光多挽長弓射天狗月明照見玉山裏
不受輕風易吹起宵淡飛度影娥池影在青天天在水樓下

雞鳴夜枕戈樓頭開一作宴招李何雲車還還衆仙下玉笙瑤
管聲相和翦雪作花雲作絮浪浪酒瀉龍頭注就中誰起壽
主人倒喝飛光酒中住

四疊前韻

玉山盤盤窈且深中有樓兮居山心白雲不斷護巖壑下與
梧竹連秋陰天風吹雲夜開牖城上烏啼擊刁斗芒碭長途
斷白蛇上蔡東門嘆黃狗主人醉坐闌干裏雲影時看一作酒
中起賞春不折背巖花烹茶自汲當門水戰國紛紛競挽戈
縱橫辯口誇隋何黃鐘不作大雅調五絃謾爾張雲和君不
見水上浮萍元桺絮也趁桃花流水注不侶白雲日日間只
伴幽人在山住

來龜軒并序

余自吳興避難浮家而歸玉山佳處無一毫之失忽干

西廡空庭中有神龜大將尺餘四牆無隙不知所來乃
添一小軒扁曰來龜以符龜來之兆及有舊犬聞鬻軍
士之右足環柱不能脫衆槍將及始去匿于田坂中不
能得之余因呼之爲阿義陸君良貴有義犬行因紀龜
之靈故及犬之義也

避亂歸來兩鬢霜春風依舊滿門牆喜看義犬眠花塢驚見
靈龜踞石牀曳尾泥途來遠道負書蓮葉出重光慎須勿落

先君夢自笑一作有義能知五世昌

拜石壇

玉山主人嘗于東城菴假山廢基得一石上有蘇子瞻題識石理瑩潤
類璧雖左旁缺損然尚奇甚博士柯敬仲見而奇之再拜題名

而去字曰拜石御史白野達兼善爲作古篆書之後玉山主人偶得子瞻
荅維揚王忠玉提刑飲快哉亭帖與石上題識相合玉山主人謂此石卽忠玉
家快哉亭物也特不知何以至此玉山主人遂爲記其事倩朱
伯盛刻之他石而與河南陸仁汝南袁華各爲詩詠之

好事久傷無米顛清泉白石亦淒然快哉亭下坡仙友拜到
丹丘三百年

送周仕宣南臺典史分題得芙蓉堂

芙蓉並開開滿堂堂中美人傾玉觴畫船鼓吹弄白日迴風
驚起雙妃央央雙飛出城去池上花開知幾度不聞嬌燕
語雕梁惟有棲鳥啼碧樹空城夜夜明月光照見烏臺臺上
霜翠幙芙蓉大如斗盈盈綠水明新妝鍾山蜿蜒若龍走送
子春江一壺酒他時戴花歸故鄉莫忘江頭折楊柳

送鄭同夫歸豫章分題得洞庭湖

五湖秋水洞庭煙七十二峯青插天神禹書藏林屋裏仙人
詩刻石屏前溫溫玉氣穿靈洞白白銀河瀉瀑泉鴻鴈來時
木葉下送君晨發楚江船

雪霽與鄭九成陳惟允坐劒池上惟允爲寫圖因次

九成韻

欽澗長虹挂淡嶺千尺轆轤斷修一作縣斷綬夜寒月黑鬼賦詩白

日清風

一作日
白風清

人寫影藤蘿陰陰蔓

一作延蔓陰

山椒長松落雪如花

飄煩君畫我掩書臥窗前
更著青芭蕉

游天池

縈紆白雲路窈窕青山
聯秋風吹客衣逸興良
翩翩捫蘿度絕壁躡磴
窮層巔崖傾石欲落樹
斷雲復連兩峯齟牙門
中谷何廓然大山屹堂
堂直欲摩青天小山亦
磊落飛來墮其前陰陰
積古鐵粲粲開青蓮神
斧削翠骨天沼涵靈泉
玉龍抱寒鏡倒影清秋
縣憶昔張貞居寄我琳
琅篇逝者不可作新詩
徒爲傳舉酒酹白日萬
壑生淒煙幽歡苦未足
落景忽已遷美人胡不
來山水空清妍

響屨廊

日日淡宮醉不醒美人
嬌步踏花行鑷鏤賜與
忠臣後葉落君王夢亦
驚

西湖口占三首

湖山堂上看荷花亂舞紅妝萬髻丫細雨霑衣涼侶水畫船

五月客思家

右觀荷
值雨

薄薄紅綃映雪膚玉纖時把髻鬟梳風流得侶貞期子添箇

芭蕉畫作圖

右題叔厚畫
素雲小像

十九韋娘著絳紗金杯玉手載春霞清歌未了船頭去笑買

新妝茉莉花

右戲贈
杜姬

泊垂虹橋口占二首

三江之水太湖東激浪輕舟疾若風白鳥羣飛煙樹末青山

都在雪花中

江風吹颿倏數里野花笑人應獨行更須對雪開金觥要聽

鄰船擲玉箏

發齊門

東方晨星如月明舟人捩舵聽雞鳴自憐不合輕爲客莫厭
秋風攪樹聲

泊閶門

楓葉蘆花暗畫船銀箏斷絕十三絃西風只在寒山寺長送
鐘聲攪客眠

發閶門

閶門西去是陽關疊疊秋風疊疊山便是早春相別處如今
楊柳不堪攀

今春送于外
史歸越上

晚泊新安有懷九成

夜泊新安驛西風八月天人家溪樹裏晚飯柁樓前水落星
移石雲開月墮船遙思佩韋者癡坐不成眠

舟中作

自愛玉山書畫船西風百丈大江牽出門已是三十日到安

恰過重九天青山白水與君賞翠竹碧梧惟我憐近聞海上
鯨波靜爛醉草堂松菊前

次周履道韻

夜泊石湖湖水傷笑容露白蒹葭蒼晝船酒行飛急觴美人
羅袖隨風揚長檠翠幙高高張浩歌起坐秋夜涼明月已在
天中央大星小星光熒煌酒酣不記過船去但聽秋聲響疎
雨夢中化作蝴蝶飛飛入花間聽春語鄰雞喔喔東方曙船
尾浪花風起舞爲君起和夢中詩水氣如煙度秋渚

次龍門琦公見寄韻二首

扁舟遠適越溪濱雙槳驚飛白鷺羣要趁秋江三尺水去看
山寺九峯雲西風網罟沿村集落日鐘聲隔水聞好對黃花
同一醉故園晴色晚如熏

秋花楓葉暗江濱萬里西風鴈叫羣謾是羈情濃侶酒獨憐

世事薄于雲九龍山色船頭看半夜鐘聲枕上聞料得高僧
禪定處松窗柏子起濃熏

九月七日復游寒泉登南峯有懷龍門雲臺二首

春遊憶得到寒泉正值鶯花過禁煙楊柳樓中金錯落琵琶
船裏玉嬋娟潘郎別去渾多病道士重來是有緣今日登高
能作賦雲臺不見使人憐

又向江頭載夕暉好懷每與世相違客中重九明朝是眼底
故人今日稀過雨黃花千藥發經霜紫蟹兩螯肥秋江更待
澄如練擊楫中流緩緩歸

可詩齋夜集聯句

附淮海秦約文仲序云至正十四年冬十二月廿二

修阻舟楫艱難遂假館于仲瑛顧君之草堂而雪霰交作寒氣薄人翌
日夜分集于可詩齋客有匡廬于彥成汝陽表子英吳郡張大本相與
笑談樽俎情誼浹洽酒半諸君咸曰今四郊多壘膺厚祿者則當奮
身報效吾輩無與于世得從文酒之樂豈非幸哉然友朋難必每思
草堂一時諸公出處俱異時郊君九歲則執筆漕臺陸君良貴亦有
漕事之元惟龍門琦公元璞獨占林泉之勝以自適其性情興言若

人又不能不于斯集馳企也因效石鼎故事以紀是集凡若干韻詩成夜漏下三鼓矣序其首者淮海秦終文仲也

今夕乃何夕歲律已云莫更長燈燭明

顧瑛

夜冷冰雪沍滕六

巧薦瑞

于立

封姨怒相妬簪盞各盡歡

秦約

杯行不知數肉臺春

筍纖

表華

法曲冰絃度紅淚泣風蠟

張守中

翠煙積春霧鼎沸雀舌

烹

顧瑛

酒瀉龍頭注呀嚶轉鶯喉

于立

蹢躅躅鵝步燕謔落語窸

約秦驅馳慨行路計窮酋授首

表華

車墜費誅屢風塵闍城郭

張守中

稼穡罄場圃憂傾漆室葵

顧瑛

啖分嬾殘芋天王狩河陽

秦約

臣拒官渡濟時風雲會

于立

曠世龍虎遇前席宣室徵

表華

下詔

輪臺布凱奏杖杜詩

張守中

諫諷校獵賦干羽舞兩階

顧瑛

歌謠誇

五袴時清仰皇澤

秦約

會少憶良晤春冰破微甲

于立

夜月照寒

素雲間鶴鳴陸

表華

吳下書惟顧瘦袁髯侶戟

張守中

短于腹如瓠

張也鄉曲英

顧瑛

秦亦廊廟具孔問郟子官

于立

杜賞已公句睽

違念契闊

秦約

茗芋寫情慄冉冉嘆駒馳

表華

營營笑蚊聚浮生

草樓塵

張守中

虛名日晞露嗟彼噂喅徒

顧瑛

有此和樂孺用繼石

鼎聯聊以識所寓

秦約

與繆叔正聯句

短檠二尺照清酣

顧瑛

圓餅裁肪韭味甘

繆佩

舊雨今為紅葉雨

顧瑛閑雲不障白雲菴

繆佩

范君遠餽吳犍肉

顧瑛

錢老能分林屋

柑

繆佩

今夕共謀真率醉

顧瑛

莫將時事說江南

繆佩

湖光山色樓聯句

附于彥成序云七月十五元璞泛舟下婁江余與高起文先生玉山隱君坐湖山樓上悵然有累卽所

見聯句成律

樓倚清秋爽氣高

高起文

眼明百里見纖毫風行綠野翻清浪

于立

雨到青林起莫濤幾樹好花開別岸

顧瑛

一雙飛鳥趁輕舸龍

門今日婁江去

高起文

會有新詩寄我曹

于立

浣華館聯句

附會稽楊維禎廉夫序云至正戊子六月廿四日維禎與

衛輝高智匡廬于立清河張師賢汝南袁華河南陸

仁謙集于浣花館酒闌主客聯句凡廿四韻主為玉山顧瑛客與聯者維禎立師賢華仁也會稽楊維禎引其首

大厦千萬餘小第亦云甲馬山分玉崑維鯢津類清雪湖吞

傀儡溪立江瀉吳淞狹地形九曲轉賢峯影千丈插斜川萬

桃蒸華小徑五柳夾仙仗撞石檢仁靈洞開玉匣雲停清蔭

初瑛涼過小雨霎鶴舞竹籬維魚亂萍喋捷風顛帽屢欹

立暑薄衣猶袷花憑羸女獻賢酒倩吳姬壓簾卷蒼龍鬚華

盤薦紫駝胛戎葵粲巧笑仁文瓜印微招白鬣魚乍剖瑛紅

蓮米新畝急觴行蒲萄維清池扇蒲簔火珠梅燈燿立冰絲

蓴浹淥雲靄摩乳彘賢琤琤玩腰珥伶班鼓解穢華軍令酒

行法弓彎舞百盤仁鯨量杯干呷腔悲牙板擊瑛調促冰絃

擊客歡語嚙維童酣鼻齁貽酒徹給泓穎立詩成繕書劄

嘔句投錦囊賢披圖出紺笈驪駒歌已終華青蛾情尚狎永

矢交友盟仁銅盤不須畝瑛

書畫舫聯句

三月三日與楊鐵崖飲于書畫舫侍姬素雲行柳子酒遂成聯句如左

龍門上客下驄馬

瑛

洛浦佳人上水簾

瑛

瑪瑙瓶中柳蜜酒

赤瑛盤內水晶鹽

瑛

晴雲帶雨沾香爇

瑛

涼吹飛花脫帽簷

瑛

寶帶圍腰星萬點

瑛

維黃柑傳指玉雙尖

平分好句才無劣

瑛

百罰淡杯令不厭

瑛

書出撥燈侵繭帖

瑛

詩成奪錦鬪香奩

瑛

臂鞦

條脫初擎研

瑛

袍袖弓彎屢拂髯

瑛

期侶梭星秋易隔

瑛

維愁如錦水夜重添

勸君更覆金蓮掌

瑛

莫放春情侶漆黏

瑛

瑛

舟中與陳敬初聯句

瑛

行春橋下看山回

瑛

翠幙紅簾面面開

瑛

立蜻蜒飛入畫船來

瑛

瑛

瑛

瑛

瑛

瑛

瑛

瑛

瑛

瑛

瑛

瑛

瑛

瑛

瑛

瑛

瑛

瑛

瑛



PL
2534
.K8
v. 23


元詩選壬集目錄

馬鍊師臻二百四首

句曲外史張雨一百九十七首

筠溪老衲圓至一十七首

白雲上人英二十三首

雲屋  善住一百五首

蒲室禪師大訢五十六首

石屋禪師清珙三十四首

澹居禪師至仁二十五首

天如禪師惟則三十六首

孫氏蕙蘭一十八首

貞懿鄭氏允端四十二首

安南國王陳益稷一十三首



元詩選壬集

馬鍊師臻

臻字志道別號虛中少慕陶貞白之爲人著道士之懷
於西湖之濱大德中嗣天師張與材至燕京行內醮名
流竝集虛中在焉未幾辭歸手畫桑乾龍門二圖傳于
世嘗從褚雪巘遊肆力吟咏所著曰霞外集淮陰龔聖
子謂其古今體製具在而馴雅如其人同里仇仁近亦
曰遠覽崧岱之雄拔江河濟淮之奔放近挹兩峰三潭
六橋之佳麗秀整交廣視闊胸次宏豁宜其筆力不凡
如此當是時江南甫定兵革偃息遺民故老如周草窗
汪水雲之徒往往託於黃冠以晦迹虛中殆其流亞歟
廬山黃石翁摘其秀句謂如達人不患貧貞女不事媚
靜知春事佳老覺世味熟某丘有樹猶堪宿何處無魚

可療飢瘦梅喜浸古壘盡老態怕著新衣裳後世視此
以爲何如人至云苦心雕琢易出口渾成難道合天心
易篇終鬼膽寒非淡於詩者不能道也

春霽書懷

紛雨洗遊塵潤物亦已足淑氣浮芳鮮山澤一時綠回鴈遠愛
亂流雲高斷續伊余愜所向偶景相穆穆好鳥如含情不語
立嘉木靜知春事佳老覺世味熟遂展平生情誰復辨蕉鹿

五雲山寫望

少乏超絕姿瘦鶴存野格乾坤心自放頗覺塵土窄安得干
金橐使我窮地脈征途多荆榛此志寧復得今晨躋山顛納
納瞰廣陌正東臨大江髣髴海外國孤帆揚長風靜入秋氣
白層巒引列嶂下有雲霧隔不知誰家樓突兀立遠色禹穴
指顧外歷歷禾黍黑簸蕩千古愁人世一過客高歌據苔石

生見日車仄目極窮冥搜一鴈長空沒

遣興

長日閉門坐軒居誰與親鶯花欺白首鮭菜足青春今古斯
文在江湖舊業貧丹心不可道風雨夜來頻

竹窻

竹窻西日晚來明桂子香中鶴夢清侍立小童間不動蕭蕭
石鼎煮茶聲

題墨竹

拂雲標格歲寒心墨色分陰重又輕不似渭川千畝綠只和
風雨作秋聲

偶成

昔嫌上界多官府不道人間足是非四十年來悲喜夢倚闌
閑看柳花飛

春日幽居

淺淺春風尚帶寒日斜香篆半燒殘杏花一樹開如錦怕觸
唬鷺不倚闌

湖中春遊曲

堂堂復堂堂畫鷁誰家郎繡旌鴛頸冷膳府鸞刀光傾椒注
桂邀流芳楚腰絡索聞懸璫篴篴急響如相惱岸頭折盡忘
憂草黃金慣積自媒身隨肩滿席惟嗔老牙籤萬軸齒不拈
孟客何賓跡如埽柳絲撲撲乘風吹花翎小鳥唬訴誰玉郎
沈醉晚未醒春光去矣猶不知

危坐

危坐不覺久月照一庭綠三更白露下夜氣溼野服恬淡失
悲喜視聽非耳目閒將黃庭經更趁月下讀

越中言懷

分甘茅屋老蒼苔不是明時棄不才避社燕歸楊柳合趁虛
人散鷺鷥來半江落日明漁浦兩岸回潮掠釣臺吳越爭雄
俱一夢年年杜若滿汀開

初春卽事

東風又到武林城靜裏看春各有情怕說利名多晝睡夢尋
山水每閑行傍人冷笑營巢燕求友翻憐出谷鷺世事不窮
時易失翠微深處夕陽明

二禽篇二首

杜鵑杜鵑聞爾曾爲蜀天子一自城荒爾身死當年御極日
萬幾何苦今朝自如此恭聞太上垂玄言治大國烹小鮮
流情縱逸不追悔無端却恨春山煙毛衣縵縷滿身黑萬里
岷峩歸不得六合茫茫啼一聲春風爲爾無顏色

鷓鴣鷓鴣不知春色何負汝每到春來聲更苦百年不得此

身安尚憶當時在行旅爾不學大鵬一舉培風兩翼如雲垂
又不學籬邊斥鷃翱翔飛躍蓬蒿枝黃陵廟前幾春草空遺
怨恨傳新詩江南二月煙花亂子子孫孫自呼喚說盡人間
行路難淒風苦雨心腸斷

貴公子

麝沈灰暖瑞煙輕十二闌干轉畫屏翠袖閑調鸚鵡語牙牌
分牘牡丹名半垂簾幕因春冷未放笙歌爲宿醒颭颭流蘇
風不定隔牆時送賣花聲

雪

冷逼街頭酒價高晚來風急更蕭騷青樓醉舞不歸去江上
一蓑憐汝曹

吳江夜泊

不見天隨子令人逸興孤邨砧聲自荅岸鳥相呼河漢回

西極星辰入太湖古情吟不盡明月照姑蘇

宮怨

多愁多怨怕春天
花外時聞警蹕傳
金縷繡衣渾不稱
餘香猶帶御鑪煙

釋宮怨

萬頃恩波一寸心
玉階青草斷車聲
文章近日無人愛
休把黃金乞長卿

張野泉偕虛谷方使君趙春洲數先輩見訪卽席賦詩各以酒字爲韻

幽居扁青春水軒
僅如斗敲門問誰來
過我得良友浮雲無
停陰霽色破古桺
人生不自適歲月欺
老醜欲挽湖水春添
我盃中酒酒盡意不
盡落日照魚笥掀髯
出門去悲歡一何

送郭似山回張公洞

春風吹沙春草長雜花媚煙飛野香幽花裊裊
泫雨色人間光景勞中腸赤城老仙呼鶴起迢迢
直度太湖水玉洞碧桃凝古芳玄扃窈窕羅疏綺
吟詩贈別情相關霧節風幢幾日還歸來無語生
幽寂曉鳩一聲春晝閑

無事

無事每日不出戶滿院松竹森交加晝眠厭聽啄
木鳥早涼喜見牽牛花一真自可了生死萬事不
必論等差誰能屑屑管迎送客來且試山中茶

弔崔雲山

埃風蕩天荒孤山卧秋草君家孤山下不厭孤山
好昔我山中房識君師侍傍白髮映蕉水妙語回
羲皇聞君又絕粒默默宴華室道畢合神風回車
朝帝一制魔誠所難有身良可

歎層陰翳太景平陸翻狂瀾憶君出門去相看淚如雨始欣
天道還逸駕倏飄舉有詩君莫吟有酒君莫斟神交動恍惚
尚想聞空音我歌山日落松聲起寥廓魂兮其有知爲我來
冥漠幽室苦夜長思君念春陽春陽難復見短歌不成章

述懷

家無負郭田何以懷歸耕豈不有他好復恐勞其生窮居四
十年富貴浮雲輕乳鳥喧高枝壯心忽然驚所憂聞道晚德
業將無成言此向知己欲語已忘情

春日寫望

遠山重疊限空明淡拂生綃絕點塵半舸夕陽喧酒客一樓
寒色倚詩人早鶯懷舊隨時至芳草無情著處新却憶城中
有貧者杏花開盡不知春

山中寒食

青陽轉節候雜芳麗原陞山中寒食近嘯鳩亦已急新塚有
人祭古墓無人泣傷心名利骨瑟瑟土花溼石馬悲無聲空
對東風立

春霽陪葛元白遊南山

積雨淹幽事初晴得此晨問舟尋上客放步約同人偶入招
提境如酬宿昔因禪心本無住吾道豈憂貧城郭千年鶴林
丘一聚塵歡娛時不偶激越意空陳路改疑前夢雲孤憶老
親彈琴僧舍晚覓句酒家春間水文輕縠平蕪展細茵目驚
流節駛心醉古風淳久識窮非鬼難言筆有神感淡將下涕
喜極欲忘身蹭蹬繁花老陰沈亂葉新野夫元嬾放杜宇足
酸辛更欲東蒙隱難期北郭鄰有懷聊自適媿爾葛天民

田家

地偏生事僻轉覺入城遙犬吠三叉路人行獨木橋炊煙時

滅沒邨酒自招邀昨日蠶新浴柔桑綠滿條

寄越上友人

分袂沙邊兩歲餘生涯別後竟何如雲迷禹穴無來信秋隔吳山有故居思斷碧天江漠漠吟低白日雨疎疎郊墟昨夜新涼入珍重佳兒好讀書

中秋見月

去年中秋月團團上林藪文士兩三人竟夕坐相守精光浮白空誰見蝦蟇醜觴酌雜歌吟待得下高柳今年中秋月輝輝入窻牖照我如有期怪我尊無酒月是去年月不復去年友人生如風花聚散良不偶賢愚與貴賤肉骨同一朽我今見明月再拜復稽首側聞古老言此言豈虛有正秋三五滿萬里絕纖垢玉兔搗神藥服之壽長久我無周生術安得月在手天梯邈難攀中局欲成疾萬方浩漫漫月輪又西走

秋日卽事

芙蓉涼淺未全紅
稚子攔街鬪草蟲
節物變遷風景在
故園心事不言中

前結交行

古交山上松青青
色不改縱有霜雪侵
節操固常在今交
陌上花容貌相矜
誇一朝風雨至飄
泊隨泥沙陳雷管
鮑世不有一貧一
富難長久對面看
仰泰山下視羣峰
皆培塿嗟來乎嗟
來乎牀頭黃金不
可無君看金盡失
顏色壯士灰心不
丈夫

後結交行

古交皆結心其意
能斷金今交皆結
金倏忽能變心取
舍旣殊軌反掌生
陸沈正平一朝忤
黃祖有若將身投
猛虎子桑莫逆忘
其生乃能相與無
相與古人今人皆
足悲百年憂樂

須臾期男兒節義死不變誰肯心懷未濟時嗚呼誰肯心懷未濟時

聞早鴈

初鴻有餘音老眼無遠光登樓望不極但見天青蒼朝飛秋日短莫宿秋水長不知從此去早晚到衡陽衡陽有故人書札不可將木末避矰繳雲邊足鷹揚中途多苦辛羽翮能無傷望爾三春歸依舊到吳鄉

德清夜泊

遠色變昏晦卸帆依淺沙浪搜盤岸木風逆赴巢鴉細草官塘直長煙野日斜寒機聞夜織燈火是誰家

擾擾

擾擾行塵應接勞繇來斥鷃樂蓬蒿胸中丘壑開圖畫霞外光陰託酒醪未必漢廷疎四皓至今吳地事三高功成便合

言選
誅身退緱嶺春風正碧桃

春日閒居二首

滿院春陰半掩扉杏花猶怕曉寒欺
蘚痕帶露侵棋石山影分雲落硯池
貧久家僮生去意社遲梁燕阻歸期
詩成一餉無人說芳草連天寄與誰

數峰青處敞蕭齋自斫楊枝傷水栽
問字無人攜酒去消閒有客抱琴來
遙汀風急鷺雙起古岸日斜花亂開
袞袞光陰堪一笑城頭畫角爲誰哀

海棠

殷紅含露卧朝寒疑是春工畫未乾
底事詩人吟不穩直須燒燭夜深看

烏夜啼

烏夜啼朝啼東方白
夜啼林影黑關河萬里天
雨霜月冷夜

長眠不得烏夜啼，憐爾巢中黃口時。
哺腥吞腐羽毛長，母子日日長追隨。
一旦離羣自成偶，相呼相喚期相守。
故雄零落不復知，畱得孤雌住衰柳。
柳條蕭颯難棲身，夢驚三月楊花春。
載飛載止情莫伸，欲去不去愁殺人。
不知挾彈誰家子，暴物傷生苦如此。
哀音散入江湖間，老屋破窻燈欲死。
烏夜啼，君豈知？

春遊

園草浮青入杖藜，莫教孤負好花時。
人生屈指頭如雪，消得春風幾首詩。

送梁中砥歸句曲

家住華陽第幾峰，又將琴劍去匆匆。
地浮雲氣連山白，露浴丹光入夜紅。
千里音塵隨斷鴈，百年聚散類飛蓬。
吳頭楚尾關春恨，盡在鶯聲柳色中。

賣藥翁

山人本在山中住偶向城中賣藥去不道石潭龍出雲失却朝來下山處

游仙詞

上清真人玉華仙夜策鸞輅凌珠煙罡風廣漠露華冷搖蕩金鈴聞半天路逢仙姥騎白鹿侍女雙雙散香玉遙看三島點神波恨入秋眉鏡中綠我自無爲神自凝萬竅不動心冥冥靈君期我謁太帝下視濁海魚龍腥玉虛煒燁明玄景羽葆搖搖入空影一曲雲和奏未終月輪已到崑崙頂

楊花

品題曾入百花名長恨濛濛畫不成灞岸雨餘粘穗溼章臺風暖撲人輕緩隨流水知無力閒度高樓似有情想得山齋清影裏亂和蛛網惹柴荆

蝶

曾隨秦女踏青陽
幾被鷓鴣指出建章
芳草夢寒迷碧色
否花雨細宿紅香
粉凝薄翅春無力
恨入修眉晚斷腸
寄語莫尋歌舞處
五侯門第有高牆

睡起

紅葵遶砌竹風涼
睡起呼童上午香
一帶粉牆平似紙
閑研水墨畫瀟湘

秋夜

眼空夜色秋滿城
城樓漏鼓聞四更
杓垂月轉萬山白
坐看天河西北傾

聞鴈

知汝幾時到先令
獨客聞雨昏低度
屋風急亂穿雲
衡岳路猶遠吳江
夜正分如何傳素札
爲我弔湘君

野宿

野宿投邨舍，褰衣度石砭。鄰雞喧莫柵，寒蟹上燈窻。戍鼓凌雲擊，城鐘入夜撞。蕭蕭楓葉下，鴈已過吳江。

題湘靈鼓瑟

沅湘水闊風蕭蕭，水風敲珮天光搖。爲彈寶瑟傳幽悵，一點柔紅瀉香露。蒼梧恨鎖雲欲流，湘花背日烘春愁。人間有夢到不得，仙山翠滑江浪黑。

雨久江邊餞別

別意千重酒暫停，放歌一曲向君聽。家貧禮數多相失，雨久支干盡不靈。古巷聚人祠櫟社，莫潮催客散樟亭。孤帆又傷誰家宿，遙見沙田燐火青。

見桺詠懷

畫船曾繫桺邊橋，歌舞升平樂意饒。事去却憐橋畔桺，春來

猶學舞兒腰

移蘭

幽蘭雜桃李，開花無清香。本具巖壑姿，庶得韜耿光。誤入芳園中，乃覺氣不揚。少年不我顧，志士徒見傷。偶值朝雨餘，
日吉復時良。呼童斲春泥，移根上高岡。爲爾去蕭艾，曉露滋
灤灤。永託松竹陰，爾生豈不昌。細葉舒冷翠，貞葩結青陽。
緩緩趨土脈，慎勿近路傍。路傍多轍迹，曲曲如羊腸。恐爾遭
采掇，委質兒女將。哀哉楚靈均，細佩荷爲裳。斯人不可見，誰
能復其常。遂令薜蘿輩，各自爭芬芳。回看桃李花，零落空嘯
妝。

贈歌者

一聲河滿遏行雲，恨逐飛花委路塵。莫道尊前無淚下，聽歌
不是舊時人。

陪葛元白仇仁近訪南竺詩僧分韻得影字

花開空山春窮幽到絕頂入寺逢遠公頓覺塵慮屏遂作蓮
社遊把酒酌龍井萬生各有態得意還自領此樂殊未極落
日倒林影明朝下山去笑別風篁嶺

憶春

斷畦零落薺花明雨過平湖水漸生坐久忽思春去遠綠陰
濃淡隱嘯鶯

栽孤松爲九華山鍾道士作

九華何崔嵬融結本真宰神器之所鍾雲物足瀟灑挺挺秦
大夫獨立而不改旣出衆木羣豈爲豔陽待初疑凍蛟掉禿
尾忽若山靈張偃蓋又如玄鶴歸來視城郭悵別人間動千
載楚南靈椿浪得名茫茫天壤知何在流精貫浹骨欲飛風
雨或致雷公怪林林紅紫索價高幄錦圍春鬪光彩憐君令
色不隨時空負才名成感慨畱向青山閱古今爲問桑田幾

滄海

吟雪

四山削玉水無波
冷坐孤吟意趣多
未必朱門知此味
紅鑪畫閣正笙歌

野步

野色畫難染
杖藜春水邊
新煙榆木火
遲日杏花天
邨酒傾壺濁
溪魚入膾鮮
人生行處樂
莫負杖頭錢

徐州寫望

并序

舟人云州有三百六十山
四時無草木
樊噲墓凡七處
莫知孰是

三百六十徐州山
骨立天風不受寒
樊侯古塚七抔土
飛沙野蔓斜陽殘
舟人指點向余說
側望淹畱寸心切
欲酌清尊弔古祠
袞袞長河流不歇

新州道中

風沙渺渺客聯鑣時拂吟鞭慰寂寥車道綠綠酸棗樹野田
青蔓苦瓜苗杜陵老去家何在阮籍愁來氣不驕自笑閒人
閒未得得閒終合隱漁樵

汶上卽事

北關言別桺飛緜記得離家月又圓華髮流年身半百黃塵
疋馬路三千戍兵自裹餽糧送津吏遙迎傳驛眠一夜南風
吹汶水古榆溪巷已聞蟬

灤都寓興

昨夜分明夢到家庭前開遍石榴花龍門不放東風過五月
平灤雪滿沙

爲楊簡齋題空蒙圖

西湖天下奇回薄太古色春風散花柳元氣蕩空碧淡然存

早春聞笛

萬里南州客離家又一年春回首舊地笛怨鷓鴣天趁日裁
烏帽尋人賣馬羈歸心憂賦役負郭幸無田

回南

家在錢塘江上春京華投老獨漂零玉泉山外雪猶白金水
河邊柳又青帽底流塵春冉冉花間行李髮星星分明記得
經遊處一路吟詩寫驛亭

途中寒食

行裝迢遞轉孤城一路閒吟緩客程潑火雨晴餉粥冷落花
風暖筍輿輕感時已悟莊生夢遺俗空懷介子情只有嘯鵲
解人意平蕪漠漠雨三聲

吳中

故鄉別久語音訛喜聽吳音入櫂歌萬里歸來心未穩夜闌

猶夢過關河

西湖晚思

日落湖水黑衆山生遠塵船回載酒客樓倚獨吟人老態多
思舊時情只貴新籬邊古梅樹開謝幾年春

拜墓

一別松楸又一年歸來拜埽一茫然老烏下竹窺盤飣稚子
攀松挂紙錢心斷野花春色裏愁生杜宇夕陽邊東風不管
流年事只向西湖送管絃

野外

野外蕭條景夏佳牧童將犢卧晴沙白鷗長遶分魚市紅木
溪藏賣酒家倦向客程添懊惱老看春事厭紛譁田翁也學
青門隱料理荒畦自種瓜

忽憶

忽憶行年五十五擾擾得失枯人腸金魚綠酒我須換蒼狗
白衣誰可量瘦梅喜浸古壘盎老態怕著新衣裳親朋相別
萬里外一字不到三年強

謾成

暖催花雨溼行塵脈脈憑軒欲損神閒憶少年如昨日只疑
樂事是前身黃鸝紫燕春仍好剩水殘山物自新可惜白鷗
波浩蕩扁舟老却釣魚人

傷廢塚

春風習習吹花木千山萬山一齊綠日午諸邨社鼓喧田家
小兒健如犢閒來徒步上前岡累累古塚相攢簇荷鋤老叟
向我言元是前朝貴人族貴人在時勢絕倫後擁前遮來繡
轂并吞鄰土孰敢嗔回山轉水開林麓相連岡幹成一丘斷
斷雲恨埋寶玉大書功德紀豐碑直向山前起華屋子孫擬

作平年計盡是老夫親拭目星移物換水東流泉下知誰伴
幽獨翁仲雙雙賣與人畱得三竿兩竿竹寒食不見紙錢飛
只有嘯鵲替人哭又說東家來卜地役夫日夜喧山谷天理
蒼茫不可知後車須看前車覆

述懷五十韻

昔際承平久生涯足可憐過庭猶昨日騎竹想當年書劒辛
勤歷輕肥少壯僂浪遊春富貴醉舞月嬋娟候轉芳華歇時
移斗柄偏狂歌傷德鳳再拜聽嘯鵲敢議乾綱墜難支國步
顛安危誰可料否泰理相連義士含孤憤謀臣誤大權少微
潛在野太史泣占天不起嚴陵釣空懷范蠡船乘軒猶寵鶴
治國味烹鮮朽木終摧折微軀忍棄捐天兵威武奮皇澤至
仁宣豈意波濤帖還容骨肉全萬方蘇雨露四海戢戈鋌倦
鳥思喬木窮魚守故淵甑塵貧似范晝睡嬾如邊逸翮淹高

翦羸驂恥後鞭夢疑隍鹿在機息海鷗眠喪亂頭顱改蕭條
節序遷行將蠡測海坐待地流泉獻璞悲和泣辭金憶震賢
世途從汨汨王道本平平東魯衣冠盛中原禮樂專遠塵山
出沒大野輒盤旋砧響千門急蟾光幾度圓窺斑嗟隱豹顧
影笑飢鸕古水縈長帶晴雲擘亂絛弓亡元在楚臺迴亦趨
燕羽服陪瑤殿天廚錫綺筵域中知道大物外愧身先歸意
驚張詠離居老鄭虔風行猶有待歲晚薄言還城郭人依舊
湖山景自妍艤舟臨斷港散策陟層巔苑廢移山鬼祠荒謁
水仙壤梁殘白蟻舊物失青瑣落景連邨雨薰風一樹蟬野
茶伸雀舌林蕨豎兒拳挂劒尋新塚懷人歎逝川計疎生坎
壘道直受迍邅穴冷拖腸鼠槎依縮項鰻愁鳴休嚇食饞犬
誤垂涎業在詩三百沽從斗十千舉觴欺大白隱几味重玄
淚盡山陽笛耕無杜曲田苦吟期自放脫橐怕人傳虎變愚

難測龜藏我獨然梅花開又落誰復繼殘編

雙鶴吟寄友人

依依兩白鶴歲久住青田一鶴垂兩翅飲啄沙汀煙一鶴展
長翮冥冥自沖天思之不可見獨立秋風前有時月夜羣動
息孤唳一聲山水碧凝眸側頸復裴回影落空林風露溼故
人獨抱經濟才淵珠炯炯光難埋江南地暖梅花開折花待
君君不來梅花歲歲開又落空向梅邊詠雙鶴

鷺

水風吹冷逼菰蒲藕葉欹斜一半枯玉立鷺鷥渾不動滿身
煙雨看西湖

至節即事

并序 錄七

癸酉歲長至節效王建體偶成絕句十首余年始二十
卽一時之事寓一時之意故淪落不復收今於故篋中

得其舊藁青燈三復如對故人樂天云欲畱年少待富
貴富貴不來年少去乃知年少承平之樂誠不易逢三
十餘年恍一夢寐吁予老矣滿簪華髮投迹空林情之
所來不覺涕下故錄于卷末以重感慨云

天街曉色瑞煙濃名紙相傳盡賀冬繡幕家家渾不卷呼盧
笑語自從容

閒看來往坐多時雨灑香塵土溼微珠翠壓頭行不穩嬌羞
兒女把人衣

昨夜梅花已報春地瓶移插更精神酒酣纖手爭來折鸚鵡
回頭不敢嗔

已有紗籠照舞兒喧喧鼓笛自相隨誰家院落來呼喚門外
天明也不知

簾旌疊疊繡鮫鮪遮護香風不放消却恐酒闌先睡去預教

玉問明朝

新詞聽徹思徘徊侍女擎羹下箸遲紅燭有花心暗喜流蘇
雙挂玉梅枝
店舍喧譁徹夜開熒煌燈火映樓臺歡遊未曉不歸去早有
元宵氣象來

邨中書事二首

餉畱兒女自喧呼指點春禽又引雛邨婦相逢還笑問把蠶
今歲是三姑
軋軋繰車草屋低新篁帶籜出簷齊鷺雛未省逢人避直向
路傍花上唬

春歸曲

平林靜綠生幽芳桃脂杏粉攢蜂房西樓浪客唱別恨屈卮
酒暖珊瑚光百勞畱春春不許愁紫喃喃如寐語翠鴉遊女

卷香歸一夜花神老風雨

雜詠六言三首

堤晚遊人爭渡花密流鶯亂鳴近水亭臺柳色轉山樓觀鐘聲

煙外幽人獨立落日正照平臺野鷺聯翩飛去山雲斷續歸來

楚尾吳頭舊夢水邊山際閒情一夜杏園風急等閒吹老鶯聲

聞蟬

短翼含風薄似秋一聲聲帶夕陽愁年年古柳官塘路催得行人白盡頭

飛霜歌

飛霜悴百草芳蘭亦委柯縱欲努舊力奈此寒風何在昔結

言選
花初豈不受春多恥隨桃李場託迹空山阿四時有代謝陽
豔忽已過薰蕕苦不辨一體同消磨不如牡丹根密幄相遮
羅傷心復傷心傷此飛霜歌

旅夜

自慚身世拙客裏更關情月樹回涼影秋聲疊夜砧道能忘
畏壘酒不破愁城睡薄吟魂冷西風亦屢驚

寄漱川楊如山

吾聞沙丘之馬黃驪牝牡世莫知九方皋去不復有天風吹
我滄海邊忽地相逢釣鼇手論文託契輸心胸傾倒金尊斟
綠酒登高望遠古意多百年之樂能幾何男兒屑屑志不展
秋霜滿鬢空蹉跎酒酣眼極情未畢笑指畫堂歌落日却憐
徐福向蓬丘蒼蒼煙浪無消息明朝挂席我歸來西湖十月
梅花開梅花開動詩思思君不待春鴈回因之一寄平安字

春日獨坐言懷

昔日歡娛憶此身名園歌舞接芳辰
蟄雷夜送催花雨香徑春迷鬪草人
合沓樓臺形勢壯風流鶯燕語言新
眼前舊物渾狼籍休怪提壺勸客頻

桃花

淺碧繁紅又滿枝化工消息本無機
豔滋曉露鶯搖落香漬春泥燕掠歸
金谷園中芳草在玄都觀裏昔人非
自從雲隔天台路劉阮如今夢亦稀

行春

行春無侶自遲留汀草汀花暖更稠
馬接近來成矍鑠謝安應合減風流
乍驚語燕穿人屋無賴游絲絆客舟
老我光陰忽如此不判尊酒復何求

送陳渭叟歸山中

人生少至百一別動經載不信歲月馳請看容鬢改先生本是超絕人長竿學釣清渭濱釣頭不解挂芳餌岸草汀花空復春大魚小魚求不得芒屨忽厭人間窄手攜詩卷出萬山來覓湖邊閉關客終朝相對百不爲口中咄咄唯言詩飛花濁酒日色靜天地悠悠知者誰興盡翩然即歸去鶴巢雛在門前樹他時我亦訪君家但問青山白雲處

閒居自遣

喜無軒蓋款柴荆靜裏天機見物情德愧王良千里馬食無婁護五侯鯖海翁豈爲鷗防慮稚子休烹鴈不鳴一笑行藏頭已白新涼又到讀書檠

歲暮偶成

古人不可見養拙謝時髦隱傷淵明桺飢懷曼倩桃鑿坏誰敢望抱甕豈應逃義見馮公偉仁依范叔豪乾坤心浩浩江

漢日滔滔老境誠難料繁荆未易薳親朋隨宿草歲月掩秋
濤夜短雞籌促天寒象緯高燕情傷局促松節感持操姜被
流離析鄒裾揖讓勞亂雲迷鶴路短髮問魚舫念與追攀絕
心辭寵辱熬世情甘木石我輩豈蓬蒿萬事差池裏長歌對
濁醪

送楊仲弘之京

迢遞官塘官樹陰征鞍催發短長亭荆吳雨漲河流白齊魯
春歸岱嶽青玉宇風雲開北極金臺日月聚文星近聞下詔
求賢急劉向終須論五經

和仇仁近歲莫見寄韻

瑤琴三疊此心閒目送飛鴻信手彈千里故人行自遠一聲
白雪和應難賀公歲晚稱狂客鄭老才高只冷官且向吟邊
了身世西山暮雨卷簾看

越上感懷

曾負琴書到越中別來三十五秋風江山有待容回鴈歲月無情類轉蓬禹穴荒煙寒木老鑑湖舊水野田空騎鯨人去知何在擬向沙邊問釣翁

憶孤山

自從梅樹委荒煙湖上風光不值錢見說年來春好在擬攜尊酒報啼鵲

冬至卽事

結屋傍湖水對門三四峰心灰無復煖鬢雪近來濃孤鴈雨中過短書燈下封平生故人意衰老不相從

題畫卷

翠疊洪濛色雲凝淡沲春高寒不可到應有採芝人

爲翁子善作晴江圖

故人遺我清江縣裏一疋紙白光晶熒心所好幾欲寫作晴
江圖塵土昏人意不到竹風入戶忽然鏗夏琅玕聲爲我胸
中埽煩躁濡毫埽素遊其神乃悟周穆王時西極之化人但
見重巒列嶂盤春轉碧應接來不斷滄浪之水倒影翻青春
風檣沙鳥紛入眼物色明麗不可陳因思神禹功疏鑿本天
意愧我一寸筆浩浩逼茫昧又疑此水通星河八月秋風揚
素波君若乘槎訪牛渚爲言博望成蹉跎嗚呼雲邊縱得支
機石成都卜肆今日無人識

水軒夏日

碧窻晝寂幽意長竹陰滿地琴尊涼輕雷送雨遠不到雪白
水花生晚香

寄籌峰林芝巖三首

小院回廊日正長綠陰幽草自生香春風老矣猶多事時送

飛花出短牆

市聲不到野人居
滿院花陰晝睡餘
偶憶新城羅給事
枉將心力著讒書

青鞵布韉厭趑趄
官向何門學曳裾
錯爲黃金換詞賦
一生惆悵馬相如

雜詠三首

幽芳泣露質好鳥
飲春聲盡向東風
裏悲歡各有情
榮貴如風花安得
長美好馮唐不解
事却恨髮白早
涼露老荷葉蓮房
亦已空可憐紅蓼
花搖搖受西風

山居寫興

人事喧喧任奕棋
青山數畝是歸期
分將藥草鋤雲種
買得松杉趁雨移
老去故人多入夢
愁來閒事總成詩
芒屨布韉身猶健
十里莎隄信杖藜

湖山春遊莫歸偶作

西月光景微斜簷尚如練攬衣昧旦起林巒淡方見景風積
霧斂曙牖新禽轉塵動九衢喧爛爛流目眩遊行惜歡悵行
行信郊甸遺情席細草賞靜引華饌山水信恬和動息各恩
怨雲斷舊時人梁回去年燕姿容一已晚浩蕩羣芳變豈不
懷爾思狗往何由羨

題畫龍門山桑乾嶺圖

昔我經龍門晨發桑乾嶺回盤鬱青冥驅車盡絕頂驛騎倦
行役苦覺道路永引領望吳楚日入衆山暝歸來愜棲遲山
水融心境寸毫寫萬里歷歷事可省理也存自然疇能搜溟
滓

題畫海南入貢天馬圖

傳驛每
喂梁肉

余吾天馬生水中毛如潑墨耳插筒雄姿挺挺浴海氣一刷

萬里追遺風九夸入貢賓來服畫出猶能駭人目韓子休教
喂地黃太僕能令飽梁肉誰憐東郊瘦馬碑兀如堵牆汗血
力盡德不揚尚望明年春草長

寒食日

密竹疎簾春晝疾風甚雨滿江南又逢寒食一百五不覺
行年六十三楚女腰肢從妙舞晉人標格祇清談不勞燕子
終朝語冷暖時情我自諳

讀秦紀

六國爭雄事已空南遊勒石紀成功早知三月咸陽火不買
魚燈照夜宮

嗟餘春

春雨足春水滿岸花匝匝光風暖人間杜宇最知機唬得血
流春不管迷芳著物苦忘歸直待楊花似雪飛多少好懷成

別恨餘香沁入野薔薇

題溪山訪友圖

溪風吹長松石路秋影薄下有尋幽人支筇注林壑良朋眇
何許雜樹森草閣畫師發淡機筆底氣參錯我昔事扁舟頗
識山水樂于今日月駛此景亦蕭索愧乏買山資老負宿昔
諾展卷令人嗟高歌激寥廓

湖樓夜坐

孤樓侵樹小老鴈入雲迷月暗水光白夜淡鄰語低鐘聲傳
下竺梅信失西溪偶憶曾遊寺塵昏壁上題

田父詞二首

龍鍾田父住溪邨桑柘岡頭石路分猶領兒孫到城市向人
聽讀勸農文

處處叢祠鼓笛喧已占蠶麥十分添醉騎牛背歸來晚亂把

山花插帽簷

春日偶成六言二首

兩袖水風春冷一抹山煙晚晴小檻倒披花影歸船遠送歌聲

燕拂花陰繡轂人指簫聲畫樓楊柳六橋舊夢夕陽一段新愁

春日閒居雜興四首

宿雨兼風釀麥秋餘寒欲斷自遲留杜鵑唬得百花盡却向綠陰深處愁

茶香庭院一枰棋柳影侵階日自移因見刺桐花滿樹等閒憶得故園時

綠波如染帶花流陣陣魚苗貼岸遊日莫畫船歌舞歇春聲散入錦纏頭

花底飛觴酒浪翻
纔迎春至又春殘
日斜客散鑪煙盡
自洗瓷瓶插牡丹

春江言別口占

送子清江皋
江烟黯行路
鳥嘯山隱春
潮長人爭渡
世上無別離
何由髮垂素

偶成小軸山水寄仰山長老熙晦翁

南山每獨往
問訊西隱樓
清陰藹喬木
天風忽涼秋
歸舟泝平湖
遙見仰山月
月色如德人
萬古光不滅
素練不盈尺
寫此千里心
欲知相憶不
明月是知音

題李安忠畫雪岸寒鴉圖

北風萬里吹石裂
古樹槎枒摧朽鐵
羣鳥啞啞如苦飢
倦飛還向空林歇
孤邨荒寒得食遠
日莫沙邊啄殘雪
回情訴意各有態
羨殺畫師心更切
我嘗記得天隨詩
至今讀之長激

越婦女衣襟便佞舌始得金籠日提挈老鳥老鳥爾身毛羽
黑離離况復人間厭爾嗥何不飛鳴丈人屋丈人屋頭春柳
綠

題畫雜詩六首

岸水依痕釣艇閒炊煙幾處出蘆灣西窗正是斜陽好一帶
泥金抹遠山

月華如水天如空蒼煙遠樹涵秋容筆頭墨盡意不盡參錯
雲山三四重

數點寒鴉水遶邨幾家茅屋掩柴門白頭溪叟歸來晚自把
漁舟繫柳根

輕雲漠漠天影空江邨雨過生微風似嫌野外春淡薄故點
桃花淡淡紅

春陰淡蕩歸帆急疊嶂層巒凝空碧知是夜來風雨淡邨外

野橋低二尺

採菱渡頭秋日晚孤樓隔岸知誰家參差遠樹雜雲氣滅沒
漁舟侵浪花

送江西熊履善茂才之金陵

君向秦淮我在吳柴門白髮老西湖書來莫附洪喬僂只道
經年一字無

西湖春日壯遊卽事

并序 錄二十四首

延祐戊午春偶以釣槎之暇因念西湖春日壯遊尚歷
歷然睂睫間光陰幾何余矍鑠矣遂成七言二韻詩三
十首以寫幽懷後我之生或不我信儻遺老覽之則將
同一興感焉

遶湖無處避芳塵疊鼓紅旗彩鷁新冉冉春雲來不斷涌金
門外踏青人

霍山廟食慶流虹
民物謳歌樂歲豐
七寶社回呈了馬
年年歸路雨和風

南屏山色染春煙
路接高峰社鼓喧
第一橋邊春更好
御舟閒在翠芳園

問誰偏解占風光
飛蓋金鞍白面郎
山北山南遊欲遍
畫船教艤集賢堂

瑞煙祠宇隱垂楊
士女穿花語笑香
三十九賢生翠碣
虛舟亭上借傳觴

鏤玉雕瓊簇開竿
珠花翠葉縷金籃
東家年少貪遊冶
正值明朝三月三

流蘇兩兩挂船頭
繡額珠簾不上鉤
金縷緩歌家宴靜
午前先入裏湖遊

紫染春羅窄袖裁
伶人楚楚自詼諧
部頭教奏金娥曲
盡向

船棚一字排

笙歌簫鼓沸春濤耳目難禁應接勞院落鞦韆誰氏女綵繩
擲起過牆高

萬柳搖金接畫橋一清堂外景偏饒文章太守開華宴預報
龍舟奪錦標

歌妓娉婷畫不成去年初籍教坊名新腔翻得梨園譜喜入
王孫喝采聲

園丁花木巧栴栳萬紫千紅簇綺筵折得青梅小如豆獻來
還索賞金錢

揉藍染水翠浮山隄上亭臺錦繡閒花柳禁人攀折去要畱
春色大家看

進餘薇露與流香散落人間任品嘗處處旗亭招客醉大書
不是趕春場

三言
珍禽翠羽養雕籠
列向船頭盡不同
憐殺錦鷄偏解語
喚人提挈避東風

豪家遊賞占頭船
趁得風輕放紙鳶
手拍絲輪爭上下一時
回首看青天

嬌民技藝也天生
鬪巧搜奇事事能
稚子土宜偏劇戲
浪兒黃累十三層

一路亭臺閒酒家
漸看楊柳綠藏鴉
太平官府無民訟
補種沿隄四季花

畫船過午入西林
人擁孤山陌上塵
曾被弁陽模寫盡
晚來閒却半湖春

要囑園丁取折枝
紅桃白李紫薔薇
石畝橋畔人煙晚
挑得春光一擔歸

遙看暝色下漁汀
金鴨香消酒半醒
倒轉船頭元有意
檻邊

人報放流星

天街夜市已喧闐半掩城門玉漏傳籠燭絳紗爭道入湖心
猶有未歸船

送得春歸夏又初名園不放玳筵虛只知富足家家事肯爲
兒孫教讀書

慣見升平春復秋分明往事昔年遊西林橋外青山色幾度
夕陽人白頭

幽居

一徑荒涼長碧苔竹門斜對遠山開自操清白傳家譜不受
青黃致木災穴鼠苦銜詩藁去溪螯喜薦酒尊來東籬滿地
金錢菊多謝西風爲翦裁

題唐十八學士圖

唐家天子尊黃屋大業隆興調玉燭當年十八登瀛仙弘文

日侍分三六兩京初定四海清君聖臣賢古難續立本圖眞
亮爲讚遂令書府藏諸櫝後有龍眠傳此本禮樂衣冠激流
俗自從淪落向人間畫手紛紛互翻覆千年事去君莫問畱
得青編遣人讀蕭蕭馬耳射東風長安道上春山綠

謾成四十二首

錄十二首

徑曲交加鎖竹陰不教寵辱到林扃心閒莫道渾無事粉落
松花汗鶴翎

參天楊柳手親栽一院西風戶牖開落日尚餘三四尺山平
水遠看秋來

小春天氣未生寒綴樹朱櫟正入看昨夜海棠開數朶一雙
蝴蝶上闌干

新霜尚薄樹聲乾寒水無痕倒浸山知是釣船歸較晚鷓鴣
嘎嘎起蘆灣

飽霜紫芋細凝酥旋撥寒灰出地鑪慚愧鄰家新酒熟客來
酤得滿葫蘆

蕭蕭野老髮垂肩家住湖西杜若煙載得茭根入城賣西風
落日滿歸船

風琴流響韻虛堂湘簟欹眠水一方靜裏數聲棋剝啄乳鷺
淡向綠陰藏

槐陰滿院喧巢鴉蜜房香老蜂趁衙鄰家艇子釣魚去水光
搖動金蓮花

北風小雨戒新寒隔水楓林葉已丹莫道閒門知己少白鷗
飛去又飛還

燕山楚水曾爲客慣聽霜砧擣月明不似新愁怕新鴈秋風
吹落雨三聲

晴日穿花煖似烘風簷微動玉丁冬山童睡起心無事所得

筇枝補鶴籠

雲歸雨歇湖水平
五色蟠螭山邊明
唱歌舟子採菱去
十里桺隄蟬亂鳴

次筠軒詩韻

幽軒列萬竹
愜此冲澹襟
乃知心跡遠
不在山林深
客散動秋影
鶴歸分夕陰
至樂寓言外
任鼓昭文琴

畫意四首

紅塵海裏嬾低顏
石路迢迢入亂山
擬向雲邊種黃獨
幾時容我屋三間

江花江草映江樓
寫出江天一片秋
隔岸小橋低數尺
淡煙消處見漁舟

幽人自樂山中趣
閒訪山家入山去
記得西峰阿那邊
亂雲遮斷無尋處

緣溪路滑蹇驢遲水色山光總入詩還勝襄陽孟夫子滿身
風雪灞橋時

和山邨見寄詩韻二首

休將野服染緇塵大患須知爲有身藥餌任從畱過客是非
終不到閑人山中相隱懷弘景谷口躬耕羨子真午睡醒來
春事晚枝頭梅豆已生仁

不成一事鬢先皤朋友惻惻喜琢磨千里音書歸鴈少滿城
風雨落花多迸階新筍微過竹脫繭春蠶欲變蛾惆悵少陵
身老大壯心激越醉時歌

浙江晚眺

昔年吳越事并吞畱得青山只斷魂落日正明漁浦渡歸鴉
遙點茆家邨雲分雨脚回沙渚帆趁潮頭出海門欲問淒涼
千古意鴟夷何處有兒孫

言
元言選
秋日閑咏

西湖晴雨畫圖閒坐倚闌干自解顏無酒可供千日醉有錢
難買一生閑草衰春色來時路鶴宿秋聲起處山橫笛吹殘
天又晚釣舟燈火入蘆灣

集句和陳渭叟見寄詩韻二首

寒食離家麥熟還不應空老道途間會須伐竹開荒徑剩著
溪南幾尺山

池邊月影閒婆娑卧聽行雲一曲歌閒憶昔年爲客處囊中
無物只詩多

集句遣懷

嬾慢無堪不出邨當年心事與誰論如今老去愁無限雨打
梨花淡閉門

句曲外史張雨

雨字伯雨一名天雨別號貞居子錢塘人宋崇國公九
成之後也年二十徧遊天台括蒼諸名山棄家爲道士
登茅山授大洞經籙開元宮王真人偕之入京璽書賜
驛傳欲官之自誓不覲出往來華陽雲石間作黃篋樓
儲古圖史甚富世稱句曲外史至正間卒于開元宮齋
舍外史風裁凝峻趙文敏公一見而異之授以李北海
書法范德機以能詩名外史造焉范適他出有詩集在
几上外史取筆書其後爲四韻詩守者大怒走白范范
驚曰我聞若人不得見今來天畀我友也卽日詣外史
結交而去由是外史名震京師一時袁伯長馬伯庸楊
仲弘揭曼碩黃晉卿諸人皆爭與爲友他日謁虞伯生
虞問能作幾家符篆乎荅曰未也虞連書七十二家示

之外史下拜曰真吾師也自後與虞手札必執弟子禮
晚年尤爲楊廉夫所推重吳郡徐良夫序其詩曰虞范
諸君子以英偉之才諧鳴于館閣而流風餘韻播諸丘
壑之間外史以豪邁之氣孤鳴于丘壑而清聲雅調聞
諸館閣之上雖出處不同其爲詞章之宗匠一也夫以
方外詩人而與館閣詞臣相頡頏寧非一代之盛歟

天池石壁爲鐵雅賦

嘗讀枕中記華山閼中吳神泉發其顛青壁繚其隅春風四
山來羣綠互紛扶羽觴曲折行浮花與之俱採芝搴薜荔洗
玉弄芙蓉聲叟頗好名石窪作魚湖鴻乙志草堂挑煙遂成
圖而此滌煩磯閱世如樗蒲發興雲林子盥手與我摹居然
縮地法挈入壺公壺

次倪元鎮遊虎丘

振屐稍踐危援藤遂支滑尚餘金玉氣山川相映發小吳不
滿眼軒中樹如髮花覆闔閭城石繞生公榻適與幽人攜及
茲莫春月坐久得忘言移鞍蔭清樾

夕佳樓

西山朝爽氣南山夕氣佳朝爽人共忻夕佳吾所懷山僧閱
世久結廬深避乖蕙樓將對峙菌閣亦雙排維南列崇阜不
受煙嵐霾我亦遲莫人心跡倦鳥偕茲焉寄高躅庶與靜者
諧

題墨蘭贈別于一山之京師

三月愁送客春寒雨如霰冥冥返塞鴻悄悄棲梁燕揚帆五
十日蓬萊望中見欲持猗蘭操一奏南薰殿

張師夔畫謝家池塘

春風颯然至幽人午夢醒遙見池塘綠不知春草生如何騎

馬客亦向夢中行

濱洲雲巢圖

張彥輔畫

蒼山不受寒裏以白兜羅借雲以爲煖我意不在多小營丹
鶴巢高棲翠雲柯飛仙度鸞笙老人臥雞窠誰能江海去風
雨一漁蓑

寄題劉彥基丹室

昔聞沖虛宮遠在錦江頭往來多異人東望不可求借問鴻
寶書枕中今在不尚餘一丸藥光景夜不收食之生羽翼飛
去十二樓下視何蒼蒼至情難久畱我將拾瑤草遲子於玄
洲

次韻晉卿翰林贈陳秉彝

金華黃太史出爲儒臺冠詩文齊六經奇古誰敢傳如掇明
月珠妙在九曲穿而子工筆札狗監非所薦挈之登龍門果

獲尾時彥孜孜勤執經矻矻勞染翰敏手不暇給精華且屢
換憐才吾輩事子乃羞自獻由茲數來往無事輒相見湖嶺
錯縈紆煙霞爭變幻一夕快雨餘春物已消半言歸天台奧
俄頃語離散此手不易執明日柁樓飯迢迢望白雲瀑布聲
許悍赤城跨滄海朝霞以爲岸儻遇仙者徒勿易樵牧賤予
衰志求道千載猶莫旦老經三百家一一理殘卷霜毫犯冠
籀墨汁滓衣汗何功使願果盡力輸老腕子書能瘦硬淚眼
秋隼健唯餘篋中字照我目光爛送子望崖返回目窮海甸
春夕豈不短反側移漏箭纔夢金庭游還逐濤江亂游知家
庭樂旭日陰始泮身扶老人杖衣憶慈母線還期當及時遲
子秋水觀栖栖寡儔侶孤坐至日晏追步太史作用以申繼
緒

遊龍井方圓菴閱宋五賢二開士像

獨尋招提遊果得世外歡昔賢所棲集畫像藏屋端山僧啓
鎖魚不待啜茗乾修廣各異製精采俱生完堂堂蘇長公英
氣邈難干筇杖紫道服天風吹袖寬清獻薄鬚眉示我鐵肺
肝尚餘所施物片石櫛而寒侍郎胡金華高括侍中冠眉間
可容掌手版出中單潁濱與淮海秋色亞層巒參寥獨緇衣
頷髭茁茅菅最後辨才師文茵高座安空山一室內舉目皆
龍鸞再拜傾挈壺喜極重悲酸去之三百載歸路何漫漫斯
人爲列星下視蟲沙繁寧不念學子道術救彫殘抵舍亟摹
貌微哉難控搏夢中儻未遇展詩時一觀

無波古井水

古井何泓然不食自甘冷去來絕攀緣挽斷轆轤綆唯有中
宵月圓中時照影

清權尊師集中覽庚戌見裏一詩感念今昔自傷之

情

天旣勞我晚不如早息我奚止七不堪于世無一可空山酒
半瓢禿髮花三朶平生仲長統誰能曲如鎖

種樹

植梓五十本移松八百栽山靈借好雨侶爲道人來青意爭
鬱勃細聲亦吹洒松如稚子長梓長未盈把吾衰詎能待將
以蔭來者

三月十三夜對月

幽篁不見天況乃見月色晴來春尚佳豈不有餘日離離花
氣上稍稍簾陰直啼鳩夜不眠聲欲碎岳石聞聲思逾寂悟
賞在茲夕

獨行

春泥未成沙曳屣柔且平春風不鳴條振衣涼且輕我意本

靜愜中林便獨行松蓋無曲影水樂皆全聲踽踽迫前岡悠
悠度斜阮老樵眼如猫見我不問名直贈金光草疑是古先
生

倪元鎮玄文館會飲

親知貴浹密屢此良譙會堂陞自崇廣促席歸臥內說詩盛
使氣屈折高李輩更端輒笑謔知節已沾醉玲瓏簷花亂蕭
屑風竹碎政使韓伯休移牀夜相對

奔月卮歌荅鐵雅所作

甕社明珠奔入月脫殼政似風蟬潔漁網出之不敢視滌盡
含沙光不滅文昌四星吞在腹一一金晶大如菽蜃物還來
作飲器日夜雄雌繞林一作如屋一扇桃核寬有餘半葉蕉心

卷未舒飲非其人躍入水怪雨盲風生坐隅置之天上白玉
盤斗柄挹酒長闌干李白跳下鯨魚背持勸我飲相交歡幽

宮馮夷爲予泣酌盡海水百怪出還我平生老蚌胎許君醉臥鮫人室

玉笙謠爲鐵門笙伶周奇賦

我有紫霞想愛聞一作君白玉笙懸匏比竹無靈氣昆丘採此十二莖鳳珠銜明珠鳳翼排素翎金華周郎妙宮徵子晉仙人初教成月下吹參差羣雛亦和鳴緱氏山頭白雲起七月七日來相迎長謝時人一揮手飄下滿空鸞鶴聲

墨龍

高昌世子寫墨龍此龍乃出開元中東井水與天河通龍下取水遺其蹤道人識爲黑一作墨帝子逃入世子之筆鋒井頭夜半飛霹靂元氣淋漓雪色碧一鎖銀牀五百年纔點目睛生羽翼

聽雨樓

雨中市井迷煙霧樓底雨聲無著處不知雨到耳邊來還是
耳根隨雨去好將此語問風幡聞見何時得暫閑鐘動雞鳴
雨還作依然布被擁春寒

遊惠山寺

水品古來差第一天下不易第二泉石池漫流語最勝江流
湍激非自然定知有錫藏山腹泉重而甘滑如玉調符千里
辨淄澠罷貢百年離寵辱虛名累物果可逃我來爲泉作解
嘲速喚點茶三昧手酬我松風吹兔毫

趙千里聚扇上寫山次韻題

翠水丹山氣旁礴幾疊香痕經手握何年破鏡飛上天吳淞
水翦并刀薄江南寶繪多遺餘王孫不歸恨蘼蕪蘼蕪消歇
秋風起班姬爲我歌烏烏

王時敏聽雪齋

頑寒鼻鼻河流澌銀濤鐵騎交奔馳瓏玲淅簌瓦溝滿坐窗
已有幽人知東家暖客紅醅凝嘈雜新聲迷聽瑩後園壓折
萬琅玕雪多政自無人聽我時空山夜寂寥風篁雪竇篩瓊
瑤希聲疏越不可盡鳴球戛擊如聞韶憶昔齋居困學翁大
書聽雪煩楚龔百年勝事將無同不傳師曠傳王恭鶴氅明
朝行雪裏須辨龍頭煎雪水牀下何人聞鬪蟻喚起春雷來
洗耳

用韻送淨月上人

陰崖顛風無時興篁竹偃地虎晝行斲冰積雪臥空谷春至
唯聞禽鳥鳴華陽南僂洞窗小香煙西放蛾眉道神僧問訊
破孤寂把臂入林一傾倒帕頭蒙寒驢背馱泥滑穩于杯渡
波寄謝少年王敬和獨行其如法汰何

效隱居擬古樂府寒夜愁

夜寒生羣獸驚寂兮寥兮栖遁情陰宮漫漫落葉平岡頭霜
月弄微明寒漏澁寒絃緊愁腸結一作斷愁語盡人生異木石思
來誰能忍

次韻率性來山人見貽之作

南峯後靈石前嵐霞舊綯爭春妍貧家客來淨埽地亦有一
瓶紅杜鵑東坡七過山南塢山人能記坡翁語君方騎馬聽
朝鷄爲我入林來聽雨雨聲吹斷聽松聲怪石長松爲友生
憐君慰我支離者不飲向人空復情我如病馬離羣去君如
伯樂能相顧羊羣好在金華山夢裏相逢猶識路

早春對雨雜言

寒谷望春如望赦雨雨風風惡相嚇牀頭敗絮未嘗溫石上
瘦花渾欲謝三時儘辨禽鳥鳴合澗助爲風水聲白水田頭
漫無路老稚種麥已青青朝晴獨見扶犁叟人生合作無犁

耦不須識字只耕田酒杯也到扶犁手

風雪中得金陵諸公詩二首

雪作衆禽驚窗幽亂霰鳴愕然身獲落莫矣歲崢嶸松竹聊
娛拙乾坤若忌名故人不相貸書札到柴荆
落木從風靡支流趁谷斜山空不須說歲去若爲遮飢雀掃
窗紙寒魚嚼雪花推書更清坐席煖到昏鴉

湖寺擁碧軒

喧寂一塵隔湖濱出寶坊荷陰分補衲水氣雜燒香書勘烏
皮几茵敷白氎牀從來已公屋詩客許徜徉

寄洞庭王子正

一作聞洞
庭之勝

洞庭山似簇銀闕翠芙蓉安得滄浪子同尋縹緲峰魚龍隨
水落橘袖待霜濃未必桃源似雲帆躡去蹤

齋居偶興

絕澗多靈石中開小洞房醉醒依竹素晴雨看梅黃樹暗鶯
聲澁巖虛水韻長未能超賈馬自足上羲皇

午日簡楊廉夫

客有擁琴至吾寧折簡招足音垂谷口雨氣截山腰酒倩紅
泉瀉花爲絳節朝不嫌泥濘極一舸段家橋

雨中

推枕遽然覺高齋人跡稀卷簾芳草短看雨杏花肥薄莫寒
仍在中林願稍違一遷隨谷鳥喬木是耶非

除夜

忽忽歲云莫徒興白首嗟山畱待伴雪春禁隔年花把卷因
遮眼分飭且膠牙自緣身懶惰莫遣送窮車

澗北梅三月始華

陰澗殘梅杳臨流一向欹但存孤注在敢恨一生遲凍雨如

相煦春寒不受吹後時翻見獨宰物遂成私

菌閣

巖架菌芝閣榜顯松雪扉雲來畫簷宿龍向墨池歸對几琴
三疊倚闌山四圍仙靈能夜降應得受玄機

早秋

每嫌新酒少尚喜故交稠籬落三家墅梧桐十日秋月生微
顧兔星淡沒牽牛亦欲觀多稼江湖雨未周

開元真人見貽劉商觀奕圖石刻毫髮布縷皆盡精
妙蓋李龍眠臨唐畫本茅君彥模勒爲玉局仙翁所

藏云

薪桂蘇蘭者能來立坐隅徒聞玉楮刻遂信石枰圖妙蹟傳
仙李高名重大蘇向來林下意不敢易樵夫

書懷二十韻奉呈虞集賢

昭代千齡運斯文一柱功初當延祐日晚識廣陵公朝士因
推轂先生猥擊蒙睽垂遺廿載寤寐接孤風太史山川彥仙
儒館閣崇置身清切上用志杳冥中句法黃初過才名冀北
空朔南馳使節江漢借歸篷酒問餘杭姥泉尋六一翁境非
秋水觀寺即紫微宮侍坐要王遠移家近葛洪於焉承欵唾
足以振罷癯卓爾身爲貴胡然老見攻戰肥終道勝德重豈
途窮玉趾閑迂步麻衣病鞠躬茶煙窗冉惹墨沼樹玲瓏飢
甚無瑤草招來有桂叢輸心何落落把被輒怱怱易進乘軒
鶴難追戲海鴻明朝去吳會長笑爲誰雄

元日雪霽早朝大明宮和辛良史省郎廿二韻

并序

延祐改元三月民瞻石宰相遇京師承需鄙作且辱先
施之惠林下朽生不能造館閣綺語幸于言句外求之
愧悚而已

纔設中庭燎俄看密霰飄歲開環甲紀星動指寅杓鳳集天
門榜珂鳴月殿橋卿雲同四表和氣集三朝陞級肪初截雲
層玉旋雕句陳分彩隊步輦簇青腰積屑承盤重吹花到笏
消逶迤光斧座凌亂綴珠翹樂共爐煙合班隨翠袖招閨風
游廣漢王局道逍遙北戲魚龍舞中岳虎豹調旌旗攢鼉鼉
冠劒掠招搖穆酒曾觴母洪崖及見堯萬年臨紫極一日慶
璇霄朝會儀如此騫騰意頗饒身唯參寂莫世豈紕紛囂姑
射消疵癘蓬萊倚次寥瑤華攬戴勝珠樹引回鑣有術揆鴻
寶何人識爨焦竟須窮海岱直擬並松喬書就神牀寫香從
別室燒憐君守華省琢句廢春宵

馬塍新居

浮家泛宅意何如玉室金堂計未疎歸錦橋邊停舫子散花
灘上作樓居澹然到處自鑿井玄晏閉關方著書但得草堂

貲優足人間何地不樵漁

西湖放鐙

共泛蘭舟鐙火闌不知風露溼青冥如今地底休鋪錦此日
槎頭直掛星爛若金蓮分夜炬空于雲母隔秋屏却憐牛渚
清狂甚苦欲燃犀走百靈

次韻段推官觀潮

雪濤卷入白螺杯雲夢吞將灩澦堆陳馬直從天漢落颶風
先自海門來青山一向開銀壁黃繖中央立露臺好在畫圖
畱壯觀江頭白首不堪回

贈紐憐大監

論卷聚書三十萬錦江江上數連艘追還教授文翁學重歎
徵求使者勞石室談經修俎豆草堂迎詔樹旂旄也知後世
揚雄在獻賦爲郎媿爾曹

請以蜀文翁之石室揚雄之墨池杜甫之草堂皆列
學宮又爲甫得謚曰文貞以私財作三書院徧行東

南牧書三十萬卷及鑄禮器以歸
虞奎章記其事邀予賦詩如上

老學齋書懷寄京師故人

手種羣松數尺圍草溪南澗客來稀一經斷送垂垂老萬事
安排念念非晨待樵蘇才蓐食涼驚絡緯尚絺衣蓬萊坊裏
清宵月也到山家白板扉

晨興

聊與梅枝說歲窮真成古木共衰翁百年勲業何煩爾一世
雲山不負公寒夢漸消窗影上春容已在雨聲中晨興陡覺
詩神王未放韶華角長雄

次韻虞公和斷江和尚種松

松下微吟愜病悰支離潦倒侶支公頂因巢鶴翻成結心爲
依禪畢竟空陸子壇前春古淡葛洪井上雨青蔥茯苓乞與
楊真外誰復緘詩過浙東

遊華藏寺

湖上亂峰如髻鬟湖邊才子駐春鞍霜餘鸚鵡沙汀淺日落
麒麟墓道寒古壁風篁無盡意清尊雲海有餘歡遠遊未羨
鴟夷子直向飛仙乞羽翰

馴鷺

孑然馴鷺雪霜明下瀨求魚自在行碧玉鐙檠雙足瘦白麻
衣被一身輕海鷗見事應何晚凡鳥題門也不情輸我鴛行
舊儔侶舉頭寥廓總雲程

題雪景三香圖二首

春雪無聲入畫堂東風渾似北風涼祇緣何遜題詩少信是
徐熙落墨強青島下迎羅韞步蒼髯來近玉臺妝匡廬也入
幽閨夢睡裏山花各自香

雪羽飛來雪意濃國香狼籍暝煙叢倩誰與翦吳淞水愛爾

能吟桺絮風翠袖佳人玉跳脫平頭奴子錦熏籠劍南畫手
看前輩著粉施朱或未工

范以善雲林清遠館

華陽

一作雲林

范監居幽眇不到玄窗未易逢山氣半爲湖外雨松
聲遙荅嶺頭鐘常聞神女騎龍過亦有仙人控鶴從安用乘
流三萬里小天元在積金峰

盧疎齋集

并序

盧疎齋集宣城校官本讀之一過生氣凜然有懷哲久
援筆而賦

人物西清第一流曾看繡斧下瀛洲難求冀北千金骨空載
江南數斛愁小謝夢無青草句大蘇詩有景蘇樓敬亭依舊
蛾眉月付與盧敖

一作騎鯨

汗漫游

書東坡先生畫像

峨嶒秀色杳難攀玉局仙人不受閑南斗日躔一作辰韓吏部西

湖風氣白香山寧一作從教刺舌奸邪黨可惜低頭侍從班試一作更

問東坡鐵拄杖于今海上未曾還

經碧浪湖奉懷吳興公

湖水秋空玉色勻蒹葭纖一作幾雨上一作洒綸巾重來羊峴誰沾淚

却顧龍門不見人獨放酒船尋鱸具誰容狂客吐車茵西風

白羽元非用只爲人間苦一作善障塵

舟次滬湖用柳博士夢薛玄卿詩韻寄倪元鎮兼懷

鄭明德

遠思重逢茅小君香銷酒盡路三分五湖歸思浮天水一霎

秋陰過雨雲柳子篇章渾可法花奴絃索共誰聞惟應自洗

唐溪石填得金泥小篆文

次韻劉伯溫御史春遊

草木幽馨澗道微白雲拄杖去如飛獨尋玉女洗頭處相伴
仙人採藥歸幾疊翠微淡杳杳一簾紅素亂霏霏何堪酒債
兼詩債老却江南白苧衣

題范德機編修東坊藁後

一編上有東坊字慚愧詩中見大巫直想瘦生如飯顆竟從
癢處得麻姑咸池水淺孤黃鵠空谷天寒病白駒擬共風流
一作西風接尊酒祇愁塵土沒雙鳧

二月病懷

煮藥香中聽雨眠都緣未熟養生篇雪消春水深三尺日上
花陰過幾輒世事悠悠高枕外衡門寂寂暮霞邊自慚病鶴
摧頽甚却顧雲霄意悄然

吾愛吾廬

吾愛吾廬聊復爾眼前白石與蒼苔水從林木陰中過風自

房一作簾櫳曲處來薄有餘情歸竹素竟一作都無長物受塵埃先生

閉戶成一作真真一作真成嬾詩債敲門不厭催

乙亥二月還錢塘書懷寄劉師魯

黑頭時與王孫別春草又生天一涯貧甚馮驩猶有缺歸來

丁令已無家葑田湖窄殘舟一作遊船少墓道山荒剩一作墳屋斜還憶

菌巢書數卷雪麋應護手栽花雪麋玄洲白犬名也

荅楊廉夫

黃篋樓中惟飲酒樓下長溝鳧雁多溪頭橋斷浮青草湖面

風來生白波饒奴竟煮脫裯筍老魚戲唼如錢荷詔書寬大

到海角河北飢民一作氓爭倒戈

十二月五日雪晴丁亥

日光玉潔千峰立悞雪晴時一氣凝當晝鑪亭催埽巷犯寒

魚榜借收冰松皮石裂號飢鼠窗隙塵消觸凍蠅青茁菜芽

渾可愛倩誰春燄卷紅綾

送鄭明德適越

四十日春廿日雨問花隨柳意茫然竹根臥瓶高筆塚竈下
生薪連水煙茅家名餘鐵鑪步龍井氣脇金沙泉稽山酒船
速回櫂遲子歸來烹蕨拳

虞先生送張元朴回龍虎有云麈尾每懷張外史鵝
羣今屬薛玄卿元朴索次韻

想見先生戴笠行黃茅岡上看陰晴承聞祖道同疏傳鄙說
還鄉侶長卿海內好詩元自少江西行李不嫌輕謫仙愛與
元丹語煙子而今亦有名

鐵笛道人新居曰書畫船亭作詩以寄

蘇州去訪揚雄宅近水樓居似月波東府官曹知者少西山
爽氣望中多臺招天上仙人鳳池養山陰道士鵝誰和涼風

吹鐵笛莫愁艇子桺枝歌

新栗寄雲林

竭來常熟嘗新栗黃玉穰分紫殼開果園坊中無買處頂山
寺裏爲求來囊盛稍共來禽帖酒薦淡空蘸甲杯首奉雲林
三百顆也勝酸橘寄書回

荅董子羽見寄

清都聞已住多年鶴駕鸞驂與後先閭闔五雲宮樹暖蓬萊
初日羽衣鮮神仙翰墨唯皇象史館人材總孟堅天上春風
如舊識殷勤吹送寄來篇

秋詞

此首重見
梧溪集

香散天街靜玉珂水臺風殿夜如何星從河漢淡中落一作秋
在梧桐疎處多鸞影不曾離寶鑑蛛絲先已墜金梭君王蘭
館詢遺事却擬鑾車共載遲

吳興舟中

茗溪斫鱸腹偏腴取酒烏程清若無最憐楊柳破二月絕勝
蛾眉遊五湖船頭濯足畏魚淦港口卸帆驚鳥呼林巒在處
著舟楫儻有剩田吾欲租

題彭大年禱雨詩卷和仲舉韻延祐己未開玄道院
作

羽衣秋薄翦湘荷茅屋山宮補綠蘿白石資方青飢飯洪崖
借乘雪精騾松雲暖憶春游岳冰草寒憐曉渡河使節南歸
如見念峯頭笙鶴好相過

次韻題呂氏園館

因向雲間求二陸西施浦口弄雲沙東風勒住螭頭舫湖雨
吹開繭栗花到處華房通曲密舊時醉墨悞欹斜一聲歌板
銀瓶側亦見玉童雙髻鴉

再次韻沙剌班郎中春遊二首

楊柳三眠午未醒
楊花飛雪散星星
海中蜃氣春浮島
月下胎仙夜降庭
尺素書來雲錦織
紫鱗躍處浪紋腥
樓前政有三株樹
翦斷西山一半青

鄰近桃源雞犬家
不緣迷路得看花
衣裳總溼三危露
服食惟消五色霞
鶴塚浪磨崖上字
漁舟潮閣渡頭沙
石盤棋子都狼籍
莫向人間問歲華

八月十五夜待月

移牀露坐閒臨水
浴鵲灣頭足芰荷
秋已平分催節序
月還端正照山河
老憐宋玉生悲思
狂憶桓伊作浩歌
雲漢茫茫一卮酒
白頭慚愧古人多

春將過半病懷索莫
惜無可與言
詩者得句自遣山
澤癯者云

一一花栽繞屋廬半春多病意何如緣詩太瘦終無補與酒
全交漸要疎硯席畱香非長物齋庖得筍是佳蔬鶴羣呼喚
來同飲新綠濺濺已滿渠

女仙江靜真碧遊仙詞

衣劍符圖有子傳生如孤鳳蛻如蟬方畱橘葉聊供母誰信

桃枝已得仙

張桃枝漢司隸校尉朱寓季陵母也行陰德久聞在易遷得爲侍郎事見真誥

蕭索簾幃通素月玲

瓏環珮曳空煙麻姑壇上花姑老相共乘鸞欲著鞭

碧筒飲

採綠誰持作羽觴使君亭上

一作竹林人共

晚尊涼玉莖沁露心微苦

翠蓋擎雲手亦香飲水龜藏蓮葉小吸川鯨恨藕絲長傾壺
誤展淋郎袖笑絕邪溪窈窕娘

上京賜宴王眉叟有詩次韻

從事何緣過草堂行都遣賜玉壺方遠勞使者紅塵騎爛煮

仙家白石羊中聖敢辭千日醉承恩獨許四明狂金莖賸有
三清露潤及葵心向太陽

鳳凰山懷古

江右夸吾浪得名豫州英槩亦沈冥夕陽枯木山如赭秋雨
荒臺草自青漢苑玉魚誰復葬昭陵石馬亦無靈可憐白髮
商人婦猶向鐙前話後庭

次孫大方仙興詩韻

仙仗來時瑞霧屯真人玉女侍靈軒亭亭珠穗香煙直爛爛
扶桑玉色溫花雨埽塵鸞帝溼島雲承鞭蜃樓昏至今星斗
天壇夜望拜青都虎豹門

送人之茅山

桃竹齊眉草屨柔江雲曉溼木棉裘茅山一去五百里楚月
相望十二樓林下甌香黃獨月松根鉏冷茯苓秋藥瓢料得

歸來滿多病微軀我亦求

雨裏郭子昭御史

洞戶霾雲晝不開大茅南面水縈迴
淡山此日蛟龍喜舊雨故人驄馬來
澗道浮槎高寄樹石幢陰篆溼生苔
銷愁底用金陵酒賸引窪尊枕瀑雷

寄倪元鎮

雨水初寒雪復作春風相欺何太顛
誰依井竈皆獸迹獨擁書冊猶鳶肩
枸杞埋根乍難斲櫻桃放花殊可憐
賀監宅前舊游處快放桺條維酒船

次韻元鎮見寄

衣桁常容蛛網懸石牀渾讓女蘿牽
道術何煩孔郎祀一作廟屋廬政用郗超錢
泉崩澗底歸樵路雨壓厨頭蒸朮煙
誰見西鄰拆書夜一枝風竹

懷茅山

我有草堂南洞門常時行坐虎同羣丹光出林掩明月玉氣
上天爲白雲遙憶田泉洗蒼木更思陶澗采香芹歸來閉戶
償高臥莫遣人書白練羣

西湖竹枝詞序稱伯雨詩俊逸清澹儕輩鮮及有
如丹光出林掩明月玉氣上天爲白雲不目之爲

仙才不
可也

梅雪齋雅集分韻得酒香

釀郁芬香味更嚴甕間飄滿讀書簾絕勝金鴨薰花氣錯認
山蜂釀蜜甜三嗅初令消渴止一中定埽宿醒淹醉翁鼻觀
還親切不待狂僧寫布帘

唐僧懷素有
草書布帘帖

次韻荅吳興黃伯成

行盡松陰黃葉株三叉路口問茅廬青山對語惟捫蝨落日
催歸獨跨驢土木形骸嵇叔夜波瀾文字木玄虛殘年記得
相存問莫道天寒無鯉魚

贈別休休菴了堂上人

老僧十年不出戶袈裟搭架風披披祖衣畱在阿蘭若佛法
傳過高白麗客牀雪鍊一甌茗經藏苔昏三尺碑不向舊房
看偃蓋卷中原有古松枝

春溪曉渡

怪底朝來雲氣升雨晴洗遍碧礚礚山腰行李去未遠谷口
人家呼渡應彷彿簫臺凌鳳吹安排春水理魚罾臥游已愜
平生志溪負牀頭六尺藤

雲林席間懷鐵笛簡草堂

花朝無花也可憐桃李矜持不作妍爛聽雨聲眠白晝夢乘
艇子上青天間居尚庶浮雲志老病難趨卜夜筵絳帳先生
惟寂莫後堂自理琵琶絃

丹陽道中觀稼

行遍山東黃葉村縱橫草路細難分荒雞戶暗蠨蛸月落鴈
天黏穉穉雲下澤車傷縣酒榼延陵詞畔讀碑文空山覓
牛羊逕入獸依然不亂羣

鄧學可畱穀城戴堯文許雪中書寄二友

鉤簾坐對西山雪茵閣前頭正向陽剡水當時元有戴穀城
今日可無張披雲松樹鱗鱗溼瞰屋山泉角角方染就綠霞
春帖子不妨青鳥便銜將

賦西塞山送趙季文湖州學錄

往來蒼雪舊山川流水桃花思杳然溪女浣紗春雨後仙人
把釣夕陽邊漁歌未用朝廷覓惠政先繇隱逸傳不信青衫
浣塵土水晶宮裏住三千

風雨近寒食未已

一榻清寒戀舊毡無言桃李不成妍桺長漸礙螭頭舫雨重

渾迷卯色天誰向侯家分賜燭自依丹井食新泉海南上已
才登塚見坡語忍待晴泥埽墓田

和馬伯庸御史春游

山巾墊角雨仍斜歲歲春風換鬢華湖口水香魚
食冷客思家鷺峰埽石繙經葉龍洞分符調井花
城郭莫醉紅猶帶臉文霞

次韻張仲舉題宋周漢國公主甲第圖

主家樓觀蔚參差想是當年全盛時宮草細分乘輦道林花
溪隱泛舟池瑤臺仙去塵生海甲帳神來風滿旗好在畫圖
畱勝蹟五雲長護鶴笙祠

廣陵有寄璚花詩丐余次韻

未信人間日易斜攜春來問列仙家情知后土無雙樹迷殺
江都是此花芍藥謾吟紅繭粟璚兒從盼玉蘭芽一壺

樊川老醉寫烏絲側帽紗

自笑

自笑摧頽如病鶴羽衣仍復會婆娑已栽斑竹將扶老更翦蟠枝作養和驟雨欲來移蟻穴落花多罷分蜂窠裏頭

春官老不道丘園自一科

唐有高蹈丘園逸倫屠釣等科

送朱伯賢茂才之金陵

句容山邑長官清此日況逢賢友生桉牘勞人煩慰藉風塵爲客話經行寬裁白苧游蕭寺近覓青驄過冶城能賦鍾英懷古昔一時驄馬盡知名

題陳琳摹董源漁樂圖

小筆誰臨北苑圖蘭亭玉枕最難模連峯秀樹荒雲遠欲無泊向小孤緣愛石望從青草別名湖如相借斲却南風十幅蒲

孤山卽事

笑撫湖山迹易陳先賢祠宇一番新
玉魚蔓草多無主白鴿秋天迴有神
曲港穿衝花外騎赤闌扶約水邊人
岡頭枯梅枿獨是先生肺腑親

素華臺

素華臺榭壓崑丘況近仙家十二樓
白裏深蟠龍虎氣空中遙接鳳凰游
瑤璃研水偏盛月雲母屏風不隔秋
姑射山中有冰雪神人願與國同休

六月六日步過白蓮峰眠食盡日而回

瀝瀝堦除走暗泉入廚新溜動廚煙
蚤來燕坐齋中飯夢在山光寺裏眠
石脚儘盤千个竹樹頭未動一聲蟬
此中長日誰爲伴海岳菴詩在枕邊

猿臂笛

三峽家山已隔生一枝玉骨尚堪橫攀援遠侶穿雲曲吟嘯
高于噴竹聲栗葉霜黃天竺夢梅花春老王關情伶倫且爲
相娛樂誰問將軍善射名

夏商隱還京師

扈蹕行營三十載王門不肯曳長裾閑從角里先生飲與說
圯橋父老書花外飛丸紅叱撥月中采藥玉蟾蜍殘骸尚有
刀圭分會向南山訪弊廬

和率性大滌十詠

錄六

雲根石

石色斑斑野鹿胎石身渾裹夜明苔直將瑞氣穿龍洞不比
游塵汗馬嵬巖下松枝同不朽月中鶴駕合頻來君看怪石
英雄坐寂莫于今臥草萊

龍洞

怪石蜿蜒驅不動自從開闢鎮重坤雨聲多在南山殷雲氣
都令白晝昏百尺潛蚪窺海眼一杯流水漫松根有時急
天符下故遣靈人夜叩關

鳳洞

第幾峯前蒼玉洞何年于此鳳求皇梧枝宿久毛皆變竹實
餐多髓亦香露溼紫苔春侶錦月明丹穴夜生光我亦鷄行
舊儔侶雲中有路共回翔

翠蛟亭

誰見蒼龍劈石開此峯元自勝飛來闌干截斷山頭雨
顛顛翻將地底雷寒甚祇疑雲是雪霜餘每恨葉成堆坡仙獨對
無言說慚愧搜詩日幾回

丹泉

涵渟萬象一泓中欲揆靈源未易窮丹窖久埋泉眼赤珊瑚

長漫石頭紅評來水味羞楊子收拾砂牀贈葛洪一醉流霞
三萬日年年分給羽人宮

天柱峯

此峯屹立浩無前信是人間別有天銅柱何煩天北際蓬山
寧在海東邊采樵巨蕝多無骨擣藥靈禽或是仙老我不能
爲狡獪峰頭看月幾回圓

祀五先生景行莫君爲遨頭詩以記之

洛中諸老今誰識飲少年高聽細論百五日前花送雨十三
樓下水侵門嶺霞栖向仇池穴春鳥啼將蜀客魂方外歸來
羞禿鬢也容鄉社割雞豚

金陵僧來聞笑隱住持事繁風雨有懷

憶曾共坐繡經石語我松華壓酒方一自宣城居輔國幾時
天竺話連牀栖栖春草元桑楚歷歷風鈴替戾岡乞得江東

今夕雨與君聊洗夢中忙

後魏沙門法果爲輔國宣城子加侯封蓋浮屠爵秩之始

閏三月三日北山看花不與盟

應笑黃花厄閏時後三仍復負芳期老無劉几簪花分閑有
陶潛止酒詩穀雨林中先紫筍鬱罌山口足黃鸝韓湘自倩
奴星去袖得瑤臺第一枝

形影

形影胡爲樂此畱山川映發思綢繆歌長杯酒母多酌世短
何人第一流弟子受經猶北面樵青分屋自西頭下方悞識
金銀氣直倚崆峒一劒秋

古意

吳綾光纚纚織成鯨掉尾美人不敢裁恐觸波浪起

夜思

空山嘈夜雨幽人坐惆悵今夕楚澗泉明日秦淮浪

奚官洗馬圖

曾侍赤墀東天池看浴龍晚涼湖上夢猶立柳陰中

玄洲唱和

并序 錄二

茅山玄洲精舍左右真仙古蹟曰菌山羅姑洞霞架海
鶴臺桐華源玄洲精舍紫軒火浣壇隱居松玉像龕至
治二年壬戌歲道吳興溪上與松雪學士倡和十絕以
記其處仍書刻石以爲山中故事

羅姑洞

事見
真誥

九疑得道女受事易遷家詩贈金條脫人逢萼綠華

鶴臺

靜夜颯靈風神君語帳中至今雙白鵠時下五雲峰

王若水梨花山鵲

山鵲語查查驚飛白雪花清明人載酒寒食客思家

芍藥白兔圖

妥帖紅雲朶迷離玉兔兒揚州行樂地惆悵鬢成絲

煙梅睡雀墨戲

珍偶偏憐瓊樹寒香漠漠紛紛誰見羅浮月黑一枝同夢梨雲

絕句

二山環合一水中有老木參天不著幽人草閣誰收無限雲煙

湖州竹枝詞

臨湖門外吳儂家郎若閑時來喫茶黃土築牆茅蓋屋門前一樹紫荊花

西湖竹枝詞

光堯內禪罷言兵幾番御舟湖上行東家鄰舍宋大嫂就船

猶得進魚羹

臘盡

小雪初晴臘盡時無窮梅柳怨開遲人間不覺春來早只有
吾家布被知

山中客夜

鞍馬南州五日程豈知物外有茅亭塵埃暑困人如醉月露
夜涼天亦醒

元統元年冬十一月句曲外史菌山巢居成製十小
詩以自見錄呈華陽隱居資一捧腹

錄四

望見飛檐松杪花下盤陰洞石聳牙老樵迷路疑一作驚相問若

箇江東道士家

谷中僅僅

一作有

一巷住壇上累累白

一作唯餘數

石陳杖隨流水過鄰

舍席與長松分主賓

但倚茅君為座主從稱外史作官銜道家六經發願寫淡向
石頭藏一函

屋壁一作頭置書碑版多雄一作白虹光怪鳳凰阿玄洲地名看到空一作淡山十

日雪竈突無煙奈爾何

松下淵明為鄭明德作

歸來不為督郵輕自為松根長茯苓博浪金椎拈不起倚鋤

却讀相牛經

次韻荅薩天錫見寄

推敲指點據吟鞍苦為搜詩夢不安誰會鳳凰臺上意手按

黃菊看鍾山外史詩又載臺榭薩天錫求識予面而之燕南八月十四夜風雨宿蘭閣絕句七首明日追送之其一首云巡官畏虎盛前呵驚動燕山薩照磨前翦

燭對牀詩未穩從渠醉尉問誰何又云內臺最近燕南幕博士臺郎有此除山澤何當大人賦寄聲多謝馬相如與此詩同是天錫在南臺時所作

凌波仙

春雲如水碧粼粼誰見凌波韞上塵洛浦湘皋都是夢手中

花是卷中人

仲穆墨蘭

滋蘭九畹空多種何侶墨池三兩花近日國香零落盡王孫

芳草徧天涯

葉靜齋草木子云趙仲穆者子昂學士之子宋秀王之後裔也能作蘭木竹石有道士張伯雨題其墨蘭詩云云仲穆見而愧之遂不復作

偶成

黃篴樓中枕書臥雙鶴交鳴驚夢破青天墜下白雲來卷簾
一陣楊花過

墨海棠

漢宮愁絕冷煙枝

一作煙枝

一蘸劉郎兩鬢絲甲帳夜寒銀燭冷六

銖雲帔獨來時

東坡書蔡君謨夢中絕句二放營妓絕句三虞伯生

題四絕于後真蹟藏義興王子明家要予次韻凡九

首

日將公事湖中了醉入重城列炬明自古大藩財賦地古人
偏得賦閑情

謝女嬌吟雪比鹽北臺馬耳見雙尖衲衣政索歌姬笑不道
春寒繡被添

寫韻軒中塵不驚與誰同躡鳳凰翎綵鸞可惜情緣重只合
清齋寫道經

釵頭新綠荔枝紅那與江桃色味同聞道端明新進譜一時
殿閣起薰風

香辟春寒玉辟塵流蘇斗帳醉和春一雙明月都無價寂莫
人間第一人

江南在處煙波好浪跡先生不上船近就闔閭城下宿可憐
霜月夜娟娟

青城樵者一衰翁寫罷烏絲滿袖風消得玉堂金硯匣至今

傳入畫圖中

初碾龍團怯醉魂分茶故事與誰論纖纖玉腕親曾見祇有
春衫舊酒痕

白公種竹蘇公桺談笑功名後世誇依舊葑雲三萬丈斷橋
誰與築隄沙

山中

一枝石瘦如麋角六出花開似麝臍隨意莓苔一杯酒也勝
騎馬聽朝雞

桂枝詞

桂樹叢生枝婀娜糝粟黃雲欲成朶薰醒秋衣嬾下牀金蟾
嚙斷燒香鎖

馬遠小景二首

桺未藏鴉雪未消春衫遊子馬蹏驕去年沽酒樓前路錯認

桃花第一橋

玉砂卷海白模糊
千樹梅花埽地無
仿佛水仙祠下路
金枝翠帶不勝扶

緝熙殿御製墨梅詩帖

宣和妙賞緇衣句
傳在夷門作勝談
行殿春風四十載
玉妃終老向江南

樓居春曉望玄圃

時寓杭州開元宮

予晉新宮倚太霞
繞湖煙火萬人家
觀臺一面無人處
日出煙銷都是花

遵道竹枝

簑簑谷口白雲生
雲裏琅玕萬玉聲
驚破幽人春枕夢
一窗斜月半梢橫

避暑圖

雪藕冰盤斫鱠厨波光簾影帶風蒲蒼生病渴無人問赤日黃埃盡畏途

修竹士女圖

空谷佳人玉珮璫琅玕斜搭領襟長杜陵野老多才思解道風吹細細香

題鶴亭所藏馬圖

九霄天馬俱龍種四十萬蹄雲錦斑一自漁陽鼙鼓後不知幾箇到驪山

吳興道中二首

眠溪大樹不見日牧鷺小兒兼釣魚南風相送玉河口舟子飯時吾讀書

扁舟偶趁采樵風題扇書裘莫惱公何處人間無六月碧瀾堂上雨聲中

明德游仙詞十首用天柱山傳來依韻繼作雲林道

氣者觀之亦足自拔于埃壒矣

丙戌四月廿日

白玉之盤滄海東蒼蒼下視遠如空請看端正山河影不滿
坳堂杯中水

鴻寶枕函雲積疊芝臺鑪火暖氤氲子能試喫青精飯我亦
聊書白練裙

夜久扶桑海色分珠宮望拜赤龍君洞庭未省君山在元是
昆侖一朵雲

藤蘿石上尋長跡金粟圖中見小身抖擻幾重衣祴看情知
不
散花人

龐見霓裳舞廣庭罷看三十九章經道人腰著金鴉觜自向
松根洗茯苓

右股清池足漚麻池中肥水是松花早知魏帝一丸藥冒信

東門五色瓜

恥作溪山服食仙
伐毛洗髓故依然
木蘭墜露研朱寫
只寫南華秋水篇

脚底琴生三尺鯉
袖中阿母一雙桃
別時身動凌波韞
爛月如銀照夜濤

眼中自小薄蓬瀛
日日雙飛下始青

明窗塵仿佛定知

草創大丹成

玉格金科自有期
赤城何待遠尋師
壁梭也解爲龍去
樵斧如何只看棋

聽琴圖

裊煙石壁對孤桐
與和長松瑟瑟風
不爲野夫清兩耳
爲君畱目送飛鴻

史局先生示以季境

贈行卷輒題一絕卷錦

丁亥

校書苦借青藜杖下馬笑拈金屈卮好是淮南師弟子錢唐
相見落花時

三香圖

凌波仙子塵生鞮空谷佳人玉鍊容不奈天寒風露早日高
猶傍錦熏籠

絕句

白足過橋三峽雪蒼頭吹笛滿林風狂花也有凌霄意飛上
松顛爛熳紅

題理妝士女

誰見新妝出繡幃辛夷花下六銖衣莫教蜂蝶知踪跡閒與
鄰娃鬪草歸

玄覽堂絕句

簾櫳低亞小梅枝快雪時晴綠滿池鈴索不搖鸚鵡睡客來

假寐亦多時

題張溪雲畫鉤勒竹

爲愛風簟手自摹不煩把燭倩官奴須當白戰簣簞谷羞殺
江南沒骨圖

金人出獵圖

小隊鳴笳曉出圍地椒狼籍獸應肥上皇久厭猩羊粉故遣
蕭郎擊豕歸

靈巖寺

我欲搜林覓硯材誰將奇石半岳栽曾中故有涵空閣好借
君王辟暑來

次韻懷友

秋衣零落補紉多翦盡西興半畝荷寒到故人殊未到不消
湖上雁來過

春菜

土甲離離宿雨痕畦蔬小摘當盤飧紅綾餅餤殘牙齒合向
巖頭嚼菜根

春藥

紫甲紅牙玉滿闌時分花雨潤斑斑茯苓乍可來歸籠遠志
從來不出山

登善精舍葺治苟完七小詩以寫予懷

錄四

故山破屋誰來補辛苦經營拾燕泥幾樹桃花相送老不消
更著子規啼

澗中采石重鋪徑坡上移花小築墩溪結雲嵐爲保障賸培
松竹當兒孫

梓桺都移五十栽稚松千箇綠瑤璫有人莫笑千年計萬一
他時化鶴來

玉鈎橋水如凝碧才過牀頭寫瀑雷恰是東風太薄劣逆流
花片出牆來

雲林畫

望見龍山第一峯一峰一面水如弓水邊亭子無人到猶有
前時躡屐踪

李商隱學仙

誰云有分不關情淪謫千年爲底名消得權兒羊浣布詩中
唯數玉溪生

京師荅薛玄卿

重重城闕亂煙花只擬將身乞酒家試聽御溝冰下水與君
持底駐年華

三衢道中三首

大溪中道放船流船壓山光瀉碧油三百里灘欹枕過買魚

釃酒下嚴州

東風惡劇雨飛花被底春寒水漲沙蘭芷溪香小回首一峯晴雪是金華

界道飛流山翠重杜鵑無語杜鵑紅歸人一舸貪新水渾墮丹青僂面中

燈花聯句

并序

永嘉李季和自金陵持趙涼公書來累宿茵閣下十月三日夜天始霜殊寒兩燈並作花遂聯句于酒間

星閣迎寒閤霜鐘動夜掄孝酒淡燔术火漏下續蘭釭寸草

熒芝小雨丹葩瑞帶雙金枝交婉孌孝銀粟亂髭鬢蠟結飛

蛾笑雨膏融吐鳳懷永珠光透鏡孝火齊幻垂幢的的燿青

瑣雨淫淫颭玉缸燭龍擎紫蓋孝翹燕綴紅雙鄰眼書窺隙

雨仙眉墨暈窗狂吟心藥發孝喜聽足音跽折墜見管風吹座

雨 鉤簾月墮江青藜如見遇揮手出紛厖孝光

神光樓與鄭明德聯句

藏書地肺穴歸巢湖領山秋清蒹葭露祐水落芙蓉灣蟲飛

燭見跋雨鶴唳棚上環桂藂豈克隱祐草間斯投閒脫幘鬢

俱禿雨哦詩意殊慳驚飈攪墜葉祐疏櫺裊藂藂爐温夕熏

罷雨汀寒夜舟還瀛嶼倚突兀祐海圖挂爛編熊經諒方煦

雨 豹隱知難攀遙聞城門柝祐却撫刀頭環濡毫瀝蟾滴雨

拄頰揮魚頰祐倚牆童勦熟雨覆杯酒腸孱神光出葭莢祐

澄懷斬茅管氣存驗當宁雨道克甘抱關腥腐孰不死祐伐

洗我獨頑仙從琴心舞雨聖視鼎胙攷黎明官祭和靖祠出處匪異致

祐躁靜難同班淵宅鑑鼉氣雨天游滌神奸緬昔鄧塢築祐

餘此巾相殷雨併乏麥飯饗祐益重黎毗瘵兩彈聞鵲血雨

重洒化鶴潛窮閭劫灰聚祐故國亡詩刪於焉遁葛井雨豈

徒慕商顏茹芝腹能實

祐

飲菊姿逾媚披雲陟砢礪

雨臨池

漱潺湲神鯉破網出

祐

乳狸據裊跼

雨

煙際挈畫鵲

祐

掌中

餒白鵬去鄉吳音鶻

雨

支頤越吟艱一世更聚散

祐

多岐重

憂患睽違隔風雨

雨

空聞珮珊珊

祐

集太白語酬僧淨月

主人碧巖裏爲余話幽栖真訣自從茅氏得風流還與遠公
齊滿堂空翠如何埽而君解來一何好白玉麈尾談重玄琉
璃硯水常枯槁蒼蒼雲松拂彼白石世人聞此皆掉頭就中
與君心莫逆袖拂紫煙去空中聞天雞借問蘇耽鶴早晚向
江西

鐵崖先生跋曰予觀貞居子集句詩政如冶城銅像捧額珠蓮座于長干也可
寶可玩太白見之當曰吾錦千萬機衣被天下詩人爲得割截如此貞居子其
慎取之哉勿俾責償
也會稽楊維禎跋

集二

詰書語六言二首

寒犬吠聲如豹夜春相應疎鐘華子岡頭清月照人獨坐山

中

夜淡僮僕靜默月明輞水淪漣獨與山僧飯訖寒林遠火初
然

主人謀簾裏為余請幽臥真若自外來乃卧風流墨與盡公

某太白詩酬曾彩月

憂患知難耐風雨空閒厭厭厭

趙白調去喉是音響支顏妹今驥一世更乘錯

姊妹愛中豔如臨出厚野難卧全雨聖烈筆畫能

封墓商醴故芝則貽寶煢燐姿益散妹雲初下

筠溪老衲圓至

圓至字天隱別號牧潛高安姚氏子少習舉子業去爲
浮屠得法于仰山欽禪師駐錫建昌之能仁所著有筠
溪牧潛集方虛谷爲之序天目洪喬祖題其後曰天隱
遠權要避名譽徧歷荆襄吳越積覽觀之富益靜定之
光二三千言經目輒記故其爲文瞻以奧其詩雖所存
不多而風骨自見如送才上人往湖南云竹枯湘淚盡
花發楚魂香富塘云亦供貧者樂獨以富爲名寄志勝
上人云瘴月人南去花時鴈北飛弘秀集中不多得也

重登牛頭峰

霜葉黃蝶飛崖泉白蛇挂行行尋故迹往物已屢化高步萬
石上獨立一木下悠然顧吾影殘日在林罅古來遺世士混
觀混真假所視旣已齊乘險意亦暇智愚相與奪得失紛代

謝吾欲營力耕穿巖樹茅舍

雪

窗鳴風片亂溜凍冰條直夜久忽無聲倚簷時浙瀝青薪焰
方吐紅燈花欲滴閉閣有餘溫蒙衾兀重席

送勤滅宗

出家殊鄉同里爲骨肉况乃情所厚而茲忽分躅清霜彫
廣野露立凍羣木日莫行子身谿谷映餐宿吾聞含德者凝
視養玄矚疾進氣雖銳久踐途乃熟歲晏能復來青燈共寒
屋

贈玉龍曾道士畫龍頭

乖龍逃雨走急落西山陬縮入畫仙筆雷公不能搜畫仙有
墨池尺水涵十洲俗龍作玄骨騎入塵寰遊我求寫龍真畫
仙許我否形全恐飛去爲君且畫頭

次韻陪星子胡主簿遊報先寺

木樓與淵蟠所性各有適顧余丘壑戀大藥不醫癖青山亦
可人乍見如素識森然一窗下獻此萬丈碧簿領三秦英軒
昂謝塵迹壯齡已疊組舊閥况列戟潔身粉黛側僧榻羣面
壁國鼎筆可扛天機錦自織停驂偶相值顧問借顏色東風
吹芳原衆卉競春日遠郊農餉起煙屋香芋栗牛鳴雨隴寒
釋耒泥濺膝良時一遊豫能不念民疾二宮山水窟屨鉢恬
食息含羞目蘄絕詎意陪履屐終期凌蒼巔一視空八極

送建昌黃綺秀才踰淮教授

還山羞聽紫芝歌旅館千門講四科絳帳未懸知己少黑裘
漸敝閱人多秋風白下沾巾別落日青淮照影過莫對飯盤
嗔苜蓿桑榆雖暖易蹉跎

義塚斜

城闕千棺瘞此斜古堆新穴滿平畬春叢亂哭鰥寡鳥雨樹
雜開嘯笑花散骨已枯苔作肉癡魂猶認土爲家何人薄莫
焚錢去風卷殘灰滿栢丫

次韻荅許府判見嘲詩癖之什

君不見蓬萊仙人五雲深興來忽起塵寰心手拈造化作一
劇世上瓦礫皆黃金又不見珠宮靈娥睡新起賽喫雲漿賭
骰子驀然發笑成電光不料陰陽噓頰齒道人文章亦如斯
落筆心手不相知豈如曲士拾蠹紙堯桀滿腹堆羣疑願君
閉口毗耶室竺貝孔韋皆長物著鞭捷出靈運前莫鬪生天
鬪成佛

雪後荆林道中

冷風寒桺閉千門桺外嘯鴉聚晚羣殘日暉暉烘雪氣徘徊
半嶺作晴雲

小汊

麻骨燈明竹壁疎
更淡人語在茅廬
開篷緣岸去沽酒
點火撥船來賣魚

胡盧

胡盧河畔洗羶裘
日日花香滿水流
嫁得夫郎愛官職
去隨太子取交州

吳王廟

吳王廟近水邊山
壁上雕青鬼髻蠻
白日鑪中煙色變
散成雲氣滿人間

送宗岳歸青蓮

布囊詩幾卷歸計
亦淒涼不惜經時
別應知聚日長石
峰蒸玉氣井水浸
蓮香曾許爲鄰寺
招余住竹房

逢故人

共看咸淳上苑花錦牋綵句敵春華白頭相見鍾陵市我亦如君未有家

元夕觀傀儡

錦襠叢裏鬪腰支記得京城此夕時一曲太平錢舞罷六街人唱看燈詞

芳塘

芳塘雨霽綠初肥折得青條串露歸一樹殘花喧鬪雀紅香滿徑撲人飛

寄恩以仁

風柳青青條葉新別愁江畔又逢春交情似我如君少一度相逢勝故人

白雲上人英

英字實存錢塘人唐詩人厲玄之後也素有能詩名歷
走閩海江淮燕汴一日登徑山聞鐘聲有省遂弃官爲
浮屠結茅天目山中數年徧叅諸方有道尊宿皆印可
之故其詩有超然出世閒趣別號白雲卽以名其詩集
牟巖翁趙松雪胡長孺林石田趙春洲輩皆爲之序云

對山曲

青山作賓翁作主山翁持觴山鶴舞山翁對山傾綠醕青山
對翁默無語山本無情翁無心青山不飲翁自斟酒闌對山
撫掌笑山鶴一聲山月沈

秋夜曲

西風不起凝空碧霜花霏霏炯秋色層霄輾上玉一輪竹影
參差光欲滴洞房深寂湘簟寒夢回孤枕疎漏傳鴈聲低度

吳天遠素屏青燈瑤穗斷隔雲聽徹五更鐘鴛鴦屏冷初日
紅

陌上花

江南三月芳菲菲雜花生樹鶯亂飛美人一去幾斜暉城郭
空在人民非山河滿目草離離畱得歌聲落翠微猶自叮嚀
緩緩歸

絕句

正月梅花落二月桃花紅榮枯元有數不必怨東風

寄蘭壑宗長

同宗同在旅彼此繫微官所去無多遠其如相見難連雲秋
樹老卷雪暮濤寒幾度空江上思君獨凭闌

客夜有感

十載紅塵海漂流笑此身山川孤館夜風雨獨眠人嗜茗真

成癖工詩不療貧還家須及早垂白有雙親

維揚春暮

煙籠柳影老鶯啼雨溼芹香乳燕飛二十四橋春又盡江南
詞客正思歸

夏晚泛湖

楊柳陰中艤小船芰荷香裏聳吟肩雷聲驚起雲頭雨塔影
倒搖波底天羣鷺遠明殘照外一僧閑立斷橋邊菱歌裊裊
知何處滿袖清風骨欲仙

宿睦州祖師菴

菴依兜率寺小憩俗心灰竹密暑不到窗虛風自來山昏飛
鶴下磬斷定僧回拂拭殘碑看年深厚綠苔

倪秀才歸越

君歸何處所超遞浙江東千里故人別一尊今夜同客愁燈

影外蛩語月明中潮水將離思茫茫逐去篷

湖上晚步

畫橈歸去歇笙簫水影山光共寂寥一叟相逢雙鬢雪向人
猶自話前朝

重游淨慈憶沆禪師

慧日峰前閣重來百感增空存黃面老不見白頭僧道偈書
猶在埋銘刻未曾有詩行已久何必上傳燈

客夜憶傅森

淡夜相思浣水邊情懷堪恨復堪憐雲山千里書不到風雨
一樓人獨眠蛩帶秋聲吟壁下鼠窺燈影出窗前去年記得
西湖上醉倒荷花香滿船

廢寺

白晝閑房一兩僧山門深掩蘚花青西風不管鐘魚破自在

斜陽語塔鈴

山中景

六月山深處松風冷襲衣遙知城市裏撲面火塵飛

徑山夜坐聞鐘

涼氣生毛骨天高露滿空二三十年事一百八聲鐘絕頂人
不到此心誰與同凭闌發孤嘯宿鳥起長松

山中二絕

一聲山鳥啼幽夢忽喚醒起來開竹扉日上中峰頂
窗前瀑布寒林外夕陽薄清風何處來撲撲松花落

寄祖雍上人

破衲卷秋雲入山溪更深似聞營梵刹應不礙禪心寒瀑瀉
蒼壁晚花生古林遙思明月夜誰聽穎師琴

勝禪人遊廬山

飄然廬嶽去破衲共枯藤此地山林勝令人肌骨清蓮開千
柄雪瀑挂一條冰五老如相見煩君爲寄聲

寄劉仲鼎山長

我已浮屠隱君仍冷掾遊向人空說項何地可依劉風雨殘
燈夢關河落木秋近聞吟更苦應是雪盈頭

家則堂大參南歸

故國衣冠已變遷靈光此際獨依然一身幽薊三千里兩鬢
風霜十九年歸去午橋非舊日夢飛秋塞隔遙天江南遺老
如公少青史名高萬古傳

梁秀才南歸

交情方脫略忽爾話歸期萍水相逢處梅花欲寄時蠅多投
店懶馬瘦到家遲去去西湖上春風柳未絲






PL
2534
148
v. 24

雲屋

善住

善住字無住別號雲屋吳郡僧也



嘗居

郡城之報恩寺往來吳淞江上與仇山村宋子虛諸人
相倡和山村贈詩曰閭門北去山如畫有日同師步翠
微其相契可知也所著谷響集近體詩若干首子虛有
荅無住師見寄詩云句妙唐風在心空漢月明即此可
以評定其詩矣

送人還山

偶隨流水出閑趁白雲歸步石苔侵屐攀松露滴衣

春興

冉冉春將莫悠悠日欲殘東風特地惡不道杏花寒

西齋秋夜

晚雨過江城西齋秋氣清夢回孤枕上無處不蟲聲

元言選
秋夕

孤館燈初暗
虛窗月正明
寒衣猶未補
風遞擣砧聲

早行

拂曙駕柔櫓
溪山行幾重
雲昏不見寺
依約但聞鐘

雨後

小園春雨後
碧草弄輕寒
花片無煩埽
新泥尚未乾

冬夕

繁草霜嚴綠
減疏星雲盡
光寒城頭一
聲畫角月落
烏啼夜

闌

福嚴卽事

村邊幾株紅
樹屋外四面
青山終日無
人能到孤雲
薄莫飛

還

寄西峯隱者

煙雲出沒弄晴碧中有幽人抱禪寂夜半巖間風雨來松花
吹滿蒼苔石

已未夏日雜興四首

溪紅淡白已隨塵斜雨橫風送却春池上偶來閒照影霜花
吹入鬢毛新

落盡紅芳見綠陰小橋流水雨餘深市樓橫笛誰家子吹得
殘陽下遠岑

纖纖碧草與堦齊濃綠陰中杜宇啼花院晝長聽政好帶聲
飛過粉牆西

中庭日午橘花開蜂蝶何知故故來一陣南薰生殿角亂飄
香雪點蒼苔

春興二首

朔鴈初歸花欲妍江雲簷澹晚晴天因思翦燭山窗夜香燼

雕盤尚未眠

三月江南春日長
桺陰庭院午風涼
離懷漠漠深於海
燕子飛來語畫梁

感舊

風雨蕭蕭送暮春
百花開盡草如茵
畫梁塵鎖簾垂地
燕子歸來不見人

過林逸人次韻巖栖翁

花邊曾醉少年春
白首相過不厭貧
近說漢家徵詔急
西山猶有卧雲人

晚興

浮圖寒聳碧崔嵬
煙雨冥濛晚不開
溪殿已燈門欲閉
松頭巢鶴未歸來

陽山道中二首

并序

泰定甲子二月初九日子與友人圓大虎遊陽山北阜
過尊相寺聞有禪者縛屋峯頂遂捫蘿而上至雲泉亭
屏而飲焉甘涼可啜得禪者於石室中爲予相勞苦煮
茗爲供旣而語次殘陽已挂樹梢矣因以二絕紀之

一掬雲泉漱齒涼小亭幽絕背山陽道人自鄉峯頭住閉戶
不知春日長

雨餘春澗水爭分野雉雙飛過古墳眼見人家住溪隴梅花
繞屋不開門

夜思

夢鵲驚飛叫不休聲聲還繞舊枝頭牆東一片梨花月又逐
笙歌上水樓

寄巖栖翁

霜髭碧眼老頭陀陋巷曾經幾度過連月不來城裏住只緣

城外好山多

聞角

曉角吹霜海月斜
一聲幽夢斷天涯
自非貫作沙場客
誰鄉風前不憶家

感事

覆雨翻雲事可哀
交情誰是舊陳雷
夕陽滿地無人見
獨立風前看落梅

送人之金陵

清遊莫憚路岐賒
但有雲山即是家
此去鳳臺明月夜
西風腸斷後庭花

宿報恩寺

淒涼塔廟幾經春
往事重思跡已陳
夜半夢回禪榻上
不知曾是寺中人

夏日卽事

庭樹森沈晚色濃
修修寒雨滿疏鐘
白雲一片歸飛急
知宿城南若箇峯

次韻山村先生二首

綠楊深處畫橋橫
風掠平湖碧浪生
待得笙歌城郭去
芴袍筇竹自閒行

驛亭楓樹著霜紅
天際冥冥見斷鴻
隔岸遠山青更好
澹煙斜日值秋風

莫春雜興五首

野水浮來半落紅
不須惆悵怨東風
春歸畢竟歸何處
還在溪光桺影中

門掩東風桺色深
莫寒脈脈透衣襟
春天最是無憑準
一日才晴一日陰

雨入孤城草木新
香紅半逐馬蹄塵
却憐杜宇無情甚
不解迎春祇送春

春光欲老綠陰寒
稚筍攬空已作竿
無限好山都不見
亂雲斜雨滿闌干

紅藥花開春欲歸
綠楊陰暗燕爭飛
晚來一陣東風雨
又送餘寒上客衣

萬里江山圖

巴水沄沄巴峽青
月明客淚墮猿聲
眼中已識瞿唐路
剩水殘山懶問名

秋興

幾夜西風葉滿苔
燕巢空在鎖塵埃
秋歸莫折黃花贈
逗到明年又再來

春日雜興二首

野塘風緊漲漣漪桃李春寒發尚遲
山色晚晴青不了倚筇
忘却立多時

湘雲碎翦作春衣步入青山映夕暉
我已無心事戲獵野禽
何事亦驚飛

冬日偶成

清霜欲重小春天楊柳蕭疎帶曉煙
無奈東皇苦多事又傳
春信到梅邊

感舊

綠楊蕭瑟颭秋風客去門間酒盞空
夜半月明生綺席不知
誰在畫樓中

莫春雜興

滿地桴陰野水新粉牆額額有凝塵
一雙戲蝶來書幌猶繞
殘花覓舊春

春杪登蘇臺

獨上高臺小凭闌荒城寂歷水雲寬連天芳草雨初霽滿地
落花春又殘白髮不生還亦老青山無事且須看吳王伯業
消磨盡江鳥呼風野樹寒

舟次盤門過無得院

蓬窓兀坐聽鳴蟬滿目陰雲欲雨天山隔壞城縣落日樹連
荒驛帶蒼煙臨流石馬何年墓種竹人家有釣船至老相尋
能幾度更揮青蓋訪林泉

贈日本僧

鯨波渺渺接遙空今古由來一葦通斗柄夜縣常辨北日輪
朝湧始知東車書旣混文無異爵服才分語不同鄉路眼中
應已熟好攜包笠扣玄宗

送日上人還吳淞

秋雲秋水兩悠悠白首何堪動別愁代嶺月明寒鴈過楚江
木落晚禾收夫差旣賜申胥劍勾踐難回范蠡舟今古興亡
無限事願因歸路問沙鷗

送人還山

茅茨拋在翠微間卽粟橫肩又獨還松樹別來巢鶴大銅瓶
歸去蟄龍閒西風黃葉埋寒徑落日青猿叫亂山後夜月明
誰是伴枕前飛瀑響潺潺

送人入杭尋弟及謁山村先生

之子難忘骨肉情遠尋仲弟入杭城好山半鄉舟中看佳句
多於枕上成驛路牛羊歸暮色江橋鼓角動秋聲端淳耆舊
今無幾爲問湖邊老淨名

與無照莫出西郊

閭闔城邊煙草昏自攜禪侶過孤村陰雲垂地鳥歸樹寒色

滿空人閉門山徑雨餘雷虎跡野塘秋盡露潮痕一聲牧笛
前峯起回首殘陽欲斷魂

過石湖

十月吳皋霜露零田家收稻滿柴扃湖中浪擁銀花白天末
山橫螺髻青寒色亂雅飛笠澤夕陽衰柳並旗亭何時覓得
清遊伴更買扁舟過洞庭

登報恩寺閣

高閣間登四望寬青山極目倚雲端水村漠漠連天遠壠樹
沈沈帶雨寒罷馬嘶風春草徧倦鴉歸堞夕陽殘豈知大道
平如掌今古人間行路難

送人之金陵

歌罷陽關酒一杯扁舟欲上更裴回舒王舊院爲僧寺後主
遺宮化劫灰北固山頭春雨過西津渡口暮潮回心間在處

堪爲客遮莫天涯杜宇催

舟次江亭

歸思悠悠極渺冥暫維舟楫並長亭
春江水暖蒲牙白野岸煙銷桺眼青
鳴犢帶聲登廢壠征鴻和影度遙汀
不知何處吹桐角獨立天涯淚欲零

月夜四首

明河如練月如弓涼葉蕭蕭下遠空
水國正秋無過鴈苔堦終夕有鳴蟲
故人自隔關河外往信猶存篋笥中
一盞青燈伴孤寂夢回吹殺破窗風

漸老襟懷豈易寬強將詩句散愁端
黃花開後重陽近白髮生來萬事難
月老獨眠松館靜晚天清坐竹窗寒
暗塵鎖斷青琴索指甲雖存莫可彈

鴈聲吹落五雲間帶月柴扉夜未關
寒氣僅傷凡草木秋風

難老舊河山孔賓好學非求隱元亮休官爲愛閒今古一株天上桂近來聞說有人攀

陰蟲切切噓秋露涼月娟娟照夕風鸞鳳幾曾栖枳棘鳴鴉多是占梧桐人皆酤酒追陶令我獨栽蓮學遠公堪笑當年槐國夢黃梁未熟已成空

京口

車聲軋軋紅埃北馬南颿日夕來淮甸雪銷江水漲海門月上楚天開堤邊行飯多逢桺野外尋詩不見梅會散金山卽歸去春風催我上琴臺

次韻山村先生二首

嚴陵臺下水潺湲漠漠高風去不還處士隱廬遺路側永公書甕出松間山田瘠瘠民生儉郡邑蕭條吏事閑幾欲清遊身未遂煙霞盤礴鬢毛斑

定起空山尚有星悲笳杳杳上青冥
壁間燈暗鴉啼樹池上月涼魚闖萍
文錦薦梓風字研綵繩穿夾梵書經
舌端解使天華墜爭侶無言對翠屏

春日至錢塘阻雨首寄山村先生

客窗燈暗曙鐘殘泥潦從衡路未乾
滿目雲山畱我好一樓風雨見君難
湖邊雪盡梅應早吳下春遲麥尚寒
南渡耆英久寥落豈知猶有故衣冠

如鏡師翦竹四竿植爲莆桃架其一
適活要予賦詩遂作此以塞請云

蒼筤翦得出遙林架就危棚近壁陰
柔蔓未垂珠落落短梢先挺碧沈沈
月明亂影翻秋几露冷清聲入夜琴
養取間門表孤直莫教容易俗塵侵

子虛以湘竹杖惠予兼貺以詩遂依韻荅之

頒得山人古竹筇
節間銷盡淚痕紅
化龍定躍蒼波裏
伴鶴還騰碧漢中
頭步安危存用舍
百年前却付窮通
相應海國歸來日
繫鄉船頭取便風

漁父

夕陽波上釣絲輕
風入蒹葭窸窣鳴
辭劍爲憐逋客難
鼓撓曾笑逐臣清
數聲竹笛湘江闊
一帽山花白髮明
南北去來人自老
幾多空抱羨魚情

經故人所居

桃花灼灼柳依依
院落荒涼晝掩扉
石沼水乾魚逝久
杏梁巢覆燕來稀
隴頭未說人澆酒
世上先傳客賣衣
欲對東風寫離恨
郡譙吹角暮雲飛

落梅

晴雪霏霏灑砌苔
浪蜂欲去更徘徊
空傳淡影浮歌扇
不送

寒香入酒杯隴首故人千里隔江南驛使幾時回翠禽莫怨
高樓笛一度春風一度開

春晚

矮窗日月無今古閉戶爭知春去來清鏡靜臨多白髮好花
閒看半蒼苔鼉傳鼓吹池塘雨茶展槍旗澗壑雷海燕未回
寒尚在暮雲重疊鎖崔嵬

苦雨

積潦橫流路不分滿空煙靄暗朝昏烏鳶跼跼墮荒圃風雨
瀟瀟失遠村芻米賈騰愁白屋管絃聲沸醉朱門無言桃李
參差放侶怯春寒欲斷魂

遣興二首

五十雖賒病見侵閉門終日少相尋春鶯漫逞千般語老驥
終存萬里心花繞竹房紅作陣柳垂莎徑翠成陰江南三月

清明後便有蛙聲聒夜深

身前萬事若浮塵過眼從衡日日新蛙黽得時多意氣鯢鯨
失水少精神青山古木丘園晚白鳥蒼煙浦溆春回首吳淞
興無限島頭新漲綠粼粼

自陽山歸舟中作

小麥青青大麥黃澗松風急夜聲長屨穿細路春泥滑花落
清渠野水香嶺上獨畱雲作蓋村邊多見石爲梁楓橋寺轉
閭門近回首西山已夕陽

無照林亭

累土崇丘作小亭手栽花木滿林坳郡中高樹已全綠屋外
遠山才半青過眼榮枯荒圃草到頭聚散野池萍餘生但願
身長健杖策時來對翠屏

贈叔恭

負笈擔簦計已灰歸來蕭寺掩莓苔呼猿別磴曾拋果放鶴
他山得看梅樵徑雪晴芒屨出江橋風熟布帆開反思身外
無窮事不直窗閒水一盃

山中

寂寥空谷久相容行道何須向別峯山腹引泉因煮茗嶺頭
乘雨爲栽松倚天傑閣巢靈鶴徹海澄潭卧毒龍樵客豈能
知住處草堂終日白雲封

秋居

栖遲寄窮巷不異住荒村寒草生枯樹秋苔上敗垣衆山皆
繞郭一水獨當門抱甕非吾事乘閒學灌園

秋日野望

寂歷村橋畔夷猶野望時路長征騎疾風定去颿遲城晚牛
羊下天秋草木衰歎聲何處笛渺渺隔煙吹

贈隱者

生無軒冕志老不釋漁竿對食慚周粟紉衣尚楚蘭江城猶
雨雪花桺政春寒窮達皆由命初非行路難

鄧隱君牧

標格類孤鶴翩然獨往還彈琴坐白石把酒看青山鬚鬢經
年改身心竟日閒料知塵世事無復得相關

送人之冷泉

茲游無伴侶遠樹獨依依日落征帆急天寒過客稀斷雲隨
竹錫殘雪照麻衣應渡西湖去聞鐘入翠微

荆軻

壯氣干牛斗孤懷凜雪霜只知酬太子不道負田光易水悲
歌歇秦庭俠骨香千金求匕首身後竟茫茫

楊花

池唐春欲莫散漫復霏微未得爲萍去先來作雪飛帶泥粘
燕觜和雨點人衣鄉晚東風急飄零無所歸

送白雲之鄞

澤國東南郡迢迢接會稽人煙逢海斷山木與雲齊夜汲分
波月晨征候店鷄却愁孤錫返草暗竹房西

歲晚二首

蘭若依城市蕭條門巷深夜闌春漏斷窗近曉寒侵書幌無
燈火禪堂有磬音幾番清梵罷紅日上遙林

陋巷寡輪鞅開門對翠屏冰銷春水綠雲盡晚山青嫋嫋來
孤遂熒熒見小星亂鴉栖已定猶自步閒庭

蟋蟀

西風吹蟋蟀切切動哀音易入愁人耳難驚懶婦心寒燈孤
館外秋雨古城陰聽極無由寐終宵費苦吟

宿山寺次韻予封先生

國

冥投雲際寺深殿一燈微海底月已出山中僧未歸澗聲經
雨急林影入秋稀明發尋征道還愁露溼衣

寄友生

分違若未久相憶侶多時後會將何日重來預作期夕風翻
急浪寒月墮高枝寄語同人說詩翁鬢已絲

晚望懷巖栖翁

晚望荒臺上孤筇手自持桺條擎雪重溪鳥遡風遲枯草春
還發陰雲凍不移何當高世者來此共題詩

次韻子封先生荅山中僧

名山不肯住自欲老深雲鑿翠通虛牖鋤荒出壞墳花開雷
客醉果熟與猿分更莫逃幽隱音書難重聞

寄中峯長老

中峯峯頂寺長憶舊游時雲暝鶴歸急山溪月到遲亂藤縣
雨壁壞帛挂風枝終亦攜瓶錫相從支遁師

寺晉支遁
禪師道場

賈葉

霜後色初變風高始亂零和雲流遠澗雜雨下空庭埽處兼
僧影燒時帶鶴翎翻思在春日繞屋政青青

送中上人歸里

相畱已無計欲別手重攜客路連愁遠鄉山入望低野花秋
寂歷江草晚淒迷舊隱重歸日寒蟬夜夜啼

秋夜獨坐

解帶坐盤石脩然四體輕夜涼蛩語細天淨月華清孤燭明
溪殿哀笳起廢城寥寥塵境外誰識此時情

次韻登石城

振策登危堞東風鴈此歸清江愁外闊遠樹望中微草色和

煙重鴛聲帶雨稀
緬懷千古事
客淚墮麻衣

寄宋子虛

儒釋門雖異
詩書味頗同
有心依澗壑
無意謁王公
午鼎篆煙碧
夜燈花穗紅
曾聞少年日
幾度過遼東

嘉定顯慶寺

艤櫂逢精舍
松扉晝不扃
莫雲兼雨黑
寒樹帶煙青
鳥散庭還靜
龍歸水自靈
徘徊未能去
石塔語風鈴

餘生

短鬢霜侵久
餘生懶問交
愛閑忘俯仰
養靜倦推敲
花露縣蛛網
芹泥落燕巢
有時幽興劇
扶杖出衡茆

秋懷四首

涼風動寥廓
庭下草初黃
病骨知寒早
愁懷覺夜長
孤城淹歲月
重露迫衣裳
黑髮渾無幾
尤宜事退藏

砌冷候蟲急燈昏幽夢長秋風吹草木天氣入淒涼門掩荒
城月鴉啼古堞霜無成今白首身世轉堪傷
礪曲獨盤旋人間事屢遷艱難銷壯志衰朽惜殘年世有還
珠浦生無種玉田歸來華表鶴亦勸學金仙
抱景坐虛室脩然誰與同像金輝夕燭欄鐵響天風汛大潮
應滿林深葉未空江南秋欲老腸斷北來鴻

錢唐感舊

江山王氣終江水自流東鐘鼓傳新寺煙花失故宮龍山靈
沼竭鳳去寢園空殘月西風夜無人倚井桐

陪山村先生白提舉宅清集

展席當清晝凭軒野思饒苔隨屐齒陷雪入酒杯消看竹鶴
先舞彈琴梅自飄風流餘二老相對話前朝

盆竹

瓦缶不多土娟娟枝葉蕃豈知么鳳尾元是古龍孫蒼雪灑
禪榻細香浮酒尊王猷來此見應亦爲銷魂

舟次吳江

客路渺無際崎嶇何日平積煙迷遠樹殘照下荒城水宿先
歸港朝行暗計程長橋知漸近笳鼓隔林鳴

寶帶橋

運得他山石還將石作梁直從隄上去橫跨水中央白鷺下
秋色蒼龍浮夕陽濤聲當夜起併入榜歌長

雲屋詩極多秀句五言如古澗流寒碧幽花墮晚紅雨聲寒繞樹野色靜連山林靜鳥
窺室泉清魚辟人倚松山衲溼洗藥野泉香樹枯生意靜僧老道心多城鴉歸晚色庭
樹入秋風片月生松頂孤泉出石根七言如野岸燒煙添柳色敗垣春雨長苔衣幽鳥
帶雲歸樹宿清鐘和月出樓鳴木葉暗隨鄰杵落草蟲寒並夜牀吟白鳥不知吳苑
廢青山曾見越兵來江郭雨昏山色古柝橋風暖鳥聲春其
論詩云典雅始成唐句法麤離豪終有宋人風知其格調有自來也

蒲室禪師大訢

大訢字笑隱南昌陳氏子家世業儒去而學佛得法於晦機熙公卓錫杭之鳳山遷中天竺文宗自金陵入正大統命以潛邸之舊爲龍翔集慶寺召訢於杭州授太中大夫主寺事設官隸之

所著有蒲室集十五卷虞邵菴

序之謂訢公以說法之餘事爲文莫之能禦吸江海於硯席肆風雲於筆端一坐十年以應四方來者之求殆無虛日鏗宏軒昂感厲奮激老於文者不能過也歐陽圭齋之序蒲菴復公也亦曰由唐至宋大覺璉公明教嵩公覺範洪公以雄詞妙論大弘其道於江海之間一時老師宿儒莫不歛衽歎服皇元開國若天隱至公晦機熙公倡斯文於東南一洗咸淳之陋趙孟頫袁桷諸

先輩委心而納交焉。晦機之徒笑隱。訢公尤爲雄傑。其
文太史虞集嘗序之矣。訢公旣寂叢林。莫不爲斯文之
嘅。豫章見心復公以敏悟之資發爲辭章。邇而上之卓
然並驅於嵩璉諸師。無愧也。圭齋次論諸禪老之文。最
爲明悉。而推重訢公如此。明洪武初。復公與蒲室之徒
全室泐公同。以高僧見召。已見於錢牧齋列朝詩集。故
不具載。

期石室不至

風水不可期。知君定來否。何處唱歌聲。月明大谿口。

送暉東陽往江西省佛智師

故家西江上。遊子未成歸。而我豈不懷。所慚志多違。十五知
好道。從師別庭闈。竭來茗上寺。遭時蹈危機。秋風走淮甸。晏
歲東海涯。交情無厚親。面諾心已非。感子始終意。見我無瑕

疵愛惡有妍醜人孰不自知目覩凌雲質自足爲我規況同
早入室甚知多令儀前年黨禍作衆潰如星馳老師卧一室
四海浮雲悲我時闕服役賴子能扶持子去我始至曾不慰
渴飢遂令八十翁落日鄉土思別來鞠再華田圃霜露滋窮
檐白日晚苦心徒爾疲感激子遂行信有天下奇草堂白頭
親有弟供甘肥敢忘師道尊恩義無或虧意氣重然諾爲道
況孜孜神機不停佇天馬脫羈羈能不念離索潦倒成荒嬉
尺書豈無郵問謁多愧辭我有心與目孰不爲鳶鳴母老家
亦殫弟妹貧賤離長絕伯父恩骨朽葬無資天誅不可逭何
用涕交頤因子感我私聽歌行步遲誓言如白水我歸豈無
期

梁楷田樂圖

作勞田中歸酒味薄可漚人生一醉飽良不負吾腹牽攜影

參差歌吹非有曲流風一胥靡此樂不可復吾人孰非古亦
有心與目封倫恨不畱重睹貞觀俗昔在唐虞世苗民有不
服地堯知良農畜瘠求善牧願持畫史心獻君比和玉朝來
愧斯圖惻愴意未足

顏暉猥

峽冬拖長冰崖滑如積鐵客子涕縱橫悲猥助嗚咽仰視浮
雲崩再聽蒼石裂不畏行路難但感芳年歇

索士巖都事赴涪東僉憲以疾不能送作詩寄別

絕筆

鯤鵬雖鉅物爲瑞不如鳳五金利而堅良玉世所重古來德
輔時不必趨俗用公德配古人文藝復掩衆前驅失班揚後
顧無屈宋譬之武事嚴萬甲卷殽雍往年試春闈對策天威
動烈風挾長波電影掠飛鞚稱此衣繡榮人品賴甄綜任衆
難獨專榱桷雜楹棟分憲得問俗施惠徵前痛積水散鳧鷖

良疇沒菰葑飛章擇守令邦賦足輸貢懷德民不欺率教童
知誦平生許經濟無由預賓從方外亦何有天地一空洞所
慚世網嬰不虞禍機中車償長途暮舟膠哀壑凍甘澤被污
萊巨照燭昏瞢乞退悔苦晚誰無鉢飯供願從金華山芋區
荒可種更憐蘇長公忍別阻追送短歌愧知己空懷好音嘒
月支王頭飲器歌

呼韓款塞稱藩臣已知絕漠無王庭馳突猶誇漢使者縱馬
夜出居延城我有飲器非飲酒開函視之萬鬼走世世無忘
冒頓功月支強王頭在手帳下朔風吹酒寒凝酥點雪紅爛
斑想見長纓繫馬上髑髏濺血如奔湍手麾欲回斗杓轉河
決崑崙注尊滿酒酣劒吼浮雲悲使者辭歡歸就館古稱尊
俎備獻酬孰知盟誓生戈矛斬取樓蘭縣漢闕功臣猶數義
陽侯

曹娥江讀碑圖

海門五月潮如山龍伯壘肩蒼蛟頑越俗輕生好巫鬼婆娑
踏舞洪濤間羣巫姣服盱獨好歌聲忽絕紅旗倒孝娥苑抱
父屍出天地無情日杲杲雄詞不媿邯鄲兒萬金莫購中郎
題碑陰八字非隱語德祖有智如滑稽豈是阿瞞不解此感
媿上馬歸路迷女德猶能奮其節壯夫氣吐萬丈霓奸雄復
欲欺後世白頭猶愛漢征西丹青似是董狐筆千年要與竹
帛齊娥江新廟照江水可憐銅爵草萋萋

太白觀瀑布圖

我本白雲人見山每回首披圖得松泉感我塵埃久我家只
在九江口從此扁舟到牛斗翻愁天上銀濤堆石轉雲崩萬
雷吼水行地底不上天龍泓豈與滄溟連風葉無聲飛鳥絕
月光雲影天茫然丈人何來自中石謫仙招隱當不辱林梢

噴雪舞飛華尚想隨風唾珠玉馬首青山如喚人歸來好及
松華春泉香入新釀解公頭上巾今者孰不樂荒墳委荆榛
遂令畫師意萬古畱酸辛酸辛復何益東海飛紅塵

駿馬圖

世無伯樂亦久矣駿馬何由千里至披圖猶似得權奇豈伊
畫師知馬意何人致此鐵色驪旋毛繞腹新鑿蹄帝閑遠謫
天駟下馳來月窟浮雲低古王有土數千里八極周遊寧用
爾方今堇國效奔命合遣龍媒獻天子飈馳電沒爭辟易萬
里所向無前敵男兒馬上定乾坤腐儒詩書果何益幾愁骨
折青海煙黃沙野雪穹廬前幸逢好事寫真傳似向長鳴誰
與憐嗟我身如倦飛鳥十年繭足愁山川安得千金購神駿
攬轡欲盡東南天

初發金陵夜泊龍灣寄茅山道士李方外

人生不必行萬里亦不願讀萬卷書願爲茅山十日客山僧
坐列羣仙圖大風揚旗出天闕小峯萬馬爭奔趨俄頃波濤
忽破碎木末飛上金畢逋青書晝馳壇室靜玉鞭夜擊聞傳
呼去年獨宿丹井下天風拂地迎麻姑今年許入玉柱洞誰
遣旅食隨檣烏懷人弔古夜寂寞寒江落月號猩鼯祖龍埋
金王氣歇梁宮晉苑沈煙蕪想見雲龍映朝日山中宰相良
非迂

會曹伯珪

故人乍見如生面良久熟視仍驚呼六年怪我憂患餘不應
豐美如瓠壺煖湯濯足敷座坐呼童爨玉羹土酥攜過雙林
謁大士天華吹墮紅氍毹斷穗清霜農圃淨寒鴉落木漁村
孤從遊復恨冬日短張燈待月松堂虛淵明不入惠遠社杜
子頗是贊公徒彼皆艱難困生理好事豈有此樂且曹君曹

君慎勿疎他年念我專壑居夜來奇夢果有徵乘風萬里雲
龍趨

送張清夫

并序

清夫吳江人爲其友袁通甫收遺文來錢唐作歌送別
袁子平生妙斲輪未必俱化隨埃塵十年讀詩不相識斯文
義與骨肉親徧搜遺藁走江城吳人往往未知名錢唐晚值
張公子爲我開篋金石鳴昌歎尚須論所好惜哉已往空戀
嫖況有張公德業崇所也敢不攄懷抱去年湖陰三日雨飢
吟待旦聽五鼓風水愁催畫鷁飛松杉喜作龍蚪舞別後寄
書能幾回羣裳有約今雨來高歌擊節孰不樂空山井塌生
秋苔王門曳裾三十載只今鬢影霜皚皚風流何止一丘壑
置之燈燼黃金臺

曹伯珪築室曰桂齋戲作俳偕體

阿仙騎蟾白銀闕醉折秋華餐玉屑霓裳曲散墮清塵涼夜
素娥悲白髮玉輪碾香空翠寒流光萬里君合歡大星漸低
海色白高齋翠影空團團萬卷芳心期厚地憔悴秋香忍相
棄百年若使富貴羈淮南小山歸不歸

送趙公子去疾侍平章魯公歸蜀

所羨還鄉樂茲行得侍親魯公黃閣舊宣詔紫泥新給傳舟
車備承筐玉幣陳會靈奔岳瀆移次動星辰父老懷遺愛朝
廷眷大臣百年輕重計一舸去畱身子職共承重親知囑諭
諄行庖供膳早張燕進觴頻寶瑟調銀甲瑯盤繪玉鱗雲林
還平古風物獨傷神地勢金城壯山光錦浪勻江喧初上峽
樹遠欲通秦牛女天河夜魚龍野水春豐碑臨巖肩高冢撫
麒麟側聽歌淇澳猶聞起渭濱上尊羅甲帳仙仗擁蒲輪朽
櫟依瓊樹飛華戀錦茵峨眉尋舊約谷口卜芳鄰願結香山

社終陪綠野賓相期無遠別萬里月隨人

次韻張夢臣侍御遊蔣山五十韻

勝遊還送客秋日淨郊原別酒歡逾洽行廚禮不煩
楓林生晚吹鞠沼媚晨暎滿座金貂貴斯人玉雪溫
絲綸承異渥黼黻進嘉言宥密皇猷重才華大雅渾
披雲簾挂玉前席錦爲墩接武夔龍地冥懷鴈鷺村
外臺分重寄南服占名藩登麥初橫榻迎春及賜藩
馮高荒墳沒弔古斷碑昏種竹期招鳳尋僧共聽猿
洞呀獐蟒化海立怒鵬騫珠鈿沈智井金鋪委壞垣
國初遺老在江表故家蕃及物多膏澤爲邦固本根
化行民自信身退道彌尊美俗時丕變吾人溺可援
山川還寂寞歲月去翩翩廢館弦聲絕虛龕繪像存
苔斑飢鼠走梅卧野蜂屯除道看驄馬來儀集采鸞
傳呼驚鹿麕笑語荅江喧撫跡多遺恨懷人欲斷魂
馭風寧有待斲聖妙無痕師表儒

林盛賢勞王事敦不求金躍冶但愛土爲墳陳寶徒祠雉柏
溫苦化龜青山隨地好朱實著霜繁克味和椒桂同馨佩芷
蓀衡廬肩可拍參井手先捫說劍雙龍吼揮毫萬馬奔築臺
先自隗學圃恥如樊破衲多年冷窮檐傷午暄不才甘朽櫟
何幸枉高軒蕪穢煩芟荆泥塗賴力掀班揚鋒遠避屈賈氣
還吞舉世懷燕石惟吾重魯璠三光開渾沌萬派出崑崙喜
接東山屐叨陪北海樽辱知榮篚帛懷德報壺飧多稼欣逢
歲嘉蔬麥滿園雲霄翔鸛鶴溟渤偃鯨鯢寒士勤嘘拂諸生
淑討論望塵趨末路立雪候重闈緣忝三生舊心冥萬化元
棠陰思召伯桺色憶王孫精衛慚填海神鰲力負坤他時愁
遠別此意竟難諉嵩華相從去重窺玉女盆

述懷送觀空海歸臨川七十韻

幼慕空門貴高蹤世可遺功名輕閱閱塵土豈磷磳澄觀難

居俗湯休不廢詩三生猶有習四海豈無師身去江湖遠山
空雷雨垂諸方驚老宿同舍走羣兒素昧平生願居然會面
期解牛須冒縈相馬必權奇壯業期軒輊新功日倍蓰氣豪
空虎穴戰勝失魚麗五載靈谿寺千章白雪詞清遊忘旦暮
物論不瑕疵奎畫前朝祕清霜古佛規巖空孤有塔山古寺
無基松燎供宵讀芹香助午炊凍泥蛙似蟹春雨菌如芝遠
客愁獫狁村童抱鹿麕雲藏吳猛廟雷護柳公碑物色紛難
數雄材應接疲願終盤谷隱恥事北山移未覺歡娛盡溪蒙
造物私寒巖徒刻畫元氣忽淋漓共喜師門盛何嗟友道睽
青山吳甸沒白水楚天涯落日三年望浮雲兩地思驛書勞
白鴈貞信卜玄龜果爾期鷄黍同心感鐵鉉羣公來雜遝餘
子去委蛇風日矜神駿雲霄刷羽儀古今存道統師友得綱
維今代誰潛子宗門一器之聯芳端不忝清要合如斯自許

奔流象何知測海螽斯夷夷開樸櫟洗滌脫瘡痍弔古多閒暇
登臨甚怛怛山河秦百二宮闕漢罍罍黃壤侵銅狄春風動
兔葵林蘇俱異物標晝不同時志大交難合歌長聲愈悲近
人山擁座照席月臨池正擬追金玉方將脫轡羈不才還涉
世中道遂分岐相失嗟狼狽無謀哂鷓鴣交情淡於水真味
美如飴衣綻寒分絮囊空遠貸貲鵠原兄弟急犴獄簡書疑
仁者應無敵將軍自數奇波濤孤梗汎風雨一巢危亡命憐
張儉逃生愧范睢百年俱繾綣千里許驅馳誓欲同生苑那
能顧渴飢推恩豈望報菲德竟何爲吾道縣孤注叢林失一
夔老師甘屏棄弟子頌期頤逝水歸東壑流光及崦嵫空餘
匠石斲誰善宰夫腠行獨招羣忌名高得謫隨長鳴悲病鶴
老氣卧孤羆入室猶橫榻承顏或奉匭樓孤金驛遠河直玉
繩歆未厭從師樂其如念母慈江雲連穉穉山雪溼茅茨短

世驚炊黍成功付覆碁何曾犀首貴空作虎頭癡白日真成
去青春有別離風煙辭北固江漢抱南箕浪穩饒蛟睡天長
白鳥遲鄉關迷遠近雲樹暗參差幸喜收蠻獠於今靜鼓鼙
詩成須數寄清響播墳笈

送何彥敬赴山東憲幕

風物中州美人材聖代優恢恢光岳合肅肅羽儀修省署千
官盛臺綱衆目收諸公多汲黯文掾獨何休健筆回天險精
機洞鬼幽霆奔羣蟄奮鼉負五山浮責已常存恕知人庶寡
尤平生周禮樂後世魯春秋西極銷鋒鏑坤維得綴旒元功
推衛霍首罪竄共兇陳寶無祠雉桃林已放牛九天行日月
一命重山丘幕府非閒散山東且勝遊飈車馳羽檄霜刃避
吳鉤白下諸侯酒淮南使者舟風清捎退鷁月冷動潛虯歷
數無雙士誰爲第一流託交慚素昧道術得相求塵土緇衣

四三
元言選
浣山林白髮羞送君因有感莫色起滄洲

佛智師歸仰山

蚤發扶輿拜鐙明愛白頭故鄉元自好游子獨淹留壯業真
何用孤懷未忍休始終存衆望不敢畏離憂

送張用鼎遊燕南

天上知名久由來漢客星江湖歌白雪風露滿青冥巴蜀須
傳檄燕山待勒銘壯夫期遠大不獨抱遺經

次韻甯宣尉

將門三葉貴古劒削霜硯霧卷烏蠻淨風生碧海清投壺驚
甲帳飛墨動雲屏未慙清遊興與松房聽雨聲

送別

沙鳥高低語江雲斷續飛青山攜手別秋日故人稀落芳
心在悠悠昨夢非歌長不用續鯨浪暗吹衣

庚午秋過淮安

百感何嗟及行人過楚州
笛聲今夜月雲物向時秋
古驛依城住長河傍海流
天王南狩日曾此駐鳴騶

過淮河口

水次千家市蠻商聚百艘
揚徐元接壤河泗此交流
乘傳陪天使浮杯任海漚
夜涼瞻斗柄想見上林秋

送薩天錫照磨赴燕南憲幕

蕭寺畱詩別高懷不負公
江聲元自急山勢古來雄
下榻疎鐘雨登臺落木風
重來無幾日除道避乘驄

楊執中幼與予同舍自予去鄉里一別四十五年矣
乍見俱不相識承惠詩二首次韻謝之

勛業雙蓬鬢江湖萬里心
扣舷山月近欹枕夜濤深
多士懷東觀何人賦上林
只將絃上趣白雪寫遺音

青衿巷南北鷄犬識比鄰驟面初疑夢論交晚覺親文章元
有命耕釣豈無人老矣非吾願滄洲合問津

次韻奉荅吳可堂左丞致政寓九江見貽

晚節陶元亮平生賀季真鷄豚栗里社賓客午橋春風物三
生夢功名百歲身種蓮毋負約金地不生塵

萬歲山

蜿蜒金翠倚青冥虛谷時傳萬歲聲葆羽璫雲氣溼玉龍
麟甲夜寒生關河拱挹皇居壯宮殿深嚴聖慮清自愧山林
榮鹿性也隨鵲鷺到承明

黃河阻風

九域重尋禹蹟荒喜聽縣水夜浪浪中原迤邐河流壯元氣
汪洋地脈長萬里風雲來黯澹五更星斗下光茫我行不有
神靈助風送天香自帝傍

高彥敬尚書墨竹

西域高侯自愛山
此君冰雪故相看
蒼梧帝子秋風淚
翠袖佳人日莫寒
妙處寧論鐵鉤鎖
深情莫報翠琅玕
誅茅何處陰厓底
靜看梢頭玉露漙

送郭幹卿學士赴奎章閣次趙魯公韻二首

歲晏俄聞上國行
安車可是莫年情
早朝翠霧沾衣溼
夜直銀河入坐清
社稷憂勤霜鬢短
江湖歸夢釣絲輕
相攜不盡丁寧語
歌斷驪駒白下城

短褐寧陪衣繡行
相忘道術愧深情
光分玉樹精神合
氣肅金盤沆瀣清
孤鳳遠歸阿閣晚
六鼇浮去五山輕
微踪亦與扁舟約
煙水南詢第幾城

次韻王繼學侍御金陵雜詠十首

錄六

新到建業

江表風流辱寵臨青山無恙只如今高陵雲合遺金化秋浦
涼生古玉沈吏散圖書齋閣靜公餘女樂後堂深題詩石壁
山靈護莫遣春風薜荔侵

東窗看山

微茫翠浪瀉青瑤木末斜分鳥道遙雲歛江亭初過雨月明
津樹欲生潮崖根橘柚知誰種礪曲茅茨許共樵不羨東山
攜妓看堆盤鱸玉映紅消

忠勤樓

自負東南一劒橫故膺宸翰錫嘉名帛書峴首愁歸鴈鼙鼓
江心吼怒鯨落木藁祠孤淚墮西風長笛壯心驚奸雄欺國
真兒戲只比藏鉤謾鬪羸

獨坐君子堂

繼學嘗師鄧善之
鄧綿州人也

海上歸來鬢未霜登臨應不愧斯堂風生葆羽迎仙蓋華散

氍毹供佛香江上靡蕪隨意綠雨中新樹過人
綿州學士
溪埋玉淚溼遺編可得忘

賞心亭

碌碌從人媿抱關賞心應共鶴飛還孤舟野水東西渡落日
長淮遠近山神鼓乍喧香霧合賓筵初散綠陰閒相思只尺
長相隔一似河流九曲灣

潛宮

御榻當年小殿西龍光照地起虹霓蓬萊珠館珊瑚樹夜月
瑤臺白玉梯甲帳列營環衛密龜茲按拍蹋歌齊代來故事
馮誰紀只有年年杜宇啼

次韻馬昂夫總管飲仙橋詩

鐵鎖高懸隔杳冥仙橋有路上瑤京夜涼暗覺潛蛟動曉色
微看素練平坤極尚遺神禹力山靈空識祖龍名爛柯舊事

馮誰問石柱題詩薜荔生

次韻吳間閒宗師贈茅山徐真人

當年野服謾朝天不羨稽山賀老船
翠蜃夜蟠金井月采鸞朝下玉爐煙
俄聞劫燒灰墨還見宮城慶醴泉
莫道仙人無白髮步虛聲裏又年年

次韻薩天錫臺郎賦三益堂笑容

華開未覺早霜殘畱伴仙人酒半闌
翡翠巢空秋浦淨落霞飛盡暮江寒
玉真對月啼雙頰楚袖迎風舞七盤
持向毘耶聽說法病翁元作色空看

次韻王伯循僉事將上江東畱別

江南江北白雲秋隨分高情且宦遊
醉著氍毹歸月下夢披葭葦釣槎頭
先生玉宇秋先見氣肅銀河夜不收
明日繡衣終遠別看山不盡更登樓

謝郭道淵以詩慶住新寺

住近城南尺五天
眼看金屋會羣仙
雲霞海上無三島
風月人間卽四禪
父老多情思沛邑
從官有意賦甘泉
恩波不獨新蘭若
麟鳳呈祥五百年

次韻荅曹德昭臺郎見寄

華壓雕闌護玉墀
光涵珠網耀摩尼
室空誰問維摩病
才絕徒憐顧愷癡
塵土汚人思自奮
雲霄舉翮欲何之
期君臺閣鵷鸞集
濯濯清風慰所知

仲實復和見貽勉荅

佛國親登七寶墀
見超無見總持尼
情塵空盡還同俗
結習都忘不斷癡
東嶺雲歸招共宿
北山鶴怨任他之
吾徒未識毘耶老
衣染天華不自知

米元暉江山秋晚圖

紅樹面秋晚澄江媚落暉扁舟如喚我莫待白頭歸

書牛

草煖犢子肥牧閒牛耳溼誰知荷蓑翁風雨租稅急

次韻荅石室元晦二首

不審往來相熟未青衣迎棹慣看人糗糒分餉家家似薯蕷
炊香頓頓新

貝闕羣仙羅玉質也知天上足金銀溪慚造物相料理巖穴
偏宜槁木身

次韻荅熊以善秀才

陴堂齊赴鼓隆隆獨著儒衣謁嬾融也勝朝回隨鴈起西風
千騎過雲中

古廟折碑圖

古廟殘碑野水村行人回首暗消魂遙天何許孤雲沒不盡

青山萬馬奔

虞伯生學士以五詩贈一上人蒙見及一公將歸蜀
謁趙魯公次韻二首

醉罷蒲陶金叵羅散華方丈寫伽陀扁舟許我從公去浩蕩
江漚萬里波

魯國數年書疏斷每思高會聽雲和別時有約終相覓綿竹
江頭雨一蓑

舟至通州夜雨大作

明日京華拂面塵穹廬如雪馬如雲雨聲未忍孤篷別故遣
蕭蕭枕上聞

次韻送寥天與

楚江送客暮帆開眼底何人識異材後夜月明潮又滿青山
空繞雨華臺

孤嶼圖為鴈山德長老題

澹煙疎樹月朦朧路隔寒潮斷復通
添箇茅菴分我住明年飛錫海門東

秋夜同太原張耆仲舉永嘉李孝光季和龍翔寺聯

句

先皇日潛邸梵宮冠東南金碧麗紺宇耆旌幢覆瓊櫺六龍

駐神馭光百靈護鸞驂地蟠龍虎氣訢殿擁貂蟬簪文石露

篆古耆化城天樂酣杏梁虹飲渚光辟甃蟾生潭復道星辰

直訢觚稜煙霧含浮圖琅璫語耆藻井罕愚囑曾暉攬鐵鳳

清旭眩冰蠶望氣芒碭遠訢問道崆峒堪御牀塵宛宛耆

仙仗華毳毼珠襦鑲玉桺光猊座涌寶龕遺弓泣父老訢執

豆奔侯男衣冠閔原廟耆矛戟園精藍馮几跋末訓光銘鼎

紀玄譚聖祚萬世啓訢法筵諸佛參貝翻譯經六耆圖繪笑

像三華鬢衆唄作

光

象教一嘿諳猿鶴驚此客

新

林礪洗餘

慚齊廚飯香霽

新

瞑閣鐘聲鎔錦薦渴獸挾

光

礎踞雕虎眈

洒埽媿無補

新

倡酬知匪堪燥吻茗屢沃

新

苦心策頻揆焚

膏續迅晷

光

卷簾納霏嵐氍毹月采淨

新

鑿落雲液甘風籟

縱古柏

新

秋陰挾高栢戶牖蜂脾蠹

光

丹青海波涵社中合

陶謝

新

方外師瞿聃息影了虛寂

新

栖禪屏癡貪苾蒭交析

聖

光

伊蒲不盈甌心同略形跡

新

累遣忘憂悵錦雉絡扇羽

新

赤螭銜劒鐔豪走異肩

光

麈尾揮鬚髮堅壘避屈賈

新

陋邦敵吳郟韻劇魔膽落句雄神力擔擁鼻極營度

新

刺手

勞鈎擗械筭遞銀鹿蠹葉剔白蟬幢鐙粟蠢蠢

光

鼎香穗醢

醢山河入帝網天人繞優曇

新

境勝情自曠理超思彌覃

光

雲卧委巾舄雨歸借篋籃

新

報章媿木李畱帖踰黃柑

新

話

言諒所慕沾醉詎可妯

光

捧席曰足慧

新

觸屏蒼頭憨

新

偏

袒嚴肩聳光鏤匡錄耳儋者吾我涉誕謾新爾汝志詒者諠者

罅發粟穰厚色湍醪味光釀光剪莖差可芼食魚愛須泔者青

谿渙以瀏蔣陵間其甜新茲事付千載相期結廬菴者

石屋禪師清珙

清珙字石屋常熟溫氏子首參高峰後嗣法于及菴信
禪師住當湖之福源嘗作偈曰拾得斷麻穿破衲不知
身在寂寥中退居雪溪之西曰天湖吟諷其間以自適
至正間朝廷聞其名降香幣旌異賜金襴衣壬辰秋示
寂所著有石屋詩其自敘曰余山林多暇瞌睡之餘偶
成偈語紙墨少便不復記錄雲衲禪人請書之蓋欲知
我山中趣向耳于是隨意走筆不覺盈帙掩而歸之慎
勿以此爲歌詠之助當須參究其意則有激焉其詩有
云天湖水湛琉璃碧霞霧山圍錦障紅觸目本來成現
事何須义手問禪翁及菴嘗語衆曰此子乃法海中透
網金鱗也

山中天湖卜居二首

林木長新葉，遶屋清陰多。溪草沒塵迹，隔山聽樵歌。自耕復自種，側笠披青蓑。好雨及時來，活我新栽禾。遊目周宇宙，物物皆消磨。既善解空理，不樂還如何。

月來照我門，風來吹我襟。勸君石上坐，聽我山中吟。玄鬢化為雪，朝光成夕陰。萬事草頭露，豈得長如今。

天湖卜居

清明無事登霞峰，伸眉極望開心胸。太湖萬頃白潏潏，洞庭兩點青濛茸。初疑仙子始綰角，碧紗帽子參差籠。又疑天女來獻花，玉盤捧出雙芙蓉。明知此境俱幻妄，對此悠然心未終。徘徊不忍便歸去，夕陽又轉山頭松。

溪巖雜詠

錄六

道人緣慮盡觸目，是心光何處。碧桃謝滿谿，流水香草溪。蛇性悅日暖，蝶心狂曾見。樵翁說雲邊，雪晝房。

一饌足生涯居山道者家有功惟種竹無暇莫栽花水碓夜舂米竹籠春焙茶人間在何處隱隱見桑麻

山廚修午供泉白似銀漿羹熟筍鞭爛飯炊粳米香油煎青頂蕈醋煮紫芽薑百味皆難及何須說上方

紅日半銜山柴門便掩關綠蒲眠蓐軟白木枕頭彎松月來先照溪雲出未還迢迢清夜夢不甯到人間

扶杖入松林閒行上翠岑鶴羣衝鵲散樹影落溪沈野果棘難採藥苗香易尋澹煙斜日暮紅葉半巖陰

結草僂爲菴年年用覆苫紙窗松葉暗竹屋蘚花粘麥飯惟饒火藜羹不點鹽生涯隨分過誰管世人嫌

閒詠

錄十二

吾家住在雪溪西水滿天湖月滿溪未到盡驚山嶮峻曾來方識路高低蝸沿素壁粘枯殼虎過新蹠印雨泥閒閉柴門

春晝寂青桐花發晝胡嘯

柴門雖設未嘗關閉看幽禽自往還尺璧易求千丈石黃金
難買一生閑雪消曉嶂聞寒瀑葉落秋林見遠山古栢煙銷
清晝永是非不到白雲間

幽居自與世相分苔厚林深草木薰山色雨晴常得見市聲
朝莫罕曾聞煮茶瓦竈燒黃葉補衲巖臺翦白雲人壽希逢
年滿百利名何苦競趨奔

溪淺泉清見石沙屋頭無角寄藤蘿夜深月下長猿歎苔厚
巖前少客過庭竹欹斜春雪重嶺梅消瘦夜寒多寥寥此道
非今古徒把瓢來石上磨

破屋蕭蕭枕石臺柴門白日爲誰開名場成隊挨身入古路
無人跨脚來深夜雪寒惟火伴五更霜冷有猿哀袈裟零落
難縫補收卷雲霞自翦裁

優游靜坐野僧家
飲啄隨緣度歲華
翠竹黃花閑意思
白雲流水淡生涯
石頭莫認山中虎
弓影休疑盞裏蛇
林下不知塵世事
夕陽長見送歸鴉

滿頭白髮瘦稜層
日用生涯事事能
木臼秋分舂白米
竹筐春半曬朱藤
黃精就買山前客
紫菜長需海外僧
誰道新年七十七
開池栽藕種茭菱

自入山來萬慮澄
平懷一種任騰騰
庭前樹色秋來減
檻外泉聲雨後增
挑薺煮茶延野客
買盆移菊送鄰僧
錦衣玉食公卿子
不及山僧有此情

競利奔名何足誇
清閑獨許野僧家
心田不長無明草
覺苑長開智慧花
黃土坡邊多蕨筍
青苔地上少塵沙
我年三十餘來此
幾度晴窗映落霞

歷遍乾坤沒處尋
偶然得住此山林
茅菴高插雲霄碧
蘚迥

斜過竹樹深人爲利名驚寵辱我因禪寂老光陰蒼松怪石
無人識猶更將心去覓心

細把浮生物理推輸贏難定一盤碁僧居青嶂閑方好人在
紅塵老不知風颺茶煙浮竹榻水流花瓣落青池如何三萬
六千日不放心身靜片時

法道寥寥不可模一菴深隱是良圖門前養竹高遮屋石上
分泉直到廚猿抱子來崖果熟鶴移巢去磳松枯禪邊大有
閒情緒收拾乾柴向地鑪

趙會初心提舉

老來脚力不勝鞦竹杖扶行步落花待月伴雲眠蘚石尋梅
陪客過鄰家粥香瓦鉢山田米雪汎甕甌水磨茶今日爲翁
時暫出此心長只在煙霞

山居吟

錄十二

滿山筍蕨滿園茶一樹紅花間白花大抵四時春最好就中
尤好是山家

年老菴居養病身日高猶自未開門怕寒起坐燒松火一曲
樵歌隔隴聞

山廚寂寂斷炊煙凍鎖泉聲欲雪天面壁老僧無定力又思
乞食到人間

此事誰人敢強爲除非知有莫能知分明月在梅花上看到
梅花早已遲

茅屋低低三兩間團團環繞盡青山竹牀不許閑雲宿日未
斜時便掩關

一片無塵新雨地半邊有蘚古時松目前景物人皆見取用
誰知各不同

山形凹凸路高低石占雲頭屋占蹊地窄栽來蔬菜少又營

小圃在橋西

移家淡入亂峰西
煙樹重重隔遠溪
年老心閑貪睡穩
厭聞鐘響與雞啼

半窻斜日冷生光
破衲蒙頭坐竹牀
枯葉滿鑪燒焰火
不知屋上有寒霜

淡秋時節雨霏霏
蘚葉層層印虎蹠
一夜西風吹不住
曉來黃葉與階齊

老來無事干懷抱
竹榻高眠石枕斜
夢裏不知誰是我
覺來新月到梅花

獨坐窮心寂杳冥
个中無法可當情
西風吹盡擁門葉
畱得空階與月明

澹居禪師至仁

至仁字行中別號熙怡叟鄱陽人得法于徑山元叟端
和尚駐錫蘇州萬壽寺博綜經傳貢尚書泰甫黃侍講
晉卿皆服其說虞文靖公稱其文醇正雄簡有史筆宗
門之子長也其詩句如松間石榻春雲護花底山尊夜
月開沙渚草香流水活海天雲淨碧峰遙醉題梧葉秋
陰合坐對槐花暮雨來又咏海棠再花云月裏精神今
夏好雨中顏色向來新俱穩秀有法判官皇甫琮編次
其詩文曰澹居藁江左外史雪廬新公爲之序

奉荅虞伯生侍講

散花丈室擁天姝金粟如來安穩無不二門開唯一默對談
還許老文殊

送興祖庭遊會稽

故人別我向何處歲晏扁舟泛若邪萬壑千巖風雪後杖藜
隨處看梅花

送歲上人還日本并簡雙林明極和尚

十年問法天王地萬里鄉山碧海東雪室有禪傳鼻祖蒲帆
無恙轉秋風潮連蓬島晴雲白霞擁扶桑曉日紅爲問雙林
老尊者尺書還寄北來鴻

至正廿二年冬十二月予訪雲海禪師於龍淵山中
握手敘契闊驩甚且觀其殿樓竹樹宛然如全盛時
因念東南幢剎率爲兵燹而朋舊多淪替所歷有滄
桑之歎而禪師之交義之願力有如此者遂作詩以
紀之云

釣艇加沙度曉晴浮圖倒影若門迎碧潭波冷白龍卧翠竹
雲深丹鳳鳴亂後樓臺符願力歲寒松柏見交情欲從池上

結荷屋天地干戈尚戰爭

次韻徐大章移居

借屋藏書避世喧地偏塵遠水雲繁
籬前沙渚羣鷗卧邨外人家萬蟻屯
春送蘭香浮綺席月移梅影度柴門
杖藜慣識湖東路今雨還尋孺子論

次韻馬國瑞員外遊會稽

勝遊還與馬遷同直上東南第一峰
神禹穴深蒼木合李斯碑在紫苔封
晚雲仙島翔歸鶴夜雨靈湫起蟄龍
若見故人煩問訊松間石上幾時逢

李煥章竹石居

翔鳳歷四海故巢何處安蓬萊蒼石外
風雨長琅玕

送厚元載遊會稽

江上楊花落孤帆度遠汀潮連滄海白
山擁會稽青逸少籠

元言邊
鵝帖支郎放鶴亭登臨有新製毋惜寄林扃

送愚仲和尚

山陰別後道偏腴海上歸來興不孤
短杖看雲懷鷺嶺扁舟載月度鴛湖
豈無大士同香飯會有神龍獻寶珠
老桂吹花應有約巖前共聽白猿呼

飲綠軒

道人住清溪日飲溪中綠
滌慮發天光心花瑩如玉
復愛溪上雲時來簷下宿

送楠上人歸定水并簡見心禪師

阿師說法雙峰下白晝天花作雪飛
烽火隔江音問絕秋風海上片帆歸

次韻荅柳仲修宣使

兵戈宇宙誰知己風雨東南話故鄉
禪伯自慚非覺老詩豪

今喜得劉郎海門鴈叫江楓赤澤國雲來野日黃悵望庭闈
空白髮菊花霜露幾重陽

贈夏君美同知

海宇煙塵日夜生中興諸將正鏖兵酈生三寸瀾翻舌一旦
來歸七十城

吳門遇江左外史

闔閭城外故人過客裏相逢感慨多夜雨蓮荒廬嶽社秋風
木落洞庭波遠公道業驚吾老潛子才華奈爾何戎馬十年
鄉國夢結茅何處共雲蘿

題秋色歸舟圖

滿目烽煙萬國秋江山何處可追遊吳淞水落鱸魚美風雨
歸來一釣舟

送謙上人還日本并簡天龍石室和尚

回首扶桑若箇邊春風萬里上歸船神龍饋供雲迷海仙女
吹花月在天密意西來端有得新詩東去豈無傳若逢石室
煩通問歲晚南湖學種蓮

次韻寄唐伯剛斷事二首

一軒涼雨讀楞伽三復停雲感物華金粟如來方丈室香風
滿地散天花

野水芙渠繞鶴汀畫橋楊柳挂魚簪秋風攜手青溪曲竹杖
荷衣一箇僧

次韻荅張仲舉承旨

沈香亭北賦名華四海車書正一家總道天關嚴虎豹那知
陸地起龍蛇詞臣自昔推張說邊將何人繼趙奢南國雲山
渾似舊幾時畱谷度牛車

次韻簡蘇昌齡學士仲銘禪師

曾向燕然勒漢銘
吳門今對萬山青
朝端聲價蘇司業
海內交游嵩仲靈
何日袈裟登釣艇
此時雲錦照溪亭
一尊王侯陶徵士
莫學三閭愛獨醒

次韻竺元和尚山謳四首

白雲招我歸清泉
濯我足閑將貝葉書
遙對青山讀童子
拾松花鄰翁分野藪
却憶馬駒師一箭中
羣鹿

千峰梅雨歇
繞舍流泉音
萬物各有適
孤雲獨無心
時歌少林曲
還共寒山吟
嘯鳥忽飛去
落花幽徑淡

獨坐孤峰顛
終朝無過客
一嘯心自閑
羣魔氣應索
池清月夏明
風靜葉還落
白叟荷樵歸
高歌亦雙脚

梅花報春信
竹外香風吹
青山與世隔
幽意何人知
冰霜政嚴潔
雲石相因依
佇立望歸鶴
月上寒松枝

集杜句述懷寄見心書記

病鳥戀本枝南鴈意在北飄飄媿此身一歲四行役所憂盜
賊多不獨凍餒迫東下姑蘇臺殘年傷水國金銀佛寺開信
美無與適細人尚姑息賢者貴爲德之子白玉溫令我心悅
懌晤語契溪心洞徹有清識學貫天人際冥漲與筆力神功
接混茫風雷纏地脈靈芝冠衆芳冰壺動瑤碧紫燕自超詣
尤異是龍脊流傳必絕倫許與必詞伯喧爭懶著鞭飛騰知
有策吾道屬艱難鸞鳳有鍛翮天門鬱嗟峨乘槎斷消息干
戈尚縱橫道路時通塞顧惟魯鈍姿養生終自惜桃源無處
尋黎民糠粃窄故國莽丘墟夢歸歸未得悵彼高飛禽何以
有羽翼匡山讀書處宿昔長荆棘陰房鬼火青戰地骸骨白
骨肉恩書重看雲淚橫臆西江萬里船終當挂帆席天寒鷁
鵠呼北風破南極梅花已飛翻節序昨夜隔感激在知音書
此豁平昔

天如禪師惟則

惟則字天如吉之永新人族姓譚氏得法于普應國師
中峰本公闢吳城東北隅廢園爲方丈曰師子林有竹
萬竿竹外多怪石其中最高者類狻猊他石或跂或蹲
厥狀匪一軒堂亭閣冠絕一時則公以中峰倡道天目
師子巖故名師子識不忘也又嘗遯跡松江之九峰道
風日振加號佛心普濟文惠大辨禪師侍者集其詩文
曰師子林別錄翰林待制遠者圖爲之序稱其隨機泛
應靡所不有云倪高士元鎮每過師子林愛其蕭爽爲
之繪圖徐幼文復圖爲十二景高季迪諸人題咏相繼
今其地大半廢爲民居湫隘踴塵無復昔時之勝矣

簞簞引

并序

西瑛懶雲窩距余禪室半里許時相過從吹簞簞以爲

供復於余言有所需乃賦長歌以贈

西瑛爲我吹簞簞發我十年夢相憶錢唐月夜鳳凰山曾聽
酸齋吹鐵笛初吹一曲江風生餘響入樹秋嗚咽再吹一曲
江潮驚愁雲忽低霜月黑坐中聽者六七人半是江湖未歸
客歡者狂歌繞樹行悲者垂頭淚沾膝我時奪却酸齋笛歛
襟共坐松根石脫略悲歡萬念消悟聲無性聞無跡西瑛簞
簞且莫吹簞簞從古稱悲粟悲歡茫茫塞天地人情所感無
今昔山僧尚賴雙耳頑請爲西瑛吐曾臆聲聞相觸妄情生
聞盡聲亡情自釋盡聞莫謂聞無聲機動籟鳴無間隔亡聲
莫謂聲無聞去來歷歷明喧寂吹者之妙余莫知聞者之悟
公莫測公歸宴坐懶雲窩心空自有真消息

贈道林訓上人

角鷹一側目所視無穹蒼臂鞬索飽非所長良馬一振鬣所

向無窮荒內閑待秣安可常丈夫心膽塞天地身與世道爲
低昂况從世外發高趣蓬蒿豈足誇翱翔我憐古道滿荊棘
歲晚狐兔爭跳梁今年識君谷水傷愛君駿氣如鷹揚願君
莫如我學步成踉蹌願君莫如我用拙甘六藏茅舍溪居已
無馬師問梅子木葉蔽膝尚有懶瓚知南陽九峰之外天茫
茫寒梅欲花春在霜興來拂袖謝丘壑闊視四海皆吾鄉我
有解纜歌一章如擊瓦缶無宮商吳松江上爲君歌一發怒
潮卷雪天風狂

吳松江觀閘

吳松江水急如箭昔見畫圖今識面百川應命爭先趨東注
海門如赴戰海波怒發驅潮頭戰退吳松水倒流江潮一日
兩相鬪萬古不洩猶寇讎江水清兮潮水濁江水不似潮水
惡惡潮推出海中洲堆積江面成山丘官憂水害難疏鑿橫

江四閘同時作潮來下閘潮平開閘內不通潮往回潮波怒
息捲底去閘門又見江波怒閘上盤渦萬陣分閘下狂瀾萬
騎奔萬雷吼今萬鼓發石走沙飛亂戈甲黃河衝破華山根
健瀑擘開青玉峽人言水性險且凶不知水與人情同情濤
識浪怒且憤不在江潮在方寸水險尚可避人險終難知人
爭額額罔晝夜水爭尚有潮平時

城南樓

城南樹尾花風晴城南樹下漁舟行隔溪竹屋數家酒矮籬
路轉人縱橫仙山石洞在眼底塔竿倒影滄波明相期待渡
日已晚坐看平野青煙生

遊三相臺示甘楊諸友臺乃姚崇牛僧孺劉沆讀書
處也

我登三相臺南望雙巽峰俯視下界如凌空開元老樹可百

丈斷崖盡日呼顛風甘郎攀果學猥挂楊子枕石飛泉中垂
藤離地坐我穩袒跣長嘯如乘龍嗚呼昔人不再得臺上土
花幾秋色前身不與後身期白雲豈識蘿衣客安得近代顏
輝來畫我石上驚風雷

真州送別悅希雲

欲別不別重相攜別思已逐寒雲飛飛雲一去不可得千邨
萬落明斜暉回頭望吳山滿目青依依亦如送我望我去立
盡風煙未忍歸

送止照歸古洪曲江三首

莫雲飛上錢王臺亂峰蘸碧湖光開六橋春色看正好之子
不甯重徘徊百年萬事煙雨過鄉井一念終難灰浩歌歸去
送歸去夢斷楚水何時來

鑾江鎮上雙江洲大船解纜荒洲頭挂帆蔽空槌鼓發白浪

卷雪風蕭颼故山三日忽到眼恍忽天上飛驛驕向來歸興
有如此今日送子心悠悠

獅王一去挽回秋滿巖谷天風哀龍困象藪亦多士濟濟
熟視宗綱頽誰能共埽松下屋黃精黃獨連門栽霜休月上
芋香起指點淡撥寒鑪灰

入仙洞山

入山隱隱如聞雷山雞角角隨人飛松風洗我市喧耳松露
灑我青蘿衣平生結習重幽賞會景會物情依依誰能歌紫
芝我當歌采薇招呼雲外青鸞歸

上海舟中即事

烏溪出閘催雙櫓急趁回潮下黃浦午前期到上洋城生怕
潮來近亭午夜潮已落岸痕高風卷浪花翻雪瀟瀟渡頭趁渡
人如雞水行泥行亦良苦西岸衝波遠入邨東岸湧沙作林

圃岸上居民無定蹤頗怪潮行無定所吾年五十遊上洋今
歲重來五十五豈無玉雪美少年向來一揖成千古亦有鴟
張萬石家勢去一朝無寸土噫吁嘻人生幻化若浮雲陵谷
變遷何足數

示多人

塵網苦多累暫閑如脫羈胡爲塵外跡而乃東西馳聚談每
倉卒旣遠翻多思眼前失真宰身外何求知百骸如僕馬勢
合聊相隨氣運忽遷謝一散無重期來日不可待去日不可
追靜緣當自保世故方無涯

登西林

沈鬱難自居偶思散遐矚主丈登西林斷崖倚修竹崖上叢
花開飛禽自相逐崖下清川流水光泛嘉木四月風雨多平
野一時綠長嘯白日低煙雲起空谷俯視萬化間勞生亦何

足

遊茅山雲林清遠之館

華陽有客似重來新見雲林別館開
寒日半巖松鶴起腥風萬壑雨龍回
琴牀流露滋瑤草丹鼎飛春上玉梅
居者未知清且遠人間咫尺望蓬萊

漕運萬戶某脫險于海因和韻唁之

語未開脣已改顏向來海運歷多艱
連檣影落蛟涎窟孤枕魂飛鬼骨山
出匣劒龍驚怒吼傳家珠虎幸生還
黃金任積高於斗不博休官一日閑

送時無擇維那歸閩

百計歸難禁生緣樂未窮聽鐘榔葉雨
欹枕荔花風客久閩音化交溪楚俗通
片帆明日遠雲斷海天空

送鄉僧昱曉林二首

風沙風葉攪征衣今日江頭送汝歸西望故鄉何處是楚天
漠漠片雲飛

鄉人問我幾時還向道如今又入山一箇蒲團半間屋吳松
江上九峰間

登茅山天市壇

天市危闌倚碧空兩京山水見冥蒙東來十日風霜路只在
寒嵐一抹中

一峰雲外菴和韻四景四首

碧虹分雨半山橋橋下春雷卷怒濤老衲定回推戶看隔溪
開盡野櫻桃

竹屋茶香滿澗煙綠杉溪處響流泉目前有法誰能說落日
微風一樹蟬

平田水語稻花香半解蘿衣受晚涼景物雙清秋正好亂山

雲外又斜陽

衲被蒙頭宿火紅雪寒愁聽上方鐘開門忽怪山爲海萬疊銀濤露一峰

湖邨菴卽事

竹根吠犬隔溪西湖鴈聲高木葉飛近聽始知雙櫓響一燈浮水夜船歸

訪仙洞山舟次大溪口

窈窕仙家何處尋夕陽明滅亂雲深大溪橫斷青山合一路風帆入樹林

贈弟仁遠入京四首

并序

始余別家時仁遠從弟年纔十七今將四十矣鬚髯戟張言論有遠志以湘南教官滿考乘風爲上國遊蟻舟維揚迂道來徑山相尋梅雨中禪榻共燈數夕旣行贈

偈四章以紀別思以戒其速歸

虬鬚鐵面岸綸巾膽氣麤豪語逼人二十三年不相見却疑
年少是前身

雨嶂煙巒翠欲流天開圖畫萬山頭凌霄閣上凭闌意畱與
他年說舊遊

白雲峰在夕陽邊目送吳雲入楚天汝到燕山却回首三千
里外又三千

錦袍花映鳳池明玉珮光搖紫府青富貴著人如醉夢倚門
慈母眼長醒

曉行吳松江

水轉沙涂又一灣迎船孤塔出煙嵐長江一道橫風起兩岸
爭飛上下帆

師子林卽景六首

萬竿綠玉繞禪房
頭角森森筍穉長
坐起自攜藤七尺
穿林絡繹似巡堂

素壁光搖眼倍明
隔簾風樹弄新晴
樹根鼃鼓鳴殘雨
恍忽南山水樂聲

半簷落日曬寒衣
一鉢香羹野蕨肥
春雨春煙二三子
水西原上種松歸

道人肩水灌畦蔬
托鉢船歸粟有餘
飽飯禪和無一事
繞池分食餒遊魚

斜梅勢壓石闌干
花似垂頭照影看
白晝雲陰天欲雪
半池星斗逼人寒

雪淡三尺閉柴荆
歲晚無心打葛藤
立雪堂前人不見
秀雲峰似白頭僧

孫氏蕙蘭

蕙蘭名淑新喻傳若金汝礪之妻也其先汴人年二十
三歸汝礪于湘中五月而卒汝礪序其遺槁曰故妻孫
氏蕙蘭早失母父周卿先生以孝經女誡教之詩固木
之學也因其弟受唐詩家法取而讀之得其音格輒能
爲近體五七言語皆閒雅可誦非苟學所能至者然不
多爲又恒毀其槁家人或竊收之則曰偶適情耳女子
當治織紉組紃以致其孝敬辭翰非所事也旣卒家人
哭而稱之因出其槁得若干首特爲編集成帙序而藏
之題曰綠窻遺槁其未成章者云露下庭梧葉風吹月
桂花登樓聞過鴈開戶見棲鷗繡簾當雪卷銀燭背風
然雪晴山顯翠風暖水生紋萱艸當階綠櫻桃落地紅
芍藥開時病荼蘼落處愁玉釵簪末利羅扇繡芙蓉

前垂柳分春色鏡裏幽蘭對曉妝花間影過那知燕柳
外聲來不見鶯慈親教婢回金剪驕妹嗔人奪繡鍼妝
成寶鏡楊花過行出珠簾燕子歸自傾甌裏春泉水親
灑階前石竹花海棠帶雨臙脂重楊柳凝煙翡翠濃殘
膏賸馥猶有餘妍汝礪溪惜其才每見於悼亡諸作纏
綿悽惻有足悲者故爲表而出之以傳於世

綠窻詩十八首

窻裏人初起窻前柳正嬌捲簾衝落絮開鏡見垂條坐對分
金線行防拂翠翹流鶯空巧語倦聽不須調

小閣烹香茗疏簾下玉鉤燈光翻出鼎釵影倒沈甌婢捧消
春困親嘗散莫愁吟詩因坐久月轉晚妝樓

燈前催曉妝把酒向高堂但願梅花月年年映壽觴
采閣閉朝寒妝成擬問安忽聞春雪下喚婢卷簾看

粲粲梅花樹盈盈似玉人甘心對冰雪不愛豔陽春

小小春羅扇團團秋月生蟠桃花樹裏繡得董雙成

自拂雙眉黛何曾慣得愁若教如翠桺便恐不禁秋

樓前楊桺發青枝樓下春寒病起時獨坐小窻無氣力隔簾

風亂海棠絲

汝礪追和云小窻開盡碧桃枝憶得青鸞化
去時昨夜秋風妒幽怨夢中吹

綠窻寂莫掩殘春繡得羅衣懶上身昨日翠帷新病起滿簾

飛絮正愁人

追和云江上愁時復值春帶圍寬盡不
身階前舊種櫻桃樹日莫飛花故著人

小妹方纔習孝經可憐嬌怯性偏靈自尋女誠窻前讀嗔道

家人不與聽

幾點梅花發小盆冰肌玉骨伴黃昏隔窻久坐憐清影閑劃

金釵記月痕

繡被寒多未欲眠梨花枝上聽春鶉明朝又是清明節愁見

人家買紙錢

春雨隨風溼粉牆
園花滴滴斷人腸
愁紅怨白知多少
流過長溝水亦香

春風昨夜碧桃開
正想瑤池月滿臺
欲折一枝寄王母
青鸞飛去幾時來

空階日晚雨纔乾
小婢相隨倚畫闌
金釵誤挂緋桃落
羅袖愁依翠竹寒

小窻今夕繡鍼閑
坐對銀蟬整翠鬟
凡世何曾到天上
月宮依舊似人間

乞巧樓前雨乍晴
彎彎新月伴雙星
鄰家小女都相學
鬪取金盆看五生

庭院深深早閉門
停鍼無語對黃昏
碧紗窻外初生月
照見梅花欲斷魂

貞懿鄭氏允端

允端字正淑姓鄭氏宋丞相清之五世孫女也其大父通判吳郡徙居焉饒于貲有半州之目世稱花橋鄭家允端姿稟秀慧尤善詩歌歸于同郡施伯仁儒雅士也相敬待如賓客至正丙申張士誠入平江家爲兵所破鬱鬱致病而卒年僅三十窆于城東之南岡宗族之士相謂曰鄭氏有容有言有學有識行乎中閨可象可則貞以厲己懿以成德有合諡典宜諡曰貞懿所著有肅雖集其自題曰嘗怪近世婦人女子作詩無感發懲創之義率皆嘲咏風月纖豔委靡流連光景而已余故剗除舊習脫棄凡近作爲歌詩緘諸篋笥以俟宗工斤正今抱病彌年垂亡有日思湮沒而無聞用寫別楮藏于家塾以示子孫伯仁哀之爲詮次成帙一時名輩如錢

塘錢惟善青城杜寅爲之前後序云

吳人嫁女辭

余見尋常百姓家多以女嫁達官貴人雖夸耀于一時而終不得偕老故作是詩以警之時至正丙申歲也

種花莫種官路傍嫁女莫嫁諸侯王種花官路人取將嫁女
王侯不久長花落色衰情變更離鸞破鏡終分張不如嫁與
田舍郎白首相看不下堂

擬寄衣曲

男兒遠向交河道鐵馬金戈事征討邊頭八月霜風寒欲寄
戎衣須趁早急杵清砧擣夜深玉纖銅斗熨帖平裁縫製就
衣襖羣千針萬線始得成封裏重重寄邊使爲語夫君奮忠
義好將功業立邊陲要使聲名垂史記

秋夜三五七言

風乍起月初陰樹頭梧葉響階下草蟲吟何處高樓吹短笛
誰家急杵擣清砧

讀西漢書

予聞太倉公逮繫長安獄生女不生男緩急無以囑少女痛
所言上書訟父辱死者不復生刑者不可屬妾身沒入官父
罪或見贖明明聖文王哀憐脫戕毒再使父子親骨肉重相
續此事諒甚高足以振頽俗好事東觀臣大書耀史錄臨卷
三歎之清風滿林麓

題耕牧圖

幽人薄世味耕牧山之陰自抱邨野姿常懷畎畝心行行南
山歌落落梁甫吟挂書牛上角揮鉏瓦中金飽飯黃昏後力
田春雲淡四體勤樹藝三生悟浮沈巢父世高尚德公人所
欽伊人去已遠高風邈難尋撫卷空歎息俯仰成古今

望夫石

良人有行役遠在天一方自期三年歸一去凡幾霜登山凌

絕巘引領望歸航歸航望不及躑躅空徬徨化作山頭石兀
立倚穹蒼至今心不轉日夜遙相望石堅有時爛海枯成田
桑石爛與海枯行人歸故鄉

詠鏡

皎皎奩中鏡相隨越歲年清光何所如明月懸中天我昔十
五餘顏色如花鮮對之理晨妝塗抹鬪嬋娟邇來年頗長貧
病相憂煎形容漸老醜無復施朱鉛今朝鏡亦昏塵垢蝕連
錢相看自黯淡焉能分媼妍人生有盛衰物情隨變遷世間
類如此何用增慨然

聽琴

夜溪衆籟寂天空缺月明幽人據槁梧逸響發清聲一彈再
三彈中含太古情坐深聽來久山水有餘清子期旣物化賞
心誰與并感慨意不已天地空崢嶸

效古

人生天地內，翕歛如轉蓬。
有材不早用，老去悲途窮。
甘羅豁達士，意氣自豪雄。
奉辭使列國，十二登上公。
早達勝晚遇，應鄙垂釣翁。

讀文山丹心集

藉甚文丞相，精忠古所難。
舍生歸北闕，效死只南冠。
血化三年碧，心存一寸丹。
偶攜詩卷在，把玩爲悲酸。

卧疾

秋來多病瘡，骨立瘦難支。
煩熱那能止，增寒柰爾爲。
脾神不自衛，江鬼故相欺。
伏枕南窗下，空吟老杜詩。

題畫

誰貌江南景，風煙萬里寬。
金銀開佛寺，紫翠出林巒。
遠客馳行役，幽人賦考槃。
蒼茫無限意，撫卷爲盤桓。

元言選
碧簫

王夫人
席上作

主人避暑開芳宴輕折荷盤當酒壘半朶斷雲擎翡翠一江
甘露瀉玫瑰胷中爽氣飄飄起鼻底清香拍拍回可笑狂生
楊鐵篴風流何用飲鞦韆杯

紅指甲

鳳花染就玉纖纖別是風流幾種看鸞鏡勻脂丹髓涇鵲鑪
添火綵雲寒封顙錦字春無限彈淚香閨血未乾報道金釵
斜插處落紅飛上髻雲端

中庭對月有感

中庭夜氣涼于水坐看青天轉玉盤萬里清光明海宇十年
殺氣暗長安閨人只憶丹心苦戰鬼偏憐白骨寒我欲排雲
叫閭闔瑤樓玉宇路漫漫

琵琶泉

井在吳
王故宮

吳王廢苑餘千載尚有寒泉一掬清巧匠鑿成推引手斷絃
牽出轆轤鳴涓涓多似江州淚軋軋疑如出塞聲一曲難前
亾國恨空畱宮井不勝情

高氏姊惠素羅

雪色香羅照眼明阿兄相贈見淡情明朝急爲裁春服相約
麻姑禮上清

水檻

近水人家小結廬軒窗瀟灑勝幽居凭闌忽聽鳴榔響知有
小船來賣漁

吐綬鳥

庭院春陰護薄寒山禽飛下玉闌干曾中錦繡無人識聞向
東風自吐看

徐熙杏花

寫生政自愛徐熙把卷摩挲眼欲迷曾記沈沈春雨後一枝
斜透粉牆西

四體美人四首

正面

似共春風別有緣美人初見下鞦韆花陰滿地日卓午芍藥
金盤五色鮮

背立

宮樣新妝賸寶衣背人鵲立好胷肢杜陵飢客長安道隔水
臨花乍見時

側身

半面紅裝似可人鳳環斜插寶釵新若教端正嬋娟面東里
西家總後塵

半截

若箇亭臺綠水邊
粉牆低處出嬋娟
分明識得東風面
不見羅裙血色鮮

念舊

憶昔娉婷十五餘
勻紅傅白鬪西施
如今老大慵妝洗
政是

梨花過

一作遇

雨時

梧桐

梧桐葉上秋先到
索索蕭蕭向樹鳴
爲報西風莫吹却
夜淡畱取聽秋聲

秋窻書懷

詩骨從來不受肥
那堪衰病弗勝衣
朝來試把羅裳繫
一作裙整瘦比今春又半圍

東坡赤壁圖

老瞞雄視欲吞吳
百萬樓船一炬枯
畱得清風明月在
網魚

謀酒付髯蘇

瘦馬

曾共元戎出塞垣生擒番將向烏桓如今老去誰終惠獨對
西風瘦骨寒

庭槐

風轉庭槐拂檻開綠陰如染淨無埃婦人不作功名夢閑看
南柯蟻往來

葡萄

滿筐圓實驪珠滑入口甘香冰玉寒若使文園知此味露華
應不乞金盤

鞵

輕輕小鞵製香羅三寸量來不較多針縷細勻裁製好鴉頭
休詫馬嵬坡

桃花

細雨春寒江上時
小桃欹樹出疎籬
從教一簇開無主
終不畱頭崔護詩

錢牧齋曰楊循吉吳中往哲女秀一人李氏其警句云云此詩載鄭氏肅離集中豈君謙偶失考耶抑別有李氏一集耶始兩存之以俟知者

桃源

秦季干戈起中原
幾變遷誰知避世者
自有一山川

毛女

我亦斯人徒偶然
櫻世網撫卷發深思
何當共長往

蘭

竝石疎花瘦臨風
細葉長靈均清夢
遠遺佩滿沅湘

筍

竹林春雨過瘦筍
迸苔長坐待成高
節清標出短牆

蓮

本無塵土氣自在
水雲鄉楚楚淨如
拭亭亭生妙香

梅

歲寒冰雪裏獨見一枝來不比凡桃李春風無數開

杜少陵春遊曲

何處尋芳策蹇驢典衣買酒出城西
玄都觀裏桃千樹黃四娘家花滿溪

春詞集句

春色沈沈鎖建章困人天氣日初長
閑來獨立雕簷下笑殺

雙飛燕子忙

武元衡

朱淑真

韓偓

王建

秋詞集句

月轉觚稜夜未央倚牀自炷水沈香
芙蓉小帳雲屏暗二十

五聲秋點長

張籍

虞伯生

劉長卿

李郢

安南國王陳益稷

益稷國王陳日暄之弟也其先閩人有陳日暄者爲交趾王李氏婿奪其國而有之元憲宗時嘗遣將兀良合台破其國都日暄傳國于其子光曷遣使納款世祖中統三年封光曷爲安南國王至元十四年光曷卒國人立其世子日烜徵之入朝不肯行會用兵占城諭日暄使助軍糧不從遂移兵伐之日暄拒戰敗走其弟昭國王益稷率妻子官吏以降二十三年封益稷爲安南國王命鎮南王脫驩及左丞相阿里海牙等引兵納之未克言者以爲非便遂止益稷從師還鄂州其後日烜遣使來貢二十七年卒子日燭立益稷竟久畱于鄂遙授湖廣行中書省平章政事武宗朝累進金紫光祿大夫儀同三司文宗天曆二年卒壽七十六謚曰忠懿王有

詩若干首傳世皆歸朝後所作安南古南交地自秦時
爲郡縣漢唐因之五代割據遂成異域元時兵力之強
盡有西南諸部而安南獨不入版圖選將用兵頻年暴
露而終莫得其要領然益稷以羈旅降王猶能以歌吟
與中朝文士相頡頏何地無才亦足以見元時詩學之
盛矣

大明殿侍宴

班陪玉筍侍紅雲日表熙熙瑞氣溫萬派朝宗滄海闊衆星
環拱紫宸尊雍容湛露歌詩什彷彿鈞天入夢魂孤孽秋毫
皆帝力願殫忠赤報深恩

送駕至上都過關口而回

控轡追隨寶馬羣古長城外送金根仙蹤縹緲鸞聲遠客路
崎嶇燕尾分喜見重瞳開日表何勞八翼夢天門梅岳有約

人知不幾處朱闌看白雲

駕畋桺林隨侍

仙仗平明擁翠華景陽鐘發海東霞千官捧日臨春殿萬騎
屯雲動曉沙白鷁韝翻山霧薄黃龍旗拂桺風斜太平氣象
同民樂南北梯航共一家

送元明善赴京

江流脈脈草離離黃鶴磯頭酒一卮報國寸一作忠心憐我老論

交一作文

半面識君遲正當重一作舉

鼎調梅日又是長亭折桺時滿

載詩書

一作收拾琴書

歸路穩鳳城依約更相期

送李龍川平章赴闕

雪滿長亭酒滿斟楚山千疊水千尋梅青半識平生面桐老
相知太古心雁影南樓孤月冷馬頭北闕五雲深二毛越叟
情無限獨向南窓袖手吟

挽上憐吉父河南王

哲人萎矣棟梁傾回首西風涕暗零三世功名今古史百年
過客短長亭手扶紅日名猶在身就黃梁夢不醒記取汾陽
舊勲業紫薇畱種繼芳馨

萬歲山侍宴

碧漢鳴鸞隔世塵玉京開宴會星辰舞迴鰲背三一作千山雪酒
上龍顏萬國春物被仁風榮御苑水涵一作流聖澤溢天津越南
羈旅陪賓列只尺光瞻日月新

駐馬渡頭

大別山頭漢口前吳王磯下沔城邊立殘秋水隔灘鷺噪落
夕陽何處蟬赤壁冷煙銷魏卒黃州淡月照坡仙英雄瀟灑
名俱在我愛狂吟不媿天

鄂館書懷

蕭然孤館起淒風半壁青燈照病容
滴碎秋心窗外雨敲殘曉夢枕邊鐘
衡陽鴈斷三千路巫峽猿啼十二峯
不盡關山回首處暮雲疊疊水重重

秋晚睡覺

海水盈盈漏轉籌霜風吹角出譙樓
夢殘淡月五更曉心遠孤雲萬里秋
玉帛幾年賓上國詩書半出老中州
平生事業渾如昨無奈青燈照白頭

謝青宮賜酒

黃封星使控麒麟騰踏高風拂路塵
仙醴釀成天上露宮壺分賜臘前春
恩沾南紀波濤闊氣轉東皇草木新
拜徹雍容歌既醉遙瞻鶴禁喜津津

色陵雨中

鴉平林鴈陣空黃花行李老秋風
如何一夜江南夢盡在

巴陵細雨中

上都回宿赤城站

塗山執玉會諸侯宴罷回程宿嶺頭白海雨來雲漠漠赤城
秋入夜颼颼皇圖萬里乾坤闊客路幾年身世浮驛吏驚呼
詩夢破一聲雞昌隔雲州

